



Ulloq: 5. februar 2024
Allaffik: Nordatlantkontoret
Sulia.sul: Ketilbjørn Hertz
Suliap normua: 2023-490-
0399
Takussutissiaq: 2808209

Uunga Siunnersuut

Kalaallit Nunaanni eqqartuussisarnermik inatsisip aamma pisortat ingerlatsinerat pillugu inatsisip allanngortinneqarneri pillugit inatsit (Allagaatinik takunnissinnaatitaaneq, pinerluttulereq pillugu inatsiseqartitsineranut atatillugu eqqartuunneqarnissamut imaluunniit pillagassanngortitsinissamut suliassanngortitsineranut atatillugu politiinit, unnerluussisussaataasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat, ilisimannittut kinaassusaasa isertuunneqarnerat aamma digitaliusumik nalunaarutiginninneq aamma piuminarsakkamik digitaliusumik nalunaarutiginninneq)

§ 1

Inatsimmik allanngorneri ilanngullugit nalunaarutiginninneq nr. 1186, 18. september 2023-imeersoq malillugu, Kalaallit Nunaanni eqqartuussisarnermik inatsimmi allannguutit tulliuttut suliarineqassapput:

1. § 50-imi imm. 2-p kingorna immikkoortutut nutaatut ilanngunneqassapput:

»Imm. 3. Pinerluttulerinermik suliami, unnerluussummut tunngassutilik pissut pillugu atortussat, politiit noqqaavigineqarnertik malillugu eqqartuussivimmuut saqqummiussimasaat, illersuisup allagaatinik takunnissinnaatitaaneranut ilatinneqannginnissaat pillugit pineqartoq § 341, imm. 2 malillugu aalajangiisimappat, pingaarnertut isumaqatigiinniarnermi kinaagaluartorluunniit eqqartuussisutut peqataasinnaangilaq.

Imm. 4. Pinerluttulerinermik suliami, unnerluussummut tunngassutilik pissut pillugu atortussat ilanngunneqannginnissaat pillugit pineqartoq § 339 c malillugu imaluunniit allatut aalajangiisimappat, tassani paasissutissanik § 339 c malillugu illersuisup pasineqartullu allagaatinik takunnissinnaatitaanerannit ilanngunneqanngitsunik paasissutissanik saqqummiussisoqarsimalluni, pingaarnertut isumaqatigiinniarnermi kinaagaluartorluunniit eqqartuussisutut peqataasinnaangilaq. Tamannali atuutissanngilaq atortussat

ilanngunneqannginnissaat illersuisup unnerluussaasullu allagaatinik takunnissinnaatitaanerit pingaarnertut isumaqatigiinniarnep siorna atorunnaarsimappat.

Imm. 5. Pinerluttulerinermik suliami pingaarnertut isumaqatigiinniarnep nalaani, aalajangiinerit imm. 3-mi aamma 4-imi taaneqartut, eqqartuussisumit, pingaarnertut isumaqatigiinniarnermi peqataanngitsumit, aalajangiiffigineqassapput.«

Imm. 3 tamatuma kingorna imm. 6-inngusaaq.

2. § 61 f, imm. 2-mi oqaaseqatigiinni siullerni, »pisortat ingerlatsinerat pillugu inatsit aamma paasitinneqarsinnaatitaaneq pillugu inatsit malillugit« peerneqassaaq.

3. §§ 101 aamma 102 atorunnaarsinneqassapput, taarsiullugulu ilanngunneqassaaq:

»Kapitali 7 a

Allagaatinik takunnissinnaatitaaneq

§ 101. §§ 101 a-mi, 101 b-mi aamma 101 d-mi malittarisassat malillugit eqqartuussutini aalajangiinernilu kinaluunniit allagaatinik takunnissinnaatitaavoq.

Imm. 2. Inuk, akuusimanani suliami immikkut ittumik soqutigisaqartoq, aammattaaq §§ 101 c-mi aamma 101 d-mi malittarisassat malillugit allagaatinik takunnissinnaatitaavoq.

Imm. 3. Tusagassiutit tusagassiuarnermi akisussaassuseqarneq pillugu inatsisartut inatsisaanni ilaatinneqartut aammattaaq § 101 e-mi malittarisassat malillugit allagaatinik takunnissinnaatitaapput.

Imm. 4. Inuit sakkutuujunggitsut pillugit suliani akuusut allagaatinik takunnissinnaatitaanerit pillugu § 102 malittarisassanik imaqarpoq.

Imm. 5. §§ 339 a-miit 339 c ilanngullugu pasineqartup pinerluttulerinermik suliami ingerlasumi allagaatinik takunnissinnaatitaanera pillugu malittarisassanik imaqarput. Pinerluttulerinermik suliani naammassineqareersuni pasineqartup allagaatinik takunnissinnaatitaanera pillugu malittarisassanik § 102 a imaqarpoq.

§ 101 a. Eqqartuussutip nalunaarutigineqarnerata kingorna sapaatip akunnera 1 qaangiutsinnagu tamanna pillugu noqqaasoqarpat, kialluunniit eqqartuussutip inerniliussaata atuarnissaa piumasaqaatigisinnaavaa.

§ 101 b. Eqqartuussutit aalajangiinerillu, inatsit malillugu tunngavilersorneqartussat, assilineqarnerisa tunniunneqarnissat kialluunniit piumasarisinnaavaa.

Imm. 2. Allagaatinik takunnissinnaatitaanermi ilaatinneqanngillat

- 1) kapitali 25-imiit 29 ilanngullugu aamma § 631-imi suliat pineqartut,
- 2) allagaatinik takunnissinnaatitaaneq ilisimatusarnermi ilisimatusarnermut atugassaattut imaluunniit tusagassiutini tusagassiornermut tunngatillugu imaluunniit aqqissuisut suliaannut atugassatut, aqqissuisumit aamma sulisunit aqqissuisuneersunit

qinnutigineqanngippat, pinerluttulerinermik suliat, ukioq 1 sinnerlugu inaarutaasumik naammassineqarsimasut,

- 3) tusagassiutini tusagassiornermut tunngatillugu imaluunniit aqqissuisut suliaannut atugassatut, inunnit § 145, imm. 1-imi, 2-mi imaluunniit 4-imi ilaatinneqartunit allagaatinik takunnissinnaatitaaneq qinnutigineqartinnagu, pinerluttulerinermik suliani sulii inaarutaasumik naammassineqanngitsuni aalajangiussat,
- 4) inimi eqqartuussiviusumi eqqissisimanissaq torersuunissarlu taamaallaat soqutigalugit matut matuneqarsimatinnagit, nassuiaatit eqqartuussinermi matoqqasumi tunniunneqarsimasut, imaluunniit
- 5) nassuiaatit, imaqarniliortoqarnissaanik inerteqquteqarnermut ilaatinneqartut.

Imm. 3. Pisuni tulliuuttuni allagaatinik takunnissinnaatitaaneq killilerneqarsinnaavoq,

- 1) naalagaaffiup isumannaatsuunissaanut imaluunniit naalagaaffiit takornartat pillugit imaluunniit inuiaat akornanni sullissiviit pillugit qajassuussinissat pingaarutillit illersorneqarnissaanut tamanna pisariaqartinneqarpat,
- 2) pitsaaliuineq, inatsisit unioqqutinneqarneranni paasinarsisitsinissamut aamma eqqartuussiniarluni imaluunniit pillagassanngortitsiniarluni suliaqarneq eqqarsaatigalugit pissutsit immikkut illuinnartut pissutigalugit tamanna pisariaqartissappassuk imaluunniit
- 3) inuit ataasiakkaat allanit sunissaqaratik pissuserisaat pillugit imaluunniit suliffeqarfiit inuussutissarsiornermini isertugaataat pillugit paasisutissanik eqqartuussut imaluunniit aalajangiineq imaqarpat aamma pisortat eqqartuussivimmi suliassanik paasisimasaqassusaat pineqartunut pingaarutilimmik qajassuussinissamut, § 101 d, imm. 4 malillugu kinaassutsip isertuunneqarnerani isumagineqarsinnaanngitsunut naleqqiullugu tunulliunneqartariaqarpat.

§ 101 c. Inuup, inatsit malittarisarluunniit pillugu apeqqummut aalajangersimasumut immikkut pingaarutilimmik soqutigisaqartup, inuit sakkutuujunngitsut pillugit suliat imaluunniit pinerluttulerinermik suliat pillugit takussutissianik, tamanna inatsit malittarisarluunniit pillugu apeqqutip nalilerneqarnissaanut takussutissiat pingaaruteqarpata, matumani eqqartuussisut allattaaviannut allanneqarsimasut ilanngullugit, ilisimatinneqarnissaq piumasqaatigisinnaavaa, takuulli imm. 2 aamma 3. Pinerluttulerinermik suliani eqqunngitsuliorfigineqartumut, imaluunniit eqqunngitsuliorfigineqartoq toqusimappat, eqqunngitsuliorfigineqarsimasup qanigisaanut tamanna aamma atuuppoq. Pinerluttulerinermik suliani, suliaq inaarutaasumik naammassineqarsimatillugu aatsaat allagaatinik takunnissinnaatitaaneq atuuppoq.

Imm. 2. Allagaatinik takunnissinnaatitaanermi takussutissiat suliffeqarfiup iluani suliarineqartut ilaatinneqanngillat. Takussutissiatut suliffeqarfiup iluani suliarineqartut tulliuuttut isigineqassapput

- 1) takussutissiat, suliap suliarineqarnerani eqqartuussivimmit, politiinit imaluunniit unnerluussisussaataasunit nammineq atugassatut suliarineqartut,

- 2) taasinermi allattaaviit aamma eqqartuussiviup siunersioqatigiinneranit imaqarniliat aamma taasinerit allat aamma
- 3) politiit unnerluussisussaataasullu iluanni immikkoortortaqrarfiit assigiinngitsut akornanni allaffigeqatigiinnerit.

Imm. 3. Pisuni tulliuttuni allagaatinik takunnissinnaatitaaneq killilerneqarsinnaavoq,

- 1) inatsimmi matumani immikkoortuni II-miit VI ilanngullugu malittarisassat malillugit akuusoq suliami paasissutissanik ilisimasaqarnissamik akornuserneqarsimappat,
- 2) nalaagaaffiup isumannaatsuunissaanut imaluunniit naalagaaffinnut takornartanut imaluunniit inuiaat akornanni sullissivinnut pillugit qajassuussinissanut pingaarutilinnut naleqqiullugu, suliami takussutissianik ilisimasaqarnissamut qinnuteqartup soqutiginninnera nammineq iluaqutissaminik isumagininnissaanut naleqqiullugu, tunullinneqartariaqarpat,
- 3) inuit ataasiakkaat allanit sunissaqaratik pissuserisaat pillugit imaluunniit suliffeqarfiit inuussutissarsiornerminni isertugaataat pillugit takussutissiaq paasissutissanik imaqarpat aamma, pineqartut pingaarutilimmik qajassunneqarnissaat pillugit § 101, imm. 4 malillugu kinaassutsip isertuunneqarneratigut isumagineqarsinnaanngitsunut, qinnuteqartup immineq iluaqutissami isumaginissaanut suliami takussutissianik ilisimasanik atuisinnaanerata tunullinneqartariaqarneratut isigineqartut, imaluunniit
- 4) pitsaaliuinermit, inatsisit unioqqutinneqarneranni paasinarsisitsinissamut aamma eqqartuussiniarluni imaluunniit pillagassanngortitsiniarluni suliaqarnermut tunngatillugu imaluunniit pasineqartup, ilisimannittup allalluunniit illersorneqarnissaannut immikkut ittumik qajassuussinissamut naleqqiullugu qinnuteqartup, immineq iluaqutissami isumaginissaanut pinerluttulerinermi suliami takussutissianik ilisimasami atornissaanut qajassuunneqartariaqarnera tunullinneqartariaqarpat.

Imm. 4. Oqartussaasup, allagaatinik takunnissinnaatitaaneq pillugu noqqaassuteqarnermik suliaqartup, allagaatinik takunnissinnaatitaaneq misissuinertut imaluunniit suliap assilillugu sanaqqinneqarnerata tunniunneqarneranik ilusilerluni tunniunneqassanersoq, aalajangissavaa, taamaattoq oqaaseqatigiit aappaat takukkit. Qajassuussassat imm. 3, nr. 2-mi imaluunniit 3-mi taaneqartut tamanna akerlilinngippassuk, noqqaassuteqarnerup kingorna inuit sakkutuujunngitsut pillugit suliani allakkatigut takussutissiat assilillugit sanaqqinneqarneri tunniunneqassapput.

§ 101 d. §§ 101 a-miit 101 c ilanngullugu malillugit allagaatinik takunnissinnaanermik noqqaassuteqarnermi, takussutissiaq imaluunniit suliaq pineqartoq pillugu pineqartup ilisimasaqalernissaminik kissaatigisaa taaneqassaaq. Noqqaassuteqarneq naleqquttumik tunngavilersorneqarsimanngippat, matumani ilisimatusarnermi ilisimatusarnermut atugassaattut imaluunniit tusagassiuutini tusagassiornermut tunngatillugu imaluunniit aaqqissuisut suliaannut atugassatut, aaqqissuisumit aamma sulisunit aaqqissuisuneersunit allagaatinik takunnissinnaanerup qinnutigineqarnera ilanngullugit, suliani amerlasuuni allagaatinik takunnissinnaanermik noqqaassuteqarneq itigartinneqarsinnaavoq.

Imm. 2. §§ 101 aamma 101 b malillugit allagaatinik takunnissinnaatitaanermik noqqaassuteqarneq aamma § 101 c malillugu inuit sakkutuujungitsut pillugit suliani allagaatinik takunnissinnaatitaanermik noqqaassuteqarneq eqqartuussivimmut noqqaassutigineqassaaq. Eqqartuussiviup aalajangenera, noqqaassuteqarneq malillugu tunngavilersorneqartussaq, §§ 517-imiit 527 ilanngullugu malillugit aalangiisussamut qulliunerusumut aalajangeqqitassanngortinneqarsinnaavoq. § 101 c malillugu pinerluttulerinermik suliani allagaatinik takunnissinnaatitaaneq pillugu noqqaassuteqarneq politidirektørimut noqqaassutigineqassaaq. Politidirektørip aalangiinera malittarisassat, § 61 e, imm. 2, aamma § 61 f, imm. 1 malillugit, § 61 f, imm. 2-mi malittarisassat malillugit unnerluussisussaataasut qullersaannut aalajangeqqitassanngortinneqarsinnaavoq.

Imm. 3. Allagaatinik takunnissinnaatitaanermik noqqaassut akuerineqarsinnaanersoq eqqartuussiviup imaluunniit polidirektørip piaarnerpaamik aalajangissavaa. Noqqaassuteqarneq eqqartuussivimmit imaluunniit politidirektørimit tiguneqarnerata kingorna ullut 10 qaangiunneranni akuerineqanngippat imaluunniit itigartinneqarpat, tassunga pissutaasoq pillugu qinnuteqartoq nalunaarfigineqassaaq kiisalu, qaqugukkut aalajangiinerup pinissaa pillugu nalunaarfigineqassalluni.

Imm. 4. Inuit ataasiakkaat allanit sunissaqaratik pissuserisaat pillugit imaluunniit suliffeqarfiit inuussutissarsiornermi isertugaataat pillugit paasissutissanik takussutissiaq imaqarpat, oqartussaasoq allagaatinik takunnissinnaatitaanermik noqqaassuteqarnermik suliaqartoq, misissuilinnginnermi imaluunniit assilillugu sanaqqiinnginnermi kinaassutsit takussutissiamiittut ilisarnarunnaarsinneqarnissaannik aalangiisinnaavoq, taamaalilluni pineqartut kinaassusaat takuneqarsinnaajunnaarsinneqassallutik. Pinerluttulerinermik suliani, misissuilinnginneq imaluunniit assilillugu sanaqqiinnginnermi kinaassutsit takussutissiamiittut ilisarnarunnaarsinneqassapput, taamaalilluni eqqartuussisooqataasut kinaassusaat takuneqarsinnaajunnaarsinneqassallutik. Kinguaassiuutitigut pinerluuteqarneq pillugu pinerluttulerinermi inatsimmi malittarisassat unioqquatinneqarneri pillugit suliani, misissuilinnginnermi imaluunniit assilillugu sanaqqiinnginnermi kinaassutsit takussutissiamiittut ilisarnarunnaarsinneqassapput, taamaalilluni eqqunngitsuliorfigineqartup kinaassusaa takuneqarsinnaajunnaarsinneqassalluni.

Imm. 5. Inuup normua allagaatinik takunnissinnaatitaanermi ilaatinneqanngilaq.

§ 101 e. Sapaatit akunnerini 4-ni kingullerni eqqartuussutit eqqartuussutigineqarsimasut, noqqaasoqarneratigut, inunnut, § 145, imm. 1-imi, 2-mi imaluunniit 4-imi ilaatinneqartunut, eqqartuussivik misissuisitsisinnaavoq. § 101 b, imm. 2, nr. 1-imut aamma 4-imut, aamma imm. 3-mut, kiisalu § 101 d, imm. 2-mi oqaaseqatigiit aappaannut, aamma imm. 4-imut aamma 5-imut, tamanna taamatutaaq atuuppoq.

Imm. 2. Noqqaasoqarneratigut allakkap unnerluussutaasup imaluunniit eqqartuussinissamik piumasaaqatip assilillugu suliarineqarnera unnerluussisussaataasut inunnut imm. 1-imi taaneqartunut tunniutissavaat. § 101 b, imm. 3, nr. 1-imut, aamma § 101 d, imm. 5-imut, tamanna taamatutaaq atuuppoq. Assilillugu sananeqannginnerani

kinaassutsit takussutissiamiittut ilisarnarunnaarsinneqassapput, taamaalilluni eqqunngitsuliorfigineqartup imaluunniit ilisimannittup kinaassusia takuneqarsinnaajunnaarsinneqassalluni. Allagaatinik takunnissinnaatitaaneq piffissami sorlermi atuutissanersoq pillugu Inatsiseqarnermut ministeri malittarisassanik aalajangersaassaaq.

Imm. 3. Takussutissiap pissusaa imaluunniit unnerluunneqartup, ilisimannittut imaluunniit allat illersorneqarnissaannut qajassuussassat taamaaliorqarnissaanut akerliliinngippata, § 449 a malillugu pingaarnertut isumaqatigiinniarnep nalaani imaluunniit eqqartuussinermi, pinerluffik pillugu ilanngussat ikiuutaasut aamma pinerluffiup sukkasuumik titartarneqarnera, unnerluussisussaataasunit aamma illersuisunit suliarineqarsimasut, noqqaasoqarnikkut inunnut imm. 1-imi taaneqartunut eqqartuussivik atukkiussissaaq. § 101 b, imm. 3, nr. 1-imut, aamma § 101 d, imm. 5-imut, tamanna taamatutaaq atuuppoq.

Imm. 4. Inuit sakkutuujunngitsut pillugit suliani, eqqartuussinerup nalaani akuusut akuersissuteqaqqaarnerisigut, inunnut imm. 1-imi taaneqartunut suliami takussutissiaq ataaseq arlallilluunniit atukkiunneqarsinnaapput.

Imm. 5. Eqartuussisut allattaaviini allanneqartut eqqartuussutaanngitsut aalajangiinerunngitsullu allat assilillugit suliarineqarneri, inatsit malillugu tunngavilersorneqartussat, kiisalu assilillugit allakkat § 310 c, imm. 3-mi taaneqartut assilillugit suliarineqarneri, inunnut imm. 1-imi taaneqartunut noqqaassuteqarnikkut eqqartuussiviup tunniutissavai. Eqqartuussineq tamakkiisumik imaluunniit ilaannakoortumik matut matullugit ingerlanneqarsimappat, matunik matusineq eqqissisimanissaq torersuunissarlu pillugit eqqarsaatiginninneq taamaallaat pissutigalugit pisimappat, tunniussineq taamaallaat pisinnaavoq. § 101 b, imm. 2, nr. 1-imut aamma 5-imut, aamma imm. 3-mut, kiisalu § 101 d, imm. 1-imi oqaaseqatigiinnut siullernut, imm. 2-mi oqaaseqatigiit aappaannut, aamma imm. 4-mut aamma 5-imut, tamanna taamatutaaq atuuppoq.

Imm. 6. Takussutissiat assilillugillu sanaqqitat, imm. 1-imiit 5 ilanngullugu malillugit takuneqarsinnaatilaalersut, tusagassiuutini tusagassioruinit aamma aqqissuinermik suliaqartuinit allaanerusunit tikinneqarsinnaassanngillat aamma tusagassiuutini tusagassiornermut tunngatillugu sulianut aamma aqqissuisut suliaannut taamaallaat tapersersuutaassallutik. Pinerluttulerinermik suliani aalajangiinerit pillugit assilillugit sanaqqitat, § 101 b malillugu inunnut imm. 1-imi taaneqartunut tunniunneqartut, suliap inaarutaasumik naammassineqarnissaata tungaanut tusagassiuutini tusagassioruinit aamma aqqissuinermik suliaqartuinit allaanerusunit tikinneqarsinnaassanngillat aamma tusagassiuutini tusagassiornermut tunngatillugu sulianut aamma aqqissuisut suliaannut taamaallaat tapersersuutaassallutik. Takussutissiat imm. 3-mi aamma 4-imi taaneqartut, kingusinnerpaamik eqqartuussineq naammassineqarpat utertillugit tunniunneqassapput.

Imm. 7. Tusagassiuutit assilillugit sanaqqitanik toqqortuisarnissaat pillugit Inatsiseqarnermut ministeri malittarisassanik aalajangersaassaaq.

Imm. 8. Imm. 6-imi oqaaseqatigiit siullernik, oqaaseqatigiit aappaannik aamma oqaaseqatigiit sisamaannik unioqqutitsinermi akiliisitaasussanngortitsisoqarsinnaavoq. Najoqqutassani, imm. 7-imi, oqaaseqatigiit pingajuat malillugu aalajangersarneqartuni, najoqqutassani aalajangersakkanik unioqqutitsinernut akiliisitaasussanngortitsisisoqarsinnaasoq aalajangerneqarsinnaavoq.

Imm. 9. Pinerluttulerinermi inatsimmi kapitali 5-imi malittarisassat malillugit ingerlatseqatigiiffiit il.il. (inatsisitigut pisinnaatitaasunut pisussaataitaasunullu) pinerluttulerineq pillugu inatsiseqartitsinermi akisussaatinneqarsinnaapput.

§ 101 f. Nipangiussisussaataaneq il.il. pillugit malittarisassat allakkut tamanna malitsiginngippassuk, §§ 101- a-miit 101 e ilanngullugu aalajangerneqartunit annertunerusumik allagaatinik takunnissinnaaneq tunniunneqarsinnaavoq.

Imm. 2. Inuk eqqartuussivit pisortanilu ingerlatsiviit avataaniittoq, paasissutissat allanut oqaatigeqqusaanngitsut, eqqartuussiviup pineqartunut taama pisussaataitaanngikkaluarluni ingerlateqqitai pillugit, nipangiussisussaataitaasoq eqqartuussiviup aalajangersinnaavaa. Nipangiussisussaataaeramik taamaattumik peqqussummik unioqqutitsinernut pinerluttulerinermi inatsimmi §§ 50 aamma 52-imiit 54 ilanngullugu taamatutaaq atuupput.

§ 102. Allatut aalajangiisoqarsimatinnagu, inuk sakkutuujunngitsoq pillugu suliami akuusup, takussutissiat suliamut tunngassuteqartut assilillugit suliarineqarnerisa tunniunneqarnissat piumasaqaatigisinnaavaa, matumani eqqartuussisut allattaaviini allanneqartut ilanngullugit.

Imm. 2. Allagaatinik takunnissinnaatitaanermik pisinnaatitaaffimmi takussutissiat suliffeqarfiup iluani suliarineqartut ilaatinneqanngillat. Takussutissiatut suliffeqarfiup iluani suliarineqartut tulliuuttut isigineqarput

- 1) takussutissiat, eqqartuussivimmit suliap suliarineqarnerani nammineq atugassatut suliarineqartut, aamma eqqartuussiviup siunersioqatigiinnerani imaqarniliat allat.
- 2) taasinermi allattaaviit aamma eqqartuussiviup siunersioqatigiinneranit imaqarniliat

Imm. 3. Eqqartuussivimmut suliamik suliarinnittumit suliarinnissimasumulluunniit allagaatinik takunnissinnaatitaanermik noqqaassuteqarneq tunniunneqassaaq. § 101 d, imm. 2-mi oqaaseqatigiit aappaannut, aamma imm. 3-mut tamanna taamatutaaq atuuppoq.

§ 102 a. Pinerluttulerineramik suliaq inaarutaasumik naammassippat, inuup pasineqarsimasup takussutissiat suliamut tunngassuteqartut, matumani eqqartuussisut allattaavianni allanneqarsimasut ilanngullugit, paragraffimi matumani malittarisassat malillugit takussutissiat taakku ilisimalernissat piumasarisinnaavaa, takuulli imm. 2, 3 aamma 6.

Imm. 2. Allagaatinik takunnissinnaatitaanermi takussutissiat suliffeqarfiup iluani suliarineqartut ilaatinneqanngillat. Takussutissiatut suliffeqarfiup iluani suliarineqartutut tulliuuttut isigineqassapput

- 1) takussutissiat, suliap suliarineqarnerani eqqartuussivimmit, politiinit imaluunniit unnerluussisussaataitaasunit nammineq atugassatut suliarineqartut,
- 2) taasinermi allattaaviit aamma eqqartuussiviup siunersioqatigiinneranit imaqarniliat aamma taasinerit allat aamma
- 3) politiit unnerluussisussaataitaasullu iluanni immikkoortortaqrarfiit assigiinngitsut akornanni allaffigeqatigiinnerit.

Imm. 3. Pisuni tulluuttuni allagaatinik takunnissinnaatitaaneq killilerneqarsinnaavoq,

- 1) inatsimmi matumani immikkoortuni II-miit VI ilanngullugu malittarisassat malillugit akuusoq suliami paasissutissanik ilisimasaqarnissamik akornuserneqarsimappat,
- 2) nalaagaaffiup isumannaatsuunissaanut imaluunniit naalagaaffinnut takornartanut aamma inuiaat akornanni sullissivinnut pillugit qajassuussassanut pingaarutilinnut naleqqiullugu, suliami takussutissianik ilisimasaqarnissamut qinnuteqartup soqutiginninnera immineq iluaqutissaminik isumaginninnissaanut naleqqiullugu, tunulliunneqartariaqarpat, imaluunniit
- 3) pitsaaliuinnermut, inatsisit unioqqutinneqarneranni paasinarsisitsinissamut aamma eqqartuussiniarluni imaluunniit pillagassanngortitsiniarluni suliaqarnermut tunngatillugu imaluunniit pasineqartup, ilisimannittup allalluunniit illersorneqarnissaannut immikkut ittumik qajassuussassanut naleqqiullugu qinnuteqartup, immineq iluaqutissami isumaginissaanut pinerluttulerinermi suliami takussutissianik ilisimasami atornissaanut soqutiginninnera tunulliunneqartariaqarpat.

Imm. 4. Allagaatinik takunnissinnaatitaaneq pillugu noqqaassut imm. 1 malillugu politidirektørimut tunniunneqassaaq. § 101 d, imm. 2-imi oqaaseqatigiit sisamaannut, aamma imm. 3-mut, tamanna taamatuttaaq atuuppoq.

Imm. 5. Allagaatinik takunnissinnaaneq imm. 1 malillugu misissuinerit imaluunniit assilillugu sanaqqitap tunniunneqarneratut ilusilerlugu tunniunneqassanersoq, politidirektørip aalajangissavaa.

Imm. 6. Inuup normua allagaatinik takunnissinnaatitaanermi ilaatinneqanngilaq.«

4. § 112, imm. 2, ima oqaasertalerneqassaaq:

»*Imm. 2.* Eqqartuussinerit, tassani eqqartuussut nalunaarutigineqarlutik, tamatigit tamanut ammapput.«

5. § 133, imm. 1, nr. 3 aamma 4, atorunnaarsinneqassapput, aamma taarsiullugit ilanngunneqassapput:

- »3) allakkatigut nalunaarutiginninneq,
- 4) oqarasuaatikkut nalunaarutiginninneq,
- 5) digitaliusumik nalunaarutiginninneq imaluunniit
- 6) piuminarsakkamik digitaliusumik nalunaarutiginninneq.«

6. § 133-imi imm. 5-ip kingorna immikkoortutut nutaatut ilanngunneqassapput:

»Imm. 6. Nalunaarutip nalunaarutikkut, digitaliusumik atsiernerup atorneqarneratigut digitaliusumik nassiunneqartukkut, pineqartup nalunaarummik tiguisimanerminik uppernaasaanissaanik noqqaassummik ilallugu nassiunneqarneratigut, imaluunniit inummit atsiorneqarsimasumik nalunaarutip assilillugu sanaqqinneqarneranik nassiussinikkut, digitaliusumik attaveqatigiinnikkut inummut tikinneqarsinnaasunnngortinneqarneratigut, digitaliusumik nalunaarutiginninneq pissaaq. Tamatuma kingorna tiguisup nalunaarummik tiguisimanerminik oqaatiginninnerani ullormi tassani nalunaarutiginninneq pisimasutut isigineqassaaq. Ulloq tiguisiffik oqaatigineqarsimanngippat, imaluunniit digitaliusumik uppernaasaatip nassiunneqarsimasup ullortut tiguisiffiatut taaneqartoq, imaluunniit utertillugu nassiussinermi allakkap naqitsisaa ullormit tiguisiffiusutut nalunaarsorneqarsimasumit kingusinneruppat, ullortut tiguisiffisimasutut nalunaarsorneqarsimasumi imaluunniit allakkap naqitsisaani ullormi taaneqarsimasumi, nalunaarutiginninneq pisimasutut isigineqassaaq.

Imm. 7. Nalunaarutip pineqartumut digitaliusumik allakkanut nakkartitsisarfimmi, pisortat isumannaatumik digitaliusumik attaveqatigiinnermut atortagaanni, tikinneqarsinnaasunnngortinneqarnerani piuminarsakkamik digitaliusumik nalunaarutiginninneq pissaaq. Oqariartuut taanna, tassunga nalunaarut ilanngunneqarsimalluni, imaluunniit ilanngussaq imaluunniit nalunaarut alla, oqariartuummut ilanngunneqarsimasoq, ammarneqarsimappat allatulluunniit suliarineqarsimappat, nalunaarut nalunaarutigineqarsimasutut isigineqassaaq. Ullormi tassani, ilanngussaq imaluunniit oqariartuut, tassunga nalunaarut ilanngunneqarsimalluni, ammarneqarpat imaluunniit allatut suliarineqarpat, nalunaarutiginninneq pisimasutut isigineqassaaq. Ullormi tassani, ilanngussaq imaluunniit oqariartuut, tassunga nalunaarut ilanngunneqarsimalluni, ammarneqarpat imaluunniit allatut suliarineqarpat, nalunaarutiginninneq pisimasutut isigineqassaaq.«

Tamatuma kingorna imm. 6 imm. 8-nngussaaq.

7. § 133, *imm. 6-imi*, imm. 8-nngortumi, »nr. 1-3-imi« ima allannngortinneqassaaq: »nr. 1-imiit 3 ilanngullugu, 5 aamma 6«.

8. § 134-*imi* »aamma oqarasuaatikkut nalunaarutiginninneq« ima allannngortinneqassaaq: »oqarasuaatikkut nalunaarutiginninneq aamma digitaliusumik nalunaarutiginninneq«.

9. § 142, *imm. 2-mi oqaaseqatigiit pingajuanni*, »naalagaaffinnut allanut attaveqarneranik« kingorna ilanngunneqassaaq: »imaluunniit inuup pingajuusup inuuneranut imaluunniit peqqissusaanut qajassuussassanik«.

10. § 147, *imm. 2-mi oqaaseqatigiit pingajuattut sisamaattullu ilanngunneqassapput*:

»Eqqartuussiviup inerteqquteqarneranik unioqqutitsinermi akiligassiisoqarsinnaavoq. Ingerlatseqatigiiffiit il.il (inatsisitigut pisinnaatitaasut pisussaatitaasullu) pinerluttulerinermi

inatsimmi kapitali 5-imi malittarisassat malillugit pinerluttulerineq pillugu inatsiseqartitsineq malillugu akisussaatinneqarsinnaapput.«

11. § 310 b-mi, imm. 1, nr. 4-imi, »§ 101« ima allanngortinneqassaaq: »§ 101 c«.

12. § 310 c, imm. 2-mi, aamma imm. 3-mi oqaaseqatigiinni siullerni, »§ 102« ima allanngortinneqassaaq: »§ 101 e«.

13. § 310 d-mi oqaaseqatigiit pingajuanni, »eqqartuussummi«-p kingorna ilanngunneqassaaq: », § 101 b malillugu,«, aamma », § 101« peerneqassaaq.

14. § 339-ip kingorna qulequttap kingorna § 340-llu siorngatigut ilanngunneqassapput:

»§ 339 a. Suliaq pillugu eqqartuussisut allattaavianni ilanngunneqarsimasut assilillugit sanaqqinneqarneri eqqartuussiviup illersuisumut nalunaarutigissavai. §§ 344 aamma 458 allatut malitseqartinnagit, assilillugit sanaqqitat pillugit illersuisup pasisaq ilisimatissinnaavaa. Assilillugit sanaqqitat inatsisinut akerliusumik atorneqarnissaat aarlerigineqarpat, assilillugit sanaqqitat pasineqartumut allanulluunniit tunniunneqannginnissaat eqqartuussiviup illersuisumut peqqussutigisinnaavaa.

Imm. 2. Unnerluutigineqartumut tunngasunik atortussat politiit suliamut atugassatut pissarsiarisimasaat, illersuisup ilisimasaqarfigilissallugit pissarsiarisinnaavai. Akornuteqanngitsumik taakku assilillugit sanaqqinneqarsinnaappata, atortussat assilillugit sanaqqinneqarneri illersuisumut tunniunneqassapput. Atortussat tiguneqartut politiinit akuersissummik peqqaarani illersuisup pasineqartumut allanulluunniit tunniutissanngilai. Tamanna nangaanartoqanngitsutut isigineqarpat, politiit akuersissuteqassapput. Atortussat, § 467, imm. 1-mi aamma imm. 2, nr. 5-imi ilaatinneqartut eqqarsaatigalugit, imm. 3-mi pissutsit taaneqartut tunngavigalugit taamaattoq akuersissuteqarnissaq itigartinneqarsinnaavoq.

Imm. 3. Naalagaaffiit takornartat, naalagaaffiup isumannaatsuunissaa, suliaq paasinarsitinneqarnissaa, inuk pingajuusoq, matumani ilisimannittup isumannaatsuunissaa, imaluunniit immikkut ittumik ingasassusilimmik inatsimmik unioqqutitsisimaneq pillugu suliaq alla ingerlasoq pillugu pinerluttoqarsimaneranik paasiniaaneq imaluunniit pinerluttulerinermi inatsimmi kapitali 7-imi imaluunniit 8-mik piaaraluni unioqqutitsinerit eqqarsaatigalugit tamanna pisariaqartinneqarpat, paasissutissat taakku, illersuisup politiinit tigusimasai pillugit illersuisup ingerlatitseqqinnginnissaa politiit peqqussutigisinnaavaat. Unnerluunneqartup pingaarnertut isumaqatigiinniarnermi nassuiaateqarnissaata tungaanut peqqussut sivitsorneqarsinnaavoq.

§ 339 b. §§ 344 aamma 458 allatut malitseqartinnagit, pasisaq illersuisoqanngitsaq noqqaassuteqarnikkut suliaq pillugu eqqartuussisut allattaavianni allanneqarsimasut pillugit

ilisimasaqalersinnaatitaassaaq. Assilillugit sanaqqitat inatsisinut akerliusumik atorpeqarnissaat aarlerigineqartinnagu, noqqaassuteqarnikkut assilillugit sanaqqitat politiit pasineqartumut tunniutissavaat.

Imm. 2. Pasisaq illersuisoqartinnagu, unnerluutigineqartumut tunngasunik atortussat politiit suliamut atugassatut pissarsiarisimasaat pillugit noqqaassuteqarnikkut pasineqartup atortussat ilisimasaqarfigilissallugit pissarsiarisinnaavai. § 339 a, imm. 3-mi pissutsit taaneqartut tunngavigalugit taamaattoq noqqaassuteqarneq politiit itigartitsissutigisinnaavaat. § 449 a-p malitsigisaanik suliap suliarineqarnissaa siunertaralugu, pasineqartup allagaatinik takunnissinnaatitaaneranut killiliineq kingusinnerpaamik pingaarnertut isumaqatigiinniarneq imaluunniit eqqartuussineq sioqqullugu atorunnaassaaq. Tamanna nangaanartoqanngitsutut isigineqarpat, noqqaassuteqarnikkut atortussat assilillugit sanaqqinneqarnerat pasineqartumut politiit tunniutissavaat. Atortussat § 467, imm. 1-imi aamma imm. 2, nr. 5-imi ilaatinneqartut tunniunneqarnissaat, § 339 a, imm. 3-mi pissutsit taaneqartut tunngavigalugit taamaattoq itigartitsissutigineqarsinnaavoq.

§ 339 c. §§ 339 a aamma 339 b malillugit illersuisup pasineqartullu allagaatinik takunnissinnaatitaanermik pisinnaatitaaffii pillugit malittarisaat avaqqunneqarnissaat politiit noqqaassuteqarnerisigut eqqartuussiviup aalajangersinnaavaa, tamanna tulliuttuni taaneqartut eqqarsaatigalugit pisariaqartinneqarpat

- 1) naalagaaffiit takornartat,
- 2) naalagaaffiup isumannaatsuunissaa,
- 3) suliap paasinarsitinneqarnissaa,
- 4) inuup pingajuusup inuunera peqqissusaanulluunniit,
- 5) immikkut ittumik ingasassuilimmik inatsimmik unioqqutitsisimaneq pillugu suliaq alla ingerlasoq pillugu pinerluttoqarsimaneranik paasiniaaneq imaluunniit pinerluttulerinermi inatsimmi kapitali 7-imik imaluunniit 8-mik piaaraluni unioqqutitsinerit imaluunniit
- 6) politiit pinerluttoqarsimaneranik paasiniaanerminni periaasii pillugit paasissutissat allanut oqaatigeqqusaanngitsut illersorneqarnerat.

Imm. 2. Pasisap illersorneqarnissaanut tamanna pingaaruteqartumik nangaanartoqartitsilerpat, imm. 1 malillugu aalajangiineq aalajangerneqarsinnaanngilaq.

Imm. 3. Atortussat ilaannaannut qajassuussassat imm. 1-imi taaneqartut taamaallaat atuuppata, illersuisoq pasineqartorluunniit atortussat ilaasa imaannik ilisimatinneqassaaq.

Imm. 4. Aalajangiineq aalajangernikkut tunngavilersugaasussakkut aalajangerneqassaaq. Aalajangernermit suliami pissutsit piviusut taaneqassapput, taakkulu §§ 339 a-mik aamma 339 b-mik avaqqutsineq tunngavilersussavaat. Avaqqutsinerup ingerlagallarnissaa pillugu eqqartuussivik aalajangiippat, pingaarnertut isumaqatigiinniarneq aallartitsinnagu eqqartuussiviup avaqqutsineq nutaamik nalilersuiffigissavaa. Avaqqutsineq piffissami erseqqinnerusumik aalajangersakkami atuutissasoq eqqartuussiviup aalajangerpagu,

kingusinnerusukkut aalajangernermi aalajangiineq sivitsorneqarsinnaavoq, sivitsuinerlu tunngavilersorneqassaaq. Eqqartuussiviup aalajangiinera aalajangeqqitassanngortinneqarsinnaavoq.

Imm. 5. Eqqartuussivik aalajangertinnagu, pasisamut immikkut ittumik illersuisunngortitsisoqassaaq, aamma illersuisoq immikkut ittoq taanna oqaaseqaateqarnissaminik periarfissinneqassaaq. Illersuisoq immikkut ittoq, imm. 6-imi taaneqartunit illersuisut arlallit akornannit illersuisunngortinneqassaaq. Eqqartuussiviup §§ 339 a-p aamma 339 b-p avaqqunneqarnissaat pillugu aalajangiinissap anguneqarnissaa siunertaralugu eqqartuussineri ingerlanneqartut pillugit illersuisoq immikkut ittoq kalerrinneqassaaq, aamma taakku isiginnaarnissaat kiisalu atortussat, unnerluussinermut tunngassuteqartut, suliamut atugassatut politiit pissarsiarisaat ilisimalissallugit pisussaaffigaa. § 392-imi, imm. 2-mi oqaaseqatigiit aappaannit tallimaat ilanngullugu, aamma imm. 3-mut, tamanna aamma atuuppoq. Unioqqutitsineq pinerluttulerinermi inatsimmi kapitali 7-imi 8-milluunniit unioqqutitsineq pillugu pinerluttoqarsimanermik paasiniaanermik tunngassuteqarpat, suliaq Nunatsinni Eqqartuussivimmit suliarineqassaaq.

Imm. 6. Illersuisut amerlasuut, imm. 5 malillugu illersuisunngortinneqarsinnaasut, Inatsiseqarnermut ministerip atorfinitsissavai.

Imm. 7. Illersuisut pineqartut pillugit malittarisassat erseqqinnerusut Inatsiseqarnermut ministerip aalajangersassavai, matumani pigaartunik aaqqissuussinerit, atorneqarsinnaasutut inissinneqarnermi akissarsiat ilanngullugit, aamma apeqqutit isumannaallisaanermut tunngasut pillugit.«

15. § 340, imm. 1, atorunnaarsinneqassaaq.

Tamatuma kingorna imm. 2-miit 4 ilanngullugu imm. 1-imiit 3 ilanngullugu immikkoortunngussapput.

16. § 340, imm. 4, imm. 3-nngortoq, ima oqaasertalerneqassaaq:

»*Imm. 3.* Imm. 2-mi malittarisassat, § 339 c-mi aalajangersagaq malillugu avaqqunneqarsinnaapput.«

17. § 341-imi imm. 2-ut ilanngunneqassaaq:

»*Imm. 2.* § 339 a, imm. 2-mi oqaaseqatigiit siulliit, imaluunniit § 339 b-mi, imm. 2-mi oqaaseqatigiit siulliit malillugit politiit aalajangiinerisa inatsisinik naapertuunnerat isumaqatigiinngissutaatillugu, aalajangiinermut aalajangerneqarsimasumut tunngaviusut politiit nalunaajaaffigissavaat. Atortussaq isumaqatigiinngissutaasoq saqqummiuteqqullugu eqqartuussiviup politiinut aammattaaq peqqussutigisinnaavaa.«

18. § 344, imm. 2-mi, »qularnaarnissaanut« kingorna ilanngunneqassaaq: »imaluunniit inummut pingajuusumut«.

19. § 344 imm. 5-itut ilanngunneqassaaq:

»Imm. 5. Eqqartuussinerni § 339 c malillugu ingerlanneqartuni, imaluunniit paasissutissat illersuisup allagaatinik takunnissinnaatitaanerani ilanngunneqanngitsut saqqummiunneqarneranni, aamma inummut akuliunnermut tunngasumut § 392 malillugu illersuisumik illersuisunngortitsinermi, eqqartuussinerni imm. 1-imiit 4 ilanngullugu atuutinnngillat.«

20. § 345-imi imm. 3-tut ilanngunneqassaaq:

»Imm. 3. Eqqartuussinerni § 339 c malillugu ingerlanneqartuni, imaluunniit paasissutissat illersuisup allagaatinik takunnissinnaatitaanerani ilanngunneqanngitsut saqqummiunneqarneranni, aamma inummut akuliunnermut tunngasumut § 392 malillugu illersuisumik illersuisunngortitsinermi, imm. 1 atuutinnngilaq.«

21. § 384, imm. 1, nr. 3-mi, § 385, imm. 1, nr. 3-mi, aamma § 386, nr. 3-mi, »inatsisinik unioqutitsinermut« kingorna ilanngunneqassaaq: », pinerluttulerinermi inatsimmi kapitali 7-imik 8-milluunniit piaaraluni unioqutitsinermut«.

22. § 387, nr. 2-mi, § 388, imm. 1, nr. 3-mi, aamma § 399, imm. 3, nr. 3-imi, »inatsimmik unioqutitsinermut« kingorna ilanngunneqassaaq: »imaluunniit pinerluttulerinermi inatsimmi kapitali 7-imik 8-milluunniit piaaraluni unioqutitsinermut«.

23. § 391, imm. 3-mi oqaaseqatigiit tallimaanni, »Inatsiseqarnermut ministereqarfik« ima allanngortinneqassaaq: »Rigsadvokati«.

24. § 391, imm. 3-mi oqaaseqatigiit arferngattut ilanngunneqassaaq:

»Akuliunnerit, eqqartuussiviup isumaa malillugu Politiets Efterretningstjeneste-mit suliarineqartussaasimannngikkaluit, Inatsiseqarnermut ministereqarfimmut nalunaarutigineqassapput.«

25. § 396, imm. 4-mi oqaaseqatigiinni siullerni, », imaluunniit« ima allanngortinneqassaaq: »imaluunniit, inatsimmik unioqutitsineq pillugu suliami allami ingerlasumi, inatsit malillugu inuup nakkutigineqarani inummut allamut nalunaaruteqarsinnaatitaanerata akuliuffigineqarnissaanut tunngaviliisumi, pinerluttoqarsimaneranik paasiniaanermut ajoqutaasinnaappat, imaluunniit politiit pinerluttoqarsimaneranik paasiniaanermi periaasii pillugit paasissutissat oqaatigeqqusaanngitsut illersorneqarnissaannik qajassuussinerup tamanna tunngavissaqartippagu imaluunniit pissutsit kalerriinissamut akerliuppata«,

26. § 399-imi imm. 4 immikkoortutut nutaatut ilanngunneqassapput:

»*Imm. 5.* Pinerluttoqarsimaneranik paasiniaanermut akuliunneq pingaaruteqartutut isumaqarfigineqarpat, aamma pinerluttoqarsimaneranik paasiniaaneq ingasattumik inatsimmik unioqquitsinermik tunngassuteqarpat, tulliuttuni taaneqartut pineqartillugit politiit oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarsinnaapput

- 1) attaveqatigiinnernut attaveqarfinnik imaluunniit nalunaarasuartaqatitigut kiffartussinernik tuniniaasunit, oqarasuaatip angalaattakkap, pasineqartumit atorneqartutut isigineqartup, sumiissusaa pillugu paasissutissanik pissarsineq, imaluunniit
- 2) gps imaluunniit sakkuut alla assingusoq atorlugu allatut tulliuttunik nalunaarsuineq
 - a) pasineqartup angallavigisai imaluunniit
 - b) pineqartoq pasineqartumut imaluunniit pasineqartutut assigisaatulluunniit aamma tassunga assartuummut illumulluunniit atassuteqarpat, inuup allap angallavigisaa.

Imm. 6. Attaveqatigiinnernut attaveqarfinnik imaluunniit nalunaarasuartaqatitigut kiffartuussinermik tuniniaasunit, oqarasuaatip angallattakkap ikumasup, politiit pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup naammassiniarneqarnerani ikiutissapput, matumani imm. 5, nr. 1-imi paasissutissanik tunniussinerit ilanngullugit.«

Imm. 5 aamma 6 matuma kingorna imm. 7 aamma 8-nngussapput.

27. § 399, *imm. 6-imi*, imm. 8-nngortumi *oqaaseqatigiit aappaattut* ilanngunneqassaaq:

»§§ 391-imi aamma 392-imi, § 396, imm. 1-imi, § 396, imm. 2, nr. 1-imi, § 396, imm. 3-mi aamma 4-imi, aamma § 398-imi malittarisassat, pisunut imm. 5-imi pineqartunut taamatuttaaq atuupput.«

28. § 400-p kingorna § 401 sioqqullugu qulequttat sioqqullugit ilanngunneqassaaq:

»*Internettikkut nittartakkanik matusineq*

§ 400 a. Internettikkut nittartakkamit pinerluttulerinerimi inatsimmi §§ 28-imiit 35 imaluunniit 37 ilanngullugu imaluunniit § 94, nr. 5-imi, imaluunniit §§ 95-imiit, 104 ilanngullugu, 105-imi, 108-imi, 111-imi imaluunniit 111 a-mi aalajangersakkanik unioqquitsisoqarnera tunngavissalimmik isumaqarfigineqarpat, internettikkut nittartagaq matuneqarsinnaavoq.

Imm. 2. Akuliunneq suliap pingaaruteqassusianut, akuliunnerullu kingunissaatut isumaqarfigineqartumik akornusiinermut naleqqiullugu naleqqutinngippat, matusineq suliarineqassanngilaq.

Imm. 3. Politiit noqqaassuteqarnerisa kingorna, internettikkut nittartakkap matuneqarnissaa pillugu eqqartuussivik aalajangiissaaq. Aalajangerneq aalajangiinikkut

aalajangerneqassaaq, taannalu tunngavilersorneqassaaq. Suliami pissutsit piviusut allanneqassapput, tassanilu akuliunnissamut piumasqaatit naammassineqarsimanerat taparserneqassaaq. Aalajangerneq qaqugukkulluunniit allangortinneqarsinnaavoq.

Imm. 4. Eqqartuussiviup aalajangiinissaa utaqqineqartariaqartillugu, pinerluttulerinermi inatsimmi § 94, nr. 5, imaluunniit §§ 104, 105, 108, 111 imaluunniit 111 a malillugit imm. 1 malillugu matusinermik siunertaq maangaannartinneqassappat, politiit matusinissaq pillugu aalajangiisnaapput. Taamaattoqarpat akuliunnerup aallartinneqarneranit piaarnerpaamik aamma nalunaaquttap akunneri 24-it qaangiutsinnagit, politiit suliaq eqqartuussivimmu saqqummiutissavaat. Akuliunnerup akuerineqarsinnaanera, aamma taanna atatiinnarneqassanersoq pillugu eqqartuussivik aalajangissaaq. Eqqartuussiviup aalajangernera tunngavilersorneqassaaq. Eqqartuussiviup isumaa malillugu akuliunneq suliarineqarsimasussaannikkaluarpat, eqqartuussiviup tamanna pillugu Rigsadvokati ilisimatissavaa. Akuliunnerit eqqartuussiviup isumaa malillugu Politiets Efterretningsstjeneste-imit suliarineqarsimasussaannikkaluit, Inatsiseqarnermut ministereqarfimmut nalunaarutigineqassapput.

Imm. 5. Attaveqatigiissutinik aamma kiffartuussissutinik elektroniskiusunik tuniniaasut aamma internettimi sullissivinni ingerlatsisut matusinerit naammassineqarnissaat pillugit politiinut ikiunnissartik pisussaaffigaat. Tuniniaasup ingerlatsisulluunniit inatsisinut naapertuuttumik tunngavissaqarani ikiuinissaq itigartippagu, § 150 taamatutaaq atuutissaaq.

Imm. 6. Akuliunnermi pineqartup tamanna pillugu noqqaassummik saqqummiussippat, politiit tuaviornerpaamik suliaq eqqartuussivimmu saqqummiutissavaat. Akuliunneq attatiinnarneqassanersoq eqqartuussiviup aalajangissavaa. Eqqartuussiviup aalajangernera tunngavilersorneqassaaq.

*Radiokkut aallakaatitsinernik- imaluunniit nalunaarasuartaatitigut atassuteqarnernik
akornusersuineq imaluunniit atassutaarutitsineq*

§ 400 b. Tamanna pingaarutilinnik pissutissaqarpat, sumiiffimmi pineqartumi immikkut ingasassusilimmik inatsimmik unioqqutitsisoqarnissanut imaluunniit inuit inuunerannik atugarissaarnerannilluunniit imaluunniit inuiaqatigiinni pingaaruteqartunut navianartorsiortitsisinnaasunik piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqqutitsisoqarnissanut, pitsaaliuineramik siunertaqarlutik politiit sumiiffimmi radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaapput imaluunniit atassutaarutitsisinnaapput.

Imm. 2. Akuliunnerup siunertaanut, suliap pingaaruteqassusianut aamma innarliineq taanna akorngullu, akuliunnerup inummut taassumunnga imaluunniit inunnut taakkununnga akuliunnerup eqqugaanut, naleqqutinnigitsumik akuliunnerussappat, akuliunneq imm. 1-imi taaneqartoq suliarineqassanngilaq.

Imm. 3. Imm. 1 malillugu akuliunneq, eqqartuussiviup aalajangiineratigut pissaaq, aalajangiinerlu tunngavilersorneqassaaq. Aalajangiinermi sumiiffik, akuliunnermut tunngasoq, aamma suliami pissutsit piviusut taaneqassapput, tassanilu akuliunnermut piumasaqaatit naammassineqarsimanerat taperserneqassaaq. Aalajangerneq qaqugukkulluunniit allanngortinneqarsinnaavoq. Piffissaq aalajangersimasoq akuliunnerup suliarineqarfissaa aammattaaq aalajangersarneqassaaq. Politiit noqqaassuteqarnerisigut piffissaq killilik pillugu eqqartuussiviup aalajangiinikkut sivitsorsinnaavaa, taannalu tunngavilersorneqassaaq.

Imm. 4. Eqqartuussiviup aalajangernissaata utaqqineqarnera pissutigalugu akuliunnermut siunertaq maangaannartinneqassappat, akuliunnerup suliarineqarnissaa pillugu politiit aalajangiisinnaapput. Taamaattoqarpit akuliunnerup aallartinneqarneranit piaarnerpaamik aamma kingusinnerpaamik nalunaaquttap akunnerisa 24-t qaangiutsinnagit politiit suliaq eqqartuussivimmut saqqummiutissavaat. Akuliunneq akuerineqarsinnaanersoq, aamma attatiinnarneqarsinnaanersoq, akuersissuteqartoqarpallu imm. 3-mi oqaaseqatigiit aappaat, sisamaat aamma tallimaat malillugu piffissami killilimmi sorlermi atuutissanersoq, eqqartuussiviup aalajangissavaa. Eqqartuussiviup aalajangernera tunngavilersorneqassaaq. Akuliunneq suliarineqartussaasimangikkaluortoq eqqartuussivik isumaqarpit, tamanna pillugu eqqartuussiviup Rigsadvokati ilisimatissavaa. Akuliunnerit, eqqartuussiviup isumaa malillugu Politiets Efterretningstjeneste-mit suliarineqartussaasimangikkaluit, Inatsiseqarnermut ministereqarfimmut nalunaarutigineqassapput.

Imm. 5. § 392-imi malittarisassat taamatuttaaq atuutissapput.

Tv-kkut nakkutiginninnermik tigusineq

§ 400 c. Tamanna pingaarutilinnik pissutissaqarpit, sumiiffimmi pineqartumi immikkut ingasassusilimmik inatsimmik unioqutitsisoqarnissanut imaluunniit inuit inuunerannik atugarissaarnerannilluunniit imaluunniit inuiaqatigiinni naleqartitanut pingaaruteqartunut navianartorsiortitsisinnaasunik piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqutitsisoqarnissanut pitsaaliuinnermik siunertaqarlutik, sumiiffimmi oqartussaasunit allanit imaluunniit inunnit ataasiakkaanit tv-kkut nakkutiginninneq politiit tigusinnaavaat. Taamaattoq inuit ataasiakkaat namminneq angerlarsimaffiini tv-kkut nakkutiginninnerannut tamanna atuutinngilaq.

Imm. 2. Akuliunnerup siunertaa malillugu, suliap pingaaruteqassusia aamma innarliineq akornusiinerlu, akuliunnerup inummut taassumunnga imaluunniit inunnut taakkununnga, akuliunnerup eqqugaanut, ajoqusiinera, akuliunnertut naleqqutinngitsutut isumaqarfigneqarpit, akuliunnerit imm. 1-imi taaneqartut suliarineqassanngillat.

Imm. 3. Imm. 1 malillugu akuliunneq eqqartuussiviup aalajangerneratigut pissaaq, taannalu tunngavilersorneqassaaq. Aalajangiinermi sumiiffik, akuliunnermut tunngasoq, aamma suliami pissutsit piviusut taaneqassapput, tassanilu akuliunnermut piumasaqaatit

naammassineqarsimanerat taperserseqassaaq. Aalajangerneq qaqugukkulluunniit allanngortinneqarsinnaavoq. Piffissaq aalajangersimasoq akuliunnerup suliarineqarfissaa aammattaq aalajangersarseqassaaq. Politiit noqqaassuteqarnerisigut piffissaq killilik pillugu eqqartuussiviup aalajangiinikkut sivitsorsinnaavaa, taannalu tunngavilersorneqassaaq.

Imm. 4. Eqqartuussiviup aalajangernissaata utaqqineqarnera pissutigalugu akuliunnermut siunertaq maangaannartinneqassappat, akuliunnerup suliarineqarnissaa pillugu politiit aalajangiisinnaapput. Taamaattoqarpat akuliunnerup aallartinneqarneranit piaarnerpaamik aamma kingusinnerpaamik nalunaaquttap akunnerisa 24-t qaangiutsinnagit politiit suliaq eqqartuussivimmut saqqummiutissavaat. Akuliunneq akuerineqarsinnaanersoq, aamma attatiinnarneqarsinnaanersoq, akuersissuteqartoqarpallu imm. 3-mi oqaaseqatigiit aappaat, sisamaat aamma tallimaat malillugu piffissami killilimmi sorlermi atuutissanersoq, eqqartuussiviup aalajangissavaa. Eqqartuussiviup aalajangerneq tunngavilersorneqassaaq. Akuliunneq suliarineqartussaasimannikkaluortoq eqqartuussivik isumaqarpat, tamanna pillugu eqqartuussiviup Rigsadvokati ilisimatissavaa. Akuliunnerit, eqqartuussiviup isumaa malillugu Politiets Efterretningstjeneste-mit suliarineqartussaasimannikkaluit, Inatsiseqarnermut ministereqarfimmut nalunaarutigineqassapput.

Imm. 5. Tv-kkut nakkutiginninnermik tigusinermi tv-kkut nakkutiginninnermik atuisinnaasut politiinik ikiuissallutik pisussaaffigaat. Inatsisinut naapertuuttumik tunngavissaqarani oqaaseqatigiit siulliit malillugit inunnt ikiuinissamik ilaginnaasut taamatutaaq § 150 atuuppoq.

Imm. 6. § 161 taamatutaaq atuuppoq. Inuussutissarsiutigalugu suliffeqarfimmut peqqussut nalunaarutigineqarpat, allanut, suliffeqarfimmut atassuteqarnertik pissutigalugu suliamut ilisimasaqalersimasunut, § 161 taamatutaaq atuuppoq.

Imm. 7. Politiit tv-kkut nakkutiginninneq pissaaneq atorlugu tigusinnaavaat, matumani ininut, tv-kkut nakkutiginninnermut tigusinissamat atorneqartussanut iserneq ilanngullugu.

Imm. 8. §§ 392-imi aamma 398-imi malittarisassat taamatutaaq atuupput.

Imm. 9. Pisup kingorna akuliunneq suliarineqarsimasoq pillugu nalunaarutiginninneq § 396, imm. 1, 3 aamma 4 malillugit pissaaq. Nalunaarutiginninneq inummut tv-kkut nakkutiginninnermut, tiguneqarsimasumut, atuisinnaasumut tunniunneqassaaq.«

29. § 420, imm. 3-mi oqaaseqatigiit pingajuanni, § 423, imm. 1-imi oqaaseqatigiit pingajuanni, aamma § 424-imi oqaaseqatigiinni siullerni aamma oqaaseqatigiit pingajuanni, »imm. 3« ima allanngortinneqassaaq: »imm. 4«.

30. § 420, imm. 3-mi oqaaseqatigiinni siullerni, aamma § 423, imm. 3-mi oqaaseqatigiit aappaanni, »imm. 5« ima allanngortinneqassaaq: »imm. 7«.

31. § 422-imi imm. 2-p kingorna immikkoortutut nutaatut ilanngunneqassaaq:

»Imm. 3. Aningaasanik peqquserluutunik malunnarunnaarsaasarneq pinerliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1-imi suliffeqarfinit inunnillu ilaatinneqartunit, pineqartut atorsinnaasaat pillugit paasissutissat pissarsiarineqarnissaannut, kontomi nuussinert pillugit, tassunga nuussinikkut aningaasaatinik, tunniussisussaataaneq pillugu aalajangiinermi ilaatinneqartunik nuussiffiusimasumi, imaluunniit nuussinermi, tunniussisussaataaneq pillugu aalajangiinermi ilaatinneqartumit nuussinermi aallaaveqartumit, politiit paasissutissanik pissarsisinnaanerit, politiit noqqaassuteqarnerisigut eqqartuussiviup tunniussisussaataaneq pillugu aalajangiinikkut aalajangersinnaavaa. Piffissami sorlermi paasissutissat pissarsiarineqarnissaat pisinnaanersoq, aalajangiinermi aalajangersarneqassaaq. Piffissaq taanna sapinngisamik sivikinnerpaatinneqassaaq aamma sapaatit akunneri 4 qaangissanngilaa. Politiit noqqaassuteqarnerisigut eqqartuussiviup piffissaq killilik sivitsorsinnaavaa, kisianni annerpaamik sapaatit akunneri 4-kkaarlugit sivitsueqqittoqarsinnaavoq. Sivitsuineq aalajangiinikkut pissaaq, taannalu tunngavilersorneqassaaq. Paasissutissanik pissarsinissap pisinnaaneranut piffissap killillip naanerata kingorna piaarnerpaamik, nuussinert pillugit politiit paasissutissanik pissarsiarisimasaat pillugit, eqqartuussivik nalunaaruteqarfiggissavaat. Tunniussisussaataaneq pillugu aalajangiinermi nuussinert ilaatinneqartunit nuussinert aallaaveqarsinnaanerannut isumaqarnermut pissutaasut aalajangersimasut taaneqarnerannik nalunaarutiginninneq imaqaassaaq.«

Imm. 3 aamma 4 tamatuma kingorna imm. 4 aamma 5-nngussapput.

32. § 422-imi imm. 4-p, imm. 5-inngortup, kingorna immikkoortutut nutaatut ilanngunneqassaaq:

»Imm. 6. Suliffeqarfiit inuilluunniit nuussineri, kontoi, nalilinnut boksii assigisaallu § 1, imm. 1, nr. 1-imiit 11 ilanngullugu imaluunniit 20-imiit 24 ilanngullugu, imaluunniit Aningaasanik peqquserluutunik malunnarunnaarsaasarneq pinerliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1, imm. 1-imi nr. 1-imi aamma 2-mi ilaatinneqartut pillugit paasissutissat pillugit, tunniussisussaataanerit peqqussutigineqarnissaat pillugit politiit aalajangiisinnaapput. Aningaasanik peqquserluutunik malunnarunnaarsaasarneq pinerliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1-imi suliffeqarfinit inunnillu ilaatinneqartunit, paasissutissanik, pineqartut taakku atorsinnaasaannik, kontomi nuussinert pillugit, tassunga nuussinikkut, tunniussisussaataaneq pillugu aalajangiinermi ilaatinneqartukkut, aningaasanik nuussinert pillugit, imaluunniit nuussinermi tunniussisussaataaneq pillugu aalajangiinermi ilaatinneqartumit nuussinermi aallaaveqartumit paasissutissanik pissarsisoqarsinnaasoq, politiit tunniussisussaataaneq pillugu peqqussut pillugu aalajangiinermi aalajangersinnaavaat. Imm. 4-imi oqaaseqatigiit aappaat taamatuttaaq atuuppoq.

Immikkoortoq manna malillugu politiit aalajangiineri allakkatigut aalajangiinerussapput aamma pissutsinik ilaqartinneqassallutik.«

Imm. 5-imiit 7 ilanngullugu tamatuma kingorna imm. 7-imiit 9-nngorput.

33. § 424-imi oqaaseqatigiit pingajuanni, »imm. 7« ima allanngortinneqassaaq: »imm. 9«.

34. § 444-imi imm. 2-tut ilanngunneqassaaq:

»Imm. 2. § 458, imm. 2 malillugu paasissutissat taakku unnerluunneqartumut tunniunneqannginnissaat unnerluussisussaataasut eqqartuussivimmit aalajangerneqaqqullugu noqqaassutigissamaarpasuk, ilisimannittup najugaa atialuunniit, atorfia najugaalu pillugit paasissutissat unnerluunneqartumut tunniutissanngikkai, unnerluussisussaataasut illersuisumut peqqussutigisinnaavaat. Illersuisup peqqussut eqqartuussivimmut saqqummiussinnaavaa.«

35. § 445-p kingorna paragraffi nutaaq ilanngunneqassaaq:

»§ 445 a. § 339, a, imm. 2-mi oqaaseqatigiit siulliit, imaluunniit § 339 b, imm. 2-mi oqaaseqatigiit siulliit malillugit inuup kinaassusaa suliame ilaanngippat, imaluunniit taanna illersuisup pasineqartullu § 339 c malillugu allagaatinik takunnissinnaanerani ilanngunneqanngippat, inuk ilisimannittutut aggersagaasinnaannngilaq.«

36. § 448, imm. 1, nr. 5-imi, »imm. 3, imaluunniit,« ima allanngortinneqassaaq: »imm. 3,«.

37. § 448, imm. 1, nr. 6-imi, »imm. 1.« ima allanngortinneqassaaq: »imm. 1 imaluunniit 4, imaluunniit«.

38. § 448, imm. 1-imi, nr. 7-itut ilanngunneqassaaq:

»7) § 458, imm. 2 malillugu ilisimannittup najugaa atialuunniit, atorfia aamma najugaa unnerluunneqartumut nalunaarutigineqarsinnaannngillat.«

39. § 458-imi imm. 1-p kingorna immikkoortut nutaat ilanngunneqassapput:

»Imm. 2. Tamanna unnerluunneqartup illersorneqarneranut pingaaruteqanngitsutut isumaqarfigineqarpat, eqqartuussiviup noqqaassuteqarnikkut aalajangersinnaavaa,

1) ilisimannittup isumannaatsuunissaanut pingaarutilimmik qajassuussinissap tamanna tunngavissaqartippagu, ilisimannittup najugaa unnerluunneqartumut ilisimatitsissutigineqassanngitsaq, imaluunniit

2) ilisimannittup isumannaatsuunissaanut pingaarutilimmik qajassuussinissap tamanna pisariaqartilerpagu, ilisimannittup atia, atorfia najugaalu unnerluunneqartumut ilisimatitsissutigineqassanngitsaq.

Imm. 3. Suliame pissutsit ataatsimut naliliiffigineqarnerisigut imm. 2 malillugu aalajangiineq aalajangerneqassaaq, matumani ilisimannittut siuliani unnerluunneqartumut

atassuteqarsimappata atassuteqarneq pillugu aamma suliap pissusia pillugu paasissutissat ilanngullugit.

Imm. 4. Imm. 2, nr. 2 malillugu aalajangiisoqarsimappat, ilisimannittup killisiorneqarnerata nalaani ini eqqartuussiviusoq unnerluunneqartup qimassagaa, eqqartuussiviup aammattaq aalajangersinnaavaa.

Imm. 5. Imm. 2 malillugu noqqaassutit saqqummiunneqartut pillugit sioqqutsilluni isumaqatigiinniarnertit nalaanni, unnerluussap ini eqqartuussiviusoq qimassaneraa, eqqartuussisut siulittaasuata aalajangissavaa.«

Imm. 2 tamatuma kingorna imm. 6-inngussaaq.

40. § 458, *imm. 2-mi oqaaseqatigiinni siullerni*, imm. 6-inngortumi, *oqaaseqatigiinni siullerni* »§ 141, imm. 5 naapertorlugu,« ima allanngortinneqassaaq: »4 imaluunniit § 104 naapertorlugu«.

41. § 458, *imm. 2-mi*, imm. 6-inngortumi, *oqaaseqatigiit sisamaattut ilanngunneqassaaq*:

»Imm. 2, nr. 1 imaluunniit 2 malillugit isertuussisoqarnissaa eqqartuussiviup aalajangersimappagu, ilisimannittup najugaa atialuunniit, atorfia aamma najugaa pillugit paasissutissat, taamaattoq unnerluunneqartumut nalunaarutigineqassanngillat.«

42. § 458-imi *imm. 7-itut ilanngunneqassaaq*:

»*Imm. 7.* Imm. 2, nr. 2 aamma imm. 4 malillugit ilisimannittup atiata, atorfiata najugaatalu isertuunneqarnissaat pillugit aalajangiineq, aalajangiinikkut aalajangerneqassaaq, taannalu tunngavilersorneqassaaq. Aalajangernermi suliami pissutsit piviusut allanneqassapput, taakkunanilu isertuussinissamut piumasaqaatit naammassineqarsimanerat taperserineqassaaq. Aalajangiineq qaqugukkulluunniit allanngortinneqarsinnaavoq. Eqqartuussiviup aalajangiinera aalajangeqitassanngortinneqarsinnaavoq.«

43. § 474, *imm. 3-mi oqaaseqatigiit aappaanni*, »Nalunaaruteqarnermi unnerluutigineqartoq najuutinngippat politiit...nassiussissapput« ima allanngortinneqassaaq: »Politiit nassiutissavaat«.

44. *Kapitali 41-imi* § 485-ip kingorna ilanngunneqassaaq:

»§ 485 a. Pinerluttulerinermik suliani eqqartuussutit aalajangiinerillu, inuit kinaassusaat ilisarineqarsinnaajunnaarsinneqarpata, taamaalilluni pasineqartup, unnerluunneqartup, eqqugaasup imaluunniit ilisimannittut kikkussusaat takuneqarsinnaajunnaarluni, taamaallaat tamanut issuarneqarsinnaapput. Oqaaseqatigiinnut siullernut unioqqutitsinermi akiligassiisoqarsinnaavoq. Pinerluttulerineq pillugu inatsiseqartitsineq malillugu pinerluttulerinermi inatsimmi kapitali 5 malillugu akisussaatitsineq, ingerlatseqatigiiffinnut il.il. (inatsisitigut pisinnaatitaasunut pisussaatitaasunullu) peqqussutigineqarsinnaavoq.

Imm. 2. Inatsisit pillugit paasissutissiinermik systeminut, inunnik paasissutissanik suliarinnittarneq pillugu inatsimmi § 9-mi ilaatinneqartunut, imaluunniit inatsisit pillugit paasissutissiinermik systemimit taamaattumit tamanut oqaluttuareqqiinnermut, imm. 1-imi aalajangersagaq atuutinngilaq.«

45. § 493 h, imm. 6, ima oqaasertalerneqassaaq:

»*Imm. 6.* § 339 a, imm. 3-mi malittarisassat taamatuttaaq atuutissapput, aamma imm. 3-mi 4-milu malittarisassat § 339 c-mi aalajangersagaq malillugu avaqqunneqarsinnaapput.«

§ 2

Pisortat ingerlatsinerat pillugu inatsimmi, peqqussutikkut nr. 1188-ikkut, 27. december 1994-imi Kalaallit Nunaannut atuutilersinneqartumi, inatsisikkut nr. 572-ikkut, 10. maj 2022-imeersukkut allanngortinneqartumi, § 6 malillugu allanngiineq tulliuuttoq suliarineqassaaq:

1. § 18, imm. 2, ima oqaasertalerneqassaaq:

»*Imm. 2.* Imm. 1-imi aalajangersakkami politiini unnerluussisussaataasuniluunniit takussutissiat ilaatinneqanngillat.«

§ 3

Imm. 1. Inatsit ulloq 1. januar 2025 atuutilissaaq.

Imm. 2. Kalaallit Nunaanni eqqartuussisarnermik inatsimmi §§ 101 b aamma 485 a, inatsisip matuma § 1, nr. 3 aamma 44, malillugu oqaasertalerneqartut, inatsisip atuutilinnginnerani eqqartuussutitut aalajanngiinernullu nalunaarutigineqartunut atuutinngillat. Eqqartuussutitut aalajanngiinernullu taamak ittunut maleruagassat atuuttut atuutsinneqassapput.

Imm. 3. Kalaallit Nunaanni eqqartuussisarnermik inatsimmi § 101 e, imm. 6-imi oqaaseqatigiit siulliit aamma oqaaseqatigiit pingajuat, inatsisip matuma § 1, nr. 3, malillugu oqaasertalerneqartut, Kalaallit Nunaanni eqqartuussisarnermik inatsimmi § 102-mi malittarisassaq maannamut atuuttoq malillugu inatsisip atuutilerana sioqqullugu takussutissianut takussutissiinernullu tunniunneqarsimasunut aamma atuupput.

Imm. 4. Kalaallit Nunaanni eqqartuussisarnermik inatsimmi § 102, imm. 1 aamma 7 malillugit malittarisassat aalajangersarneqartut, Kalaallit Nunaanni eqqartuussisarnermik inatsimmi § 101 e, imm. 2 aamma 6, malillugit inatsisip matuma § 1, nr. 3 malillugu oqaasertalerneqartut malillugit najoqqutassanit taarserneqartigatik atuutissapput.

Inatsisissatut siunnersuummut oqaaseqaatit

Oqaaseqaatit nalinginnaasut

Ujarliutit

1. Aallaqqaasiut

2. Inatsisissatut siunnersuutip immikkoortui pingaarnerit

2.1. Allagaatinik takunnissinnaatitaaneq

2.1.1. Inatsisit atuuttut

2.1.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.2. Oqarasuaatip angallattakkap ikumasup, pasineqartumit atorineqartutut isumaqarfigineqartup sumiissusia pillugu paasisutissanik pissarsiniarnermik suliaqarneq

2.2.1. Inatsisit atuuttut

2.2.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.3. Tunniussisussaataaneq

2.3.1. Inatsisit atuuttut

2.3.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.4. Immikkut ittumik ingasattunik inatsisinik unioqqutitsinnerit pillugit pinerluttoqarsimaneranik paasiniaanermi pinngitsaalilluni akuliunnerit

2.4.1. Inatsisit atuuttut

2.4.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.5. Inuup nakkutigineqarani inummut allamut nalunaaruteqarsinnaatitaaneranut il.il. pisinnaatitaanani akuliunnerit pillugit nalunaarutiginninneq.

2.5.1. Inatsisit atuuttut

2.5.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.6. Pinngitsaaliilluni akuliunnerit suliarineqarsimasut pillugit nalunaarutiginninneq

2.6.1. Inatsisit atuuttut

2.6.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.7. Internettikkut nittartakkanik matusineq

2.7.1. Inatsisit atuuttut

2.7.2. Inatsiseqarnermut ministereqarfiup isumaliutiginninnera

2.8. Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuineq imaluunniit atassutaarutitsineq

2.8.1. Inatsisit atuuttut

2.8.2. Inatsiseqarnermut ministereqarfiup isumaliutiginninnera

2.9. Tv-kkut nakkutiginninnermik tigusineq

2.9.1. Inatsisit atuuttut

2.9.2. Inatsiseqarnermut ministereqarfiup isumaliutiginninnera

2.10. Ilisimannittut kinaassusaasa isertuunneqarnerat

2.10.1. Inatsisit atuuttut

2.10.2. Inatsiseqarnermut ministereqarfiup isumaliutiginninnera

2.11. Digitaliusumik nalunaarutiginninneq aamma piuminarsakkamik digitaliusumik nalunaarutiginninneq

2.11.1. Inatsisit atuuttut

2.11.2. Inatsiseqarnermut ministereqarfiup isumaliutiginninnera aamma aaqqissuussineq siunnersuutigineqartoq

3. Pisortanut aningaasaqarnikkut kingunissai aamma atortuulersitsinermi kingunissaa

4. Inuussutissarsiornermut il.il. aningaasaqarnikkut allaffissornikkullu kingunissaa

5. Innuttaasunut allaffissornikkut kingunissaa

6. Silap pissusaanut kingunissaa

7. Avatangiisinut- pinngortitamullu kingunissaa

8. EU-mi inatsisitigut tunngassuteqartut

9. Oqartussat suleqatigiiffiillu il.il. tusarniaaffigineqartut

10. Immersugaq eqikkaaffiusoq

1. Aallaqqaasiut

Naalagaaffeqatigiini Kalaallit Nunaannut naligiimmik, pitsaasumik aamma patajaatumik peqatigiinnissaq naalakkersuisut kissaatigaat. Kalaallit Nunaat peqatigalugu taamaammat qallunaat akisussaaffii naalakkersuisuit ineriartortinniarpaat, ilaatigut suliassaqarfinni, Danmarkip akisussaaffigisaani inatsisiliornerit nutarterneqarnerisigut. Kalaallit Nunaannut inatsisiliornerit, Danmarkip akisussaaffigisaasa, ullumikkumut naleqquttuunissaat aamma pitsaasumik pitsaassuseqarnissaat pingaaruteqarpoq.

Pinerluttulerinermik suliat suliarineqartarneranni Kalaallit Nunaanni eqqartuussisarnermik inatsimmi malittarisassat, inatsisip 2010-mi atuutilernerata kingorna, arlaleriarlutik aaqqinneqartarsimapput.

Assersuutigalugu 2022-imi paasissutissiineq pillugu malittarisassat nutaat, aamma eqqunngitsuliorfigineqartut ilitsersorneqartarnissaat pillugit malittarisassat eqqunneqarput,

taakkulu qallunaat eqqartuussisarnermik inatsisaanni malittarisassanit (inatsimmit nr. 572-imi, 10. maj 2022-imeersumit) isumassarsianit tunngaveqarput, aamma 2023-imi nassuerneramik suliat suliarineqartarneri pillugit malittarisassanik eqqussisoqarpoq, aamma unnerluunneqartup aggingitsoornerani suliap naammassillugu eqqartuussutigineqarnissaa pillugu malittarisassat taamatuttaaq annertusineqarput taakkulu qallunaat eqqartuussisarnermik inatsisaanni malittarisassanit (inatsimmit nr. 414-imit, 25. april 2023-imeersumit) isumassarsianit tunngaveqarput.

Aammattaaq inatsisit unioqqutinneqarneranni pinerluttoqarsimaneramik paasiniaanermi politiit inunnik sunniiniartartunik atuisarnerat pillugu malittarisassanik eqqussisoqarnissaa pillugu inatsisissatut siunnersuummut missingiut 2023-imi junimi Inatsiseqarnermut ministereqarfiup tamanut tusarniutigalugu nassiuppaa, taannalu 2023-imi ukiakkut Inatsisartunut saqqummiunneqarsinnaanera naatsorsuutigineqarpoq.

Ullumikkut aamma siunissami pinerluttuliortarneq- aamma sioorasaarutaasinnaasut pillugit inatsisip ullumikkut naleqquttuunissaata qulakkeerneqarnissaa pillugu, Kalaallit Nunaanni eqqartuussisarnermik inatsisip allanngortinneqarnissaanut siunnersuut manna Inatsiseqarnermut ministereqarfiup suliarisimavaa.

Tamanna tunngavigalugu Kalaallit Nunaanni eqqartuussiviit sulisarnerat pillugu periarfissaatillugu annerpaamik ammasuunissap aamma paasisimasaqarnissap qulakkeerneqarnissaa siunertaralugu, inuit tamarmik eqqartuussutit pillugit allagaatinik takunnissinnaatitaanerisa annertusineqarnissaa inatsisissatut siunnersuutip illuatungaani siunertaraa.

Ilungersunartumik aamma aaqqissuussaanagerusumik pinerluttuliornerup sunniuteqarluartumik akiorneqarnissaanut politiit pinerluttoqarsimaneramik paasiarnerminni periarfissaasa pitsanngorsarneqarnissaat kiisalu ilisimannittut illersorneqarnerisa pitsanngorsarneqarnera inatsisissatut siunnersuutip illuatungaani siunertaraa.

Taaneqartorpiaq siunertaralugu illersuisup pasineqartullu allagaatinik takunnissinnaatitaanerisa ilaatigut killilerneqarnissaat siunnersuutigineqarpoq. Suliap naammassineqarnissaanut uppernarsaatinik pingaarutilinnik illersuisup unnerluunneqartullu saqqummiussisinnaanerannut attuinngitsumik taamaalilluni siunnersuut ilusilerneqarpoq. Illersuisup unnerluunneqartullu allagaatinik takunnissinnaatitaanerisa killilerneqarnerat eqqartuussiviup aalajangeratigut pissasoq, aamma immikkut ittumik illersuisoq ivertinneqassasoq, taannalu atortussanik, allagaatinik takunnissinnaatitaanermut killiliinermi apeqqutit pillugit takunnissinnaassasoq, aamma illersuisup unnerluunneqartullu atortussani allagaatinik takunnissinnaatitaanerannut

killiliinermut akerliliisunik eqqartuussivimmut tunngavilersuutunik saqqummiussisassasoq aammattaaq siunnersuutigineqarpoq.

Oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu Kalaallit Nunaanni eqqartuussisarnermik inatsimmi paatsuugassaannngitsunik inatsisini malittarisassat eqqunneqarnissaat aamma siunnersuutigineqarpoq. Pinerluttoqarsimaneramik paasiniaanermit ilaatillugu oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu siunnersuutikkut politiit erseqqissumik periarfissiissummik peqalissapput, kisianni tamanna ilutigalugu politiit taamatut atuisinnaanissaannut, aamma eqqartuussiviup aalajangiinerata pissarsiarinissaa, aamma akuliunnermi pineqartumut illersuisumik ivertitsisoqarnissaa pillugu piumasaqaatit aalajangersarneqassapput.

Tunniussisussaataitaanerup peqqussutigineqarnera pillugu eqqartuussiviup ataatsimik aalajangiinerani, uiguleriiaani akiliineq malinnaaviginiarlugu politiit tunniussisussaataitaanerup peqqussutigineqarnera pillugu aningaaserivinnut il.il. peqqussuteqarsinnaanerata, aamma pisut ilaanni eqqartuussiviup aalajangernera pissarsiareqqaarnagu aningaaserivinnut il.il. tunniussisussaataitaanerup peqqussutigineqarnera pillugu malittarisassanik eqqussisoqarnissaa aammattaaq siunnersuutigineqarpoq. Ingammik aningaasaqarnikkut pinerluttuliornernik, matumani pinertuliornernit (ingasattunit) allanit pissarsianit malunnarunnaarsaaneq ilanngullugu, politiit pinerluttoqarsimaneramik paasiniaanerisa sunniuteqarluarnerulernissaat siunnersuummi matumani siunertarineqarpoq.

Pinerluttulerinermi inatsimmi kapitali 7-imik aamma 8-mik (naalagaaffiup isumannaatsuunissaanut imaluunniit naalagaaffiup inatsit tunngavisoq malillugu aaqqissuussineranut pinerluttuliornernut, pinerliiniarnernut il.il.) piaaraluni unioqquitsinerit pillugit pinerluttoqarsimaneramik paasiniaanerni, suliami piviusumi tassani piumasaqaatitaqannngitsumik sivisuumik sivisussusilimmik inissiisarfirmi inissiisoqarnissaa ilimagineqaraluartoq apeqqutaatinnagu, inuup nakkutigineqarani inummut allamut nalunaaruteqarsinnaataitaaneranut akuliunnertut imaluunniit immikkut ittumik piumasaqaatitalimmik pinngitsaalilluni akuliunneq nakkutiginninnertut iluseqartoq, periarfissaasariaqartoq, aammattaaq siunnersuutigineqarpoq. Akuliunnermut piumasaqaatit allat naammassineqarsimanissaat siunnersuut malillugu piumasaqaataavoq.

Pisinnaatitaanani pinngitsaaliilluni akuliunneq siunissami eqqartuussivimmit Inatsiseqarnermut ministereqarfimmuunngitsoq Rigsadvokatimut nalunaarutigineqassasoq aamma siunnersuutigineqarpoq. Taamaattoq pisinnaatitaanani pinngitsaaliilluni akuliunnerit Politiets Efterretningstjeneste-mit suliarineqartut suli Inatsiseqarnermut

ministereqarfimmut nalunaarutigineqassapput. Pisinnaatitaanani akuliunnerit pillugit nalunaarutiginninnerit tiguneqartut malitseqartitsivigineqarnerisa sunniuteqarluarnerulernissaat siunnersuummi siunertarineqarpoq.

Inatsimmik ingasattumik unioqqutitsinermi imaluunniit politiit pinerluttoqarsimaneranik paasiniaanermi periaaserisaat pillugit paasisutissat allanut oqaatigeqqusaanngitsut illersorneqarnissaanut qajassuussinerit tamanna pissutissaqartippassuk, pinerluttoqarsimaneranik paasiniaanermi ingerlasumi pinngitsaaliilluni akuliunnerit naammassisimasut pillugit nalunaarutiginninnerit aamma kinguartinneqarsinnaasut imaluunniit ilanngunneqarsinnaanngitsut, aammattaaq siunnersuutigineqarpoq. Nalunaarutiginninnerup kinguartinneqarnissaa imaluunniit ilanngunneqannginnissaa pillugu eqqartuussivik aalajangiinissamat piginnaatitaammat allanngunngilaq. Pinerluttoqarsimaneranik paasiniaanerup ingerlasup imaluunniit politiit pinerluttoqarsimaneranik paasiniaanermi periaasiisa ersersinneqarnerisigut, pinngitsaaliilluni akuliunnerup naammassereersup nalunaarutigineqarnerata politiit ingasattumik pinerluttuliorneq alla pillugu pinerluttoqarsimaneranik paasiniaanerisa akornuserneqarnissaata ingalassimaneqarnissaa siunnersuummi siunertarineqarpoq.

Internettikkut nittartakkat, taakkuninnga qarasaasiaq atorlugu pinerluuteqarnernut ilutsit erseqqissumik taasat pillutik, politiit matusinissaat pillugit malittarisassat eqqunneqarnissaat aammattaaq siunnersuutigineqarpoq. Ilaatigut qarasaasiakkut pinerluttuliornermi eqqugaasinnaasut peqquserlunnernut, unioqqutitsilluni allap qarasaasiaanut pulanernut il.il. illersorneqarnissaat siunnersuummi siunertarineqarpoq.

Radiokkut aallakaatitsinerik- imaluunniit nalunaarasuartaatitigut atassuteqaatinik politiit akornusersuisinnaanerit imaluunniit atassutaarutititsinnaanerit imaluunniit immikkut ittumik pisuni tv-kkut nakkutiginninnermik tigusinnaanerit pillugu malittarisassanik eqqussisoqarnissaa aammattaaq siunnersuutigineqarpoq. Assersuutigalugu pisoq pissagaluarpat, pinerliiniat saassussinnaanerit pitsaaliorniarlugu nalaagaaffiup sinnerani atortut taakku atornerarnerisut periarfissanik taakkuninnga Kalaallit Nunaanni politiit atuisinnaanerannik tunineqarnissaat siunnersuummi siunertarineqarpoq.

Ilisimannittut kinaassusaasa isertuunneqarnissaat pillugit malittarisassat eqqunneqarnissaat naggataagut siunnersuutigineqarpoq. Ilisimannittup kinaassusaata unnerluutigineqartumut isertuunneqarsinnaanera, tassani unnerluunneqartup illersorneqarneranut ilisimannittup kinaassusaata ilisimaneqarnissaa pingaaruteqarnani, aamma ilisimannittup isumannaatsuunissaanut qajassuussinerit ilisimannittup kinaassusaata isertuunneqarnissaa pisariaqartilissagaa, siunnersuummi pineqarput. Illersuisup ilisimannittup kinaassusia ilisimassavaa, aamma ilisimannittut kinaassusaat ilisarineqarsinnaajunnaarsillugu nassuiaateqartitsineq pillugu eqqartuussiviup aalajangiinera, immikkut

aalajangeqqitassanngortinneqarsinnaavoq. Unnerluunneqartumit imaluunniit inunnit ilisimannittumut attaveqartunit pillaatit akiniutitut ilisimannittut illersorneqarnissaat siunnersuummi siunertarineqarpoq.

Tamatuma saniatigut digitaliusumik nalunaarutiginninneq aamma piuminarsakkamik digitaliusumik nalunaarutiginninneq pillugu malittarisassanik ilanngussisoqarnissaa siunnersuutigineqarpoq, taamaalilluni Kalaallit Nunaanni eqqartuussisarnermi aamma digitaliusumik attaveqatigiinnerup atorneqarnerani periarfissat massakut atuuttut iluaqutaasinnaasunngortinneqarniassammata.

Inatsisissatut siunnersuummi »eqqartuussisarnermik inatsit« innersuussutigineqartillugu, allamik allassimasoqartinnagu Kalaallit Nunaanni eqqartuussisarnermik inatsit pineqarmat, maluginiarneqassaaq.

2. Inatsisissatut siunnersuutip immikkoortui pingaarnerit

2.1. Allagaatinik takunnissinnaatitaaneq

2.1.1. Inatsisit atuuttut

Eqqartuussisut allattaavianni aamma takussutissiani saqqummiunneqartuni eqqartuussivimmiittuni, allagaatinik takunnissinnaatitaaneq pillugu eqqartuussisarnermik inatsisimmi § 101 malittarisassamik nalinginnaasumik imaqarpoq.

Pisuni inatsimmi tamanna pillugu immikkut ittumik aalajangersaasoqarsimatinnagu, akuusut aamma allat, inatsisitigut tamatumani soqutigisaqartut, eqqartuussisut allattaaviinit takussutissianik takussutissianillu saqqummiunneqartunik eqqartuussivimmiittunik piumasaqaateqarsinnaapput § 101, imm. 1 malillugu. Pinerluttulerinermik suliani akuusunit allaanerisut taamaattoq suliap naammasineqareersimanerani aatsaat malittarisassaq manna malillugu allagaatinik takunnissinnaatitaapput.

Naalagaaffiup isumannaatsuunissaanut imaluunniit naalagaaffinnut takornartanut pissutsit qajassuussassat imaluunniit taakkununga immikkut ittumik qajassuussassat allakkut imm. 1 malillugu allagaatinik takunnissinnaatitaaneq nangaanartoqartilerpassuk, imaluunniit takussutissiap inatsisinut akerliusumik atorneqarnissaa aarlerigineqarpat, allagaatinik takunnittussaataaneq tamakkiisumik ilaannakoortumilluunniit itigartitsissutigineqarsinnaasoq, § 101, imm. 2-mi takuneqarsinnaavoq.

Takussutissiat sapingisamik sapaatip akunnerata 1-p ingerlanerani tunniunneqartariaqartut, § 101, imm. 3-mi takuneqarsinnaavoq.

Eqqartuussiviup politidirektørimit oqaaseqaammik pissarsereerneratigut, pinerluttulerinermi suliani takussutissiat aatsaat tunniunneqarsinnaasut, inatsiseqarnermut ministerip aalajangersinnaagaa, § 101, imm. 4-mi takuneqarsinnaavoq. Imm. 2-mi tunngaviit taaneqartut pissutigalugit, politidirektørup takussutissiamik tunniussinissaq akerlerippagu, eqqartuussiviup suliaq aalajangernikkut aalajangiiffigissavaa, taannalu tunngavilersorneqassaaq.

Imm. 2 aamma 4 malillugit eqqartuussiviup aalajangiineri sapaatit akunneri 6 qaangiutsinnagit nunatta eqqartuussisuuneqarfianut saqqummiunneqarsinnaasut, § 101, imm. 5-imi takuneqarsinnaavoq. Taamaattoq pissutsit immikkut ittut sinniineq isumakkeerfigineqarsinnaasunnngortippassuk, piffissaliussap taassuma sinnerneqarnera qaammatit 6 tungaannut isiginngitsuusaarsinnaavaa. Imm. 4-mi oqaaseqatigiit aappaanni pisuni taaneqartuni suliaq politidirektørimit nunatta eqqartuussisuuneqarfianut ullut 3 qaangiutsinnagit saqqummiunneqassaaq, aamma takussutissiaq suliap nunatta eqqartuussisuuneqarfianit aalajangerneqartinnagu tunniunneqassanngilaq.

Pineqartumut eqqartuussutigineqartoq pillugu eqqartuunneqartup takussutissiamik pisinnaanera, § 101-imi aalajangersakkanit attorneqassanngitsoq, naggataagut § 101, imm. 6-imi takuneqarsinnaavoq.

§ 101-mi aalajangersagaq, qallunaat eqqartuussisarnermik inatsisaanni § 41 a-mit tunngaveqarpoq, soorlu aalajangersagaq taanna Kalaallit Nunaanni Eqqartuussiveqarneq pillugu Isumalioqatigiissitat 2002-mi aasami suliarfik naammassimmassuk, taamatut oqaasertalerneqarsimasoq.

Eqqartuussisarnermik inatsimmi § 101-ip saniatigut, inuit sakkutuujunngitsut pillugit suliani aamma pinerluttulerinermik suliani nalinginnaasumik imminnut assortuuttoqannginnissaanut tunngavik atuuppoq, taassumalu suliap suliarineqarnerani suliami akuusut pingaarnertut malittarisassaq pingaarneq malillugu paasissutissanik, illuatungerisap eqqartuussivimmud saqqummiussaanic pissarsisinnaanerat kinguneraa. Pinerluttulerinermik suliani piumasaqaatit ilaasa ataanni eqqartuussisarnermik inatsimmi § 344 malillugu tamanna pinngitsoorneqarsinnaavoq, kisianni taamatut pinngitsoortitsineq kingusinnerpaamik pingaarnertut isumaqatigiinniernerup nalaani atorunnaassaaq. Angajoqqaat oqartussaanagerat pillugu, meeqqap najugaqarfia aamma najorneqarnera pillugit inuit sakkutuujunngitsut pillugit suliani, pisut ilaanni akuusut, eqqartuussisarnermik inatsimmi § 287 malillugu angajoqqaat oqartussaasuunerat pillugu inatsit malillugu meeqqap oqaloqatigineqarnerata imarisai pillugit paasissutissanik pinissaat akornuserneqarsinnaavoq, aamma pinngitsaaliissummik qitornavissiartaartitsineq pillugu suliani, eqqartuussisarnermik inatsimmi § 298, imm. 3 malillugu angajoqqaaviit

qitornavissartaarnissamik qinnuteqartup kinaassusaa pillugu paasissutissanik pinissaat akornuserneqarsinnaavoq. Ilanngunneqanngitsut taamaattut immikkut ittut eqqaassanngikkaanni, inuit sakkutuujunngitsut pillugit suliani tamakkiisumik assortuisinnaaneq atuuppoq, imaappoq akuusut allakkut atortussat illuatungerisap eqqartuussivimmut saqqummiussai tamaasa pissarsiarisinnaavaat.

Eqqartuussisarnermik inatsimmi § 340 malillugu politiit tamanna eqqartuussivimmut saqqummiussimaneraat apeqqutaatinnagu, pinerluttulerinermik suliani nalinginnaasumik illersuisup aammattaaq politiit suliami atortussaataat ilisimalissallugit pissarsiarisinnaavai. Politiit akuersissuteqaqqaartinnagit atortussat unnerluunneqartumut illersuisup tunniussinnaanngilai, kisianni aallaaviatigut unnerluunneqartumut qimerloortissinnaallugit.

Naalagaaffinnut takornartanut, naalagaaffiup isumannaatsuunissaanut imaluunniit suliap paasinarsisinneqarnissaanut imaluunniit inummut pingajuusumut qajassuussineq tamanna pisariaqalersippagu, politiit atortussiaataanik illersuisup pissarsisinnaanera taamaattoq killilerneqarsinnaavoq, imaluunniit illersuisup paasissutissanik politiit pissarsiarineqarsimasunik ingerlatitseqqinnginnissaa peqqussutigineqarsinnaavoq. Pingaarnertut isumaqatigiinniarnep nalaani unnerluunneqartup nassuiaareernerata tungaanut, peqqussut sivitsorneqarsinnaavoq.

§ 340-mi aalajangersagaq, qallunaat eqqartuussisarnermik inatsisaanni § 745-mit tunngaveqarpoq, soorlu aalajangersagaq taanna Kalaallit Nunaanni Eqqartuussiveqarneq pillugu Isumalioqatigiissitat 2002-mi aasami suliarfik naammassimmassuk, taamatut oqaasertalerneqarsimasoq.

Qallunaat eqqartuussisarnermik inatsisaanni § 745, piareersaataasumik suliani tapersearneqarluni, ilaatigut ima nassuiaarneqartarpoq, illersuisup politiit atortussaataanik pissarsisinnaanera killilerneqarpat, illersuisup pissarsisinnaaneranik killiliisoqarsimaneranik illersuisoq nalunaarfigineqassasoq. Aammattaaq illersuisup politiit atortussaataanik pissarsisinnaanissaanut killiliinerit kingusinnerpaamik pingaarnertut isumaqatigiinniarnep aallartinnerani atorunnaarsinneqarput.

Kalaallit Nunaanni eqqartuussisarnermik inatsimmi § 340, qallunaat eqqartuussisarnermik inatsisaanni § 745-p eqqartuusseriaatsimi atuuttumi nassuiarneqartarnerata assinganik nassuiarneqassasoq ilimagineqassaaq.

Illersuisumut peqqussutit pineqartillugit (imaappoq paasissutissanik illersuisup unnerluunneqartumut ingerlatitseqqinnginnissaa), Folketingstidende 2007-08 (katersat aappaat), ilanngussaq A, qupperneq 1457 malillugu atortussat imaat taanngikkaluarlugit, atortussanik nipangiunneqartussaasunik peqartoq, illersuisoq unnerluunneqartumut

ilisimatitsinissamik pisinnaatitaasoq § 340-mut piareersaataasumik suliani takuneqarsinnaavoq. Suliat piareersaataasut malillugit unnerluunneqartoq politiinit killisiorneqartariaqarnerasoq pillugu tamanna illersuisup unnerluunneqartullu oqallisiginninnerannut pingaaruteqarsinnaavoq.

Soorlu qallunaat eqqartuussisarnermik inatsisaanni 2002-mi taamaattoq, pinerluttulerinermik suliami, illersuisoqartinnagu unnerluunneqartup politiit atortussaataannik pissarsisinnaaneramik, Kalaallit Nunaanni eqqartuussisarnermik inatsit imaqaangilaq.

Kalaallit suliassaataat pillugit, naalagaaffimmi oqartussaasunit suliarineqartut suliarineqarsimasulluunniit pillugit, Pisortat ingerlatsinerat pillugu inatsit, peqqussutikkut nr. 1188, 27. december 1994-imeersukkut atuutilersinneqartoq, pinerluttulerinermik suliani, suliap aalajangiiffigineqareernerani akuusut allagaatinik takunnissinnaatitaanerak pillugu § 18-imi aalajangersakkamik imaqarpoq.

Suliap aalajangiiffigineqareernerani, tamanna pineqartup qajassuunneqarnissaanik suliarinninneq eqqarsaatigalugu naleqquttumik tunngavilersorneqarsimappat, aamma pitsaaliuinnermut, paasinarsititsinnermut aamma inatsimmik unioqqutitsinnermi inuk eqqartuunniarlugu imaluunniit pillagassanngortinniarniarlugu suliaqarnermi qajassuutassat imaluunniit unnerluunneqartup, ilisimannittup allaluunniit illersorneqarnissaannut immikkut ittumik qajassuutassat taamaaliortoqarnissaa pissutissaqartinngippassuk, pinerluttulerinermik suliami akuusut, suliami takussutissiat ilisimalernissaat piunasaqaatigisinnaagaat, aalajangersakkami takuneqarsinnaavoq. Takussutissiat ilaasa allagaatinik takunnissinnaatitaanerami ilanngunneqannginnissaat pillugu §§ 12-imiit 14 ilanngullugu aalajangersakkat taamatuttaaq atuupput.

Pinerluttulerinermik suliaq pillugu aamma takussutissiat, suliamut atatillugu eqqartuussivimmu saqqummiunneqarsimasut pillugit, eqqartuussisut allattaaviannit takussutissiat aalajangersakkami ilaatinneqanngillat. Eqqartuussisut allattaaviinut aamma pinerluttulerinermi sulianut allanut, suliap suliarineqarnerani atorneqarsimasunut tamanna aamma atuuppoq.

Pinerluttulerinermik suliami naammassineqareersumi politiit atortussaataasa ilaannik, eqqartuussisarnermik inatsimmi § 101-imi ilaatinneqanngitsunik, imaappoq atortussat ilaannik, eqqartuussisut allattaaviinit imaluunniit takussutissiaataannik, eqqartuussivimmi saqqummiunneqarsimasuunngitsunik, unnerluunneqartup allagaatinik takunnissinnaatitaanerni ingammik aalajangersagaq naleqquttuavoq.

Tusagassiuutini aaqqissuisunut aaqqissuinermilu sulisunut, tusagassiuisarnermi akisussaasuuseqarneq pillugu inatsisartut inatsisaanni ilaatinneqartunut, eqqartuussisarnermik inatsimmi § 102 malittarisassanik imaqarpoq. Inuit taakku ilaatigut allakkanik unnerluussutinik eqqartuussisullu allattaaviinik takunnissinnaatitaapput, kisianni tusagassiuutini tusagassiornermut tunngatillugu aamma aaqqissuisut suliaannut tapersiisutut taamaallaat atortussanik taakkuninnga atuisinnaapput. Atortussat tusagassiuutini tusagassiornermut aamma aaqqissuinermi sulisunit allaanerusunit takuneqarsinnaannginnerat, allaatigisap immikkoortuini ataqatigiinni takisuuni issuaqqissaarneqarsinnaannginnerat aamma apeqqarissaarnermi kimulluunniit eqqartorneqarsinnaannginnerat, tamatuma kinguneraa.

§ 102-mi aalajangersagaq, qallunaat eqqartuussisarnermik inatsisaanni § 41 a-mit tunngaveqarpoq, soorlu aalajangersagaq taanna Kalaallit Nunaanni Eqqartuussiveqarneq pillugu Isumalioqatigiissitat 2002-mi aasami suliarfik naammassimmassuk, taamatut oqaasertalerneqarsimasoq.

2.1.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.1.2.1. Pillaatissiisoqarnissaanik suliani ingerlasuni illersuisut politiit atortussaataannik takunnissinnaanerat pillugit qallunaat eqqartuussisarnermik inatsisaanni malittarisassat inatsisikkut nr. 436-ikkut, 10. juni 2003-imeersukkut (Rockerit pinerluttuliortarnerisa aaqqissuussaasumillu pinerluttuliortarnerit allat akiorniarneqarnerat) allanngortinneqarput.

Allannguutit Folketingstidende 2002-03, ilanngussaq A, quppernerit 6702-imiit 6703 ilanngullugu malillugit, rockerit perluttuliortarnerisa aaqqissuusaasumillu pinerluttuliortarnerit allat sunniuteqarluartumik akiorneqarniarnerannut politiit paasissutissanik pingaaruteqarluinnartunik tigusisinnaanerannut periarfissat qulakkeerneqarnissaat, allannguutit siunertarigaat, inatsisip allanngortinneqarnissaanut piareersaataasumik suliani takuneqarsinnaavoq.

Illersuisup (tamatumalu kingunerisaanik pasisap imaluunniit unnerluunneqartup) allagaatinik takunnissinnaatitaanerat pasilliinermut imaluunniit unnerluussummut tunngassuteqartunut atortussanut, politiit suliami piviusumi atugassatut pissarsiarisimasaanut, siullertut taamaallaat tunngassuteqalerput. Politiinit atiusoq suliami ilanngunneqarsimanngippat, nalunaarutiginnittartup, kinaassutsimi isertuunneqarnissaanik kissaateqartup, kinaassusaa pillugu paasissutissat illersuisup aamma pasisaasup imaluunniit unnerluunneqartup allagaatinik takunnissinnaatitaaneranni ilaatinneqarunnaarnera, allannguutip ilaatigut kinguneraa. Tamatuma saniatigut tunuliaqutaasut pillugit paasissutissat nalinginnaasut,

assersuutigalugu pinerluttuliornermi ilutsit imaluunniit inuit eqimattakkuutaat ataaniittunut aalajangersimasunut imaluunniit susassareqatigiinnut tunngasut, illersuisup allagaatinik takunnissinnaatitaaneranut ilaatinneqartussaanginnerat, allannguutip taassuma kinguneraa. Atortussat, unnerluussisussaataasut pingaarnertut isumaqatigiinniarnermi saqqummiutissallugit siunertaqarfigisaat, atortussat suliami aalajangersimasumi tassani atorneqartussatut pissarsiarineqarsimappata pissarsiarineqarsimangikkaluarpataluunniit, suli tamatigut illersuisup allagaatinik takunnissinnaatitaaneranut ilaammata, taamaattoq maluginiarneqassaaq.

Illersuisup (tamatumalu kingunerisaanik pasineqartup imaluunniit unnerluunneqartup) allagaatinik takunnissinnaatitaanerisa killilerneqarsinnaaneranut periarfissat aappaattut annertusineqarput, taamaalilluni ingasattumik inatsimmik unioqqutitsinermi pinerluttoqarsimaneranik paasiniaanermi ingerlasumi aamma politiit pinerluttoqarsimaneranik paasiniaanermi periaaserisaanut paasissutissat oqaatigeqqusaangitsut, allagaatinik takunnissinnaatitaanerup killilerneqarnissaa tunngavilersinnaavaat. Illersuisup allagaatinik takunnissinnaatitaaneramik killilersuineq aammattaaq piffissamik sivisussusiligaangitsuusinnaavoq taamaalillunilu pingaarnertut isumaqatigiinniarnernup nalaali aamma suliap naammassineqareernerani sunniuteqassalluni.

Inatsimmik allannguinerup kingorna, allagaatinik takunnissinnaatitaaneq pillugu illersuisumit (aamma pasisamit unnerluunneqartumilluunniit) atortussat ilaatinneqannginneri pillugit, eqqartuussivik aalajangiinermik aalajangersaassaaq. Apeqqutip taassuma suliarineqarnerani, pasineqartumut unnerluunneqartumulluunniit, taassuma soqutigisaanik isumaginnittussamik eqqartuussissuserisumik immikkut ittumik ivertitsisoqassaaq. Eqqartuussissuserisoq eqqartuussissuserisut immikkut ittut ilaannit ivertinneqassaaq, taannalu isumannaallisaaikkut akuerineqassaaq.

2003-imi inatsisip allanngortinneqarneratigut eqqartuussissuserisoq eqqartuussissuserisut arlallit akornannit ivertinneqassaaq, tassanngalu suliani pillaasarnermik inatsimmi kapitali 12-imi aamma 13-imi (naalagaaffiup isumannaatsuunissaanut imaluunniit naalagaaffiup inatsit tunngavisoq malillugu aaqquissuussineranut pinerluttuliornernut, pinerliiniarnernut il.il.) malittarisassat unioqqutinneqarneranni inuup nakkutigineqarani inummut allamut nalunaaruteqarsinnaatitaaneranut akuliunnerni ivertitsisoqassaaq.

Tamanna inatsisikkut pillaasarnermik inatsisip aamma eqqartuussisarnermik inatsisip allanngortinneqarneri pillugit inatsisikkut nr. 1552-ikkut, 21. december 2010-imeersukkut (Ilunaarutit toqqukat pigisallu nalillit allat nanineqarnissaat, arsaarinninnermik piunasaqaatip pisoqalisoornera, isertuussamik arsaarinninneq il.il.) allanngortinneqarpoq, taamaalilluni eqqartuussissuserisoq tamatuma kingorna isumannaallisaaikkut akuerisaasunit eqqartuussissuserisunit immikkut ittunit, illersuisut allagaatinik

takunnissinnaatitaanerannit killiineq pillugu suliani atorfinitsinneqartut akornannit ivertinneqassammat.

Folketingstidende 2010-11, A, L 54 saqqummiunneqartoq, qupperneq 14 malillugu suliani pillaasarnermik inatsimmi kapitali 12-imi imaluunniit 13-imi malittariassat unioqqutinneqarnerannik tunngassuteqartuni, inuup nakkutigineqarani inummut allamut nalunaaruteqarsinnaatitaaneranut akuliunnermi eqqartuussissuserisut ivertinneqartut kinaassusaasa isertuunneqarnissaasa qulakkeerneqarnissaa siunertaralugu Politiets Efterretningstjeneste-mit kajumissaarinnikkut allanngueq taanna pimmat, 2010-mi inatsisip allanngortinneqarnissaanut piareersaataasumik suliani takuneqarsinnaavoq.

Illersuisup allagaatinik takunnissinnaatitaanerannit atortussat ilanngunneqannginnissaat pillugu eqqartuussiviup aalajangiinera, 2003-mi inatsisip allanngortinneqarnerata kingorna aalajangiinnikkut aalajangerneqartalerpoq aamma aalajangeqqitassanngortinneqarsinnaalluni. Illersuisup allagaatinik takunnissinnaatitaanerannik killiliinissaq pillugu aalajangerneq piffissamut killiligaanngippat, illersuisup allagaatinik takunnissinnaanerani atortussat pineqartut ilanngunneqannginnissaat suli pissutissaqarnerisooq qulakkeerniarlugu, pingaarnertut isumaqatigiinniarneq sioqqullugu, qajassuutassat oqimaalutarneqarneri nutaamik misilinneqassapput.

Unnerluutiginnittup nalunaarutiginnittulluunniit, kinaassutsiminik isertuusserusuttup, aamma taassumap isumannaatsuunissaa eqqarsaatigalugu kinaassusaata suliami ilaatinneqanngitsup, tamanna inuup pingajuusup inuuneranut peqqissusaanulluunniit eqqarsaatiginninnermik tunngaveqarpat, tamanna pillugu politiini tjenestemandip killisiorneqarnerani kinaassusaata paasineqarnissaa pinngitsoortinniarlugu politiini tjenestemandip eqqartuussivimmi nassuiaanissaani itigartissinnaagaa, soorlu aamma pineqartup kinaassusaa pillugu paasissutissat suliami ilaanngippata ilisimannittoq ilisimannittutut illersuisumit aggersagaasinnaanngitsoq imaluunniit illersuisup allagaatinik takunnissinnaatitaanerannit ilanngunneqassanngitsoq, periarfissaanissaa pingajuattut eqqunneqarpoq.

2.1.2.2. Eqqartuussisarnermik inatsisip inatsisillu allat allanngortinneqarneri pillugit inatsisikkut (Eqqartuussisarnermi tamanut ammanissaq) nr. 215-ikkut, 31. marts 2004-imeersukkut qallunaat eqqartuussisarnermik inatsisaanni eqqartuussivimmi suliat ingerlasut aamma naammassineqarsimasut pillugit allagaatinik takunnissinnaatitaaneq pillugu malittarisassat arlallit ilanngunneqarput.

Folketingstidende 2003-04, ilanngussaq A, qupperneq 598 malillugu, eqqartuussiviit sulisarnerat pillugu sapinngisamik annerpaamik ammasuunissap paasisimasaqarnissallu

qulakkeerneqarnissaa qulakkeerniarlugu, eqqartuussivinni allagaatinik takunnissinnaatitaanerup annertusarneqarnissaa aamma allakkut inuit sakkutuujunngitsut pillugit suliani pillaatissiisoqarnissaanillu suliani tamanut ammasumik pisoqarnissaa pillugu eqqartuussisarnermik inatsisip nutarterneqarnissaa inatsisip allanngortinneqarnerani siunertaasoq, inatsisip allanngortinneqarnissaanut piareersaataasumik suliani takuneqarsinnaavoq.

Pingaarnertut immikkoortut tulliuuttut inatsisip allanngortinneqarnerani imaritinneqarput:

Inuit sakkutuujunngitsut pillugit sulianut pillaatissiisoqarnissaanillu sulianut eqqartuussutit eqqartuussiviullu aalajangiineri pillugit nalinginnaasumik allagaatinik takunnissinnaatitaaneq eqqunneqarpoq, tamannalu allagaatinik takunnissinnaatitaaneq pillugu malittarisassanut manna tikillugu atuuttunut naleqqiullugu annertuumik annertusiinertut takussutissaavoq, tassani allagaatinik takunnissinnaatitaaneq inatsisitigut tamatumani soqutigisaqarnermik taaneqartartoq allagaatinik takunnissinnaatitaanermi piumasaqaataavoq.

Takussutissiani eqqartuussiviullu aalajangiinerini allagaatinik takunnissinnaatitaaneq eqqarsaatigalugu piumasaqaat »inatsisitigut tamatumani soqutigisaqartut« pillaatissiisoqarnissaanik suliani eqqunngitsuliorfigineqartup allagaatinik takunnissinnaatitaanera pillugu malittarisassamik ilaneqarpoq, taamaalillunilu eqqunngitsuliorfigineqartup allagaatinik takunnissinnaatitaanera annertusineqarluni.

Tamatuma peqatigisaanik pillaatissiisoqarnissaanik suliani naammassineqareersuni allagaatinik takunnissinnaatitaaneq pillugu malittarisassat piuminarnerulersinneqarput. Pasineqartup allagaatinik takunnissinnaatitaanera aamma inunnut allanut »inatsisitigut tamatumani soqutigisaqartut«-nut tamanna atuuppoq. Manna tikillugu malittarisassat eqqartuussisarnermik inatsisip pisortallu ingerlatsinerat pillugu inatsisip akornanni siammarsimapput, aamma malittarisassat taakku akornanni arlalinnik assigiinngissuteqarpoq. Eqqartuussisarnermik inatsimmi pillaatissiisoqarnissaanik suliat naammassineqareersut pillugit allagaatinik takunnissinnaatitaaneq pillugu malittarisassat assigiissaartut inatsisip allanngortinneqarneratigut aalajangersarneqarput.

Pillaatissiisoqarnissaanik suliani ilungersunanninnerusuni pasisap, illersuisoqanngitsup, allagaatinik takunnissinnaatitaanera inatsisitigut tunngavissinneqarpoq.

Oqartussaasut, naak taamaaliortussaanngikkaluarlutik, nipangiussisusaatitaaneq akornutaatinnagu, paasissutissanik tunniussisinnaanerannik tunngavik aammattaaq inatsisitigut tunngavissinneqarpoq.

Eqqartuussutini eqqartuussiviullu aalajangiinerini annertunerusumik allagaatinik takunnissinnaatitaanermut illuatungiliussatut, eqqartuussummi eqqartuussiviulluunniit aalajangiinerani kinaassutsit isertuunneqarsimangippata, pillaatissiisoqarnissaanik suliani eqqartuussutit eqqartuussiviulluunniit aalajangiinerisa tamanut saqqummiunneqarnissaasa inertequtigineqarnerat naammassineqarpoq.

2.1.2.3. Danmarkimi 2003-mi 2004-imilu inatsisip allanngortinneqarneranut tunngaviusut, aamma Kalaallit Nunaannut atuuttariaqartut, Inatsiseqarnermut ministereqarfik isumaqarpoq.

Illuatungaani suliap aalajangiivigineqarnissaanut unnerluunneqartup uppernarsaatinik pingaaruteqartunik pissarsisinnaanera attorneqartinnagit, pinerluttoqarsimaneranik paasiniaanerit ingerlasut, immikkut ittumik pinerluttoqarsimaneranik paasiniaanermi periaatsit il.il. isertuunniarlugit, illersuisup pasineqartulluunniit imaluunniit unnerluunneqartup paasissutissanik pisinnaanerisa killilerneqarnissaat aamma Kalaallit Nunaanni politiinut ilungersunartumik pinerluttuliornerit pinerluttoqarsimaneranik paasiniaavigineqarnissaannut periarfissaannut taamaalilluni tamanna pingaaruteqarpoq.

Illuatungaani aamma Kalaallit Nunaanni inuiannut nutaaliaasunut inuit inatsisitigut illersugaanerannik- aamma inuiaqatigiinnut tv, radio, internet il.il. aqqutigalugit paasissutissarpassuarnik pissarsisinnaanermik pingaartitsisunut, eqqartuussisarnermi annertuumik tamanut ammasuunissaq pingaarutilimmik isumaqarpoq, soorlu aamma eqqartuussiviit suliaqartarnerat pillugu innuttaasunut tusagassiuutinullu annertunerusumik ammassuseqarneq inuit amerlanerit eqqartuussiveqarnermut tatiginninnerannut aamma nakkutigineqarnissaanut piumasqaataasoq.

Taamaammat eqqartuussisarnermi inatsit, Danmarkimi ukiut 20-it qaangerlugit malittarisassanik atuuttunik tunngaveqartoq, qallunaat eqqartuussisarnermik inatsisaanni allagaatinik takunnissinnaatitaaneq pillugu malittarisassanut tulluurtunik nutarterneqartariaqartoq Inatsiseqarnermut ministereqarfik isumaqarpoq.

Qallunaat eqqartuussisarnermik inatsisaanni allagaatinik takunnissinnaatitaaneq pillugu malittarisassat allanngortinneqarnerat, eqqartuussisarnermik inatsisip allanngortinneqarnera pillugu (ilisimannittut illersorneqarnerisa annertusineqarnera) inatsisikkut nr. 709-kkut, 8. juni 2018-imeersukkut naammassineqartoq, atanermi tassani Kalaallit Nunaanni eqqartuussisarnermik inatsimmi eqquttariaqartoq, Inatsiseqarnermut ministereqarfik isumaqarpoq.

Qallunaat eqqartuussisarnermik inatsisaanni inatsimmik allanngortitsinermi tassani illersuisunut peqqussuteqartarneq allanngortinneqarpoq, taamaalilluni ilisimannittup

isumannaatsuunissaanik qajassuussineq, ilisimannittup najugaa atialuunniit, atorfia najugaalu pillugit paasissutissanik ingerlatitseqqinnginnissaa pillugit illersuisup peqquneqarnissaanut tunngaviliisinaanera erseqqissumik takuneqarsinnaaleroq. Pisuni pingaarnertut isumaqatigiinniarnep nalaani paasissutissat taaneqartut unnerluunneqartumut nalunaarutigineqannginnissaat pillugit eqqartuussivimmuut unnerluussisussaataasut noqqaassuteqassamaarneranni, politiit periarfissaq taanna atussagaat siunertarineqarpoq.

Ataani imm. 2.10 malillugu pingaarnertut isumaqatigiinniarnep nalaani pisut ilaanni ilisimannittup kinaassusaata unnerluunneqartumut isertuunneqarsinnaanera inatsisissat siunnersuummi siunnersuutigineqarmat, Danmarkimi 2018-imi inatsisip allanngortinneqarnerasut pisumi, pinerluttoqarsimaneranik paasiniaanerup nalaani unnerluunneqartup allagaatinik takunnissinnaatitaanera pillugu malittarisassat erseqqissaavigineqartariaqarput.

Kisianni allagaatinik takunnissinnaatitaaneq pillugu qallunaat eqqartuussisarnermik inatsisaanni, pisortat ingerlatsinerat pillugu inatsisip aamma eqqartuussisarnermik inatsisip allanngortinneqarnera pillugu inatsisikkut nr. 638-ikkut, 12. juni 2013-imeersukkut (Allannguutit tamanut ammasumik pisortat ingerlatsinerat isigalugu) naammassineqartukkut, malittarisassat allanngortinneqarnerisa massakkuugallartoq ilanngunneqarnissaat Inatsiseqarnermut ministereqarfiup tunngavissaqartinngilaa.

Paasitinneqarsinnaatitaaneq pillugu inatsimmut nutaamut aamma taassuma malitsigisaanik pisortat ingerlatsinerannut inatsimmi allannguineranut allannguutit taakku qanittumik ataqatigiipput, aamma paasitinneqarsinnaatitaaneq pillugu inatsit nutaaq imaluunniit taassuma kingunerisaanik pisortat ingerlatsinerat pillugu inatsimmi allannguutit Kalaallit Nunaannut atuutilersinneqanngillat.

Allagaatinik takunnissinnaatitaaneq pillugu qallunaat eqqartuussisarnermik inatsisaannik taama tulleriillutik, 2003-imi, 2004-imi aamma 2013-imi allannguinerit pingasut taakku, piffissami 2003-miit 2013 ilanngullugu qallunaat eqqartuussisarnermik inatsisaanni allannguinerit pillugit allakkiami ataatsimut Kalaallit Nunaanni eqqartuussiveqarneq pillugu Siunnersuisoqatigiinnut saqqummiunneqartumi ilaammata maluginiarneqassaaq. Isumaliutiginninnerit ingerlaqqinnissaat siunertaralugu, inatsimmi allannguinerit pillugit allakkiap Inatsiseqarnermut ministereqarfimmut Kalaallit Nunaannilu Namminersorlutik Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

2018-imi Inatsiseqarnermut ministereqarfiup erninnaartumik naliliinera malillugu eqqartuussisarnermik inatsimmi § 340, imm. 4-p erseqqissaavigineqarnissaa

pisariaqanngitsutut isigineqarpoq, tassami pinerluttulerinermik suliani ilisimannittup kinaassusaa pasineqartumit amerlanertigut pinngitsoorani ilisimaneqartarmat imaluunniit eqqoriarneqarsinnaammat, 2018-imi inatsimmik allannguinerup Kalaallit Nunaanni eqqartuussiveqarnermik inatsimmi eqqunneqarnissaa, Kalaallit Nunaanni eqqartuussiveqarneq pillugu Siunnersuisoqatigiit innersuussutigisimannngimmassuk aammattaaq maluginiarneqassaaq.

Kisianni taaneqareersutut pingaarnertut isumaqatigiinniarnep nalaani ilisimannittup kinaassusaata isertuunneqarnissaa pillugu malittarisassanik massakkut siunnersuuteqartoqarpoq, taamaammallu pinerluttoqarsimaneranik paasiniaanerup nalaani aamma isertuussinissaq periarfissaasariaqarpoq.

2.1.2.4. Qallunaat eqqartuussisarnermik inatsisaanni malittarisassanik tulluurtunik, allagaatinik takunnissinnaatitaaneq pillugu eqqartuussisarnermik inatsimmi §§ 100-imi, 101-imi aamma 340-imi malittarisassat atuuttut malittarisassanik nutaanik taarserneqarnissaat inatsisissatut siunnersuutigineqarpoq.

Pinerluttulerinermik suliani eqqartuussutini aalajangiinernilu kinaassutsit ilisarnarunnaarseqqaarnagit tamanut issuarneqarnissaat nalinginnaasumik inerteqqutigineqassasoq tamatum peqatigisaanik siunnersuutigineqarpoq. Aalajangiinerup oqaasertalernertarpiaata issuarneqarnissaanut inerteqquteqarneq taamaallaat tunngassuteqarpoq, aamma pinerluttulerinermik suliat allatut eqqartorneqarnerat, matumani peqataasut atii pillugit paasissutissaqarpat paasissutissat ilanngullugit, allanngortinneqassanngitsut siunnersuutigineqarpoq.

Illersuisup pasineqartullu allagaatinik takunnissinnaatitaanerisa malitsigisaanik inuup kinaassusaa pillugu paasissutissat suliami ilaangippata, inuk ilisimannittut qaaqquneqarsinnaanngitsoq, aamma inuup taamaattup kinaassusaa pillugu politiini tjenestemandi ilisimannittut nassuiaanissaanik piumaffigineqarsinnaanngitsoq, aammattaaq siunnersuutigineqarpoq. Nalunaarutiginnittartut kinaassutsimik isertuussit siunnersuummi isiginiarneqarput. Unnerluussisussaataasut nalunaarutiginnittartumit paasissutissat uppersaatit atorumagunikku, pineqartoq ilisimannittut qaaqquneqarsinnaavoq qaaqquneqassallunilu.

Eqqartuussisoq, atortussanik, illersuisup pasineqartullu allagaatinik takunnissinnaatitaanerannit ilanngunneqanngitsunit saqqummiuffigineqartoq, pisuni attuumassuteqartuni unnerluunneqartup pisuunera pillugu apeqqutip aalajangiiffigineqarnerani ilaasinnaatitaassanngitsoq, aammattaaq siunnersuutigineqarpoq.

Inatsisissatut siunnersuummi § 1, nr. *-it innersuussutigineqarpoq (§ 50, imm. 3-miit 5 ilanngullugu siunnersuutigineqartut, § 61 f, imm. 2-p allanngortinneqarnera, §§ 101-miit 102 a-mut siunnersuutigineqartut, § 142, imm. 2-p allanngortinneqarnera, §§ 339 a-miit 339 c-mut siunnersuutigineqartut, § 340-p allanngortinneqarnera, § 341, imm. 2-mut siunnersuutigineqartoq, § 344, imm. 5-imit, § 345, imm. 3-mut, aamma § 445 a-imut siunnersuutigineqartut, § 474, imm. 3-p allanngortinneqarnera, § 485 a-mut siunnersuutigineqartoq aamma § 493 h, imm. 6-ip allanngortinneqarnera), aamma § 2-mut (pisortat ingerlatsinerat pillugu inatsimmi § 18-p allanngortinneqarnera).

2.2. Oqarasuaatip angallattakkap ikumasup, pasineqartumit atorineqartutut isumaqarfigineqartup sumiissusia pillugu paasissutissanik pissarsiniarnermik suliaqarneq

2.2.1. Inatsisit atuuttut

Pasineqartumik nakkutiginninneq assigiinngitsunik iluseqarsinnaavoq aamma akuliunnermik annertunerusumik annikinnerusumilluunniit pissuseqarsinnaalluni. Akuliunnerup sakkortussusaanut nakkutiginninnerup nalaani pasineqartup sumiinnera apeqqaataassaaq, aamma tassunga atatillugu politiit atortorissaarutininik sorlernik atuinerat apeqqaataassalluni. Uuttuutip illuatungaani inummik isiinnarmik, sumiiffimmi ajornanngitsumik tikinneqarsinnaasumi, nakkutiginninneq taaneqarsinnaavoq, tamatumalu peqatigisaanik toqqorsimasumik, sakkumit ungasianit aqutamit inummik najukkaminniittumik nakkutiginninneq, uuttuutip illuatungaaniittutut taaneqarsinnaasoq.

Nakkutiginninnerit ilaasa ilusaat pillugit eqqartuussisarnermik inatsit § 399-imi aalajangersakkanik imaqarpoq.

Nakkutiginninneq pillugu eqqartuussisarnermik inatsimmi aalajangersakkat taamaallaat inunnik, imaaliallaannaq tikinneqarsinnaanngitsuniittunik, isigisanut tunngasunut sakkuutit atorlugit, assersuutigalugu qinngutit imaluunniit assiliivik atorlugit politiit nakkutiginninnerannik imaqarpoq. Inunnik sumiiffinni tikikkuminartuniittut nakkutigineqarnerat, taamaalilluni aalajangersakkami ilaatinneqanngillat, uani nakkutiginninnermut atatillugu isigisanut tunngasunut sakkuutit atorineqarsut apeqqaataatinneqanngilaq. Nakkutiginninneq atortorissaarutininik taamaattunik atuinani suliarineqarpat, inummik imaaliallaannaq tikinneqarsinnaasumiinngitsumik nakkutiginninneq eqqartuussisarnermik inatsisip aammattaaq malittarisassiunngilaa. Nakkutiginninnerit taamaattut pinerluttulerineq pillugu inatsiseqartitsinnermut atatillugu eqqartuunneqarnissamut imaluunniit pillagassanngortitsinissamut suliasanngortitsitsinnermi pinngitsaaliilluni akuliunnertut pissuseqanngillat.

Eqqartuussisarnermi inatsimmi § 399, imm. 1-imiit 3 ilanngullugu nakkutiginninnerit ilusaat pingasut annerusumik minnerusumilluunniit erseqqissarneqartutut pissusillit malittarisassiuunneqarput.

Pisuni inuk akuliuffigineqartoq imaaliallaannaq tikiqqarsinnaasumiinngippat, aamma nakkutiginninneq qinngutit imalluunniit sakkuut alla atorlugu pippat, § 399, imm. 1 malillugu nakkutiginninneq ilaatinneqarpoq. Akuliunneq pinerluttoqarsimaneranik paasiniaanermut pingaaruteqartumik kinguneqarnissaa isumaqarfigineqarpat (ilisarnaatit pillugit piunasaqaat), aamma pinerluttoqarsimaneranik paasiniaaneq, inatsimmik unioqutitsinermik, inatsit malillugu inissiisarfimmi inissinneqarnissamik (pinerluttuliortoqarsimaneranik piunasaqaat) kinguneqarsinnaappat, nakkutiginninneq taamaattoq suliarineqarsinnaavoq.

Inummik, imaaliallaannaq tikiqqarsinnaanngitsuniittumik nakkutiginninneq, tv-kkut assiliivik avataaniit aqunneqartoq imaluunniit automatiskiusumik ingerlasoq, assiliivik imaluunniit sakkuut assingusoq ikiorsiullugu suliarineqartoq, § 399, imm. 2-mi malittarisassiuunneqarpoq. § 399, imm. 1-imi nakkutiginninneq assigalugu, akuliunnerup pinerluttuliortoqarsimaneranik paasiniaanermut pingaarutilimmik kinguneqarnissaa piunasaqaataavoq, kisianni pinerluttoqarsimaneranik paasiniaaneq ingasattumik inatsimmik unioqutitsinermik tunngassuteqarpat, imm. 2 malillugu akuliunneq suliarineqarsinnaavoq. Folketingstidende 2007-08 (katersat aappaat), ilanngussaq A, qupperneq 1341 malillugu eqqartuussisarnermik inatsimmut piareersaataasumik suliaqarnermi takuneqarsinnaavoq »ingasattumik inatsimmik unioqutitsineq«-mi inatsimmik unioqutitsinerit, piviusumik pineqaatissinermik kinguneqarnissaannik naatsorsuutigineqartut, iliuusereriikkanut kinguneritittakkat sakkortusiartortinneqarneranni akiliisitsissummit sakkortunerusutut paasineqassasut.

Inuit illumiittut imaluunniit illumi inini allaniittut, tv-kkut assiliivimmit avataanit aqunneqartumit imaluunniit automatiskiusumik ingerlasumit, assiliivimmit sakkuumilluunniit assingusumit imaluunniit sakkuummit, illumi imaluunniit illumi inimi allami atorneqartumit nakkutillivigineqarnerat, eqqartuussisarnermik inatsimmi § 399, imm. 3-mi malittarisassiuunneqarpoq. Nakkutiginninnermut taamaattumut tulliuuttut piunasaqaataapput, 1) suliami uppersaataip akuliunnermi pissarsiarineqarsinnaanera aalajangersimasumik pissutissaqartinneqartutut isumaqarfigineqartoq, 2) pinerluttoqarsimaneranik paasiniaanermi akuliunneq pingaaruteqartutut isumaqarfigineqartoq (ilisarnaatit pillugit piunasaqaat), aamma 3) pinerluttoqarsimaneranik paasiniaaneq immikkut ittumik ingasassusilimmik inatsisip unioqutinneqarneranik, inuit inuunerannik atugarissaarnerannilluunniit imaluunniit inuiaqatigiinni naleqartitanut pingaaruteqartunut navianartorsiortitsisimasoq (pinerluttoqarsimaneranik piunasaqaat). »Immikkut ittumik inatsisip unioqutinneqarnera« nalinginnaasumik inatsisinik

unioqqutitsinertut, tassani piumasaqaatitaqanngitsumik inissiisarfimmut inissinneqarnissamik sivirusumik sivirusussilimmik eqqartuunneqarnissaq piviusumik naatsorsuutigineqartariaqartoq, eqqartuussisarnermik inatsimmut piareersaataasumik suliani takuneqarsinnaavoq.

Akuliunnermut siunertarineqartumut, suliap pingaaruteqarneranut aamma kanngunarsagaaneq ajoquserneqarnerlu, akuliunnerup ajoqusiineratut isigineqartoq, § 399, imm. 5 malillugu naleqqutinngitsuussappat, akuliunneq suliarineqassanngitsoq, eqqartuussisarnermik inatsimmi § 399 malillugu nakkutiginninnernut ilutsinut tamanut nalinginnaasumik piumasaqaataavoq.

Eqqartuussisarnermik inatsimmi § 399, imm. 1 malillugu nakkutiginninnissamik aalajangerneq, politiinit aalajangiiffigineqassaaq. § 399, imm. 2 imaluunniit 3 malillugu nakkutiginninnernut kisianni inuup nakkutigineqarani inummut allamut nalunaaruteqarsinnaatitaanera pillugu malittarisassat aamma taakku atuupput, ima paasillugu, § 391 malillugu § 399, imm. 6 malillugu politiit eqqartuussiviup aalajangiinissaa utaqqissappassuk, akuliunnerup siunertaa maangaannartinneqassanngippat, sioqqutsilluni eqqartuussivimmit akuliunneq akuerineqaqqaarsimasussaavoq.

Inuup nakkutigineqarani inummut allamut nalunaaruteqarsinnaatitaaneranut akuliunnerit pillugit malittarisassat taamatuttaaq nakkutiginninnermi atorneqassasut eqqartuussisarnermik inatsimmi § 399, imm. 6-p aammattaaq malitsigaa, matumani ilaatigut § 392 malillugu illersuisumik ivertitsineq, aamma § 396 malillugu akuliunnerup naammassineqarnera pillugu nalunaaruteqarnissaq pillugu malittarisassaq ilanngullugu.

Inuup oqarasuaataata angallattakkap sumiinneranik paasissutissat atorlugit, politiit pasineqartumik nakkutiginninnissaannut piumasaqaatit suut pillugit piumasaqaataassanersut pillugit apeqqutinik immikkut ittunik imaqartunik, imaluunniit attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasunit, politiinut paasissutissanik taamaattunik tunniussissallutik pissutissaqarnerat imaluunniit pisussaannerat pillugit, ullumikkut eqqartuussisarnermik inatsit aalajangersakkanik imaqanngilaq.

Qallunaat eqqartuussisarnermik inatsisaanni § 791 a-mi taamanikkut malittarisassap assigisaa malillugu politiit paasissutissanik taamaattunik pissarsinerat nakkutiginninnertut pissuseqarnersoq pillugu apeqqut, suliami Ugeskrift for Retsvæsen 2003-imi, qupperneq 137-imi suliarineqarpoq. Suliami tassani inuup, tillinniarsimasutut pasineqartup isertortumik malinninneqarnissaata aallartinneqarnissaanik politiit kissaateqarput. Taaneqartut taakkorpiaat siunertaralugit, pasineqartup oqarasuaataasa angallattakkat napparutini sorlarni nutarterneqartarnerat, napparummit sumut sammiveqarnerat

napparummillu ungasissusaat pillugit nalunaarasuartaaserinermik ingerlatseqatigiiffinnit paasissutissanik politiit pissarserusussimapput, taamaalilluni taanna qimaassagaluarpas sumiissuseqqinneqarnissaa periarfissaaniassammat.

Paasissutissat qallunaat eqqartuussisarnermik inatsisaanni § 791 a, imm. 3-mi (Kalaallit Nunaanni eqqartuussisarnermik inatsimmi § 399, imm. 3-p assigisaani) ilaatinneqartut, aamma pisumi tassani piviusumi politiit piumasagaataata akuerineqarnissaa tunngavissaqanngitsoq illoqarfimmi eqqartuussisut aalajangerpaat. Kisianni politiit eqqartuussiviup aalajangiinera pissarsiareqqaarnagu paasissutissat taakku pissarsiarisinnaasimagaat nunap eqqartuussisuuneqarfiata aalajangerpaa. Paasissutissat kissaatigineqartut attaveqatigiinnernut attaveqarfiit imaluunniit nalunaarasuartaatitigut kiffartuussinerit pillugit paasissutissaataannik imaqartut, taakkulu nalunaarasuartaatitigut attaveqatigiinneq pillugu unammilleqatigiittussaaneq pillugu inatsimmi § 13, imm. 3-imi ilaatinneqartut, aamma politiinut ingerlatitseqqinneq imaaliillaanaq pissutissaqavissutut isigineqarneqarsinnaanngitsoq, eqqartuussiviit qullersaata oqaatigaa. Kisianni sumiissutsit pillugit paasissutissat pillugit ingerlatitseqqinneq pillaasarneq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliassanngortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqartarnerat pillugu eqqartuussisarnermik inatsimmi malittarisat periarfissaliissuteqarnerannik isigisariaqarmat, imaluunniit sumiissutsit pillugit paasissutissat ingerlateqqinneqarnerat taamatut akuliunnermut naligiissinneqartariaqarmat, ingerlatitseqqinneq pisinnaavoq. Pasineqartup politiinit isertortumik malinneqarneranut atatillugu paasissutissat atorneqartussaasimapput. Taamaammat qallunaat eqqartuussisarnermik inatsisaanni § 791 a malillugu akuliunneq nakkutiginninnermut naligiissinneqartariaqartoq, eqqartuussiviit qullersaata aalajangerpaa. Paasissutissat inuup angalaarnerata summinnera eqqorluartumik sumiissusersisinnaanngimmassuk, tassani illumut imaluunniit illumi ininut allanut sumiissusersisinnaanagu, akuliunneq eqqartuussisarnermik inatsimmi § 791 a, imm. 2-mi, aamma imm. 3-unngitsumi ilaatinneqartoq, eqqartuussiviit qullersaata aalajangerpaa. Aalajangersakkap taassuma piumasagaatai naammassineqarsimappata, taamaammat paasissutissanik taakkuninnga ingerlatitseqqinneq pissutissaqartoq, aalajangiinikkut aalajangerneqarsinnaavoq.

Qanoq annertutigisumik akuliunnerup pinerluttulerineq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliassanngortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut pinngitsaaliilluni akuliunnertut pissuseqarnera pillugu apeqqummut tunngatillugu, politiit naleqqiinnermut sakkuutinik taaneqartunik atuinerannut naleqqiineq tikkuarneqarsinnaavoq.

Nakkutiginninneq pillugu aalajangersakkap qallunaat eqqartuussisarnermik inatsisaanni § 791 a-mik ilanngussinissamut tunngaviliisumut, inatsisissatut siunnersuummut atatillugu, pinerluttoqarsimaneranik paasiniaanermi periaatsit allat, matumani naleqqiinnermut sakuutit ilanngullugit, inatsisitigut malittarisassiuunneqartariaqarnersut Inatsiseqarnermut ministereqarfiup ilaatigut isumaliutersuutigaa. Naleqqiineq ima paasineqassaaq, politiit naleqqiinnermut sakuutinik tigussaasumut ikkussinerat, assersuutigalugu ungasissumiit tigussaasup malinneqarnissaa siunertaralugu biilimut, pasineqartup illuu, naleqqiinnermut sakuutinik ikkussinerat.

Erniinnaartumik isiginninneq aallaavigalugu naleqqiineq nakkutiginninnermut aamma anngiortumik naalaarnermut ilaatigut assigiissuseqartoq, Inatsiseqarnermut ministereqarfiup tassunga atatillugu maluginiarpa, tassami paasissutissatut politiit najuunneranni pissarsiarineqartartut nalinginnaasumik naatsorsuutigineqartartut, sakuutit tekniskiusut atorlugit matumuuna ilisimasat pissarsiarineqarsinnaanngormata. Kisianni assinik immiussinissamut imaluunniit oqaloqatigiinnernik anngiortumik tusarnaarnissamut naleqqiineq periarfissiinngitsoq, aamma tekniskiusumik atortorissaarutit atorlugit naleqqiineq taamaammat »isertortumik malinninneq«-tungajattut pissuseqartoq, ministereqarfiup tamatuma kingorna erseqqissarpa.

Taamaammat pinerluttoqarsimaneranik paasiniaanermi atorneqartartunut allanut, eqqartuussisarnermik inatsimmi malittarisassiuunneqartunut naleqqiullugu, akuliunneq ima pingaaruteqartiginngitsutut aamma akuliuffiutiginningsutut isigineqarpoq, aamma politiit naleqqiinnermik atuinerat pillugu inatsisitigut malittarisassiuinissap siunnersuutigineqarnissaa pissutissaqanngitsoq Inatsiseqarnermut ministereqarfik taamaalilluni isumaqarpoq. Folketingstidende 1998-99, ilanngussaq A, qupperneq 840 innersuussutigineqarpoq.

Nakkutiginninnissaq pillugu malittarisassat pillugit qallunaat eqqartuussisarnermik inatsisaanni § 791 a-mut piareersaataasumik suliani aamma tassunga atatillugu Vestre Landsret-ip aalajangiinera innersuussutigineqarpoq, tassani politiit naleqqiinnermik atuinerat pillugu apeqqut pineqarpoq. Aalajangiinermi, Ugeskrift for Retsvæsen 1996, qupperneq 1496-imi, issuarneqartumi, pisumi piviusumi tassani, sakuut elektroniskiusumik sumiissusersiutaasoq atorneqartoq pasineqartup biiliata qaavanut ilineqarsimammat, pillaaarneq pillugu inatsiseqartitsinermit atatillugu eqqartuunneqarnissamut imaluunniit pillagassanngortitsinissamut suliassanngortitsinermit atatillugu politiit, unnerluussisussaatitaasunit imaluunniit eqqartuussivinnit inuup kiffaanngissusianut pinngitsaaliilluni akuliunneq pineqanngitsoq, kisiannili tekniskiusumik atortorissaarutit atornerisigut isertorluni malinninneq pineqartoq, nunap eqqartuussisuunneqarfiata aalajangerpa. Tamatuma kingorna aamma, Ugeskrift for Retsvæsen 2003, qupperneq 1599 V malillugu tamanna eqqartuusseriaatsimi atuuttumi tunngavigineqarpoq.

Pisumi, naleqqiinnermut atortunik pasineqartup biiliata iluani ikkussinissamik politiit kissaatiginninneranni, sakkuutit atornerisigut naleqqiineq pineqartoq, ikkussinerlu pillaasarneq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaanngissusianut pinngitsaaliilluni akuliunnertut kinguneqartoq, taamaammallu akuliunneq qallunaat eqqartuussisarnermik inatsisaanni § 791 a, imm. 2-mi ilaatinneqartoq, eqqartuussiviit qullersaata tamatuma kingorna Ugeskrift for Retsvæsen 2000, qupp. 2476-mi naqinneqartoq malillugu aalajangerpaa.

2.2.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.2.2.1. Pillaasarnermik inatsisip, eqqartuussisarnermik inatsisip inatsisillu allat (Pinerliiniartarnerup il.il. akiorniarneqarnerani suliniutit patajaallisarneqarnerat) allanngortinneqarnerat pillugu inatsisikkut nr. 542-ikkut 8. juni 2006-imeersukkut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu politiit atuisinnaanerat, qallunaat eqqartuussisarnermik inatsisaanni § 791 a, imm. 5-imi malittarisassanik ilanngussisoqarpoq.

Akuliunneq pinerluttoqarsimaneranik paasiniaanermut annertuumik pingaaruteqartutut isumaqarfigineqarpat, aamma pinerluttoqarsimaneranik paasiniaaneq inatsimmik unioqquitsinermik, parnaarussivimmi ukiumi 1-imi aamma qaammatillu 6-ilinni taannaluunniit qaangerlugu parnaarunneqarnissamut tunngassuteqarpat, malittarisassaq manna malillugu politiit attaveqatigiinnermi attaveqarfinnik tuniniaasunit imaluunniit nalunaarasuartaatitigut kiffartuussinermik suliaqartunit oqarasuaatip angallattakkap, pasisamit atorneqartutut isumaqarfigineqartup (oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq) sumiissusersineqarnissaa pillugu paasissutissanik pissarsisinnaapput. Eqqartuussiviup aalajangiineranik politiit utaqqinerannik siunertaq maangaannartinneqassanngippat, malittarisassaq malillugu eqqartuussiviup sioqqutsisumik aalajangernera taamaaliornissamut piumasaqaataavoq.

Pinerluttuliortoqarsimaneranik piumasaqaammik minnerpaamik ukiumik 1-mik qaammatinillu 6-inilinnik sivisussusilimmik pillaatissiissuteqarnissaq pillugu qallunaat eqqartuussisarnermik inatsisaat atuitillugu, Kalaallit Nunaanni eqqartuussisarnermik inatsimmi aalajangersakkat assigisaanni pinerluttoqarsimaneranik piumasaqaat »ingasattumik inatsimmik unioqquitsineq« atorneqarmat maluginiarneqassaaq – taannalu ima paasineqassaaq inatsimmik unioqquitsinerit, tassani Folketingstidende 2007-08

(katersat aappaat), ilanngussaq A, qupperneq 1341 malillugu pineqaatissiineruvoq, iliusereriikkanut kinguneritittakkat sakkortusiartortinneqarnerannut iluseq malillugu akiliisitsinermi sakkortunerusoq piviusumik naatsorsuutigineqartariaqartoq.

Pinerliiniartarnerup akiorneqarnissaa pillugu ministereqarfiit akornanni suleqatigiissitat nalunaarusiaanni, oqarasuaatit angallattakkat atorneqarnerini taamanikkut teknikkimi atorneqartumi, napparutit sumiissusaat aqutugalugit oqarasuaatip angallattakkap ikumasup, attaveqatigiinnermut atorneqarnera apeqqutaatinnagu, sumiissusersineqarnissaa periarfissaasoq, qallunaat eqqartuussisarnermik inatsisaanni § 791 a, imm. 5-imi aalajangersakkamut piareersaataasumik suliani takuneqarsinnaavoq. Attaveqatigiissutit aamma kiffartuussissutit elektroniskiusunik, nakkutiginninnissamik aalajangiineq tunngavigalugu siumut sammisumik (ingerlaavartumik), napparutit oqarasuaatinut angallattakkanut atorneqartut sorliit oqarasuaatip angallattakkap attaveqarfiginerai pillugit paasissutissanik politiinut tunniussisarmissaat, suleqatigiissitat innersuussutigivaat. Folketingstidende 2005-06, ilanngussaq A, qupperneq 7193 innersuussutigineqarpoq.

Oqarasuaatip angallattakkap ikumasup sumiinnera pillugu politiit paasissutissanik pissarsinissaat pillugu immikkut ittumik malittarisassanik taamanikkut qallunaat eqqartuussisarnermik inatsisaat imaqqanngitsoq, Inatsiseqarnermut ministereqarfiup tassunga atatillugu taavaa. Pasisamik nakkutiginninneq politiit pissutsinik pillarneqaataasussanik pinerluttoqarsimaneranik paasiniaanerannut sakuuvoq pingaaruteqartoq.

Attaveqatigiinnermi attaveqarfinnik tuniniaasunit imaluunniit nalunaarasuartaatitigut kiffartuussisarnermik suliaqartunit oqarasuaatip angallattakkap pasisamit atorneqartutut isumaqarfigineqartup (oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsinarnermik suliaqarneq) politiit pissarsinnaanissaat pingaaruteqartoq, Inatsiseqarnermut ministereqarfik suleqatigiissitat isumaat assigalugu pingaaruteqartuusoq isumaqarpoq. Oqarasuaatinut angallattakkanut napparutit sorliit, oqarasuaatip angallattakkap pineqartup nutarsaanermi attaveqarfigisai, nutarsaanermi celle sorleq atorneqarsimanersoq, kiisalu – oqarasuaatip angallattakkap attaveqatigiinnermi atorneqarnerani – napparummit qanoq ungasitsigisumi oqarasuaatip angallattakkap inissisimasimanagera pillugu paasissutissat ingammik pineqassapput.

Nakkutiginninnertut ilusilerlugu pisarneq malillugu pinerluttoqarsimaneranik paasiniaanerup atuuffia, taamaaliornikkut nalunaarasuartaatitigut attaveqatigiinnermi teknologii ineriartorneranik aamma, taamanikkut oqarasuaatinik atuilluni attaveqatigiinnermi teknikkikkut periarfissanut naleqqiullugu, annertusineqartutut oqaatigisariaqarpoq. Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsinarnermik suliaqarneq politiit pinerluttoqarsimaneranik paasiniaanerminni atortunik allanik atuinerannut atatillugu

pisimasinnaavoq, aamma pisuni tassani oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsinermik suliaqarneq, oqaatsip imarisaatut immikkoortutut, pinerluttoqarsimaneranik paasiniaanermi annertuumik pingaaruteqarluni pisinnaavoq.

Attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasunit, nakkutiginninnissamik aalajangerneq tunngavigalugu oqarasuaatinut angallattakkanut napparutit sorliit oqarasuaatip angallattakkap ikumasup atassuteqarfiginerai pillugit siumut sammisumik (ingerlaavartumik) politiinut paasissutissanik tunniussissallutik pisussaaffilerneqartariaqarnerat pillugu suleqatigiissitat innersuussutaat, Inatsiseqarnermut ministereqarfiup isumaqatigaa.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq, pasineqartup isertorluni malinneqarneranut atatillugu sulianeqartoq, sulisaatsimi akuliunnertut, Ugeskrift for Retsvæsen 2003, qupperneq 137 H malillugu qallunaat eqqartuussisarnermik inatsisaanni taamanikkut § 791 a, imm. 2-mi atuuttumi nakkutiginninnertut isigineqarsimavoq. Eqqartuussiviit qullersaata aalajangiineratigut, qulaani imm. 2.2.1-imi taaneqartukkut, kisianni pisumut, pasineqartup oqarasuaataa angallattagaq pillugu politiit sumiiffiit pillugit paasissutissanik pissarsiniarnerat, tamatuma peqatigisaanik pineqartumik isertortumik malinninnermut atatillugu pinngilaq.

Pillaasarneq pillugu inatsiseqartitsinermit atatillugu eqqartuunneqarnissamut imaluunniit pillagassanngortitsinissamut suliassanngortitsinermit atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat, qallunaat eqqartuussisarnermik inatsisaanni § 791 a malillugu nakkutiginninnermi ilaatitsineqartoq imaluunniit sanilliunneqartariaqartoq pisumi taamaattumi pineqarnersoq, Inatsiseqarnermut ministereqarfiup isumaa malillugu nalornissutaasinnaavoq. Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pisuni taamaattuni politiit naleqqiinnermut sakkuutinik atuinerrannut arlalinnik assigiinngissuteqartutut taaneqarsinnaavoq. Pisut taakku marluk taamaallutik, pisuni pasineqartup piviusumik isiginnaarneqarnera pinani, aamma attaveqatigiinnerup imaanik tusarnaarneq sularineqarani, politiit »atortorissaarutit tekniskiusut atorlugit isertortumik malinninnerattut« pissuseqartutut nalilerneqarput. Qulaani imm. 2.2.1-imi taaneqartutut, naleqqiinnermut sakkuut pasineqartup biilianut iserniarnermi atorneqanngippat, naleqqiineq Pillaasarneq pillugu inatsiseqartitsinermit atatillugu eqqartuunneqarnissamut imaluunniit pillagassanngortitsinissamut suliassanngortitsinermit atatillugu politiinit, unnerluussisussaataitasunit imaluunniit

eqqartuussivinnit inuup kiffaanngissusianut akuliunnerit aallartinneqarnerattut isigineqanngilaq.

Pinerluttoqarsimaneranik paasiniaanermut tunngatillugu oqarasuaatip angallattakkap napparutinit sorlernit nutarsarneqarsimanersoq pillugu paasissutissanik pissarsinissamik politiit pisariaqartitsinerat, taamaalillunilu oqarasuaatip angallattakkap sumiinnerata paasineqarnera, pisuni – soorlu qulaani taaneqartumi eqqartuussiviit qullersaata aalajangiinerani pisimasumi – aamma pineqartumik isertortumik malinninneq suliarineqarsimasoq, akuerineqarsinnaavoq. Kisianni pisuni, tassani isertorluni malinninneq aallartinneqarsimanani, politiit taamatut pisariaqartitsisinnaanerat eqqarsaatigineqarsinnaavoq. Assersuutigalugu politiit pinerluttoqarsimaneranik paasiniaaneranni pineqartup sumiinnera pillugu tamakkiisumik isiginninnissaq taamaallaat pisariaqartinneqartippasuk, tamatumalu peqatigisaanik pineqartumik taassumalu suliaqarneranik isiginnaarneq pisariaqanngitsoq imaluunniit naleqqutinngitsumik isumalluutunik atuiffiuallaartussaasoq, tamanna pisinnaavoq. Aammattaaq pisut, tassani pasineqartoq ima »isumannaatsuunissaq pillugu misissortorujussuutigivoq«, tamanna sulisaatsimi ajornakusoorluni imaluunniit »assaat atorlugit« pineqartumik isertorluni malinninneq naammassineqarsinnaannani.

Eqqartuussiviit qullersaata aalajangiinera eqqarsaatigalugu aamma pissutsit suut ataanni politiit oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq politiit suliarisinnaaneraat pillugu nalorninissap pinngitsoortinneqarnissaa siunertaralugu, tamanna pillugu eqqartuussisarnermik inatsimmi immikkut ittumik aalajangersakkamik ilanngussisoqarnissaa Inatsiseqarnermut ministereqarfiup pitsaanerpaatippaa. Naak oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq sulisaatsit malillugit pisut ilaanni qallunaat eqqartuussisarnermik inatsisaanni § 791 a-mi nakkutiginninnermut sanilliunneqarsinnaagaluartoq, taamaalilluni akuliunneq taanna pillugu eqqartuussisarnermik inatsimmi immikkut ittumik ilanngussisoqarnissaa Inatsiseqarnermut ministereqarfiup naleqqunnerpaatippaa. Tamanna pinerluttoqarsimaneranik paasiniaanernut allanut atatillugu pinersoq, assersuutigalugu »assaat atorlugit« isertorluni malinninneq, politiit piunasaqaatit erseqqinnerusumik taasat ataanni oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarnermik suliaqarsinnaanerata, matumuuna qulakkeerneqarpoq.

2.2.2.2. Pillaasarnermik inatsisip, eqqartuussisarnermik inatsisip, taartisiaqartitsinissamut akisussaasuuneq pillugu inatsisip aamma tusagassiuisarnermi akisussaassuseqarneq pillugu inatsisip (Eqqissisimanermik akornusiinerit nikanarsaanerillu il.il.) allannortinneqarneri

pillugit inatsisikkut nr. 1719-ikkut, 27. december 2018-imeersukkut oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq pillugu qallunaat eqqartuussisarnermik inatsisaanni § 791 a, imm. 5 allanngortinneqarpoq, tassami aalajangersakkami oqarasuaatip angallattakkap sumiiffia pillugu oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik attaveqatigiinnermi attaveqarfinnik tuniniaasartunit nalunaarasuartaatinillu sullissinermik suliaqartunit pissarsiniarnermik suliaqarneq taamaallaat pineqarunnaarluni aamma oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq suliarineqartoq gps imaluunniit sakuut alla assingusoq inuup angalaarneranik nalunaarsuisartoq atorlugu oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq aamma ilaatinneqalerat.

Pillaasarnermik inatsimmi § 264 b-mi aalajangersakkamik ilanngussisoqarneranut atatillugu inatsimmik allanngineq pivoq, tassani pissutissaqarani gps sakuulluunniit allat atorlugit allap angalaarnerata nalunaarsorneqarnera tassani inertequtigineqalerluni.

Politiit gps imaluunniit sakuut assingusoq atorlugu inuup angalaarneranik nalunaarsuinerat qallunaat eqqartuussisarnermik inatsisaanni § 791 a, imm. 5-imi oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermut assingusoq Inatsiseqarnermut ministereqarfik isumaqartoq, inatsisip allanngortinnissaanut piareersaataasumik suliarineqartuni takuneqarsinnaavoq. Pisuni taakkunani marlunni, inuup angalaarnera siumut isigisumik ingerlaavartumillu malinneqarsinnaasimavoq. Tekniskiusumik periarfissat apeqqutaallutik gps imaluunniit sakkut assingusoq atorlugu inuup angalaarneranik nalunaarsuineq pisut ilaanni, sumiiffissarsiuinerup pisut ilaanni eqqorluarnerusinnaanera pissutigalugu, annertunerusumik sakkortussuseqarsinnaavoq.

Politiit pinerluttoqarsimaneranik paasiniaanerannut ilaatigut atillugu, paasissutissat suliarineqarneranni tamanna pisariaqarpat aamma atsikkutigiippat, politiit taamanikkut gps imaluunniit sakuut assingusoq atorlugu inuup angalaarnera nalunaarsorsinnaavaat. Pasineqartup angalaarnerata nalunaarsorneqarnera imaluunniit inuup allap pasineqartuunngitsup angalaarnerata nalunaarsorneqarnera uani pineqarsinnaapput.

Pasineqanngitsumut gps-imik imaluunniit assigisaanik atuineq pillaasarneq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliassanngortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut

akuliunnerit aallartinneqartarnerat kiisalu pasineqartumut uppersaatinik ujaasinerit suliarineqartussaatiillugit ingammik naleqquttuusinnaavoq. Pinerluttoqarsimaneranik paasiniaanermi iliuutsit taakku arlallit, pinerluttoqarsimaneranik paasiniaanermi iliuutsit pineqartut pilersinneqarnerannut atatillugu politiit sumiiffinnut (assersuutigalugu illunut, allaffinnut assigisaannullu) isersinnaanissaat piumasaqaatigaat. Inip anngiortumik naalaarneqarnissaanik, immikkut ittumik sakkuutit illumi imaluunniit inimi illumiittumi atorineqartut atorlugit, imaluunniit sakkuut ungasissumit aqunneqartoq automatiskiusumilluunniit ingerlasoq atorlugu nakkutiginninnermik imaluunniit isertorluni uppersaatinik ujaasinerimik pilersitsineq uani ilaatigut pineqarsimapput. Pisuni taamaattuni pasineqartumit allaanerusut kisianni sumiiffinnut taakkununga amerlanertigut aamma isersinnaapput, aamma pineqartut taakku politiit suliaqarnerisa nalaanni sumiiffimmut takkuppata aamma pinerluttoqarsimaneranik paasiniaanermi iliuutsit pillugit ilisimasaqalerpata, pinerluttoqarsimaneranik paasiniaaneq ajoqusersinnaavaat.

Pasineqanngitsumik gps atorlugu ujarlugu nanisineq, ilungersunartumik pinerluttuliornerni pinerluttuliortut ujarneqarnerannut atatillugu aamma atorneqarsinnaavoq, assersuutigalugu pinerluttuliortutut pasineqartoq politiit toqqorsimappat. Pisuni taamaattuni politiit ujaasineranni aamma pinerluttoqarsimaneranik paasiniaaneranni, gps atorlugu assersuutigalugu ujarneqartumut qanigisanik, ikinngutinik imaluunniit nalunngisanik ujaasinerup atorneqarsinnaanera pingaaruteqarsinnaavoq, tassami taamatut ujaasineq pasineqartumut ingerlatsisinnaavoq.

Politiit pinerluttoqarsimaneranik paasiniaanerannut tamanna annertuumik pingaaruteqarsimappat, pasineqartut pasineqanngitsullu pillugit gps atorlugu nakkutiginninneq politiit suli periarfissaassasoq, Inatsiseqarnermut ministereqarfik isumaqarpoq.

Inatsiseqarnermut ministereqarfiup isumaa malillugu gps imaluunniit sakkuut assingusoq atorlugu politiit pasineqartup imaluunniit inuup allap angalaarneranik nalunaarsuinerannut piumasaqaatit, eqqartuussisarnermik inatsimmi § 791 a, imm. 5-imi oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermi piumasaqaatit assigissariaqarpat. Inummik imaaliallaannaq tikinneqarsinnaasumiinngitsumik, assiliivimmik assigisaanilluunniit ungasianit aqunneqartumik imaluunniit automatiskiusumik atuilluni nakkutiginninnermut, soorlu § 791 a, imm. 2 malillugu, piumasaqaatit aamma taakkuapput.

Akuliunneq pinerluttoqarsimaneranik paasiniaanerimut pingaaruteqartumik kinguneqarnissaa isumaqarfigineqarpat (ilisarnaatit pillugit piumasaqaat), aamma pinerluttoqarsimaneranik paasiniaaneq, inatsimmik unioqqutitsinerimik, inatsit malillugu parnaarussivimmi ukioq 1 qaammatillu 6 imaluunniit qaangerlugit inissinneqarnissamik

(pinerluttuliortoqarsimaneramik piunasaqaat) kinguneqarsinnaappat, nakkutiginninnermut piunasaqaataassasoq, tamatuma kinguneraa.

Nakkutiginninneq aamma taamanikkut § 791 a attuuttoq malillugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq assigalugit, pasisap imaluunniit inuup allap angalaarneranik gps imaluunniit sakkuut assingusoq atorlugu politiit nalunaarsuinerannut atatillugu nalinginnaasumik atsikkutigiissitsinissaq pillugu malittarisassaq aamma attuuttariaqarpoq, taamaalilluni akuliunnerup siunertaa, suliap pingaaruteqassusia aamma kanngunarsagaaneq ajoquserneqarnerlu, akuliunnerup akuliunnermik eqqorneqartumut ajoqusiisimamera, taamanikkut § 791 a, imm. 7 atuuttoq malillugu naleqqutinngitsumik akuliunnerusimappat, akuliunneq suliarineqarsinnaassanngilaq.

Gps imaluunniit sakkuut assingusoq atorlugu pasineqartup imaluunniit inuup allap angalaarnerata politiinit nalunaarsorneqarnerata aallartinneqarnissaa pillugu aalajangiineq, eqqartuussivimmit aalajangerneqartariaqaraluartoq Inatsiseqarnermut ministereqarfik aammattaaq isumaqarpoq. Pisoqarsinnaavoq, tassani eqqartuussivimmit aalajangiineq utaqqeqqaanngikkaluarlugu, gps imaluunniit sakkuut assingusoq atorlugu inuup angalaarneranik nalunaarsuinissap aallartinneqarnissaanik politiit pisariaqartitsilersinnaallutik. Akuliunneq suliariniarlugu politiit aalajangiisinnaasut tamatumalu kingorna akuliunneq eqqartuussivimmut akuereqqullugu saqqummiullugu, tamatuma kingorna siunnersuutigineqarsimavoq. Aamma taanna oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermut malittarisassat taamanikkut atuuttut aamma taassuma assigaa.

§ 791a, imm. 5 periarfissaliissusiullugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup naammassineqarnerata kingorna, akuliunnermut sammitinneqartumut nalunaaruteqarneq suliarineqartussaavoq. Inatsiseqarnermut ministereqarfiup isumaa malillugu gps imaluunniit sakkuut assingusoq alla atorlugu pasisap inuulluunniit allap angalaarneranik politiit nalunaarsuinerannut atatillugu assigisaa aamma atuuttariaqaraluarpoq. Aamma gps imaluunniit sakkuut assingusoq alla atorlugu pasisap inuulluunniit allap angalaarneranik politiit nalunaarsuinerat pillugu suliani inummut pineqartumut eqqartuussissuserisumik ivertitsisoqarnissaa Inatsiseqarnermut ministereqarfiup aammattaaq eqqortuunerpaasora.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu taamanikkut

aalajangersakkap atuuttup, eqqartuussisarnermik inatsimmi § 791 a, imm. 5 malillugu attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasunit oqarasuaatip angallattakkap sumiissusersineqarnissaa pillugu paasissutissanik pissarsinertut iluseqartumik, aamma pineqartoq pasineqartumut, assartuummut tassunga imaluunniit illumut soorlu pasisatut attuumassuteqarpat, politiit allatut iliorlutik gps imaluunniit sakkuut assingusoq alla atorlugu pisineqartup inuulluunniit allap angaalaarneranik nalunaarsuisinnaanerisa aamma ilanngunneqarnissaannut annertusineqarnissaa tamanna tunngavigalugu siunnersuutigineqarsimavoq.

Folketingstidende 2018-19 (katersat siulliit), A, L 20 taamatut saqqummiunneqarnermisut, quppernerit 15-imiit 17 ilanngullugu innersuussutigineqarput.

2.2.2.3. Politiit eqqartuussiviup aalajangiineratigut gps imaluunniit sakkuut assingusoq atorlugu inuup angalaarneranik politiit nalunaarsuisinnaatitaanissaannut periarfissaliissutip assinga Kalaallit Nunaanni eqqartuussisarnermik inatsimmi ilanngunneqassasoq, Kalaallit Nunaanni eqqartuussiveqarneq pillugu Siunnersuisoqatigiit innersuussutigisimavaat.

Kalaallit Nunaanni eqqartuussiveqarneq pillugu Siunnersuisoqatigiit innersuussutaat Inatsiseqarnermut ministereqarfiup isumaqatigaa.

Aamma tassunga atasumik oqarasuaatip angallattakkap sumiissusersineqarnissaa pillugu attaveqatigiinnermut attaveqarfinnik aamma attaveqatigiinnermi attaveqarfinnik tuniniaasartunit oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu Kalaallit Nunaanni eqqartuussisarnermik inatsimmi malittarisassanik ilanngussisoqartariaqartoq, Inatsiseqarnermut ministereqarfik isumaqarpoq. Qallunaat eqqartuussisarnermik inatsisaanni ataatsimoorussamik piunasaqaatitaqartuni, ataatsimut aalajangersakkakut akuliunnermut malittarisassiuunneqartuni, akuliunnerit pineqartut taakku suliarinissaannut, akuliunnerit qanittumik assingusut pineqarmata, Inatsiseqarnermut ministereqarfiup pingaartippaa.

Taamatut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsinermik suliaqarneq pillugu qallunaat eqqartuussisarnermik inatsisaanni allanngortitsineq, Kalaallit Nunaanni eqqartuussiveqarneq pillugu Siunnersuisoqatigiinnut qallunaat eqqartuussisarnermik inatsisaanni allannguutit, piffissami 2003-miit 2013 ilanngullugu suliarineqarsimasut pillugit allakkiami ataatsimut saqqummiussinnermi, ilaammat maluginiarneqassaaq. Isumaliutiginninnerit ingerlaqqinnissaat siunertaralugu, inatsimmi allannguinerit pillugit allakkiap Inatsiseqarnermut ministereqarfimmut Kalaallit Nunaannilu Namminersorlutik

Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

Kalaallit Nunaanni oqarasuaatinut angallattakkanut sumiiffinni antenninit maligaasanik pissarsisinnaaneq Danmarkimit qaqutigoornerummat, aamma oqarasuaatip angallattakkap sumiissusersiorneqarnerata malinneqarneratigut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq massakkuugallartoq Danmarkimi politiinut pingaaruteqarnerata assinganik Kalaallit Nunaanni Politiinut pingaaruteqarnissaa naatsorsuutigineqarsinnaanngitsoq, Inatsiseqarnermut ministereqarfiup nalunngilaa. Gps assigisaaluunniit atorlugu oqarasuaatip angallattakkap sumiissusersiorneqarnerata malinneqarneratigut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq inatsisitigut malittarisassiuunneqarpat, oqarasuaatip angallattakkap sumiissusersiorneqarnerata malinneqarneratigut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq tamakkerlugu ataqatigiissumik malittarisassiuunneqarnissaata naammassineqarnissaa kisianni pissutsit taaneqartut pissutigalugit naleqquttuuvoq. Tassunga aamma ilaavoq oqarasuaatip angallattakkap sumiissusersiorneqarnerata malinneqarneratigut oqarasuaatip angallattakkap sumiissusersiorneqarnerata malinneqarneratigut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pissutsit malillugit aamma Kalaallit Nunaanni Politiinut naleqquttuusinnaammat tassunga aamma ilaavoq.

2.2.2.4. Qallunaat eqqartuussisarnermik inatsisaanni § 791 a, imm. 5-p assinganik eqqartuussisarnermik inatsimmi § 422, imm. 5-imi aalajangersakkamik ilanngussisoqarnissaa inatsisissatut siunnersuutikkut taamaammat siunnersuutigineqarpoq.

Pinerluttoqarsimaneranik paasiniaanerminnut atatillugu, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermik politiit atuinerat siumut isigaluni immikkut ittumik inatsimmi aalajangersakkamik malittarisassiuunneqarnera, siunnersuutip kinguneraa. Ullumikkut oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup piviusup pinerluttulerineq pillugu inatsiseqartitsineranut atatillugu eqqartuunneqarnissamut imaluunniit pillagassanngortitsinissamut suliassanngortitsineranut atatillugu politiinit, unnerluussisussaataitaasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerattut, imaluunniit taamaaliorneq pinerluttulerineq pillugu inatsiseqartitsineranut atatillugu

eqqartuunneqarnissamut imaluunniit pillagassannortitsinissamut suliassannortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaangissusianut pinngitsaaliilluni akuliunnerit aallartinneqarnerat pillugit malittarisassat avataanniinnerattut isigineqarsinnaanersoq ingammik nakkutiginninneq pillugu eqqartuussisarnermik inatsimmi malittarisassaanit inerniliussat assingusut assigiissinneqarnerisigut pisarpoq.

Akuliunneq pinerluttoqarsimaneranik paasiniarnermik annertuumik pingaaruteqartutut isigineqartariaqarpat, aamma pinerluttoqarsimaneranik paasiniaaneq ingasattumik inatsimmik unioqputitsinermik tunngassuteqarpat, siunnersuut malillugu oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq siunnersuut malillugu suliarineqarsinnaavoq. § 399, imm. 2 malillugu tv-kkut assiliivimmit ungasissumit aqunneqartumit automatiskiusumilluunniit ingerlasumit, assiliivimmit sakkuummilluunniit assingusumik atorluni nakkutiginninnermut piunasaqaatit atuuttut tamatuma assigai.

Siullertut siunnersuut malillugu oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq ima paasineqassaaq, § 422, imm. 5, nr. 1-itut siunnersuutigineqartoq malillugu oqarasuaatip angallattakkap sumiissusersiorneqarnera pillugu attaveqatigiinnermut attaveqarfinnit aamma attaveqatigiinnernut attaveqarfinnik imaluunniit nalunaarasuartaatitigut kiffartuussinermik tuniniaasunit paasissutissanik pissarsineq. Oqarasuaatinut angallattakkanut napparutit sorliit oqarasuaatip angallattakkap pineqartup nutarsarnermini attaveqarfigisimanerai, nutarsarnermi celle sorleq atorineqarsimanersoq, aamma napparummit oqarasuaat angallattagaq sammivimmut sorlermut sammiveqarsimanersoq qanorlu ungasitsigisimanersoq pillugit paasissutissat ingammik pineqassapput.

Oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq *aappaattut* ima paasineqassaaq § 422, imm. 5, nr. 2-tut siunnersuutigineqartoq malillugu allatut gps imaluunniit sakuut assingusoq atorlugu inuup angalaarneranik nalunaarsuineq. Nr. 2-tut siunnersuutigineqartumi gps-imik imaluunniit atortumik tekniskiusumik assingusumik inuup aalajangersimasup angalaarneranik nalunaarsuinissamut politiit atuinerat ilaatinneqarpoq, imaappoq inuup sumiinnera pillugu paasissutissanik radiokkut tv-kkulluunniit aallakaatitsineq imaluunniit toqqorsivimmiititsineq, taamaalilluni ingerlaavartumik imaluunniit tamatuma kingorna inuup angalaarnera malinneqarluni. Radio-p maligaasaata naleqqiiffigineratigut, inuup tigummiaanit il.il. (matumani oqarasuaatit angallattakkat, qarasaasiat angallattakkat il.il.) aallakaatinneqartunit, imaluunniit videoliut, inuup angalaarneranik takutitsisoq atorlugu nakkutiginninneq

aalajangersakkami aamma ilaatinneqarpoq. Politiit inuup aalajangersimasup angalaarneranik nalunaarsuinerat aamma taamaalillunik najuutinngikkaluarlutik inuup angalaarneranik malinnissinnaanerit uani pingaaruteqarpoq.

Politiit a) pasineqartup angalaarnera b) inuup allap, pineqartoq taanna pasineqartumut imaluunniit assartuummut tassunga, angallammut imaluunniit illumut pasineqartutut assigisaanilluunniit atassuteqarpat, angalaarnera nalunaarsussallugu nr. 2-tut siunnersuutigineqartup periarfissaliissutigaa. Kalaallit Nunaanni pissutsit eqqarsaatigalugit, »angallat« immikkut taaneqassasoq siunnersuutigineqarpoq (qallunaat eqqartuussisarnermik inatsisaanni angallatit oqaatsimit »assigisaanilluunniit« ilaatinneqarput).

Eqqartuussisarnermik inatsimmi § 399, imm. 6-imi aalajangersakkamik ilanngussisoqarnissaa aammattaaq siunnersuutigineqarpoq, tamatumalu kingorna attaveqatigiinnermut attaveqarfinnik imaluunniit nalunaarasuartaatitigut kiffartuussisarnermik tuniniaasut oqarasuaatip angallattakkap ikumasup, pasineqartumut atorneqartutut isumaqarfigineqartup, sumiissusia pillugu paasissutissanik pissarsisarnermik suliaqarneq pillugu politiinik ikiuinissamik pisussaataalerput. Inatsisiliornermi attaveqatigiinnermut attaveqarfinnik imaluunniit nalunaarasuartaatitigut kiffartuussisarnermik tuniniaasut inuup nakkutigineqarani inummut allamut nalunaarsinnaatitaaneranik akuliunnermi ikiuunnissaat, oqarasuaatip angallattakkap ikumasup, pasineqartumut atorneqartutut isumaqarfigineqartup, sumiissusia pillugu paasissutissanik pissarsisarnermik suliaqarneq pillugu aalajangersagassatut siunnertuutigineqartumut periarfissaliissutigineqartoq malillugu oqarasuaatip angallattakkap sumiissusersineqarnissaa pillugu paasissutissanik pissarsinertut iluseqartup, suliarineqarnissaa aalajangersakkap qulakkeerpaa.

Eqqartuussisarnermik inatsimmi § 393, imm. 1-ip malitsigisaanik ilaatigut inuup nakkutigineqarani inummut allamut nalunaarsinnaatitaaneranik akuliunnerup naammassineqarnissaanut attaveqatigiinnermut attaveqarfinnik imaluunniit nalunaarasuartaatitigut kiffartuussisarnermik tuniniaasut politiinut ikiuunnissaannut pisussaaffik, matumani oqarasuaatikkut oqaluttumik naalaarnerup pilersinneqarneri aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit §§ 386-imi aamma 387-imi paasissutissat taaneqartut tunniunneqarneri ilanngullugit, aalajangersakkap assigaa.

Inatsisissatut siunnersuummi § 1, nr. * (eqqartuussisarnermik inatsisip § 399-anik allannortitsineq) innersuussutigineqarpoq.

2.3. Tunniussisussaataaneq

2.3.1. Inatsisit atuuttut

Inunni pasisaanngitsuni tunniussisussaataanerup peqqussutigineqarnera pillugu eqqartuussisarnermik inatsimmi § 420 aalajangersakkanik imaqarpoq, imaappoq pinerluttulerinermik suliap naammassineqarnissaanut pingaarutillit tigussaasut suugaluartut tunniunneqarnissaat imaluunniit qimerloortinneqarnissaallu pillugit pisussaaffeqarneq uani pineqarpoq. Inuit aamma inatsisitigut pisinnaatitaasut pisussaataasullu tunniussisussaataanerup peqquneqarsinnaapput.

Inatsimmik unioqquitsinermik pinerluttoqarsimaneranik paasiniaanerup atatillugu, eqqunngitsuliorfigineqartoq ilaatinngikkaluarlugu unnerluussisussaataasunit ingerlanneqartumi, imaluunniit innarliinermi qanilleqqusinnginneq, najugaqataasinnaannginneq aamma anisitsisarneq pillugu inatsimmi (inuup inuup allap eqqissisimaneranik innarliisimasoq malersuinikkut imaluunniit inummik allamik attaveqarnikkut nuanniillioortitsilluni il.il. imaluunniit inummut allamut peqquserluummik, taamatut eqqissisimanermik innarliinermik iliuuseqarsimappat) § 2, imm. 1, nr. 1-imi taaneqartumi, tigussaasup suugaluartulluunniit uppersaataasinnaanera tunngavissaqartutut isumaqarfigineqarpat, arsaarinnissutigisariaqartoq imaluunniit inatsisip unioqquatinneqarnerani tillinneqarsimappat, taassumalu tillitap tigoqqinnissaa piunasaqaatigisinnaappagu, tigussaasut suugaluartunilluunniit inuup atorsinnaasai qimerloortinneqassasut imaluunniit tunniunneqassasut, inummut pasisaanngitsumut nalunaarutigineqarsinnaasoq, eqqartuussisarnermik inatsimmi § 420, imm. 1-p taamaalilluni malitsigaa.

Tigussaasut suugaluartulluunniit pissarsiarineqarsinnaanngitsut imaluunniit allatut taamaallaat ajornakusoortumik pissarsiarineqarsinnaasut, assersuutigalugu pigisat suugaluartut toqoqqanerat pissutaalluni pissarsiariuminaatsut imaluunniit tikikkuminaatsuusut, imaluunniit inuk, tigussaasumik suugaluartumilluunniit attuumassuteqartumik atorsinnaasaminik tigummiqartoq taassuminnga tunniussiumanngippat, tunniussisussaataaneq peqqussutigineqarsinnaavoq. Takussutissiat paasissutissanik nipangiussisussaataasunik imaluunniit allanut oqaatigeqqusaanngitsunik imallit illersugaasut pineqartillugit tamanna assersuutigalugu pisinnaavoq.

Tunniussisussaataanerup pisussaaffik eqqartuussisarnermik inatsimmi § 420, imm. 4 malillugu ilisimannittutut nassuaasussaataanerup assinganik killiligaavoq. Eqqartuussisarnermik inatsimmi § 142, imm. 2-mi, § 143, imm. 2-mi, § 144, imm. 3-mi aamma 4-imi, aamma § 146-imi malittarisassat malillugit ilisimannittut eqqartuussivimmi nassuaasussaataannginnerat- imaluunniit ilisimannittup ilaatinneqannginnissaanut

tunngavissaqarpat tunngavigisat suliap paasinarsisinneqarnissaanut tunulliuqqartariaqartut eqqartuussivik tamatuma peqatigisaanik aalajangiisimangippat, eqqartuussisarnermik inatsimmi §§ 142-miit 145 ilanngullugu malillugit ilisimannittutut eqqartuussivimmi nassuiaasussaataaqqinneq- imaluunniit ilisimannittup ilaatinneqannginnissaanut tunngavissaqarpat, tunniussisussaataaneq taamaalilluni peqqussutigineqarsinnaanngilaq. § 420, imm. 4 malillugu, § 144, imm. 1, malillugu pasineqartup qanigisai taamaalillutik tunniussisussaataanermik peqquneqarsinnaanngillat. Kikkut pasineqartup qanigisaasut isigineqassanersut pillugit, pasineqartumut pissutsit piviusumik nalersuiffigineqarnerannut tamanna pissuteqartinneqassaaq. Sulisaaseq malillugu uani pasineqartup meerai, angajoqqaavi aamma aapparisai ilaatinneqarput, kisianni aamma allaasinnaapput.

Paasissutissat nipangiussisussaataanermik ilaatinneqartut tunniussisussaataanermik peqquneqarnikkut aallaaviatigut tunniunneqassapput. Taamaattoq eqqartuussisarnermik inatsimmi § 143, imm. 1 malillugu inuuniutit ilaat ilanngunneqassanngillat. Inuuniutit taakku tassaapput ilagiinni imaluunniit upperisarsioqatigiinni allani palasit, ajoqit, oqaluffimmi suliassaqartartut, nakorsat, illersuisut, eqqartuussissuserisut aamma eqqartuussinermik suliame sarsarnissaminut pisinnaatitsissummik pigisaqartut. Inuuniutinut allanut tunniusseqqusineq akuerineqarsinnaavoq, nipangiussisussaataatsineq pigineqaraluarpat apeqqutaatinnagu. Inatsit imaluunniit isumaqatigiissut, ileqqoreqqusat imaluunniit assigiimmik suliaraqfinni ileqqut assigisaallu nipangiussisussaataaneq malitsigippassuk tamanna apeqqutaatinnagu, tamanna atuuppoq. Inuuniutinut, § 143, imm. 1-imi ilaatinneqanngitsunut, kisianni inatsisit malillugit nipangiussisussaataasunut, § 143, imm. 3 malillugu § 420, imm. 4 malillugu taakku taamaakkaluartoq paasissutissanik nipangiussisussaataanermik ilaasunik tunniussinissamut pisussaaffeqannginnerat, eqqartuussiviup piviusumik aalajangiiffiginissaat periarfissaraa.

Tunniussisussaataanermik peqquneqarneq malinniarlugu inuup paasissutissat nipangiussisussaataanermik ilaatinneqartut tunniuttariaqalerpagit, nipangiussisussaataanerup unioqqutinneqarnerani pineqaatissiissutinik pillaatissiissuteqartoqarsinnaanngilaq. Taamaaliornikkut annaasaqaataasunut taarsiissutinik akiliinissamut aamma pisussaaffeqartoqanngilaq. Paasissutissanik tunniussineq pisuni taamaattuni pissutissaqartutut isigineqarpoq, aamma taamaammat nipangiussisussaataanerup unioqqutinneqarnera uani pineqanngilaq.

Tunniussisussaataanermik peqquneqarneq akuerineqanngippat, § 150, imm. 1 malillugu, 423, imm. 2 malillugu tamanna ilisimannittutut nassuiaasussaataaneq assigalugu pinngitsaalissutigineqarsinnaavoq. Assersuutigalugu tunniussisussaataanermik peqquneqarnerup akuerineqarnissaata tungaanut pineqartup akiliisitsissummik akiliinissaa imaluunniit akiliisitsissut ingerlaavartuq (pinngitsaaliinikkut akiliisitsissut) qaammatit 6

tikillugit eqqartuussiviup akileeqqullugu peqqusinnaavaa. Inummut tunniussisussaataaernerik peqquneqarnermik akuersinngitsumut, akuersinnginnerup pissutaanik aningaasartuutit akileqqullugit eqqartuussivik pisussaaffiliisinnaavoq. Inuit aammattaaq, tunniussisussaataaernerik peqquneqarnek akuerinngikkunikku, qaammatit 6 tikillugit killeqaratik angalaarsinnaatitajunnaarsinnaapput, assersuutigalugu parnaarussivimmiisinneqarsinnaapput.

Tunniussisussaataaernerik peqquneqarnek pillugu aalajangiineq eqqartuussisarnermik inatsimmi § 422, imm. 1 aamma 2 malillugit politiinit noqqaassuteqarnikkut eqqartuussiviup aalajangiineratigut aalajangerneqassaaq. Aalajangiinermi suliami pissutsit piviusut taaneqassapput, taamaaliornikkullu akuliunnermut piunasaqaatit naammassineqarsimanerat taparserneqassaaq. Eqqartuussivik aalajangiisinnagu, eqqartuussisarnermik inatsimmi § 422, imm. 6 malillugu akuliunnermut pineqartoq oqaaseqaateqarumaguni oqaaseqaateqarsinnaassaaq.

Taamaattoq § 422, imm. 3-mi oqaaseqatigiit siulliit malillugit eqqartuussiviup aalajangiinerata utaqqineqarnissaa pissutigalugu akuliunnermut siunertarineqartoq maangaannartinneqassappat, tunniussisussaataaernerik peqqussuteqarnek politiinit aalajangerneqarsinnaavoq. Pisuni taamaattuni, suliap politiinit eqqartuussivimmut aalajangigassanngorlugu saqqummiunneqarnissaa, akuliunnermi pineqartup noqqaassutigisinnaavaa. Taamaattoqarpat § 422 imm. 3-mi oqaaseqatigiit aappaat malillugu piaarnerpaamik aamma kingusinnerpaamik nalunaaquttap akunneri 24-it pingasoriarlugit qaangiutsinnagit, politiit suliaq akuersissutigineqaqullugu saqqummiutissavaat. Pisuni taamaattuni, siunertaq tunngavigalugu aalajangiinermik aalajangiiffigineqartuni, inuk akuliunnermi pineqartoq, tamanna sioqqullugu nalunaarutiginninnermik tigusissanngilaq, kisianni apeqqut eqqartuussivimmut saqqummiunneqassappat, oqaaseqaatissaminik oqaaseqaateqarnissani periarfissarissavaa. Akuliunneq sioqqullugu politiit aalajangiinerminnut pissutitik pillugit allakkatigut tunniussinissaminik pisussaaffeqarnerat pillugit eqqartuussisarnermik inatsit malittarisassanik imaqqanngilaq. Apeqqut eqqartuussivimmut saqqummiunneqassappat, tunniussisussaataaernerik peqquneqarnermi pineqartup, § 422, imm. 3-mi oqaaseqatigiit aappaat malillugu akuliunnerup akuerineqarsinnaanera pillugu eqqartuussiviup aalajangiinera akuusup pissavaa. Eqqartuussiviup aalajangiinera, aalajangiinikkut § 422, imm. 3-mi oqaaseqatigiit pingajuat malillugu tunngavilersorneqartussaaq, aalajangerneqassaaq. Eqqartuussivik aalajangiisinnagu, inuk akuliunnermi pineqartoq, eqqartuussisarnermik inatsimmi § 422, imm. 5 malillugu oqaaseqarnissaminut periarfissinneqassaaq, aamma pasineqartup illersuisua aallaaviatigut nalunaarfigineqassaaq aamma eqqartuussisarnermik inatsimmi § 345 malillugu, taakku eqqartuussisut allattaaviinut allatsinniarlugit, oqaaseqaatinik naatsunik saqqummiussinissaminut naleqquttumik piginnaatitaavoq.

Eqqartuussiviit akuersiteqqaarnagit pinerluttoqarsimaneranik paasiniaanerit, politiit suliarissassamaagaat pillugit, pasineqartup, taassuma illersuisuata imaluunniit allat nalunaarfigineqarnissaat pillugu eqqartuussisarnermik inatsit malillugu politiit assigisaanik nalinginnaasumik pisussaataitanerat atuutinnigilaq. Killisiuineq, ilisaritinniakkamik takutitsineq, assinik takutitsineq imaluunniit pinerluttoqarsimaneranik paasiniaanermi iliuutsit allat assingusumik pingaaruteqartut, eqqartuussisarnermik inatsimmi § 340, imm. 3 malillugu pingaarnertut isumaqatigiinniarnep nalaani uppersaatitut atorneqarnissaat ilimagineqartut pillugit, inatsit atuuttut malillugit taamaattoq pasineqartup illersuisua politiit pinerluttoqarsimaneranik paasiniaanermi iliuusaat pillugit sioqqudsisumik nalunaarutiginninnermik tigusissaaq. Pasineqartup illersuisua § 340, imm. 1-imi aamma 4-imi malittarisassat malillugit atortussani allagaatinik takunnissinnaatitaassaaq.

Tunniussisussaataitanermik peqquneqarnermi inuup tigussaasuni suogaluartulluunniit atorsinnaasai pineqarput. Eqqartuusseriaaseq atuuttoq malillugu taakku taassaasinnaapput takussutissiat, matumani takussutissiat elektroniskiusutut ilusillit, aamma tigussaasunut suogaluartunulluunniit killilerneqanngitsut. Sulisaatsimi tunniussisussaataitaneq pillugu malittarisassat ilaatigut konto pillugu paasissutissat tunniunneqarnissaannut atorneqartarpoq. Assersuutigalugu tassaasinnaapput kontot suut pasineqartup piginerai pillugit paasissutissat imaluunniit kontomi ilisinerit tigusinerillu pillugit paasissutissat, matumani piffissami erseqqinnerusumik aalajangersakkami siunissami nikisitsinerit ilanngullugit. Qallunaat eqqartuussisarnermik inatsisaanni aalajangersakkap assinga pillugu Eqqartuussiviit qullersaata aalajangiinera Ugeskrift for Retsvæsen 2017, qupperneq 293 malillugu, sulisaaseq malillugu § 420, imm. 1 malillugu tunniussisussaataitaneq, kontomut aalajangersimasumi piffissami erseqqinnerusumik taaneqartumi («siumut sammisumik tunniussisussaataitaneq») rmi siunissami nuussinerit pillugit.

Tunniussisussaataitanikkut takussutissiat imaluunniit tigussaasut suogaluartulluunniit, tunniunneqarnissaannik imaluunniit qimerloortinneqarnissaannik kissaatigineqartut, erseqqeqqissaartumik allaaserineqarnissaat aalajangersakkanut piareersaataasumik suliat malillugit piumasaqaataannigilaq, kisianni taakku pillugit paasissutissat taamaattoq ima eqqortigissapput, tigussaasut suogaluartulluunniit imaluunniit takussutissiat, aalajangerneqarsinnaallutik, takuuk pinerluttoqarsimaneranik paasiniaanerup nalaani arsaarinnineq tunniussisussaataitanerlu pillugit Strafferetsplejeudvalget-p isumaliutissiissutaa nr. 1223/1991, qupperneq 33, tassani inatsiseqartitsineri pissut taanna tunngavigineqarluni.

2.3.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.3.2.1. Pillaasarnermik inatsisip, eqqartuussisarnermik inatsisip inatsisillu assigiinngitsut allat (Aningaasaqarnikkut pinerluttuliornernut suliniutit patajaallisaavigineqarnerat) allanngortinneqarnissaat pillugit inatsisikkut nr. 634-ikkut, 12. juni 2013-imeersukkut, qallunaat eqqartuussisarnermik inatsisaanni § 806, imm. 3-mi tunniussisussaataaneq pillugu eqqartuussiviup aalajangiinermi, politiit suliffeqarfinit, Aningaasanik peqquserluutunik malunnarunnaarsaasarneq pinerliiniarnernilu aningaasalersuisarneq pinaveersimatinniartugit iliuserisassat pillugit inatsimmi (aningaasatigut peqquserluutunik malunnarunnaarsaaneq pillugu inatsimmi) § 1 malillugu kontomi ingerlatsinerit pillugit, tassunga nuussinikkut aningaasaatinik, tunniussisussaataaneq pillugu aalajangiinermi ilaatinneqartunik nuussiffiusimasumi, imaluunniit nuussinermi, tunniussisussaataaneq pillugu aalajangiinermi ilaatinneqartumit nuussinermi aallaaveqartumit, piffissamut erseqqinnerusumik taasamut, sapaatit akunnerinik 4-nik sivilisunerisinaannngitsumut (>nuussineq pillugu aalajangiineq<)-mut politiit paasissutissanik pissarsisinnaanerit, politiitit noqqaassuteqarnerisigut eqqartuussiviup tunniussisussaataaneq pillugu aalajangiinikkut aalajangersinnaagaa periarfissiisutiginerpoq. Piffissarli sivilisunerisinaavoq sap. Akunnerinik sisamanik, nutaamik eqqartuussisup aalajangiineratigut.

Folketingstidende 2012-13, A, qupperneq 29 quppernerillu tulluittut arlallit malillugit inatsisissatut siunnersuummi nr. L 164-imi, 28. februar 2013-imi saqqummiunneqarsimasumi § 2, nr. 6-imut oqaaseqaatit malillugit politiit nuussinermi pillugit paasissutissanik pissarsiniarnissamut periarfissanik atuineranni, tunniussisussaataanermik peqquneqarnissamut piunasaqaatit pisuni ataasiakkaani naammassineqarsimassat, inatsisip allanngutissaattut siunnersuummi takuneqarsinnaavoq. § 806, imm. 3-mi oqaaseqatigiit arferngat arfineq aappaallu malillugit eqqartuussiviup aalajangiinerni periarfissaliissut atorlugu paasissutissat politiit pissarsiarisimasaat pillugit, politiit tulliusumik eqqartuussivik nalunaarfigissavaa.

Akuliunnerit allanerusut pillugit malittarisassanik eqqartuussisarnermik inatsip imaqarpoq, taakkulu sioqqutsilluni eqqartuussivik aalajangiiseqqaarnagu erniinnartumik politiitit atornerisinaapput. Tamanna atortussat suugaluartulluunniit parnaaqqaanngitsut sumiiffiillu inigisap avataaniittut, § 409, imm. 1, nr. 2 malillugu, § 412, imm. 1 malillugu assersuutigalugu pasineqartup atorsinnaasaasa uppernarsaatissanik ujaasiffigineqarnerani atuuppoq aamma § 428 malillugu inunnut politiit avataaniittunut pasineqartup assiinik qimerloortitsinermi atuulluni. Akuliunnerup atornissaanut piunasaqaatit naammassineqarsimanersut, politiit nalilissagaat, akuliunnernut taakkununga atuuppoq. Akuliunnerup inatsinik naapertuuttumik pinera isumaqatigiinngissutiginerqalerpat, tamanna pillugu apeqqu § 341 malillugu eqqartuussivimmut saqqummiunneqarsinnaavoq.

2.3.2.2. Eqqartuussisarnermik inatsisillu allat allanngortinneqarneri pillugu inatsisikkut nr. 124-ikkut, 30. januar 2021-imeersukkut (2021-imiit 2023 ilanngullugu politiit unnerluussisussaataasullu aningaasarnerat pillugu isumaqatigiissutip naammassineqarnera) qallunaat eqqartuussisarnermik inatsisaanni § 806, imm. 7-imi suliffeqarfinit inunnilluunniit, aningaasanik peqquserluutinik malunnarunnaarsaasarneq pillugu inatsimmi § 1, imm. 1, nr. 1-imiit 13 ilanngullugu imaluunniit 19-imiit 24 ilanngullugu ilaatinneqartunit nuussinerit, kontot, toqqorsiviit, boksit assigisaalluunniit pillugit paasissutissat tunniussisussaataaneramik peqqussuteqarnissamut politiit aalajangiisinnaanerisa periarfissinneqarnera ilanngunneqarpoq. Suliffeqarfinit inunnillu, aningaasanik peqquserluutinik malunnarunnaarsaasarneq pillugu inatsimmi § 1 ilaatinneqartunit, kontomi nuussinerit pillugit, tassunga nuussinikkut, tunniussisussaataaneq pillugu aalajangiinermi ilaatinneqartumi, aningaasanik nuussisoqarsimalluni, imaluunniit tunniussisussaataaneq pillugu aalajangiinermi nuussinermi ilaatinneqartumi nuussinermiit aallaaveqartumit, paasissutissanik, pineqartut atorsinnaasaannik, pissarsiniarsinnaaneq, politiit tunniussisussaataaneramik peqqussuteqarnissaq pillugu aalajangiinermi aalajangersinnaavaat.

Akuliunnermi pineqartup tamanna noqqaassutigippagu, politiit piaarnerpaamik nalunaaquttap akunneri 24-t qaangiutsinnagit, suliaq eqqartuussivimmut saqqummiutissavaat, eqqartuussiviullu akuliunneq akuerineqarsinnaanersoq aalajangiinermikkut aalajangissavaat.

Politiit unnerluussisussaataasullu aningaasaqarnerat pillugu 2021-imiit 2023 ilanngullugu isumaqatigiissummut ilaatillugu, Folketingstidende 2020-21, A, L 132 saqqummiunneqarsimasoq, qupperneq 6 malillugu aningaaserivinnit paasissutissat pissarsiarineqarsinnaanerannik piuminarsaaneq naammassineqassasoq, inatsisit allanngortinneqarnissaannut inatsimmut siunnersuummi takuneqarsinnaavoq.

Assersuutigalugu pinerliiniarnerni aningaasalersuineq, aningaasatigut peqquserluutinik malunnarunnaarsaaneq, peqquserlunneq, akileraarutissanik ikinnerusunik akiliiniarluni piaaraluni paasissutissanik kukkusunik tunniussinikkut pinerluttuliorneq aamma aningaasaqarnikkut pinerluttuliornerit allat pillugit pillaatissiisoqarnissaanik suliani nuussinerit, kontot, toqqorsiviit, boksit assigisaalluunniit pillugit paasissutissat, tassaasut takussutissat uppersaataasullu, pingaaruteqarluinnartut, aammattaaq takuneqarsinnaavoq. Suliffeqarfiit aningaasalersuineramik ingerlataqartut aningaasalersuineq pillugu inatsisiliorneq malillugu nipangiussisussaataapput taamaammallu eqqartuussisarnermik inatsimmi tunniussisussaataaneq pillugu malittarisassat malillugit peqquneqartinnatik, nalinginnaasumik politiit noqqaassuteqarnerisigut sullitamik pillugit paasissutissanik tunniussisinnaanngillat.

Tunniussisussaataaneq pillugu aalajangiinernut politiit, unnerluussisussaataasut eqqartuussiviillu isumalluuterpassuit atorsimavaat. Taamaammat tunniussisussaataaneq pillugu aalajangiinissap ataatsip piareersarneqarneranut politiini nalunaaquttap akunnerisa 3 missaat aamma unnerluussisussaataasuni nalunaaquttap akunnerisa 2 missaat atornerqartartoq nalilerneqarpoq, aamma politiit unnerluussisussaataasullu eqqartuussiviup tunniussisussaataaneq pillugu aalajangiinissaanik utaqqisimatillugit, tamatuma saniatigut tunniussisussaataanermik aalajangiinerit pillaatissiisoqarnissaanik suliami kinguarsaataasutut ilaasarput.

Isumalluutinik atuinerup taassuma annikillisinneqarnissaa, kiisalu nalinginnaasumik aningaasaqarnikkut pinerluttuliornerit pinerluttoqarsimaneranik paasiniaaffigineqarnerisa naammassiuminarsarneqarnissaat Inatsiseqarnermut ministereqarfiup kissaatigisimavaa. Tassunga atatillugu naammassiuminarsaaneq taamaattoq tunniussisussaataaneq pillugu eqqartuussisarnermi inatsimmi malittarisassat allanngortinnerisigut pisinnaasoq, taamaalilluni politiit nammineerlutik nuussinerit, kontot, toqqorsiviit, boksit assigisaalluunniit pillugit tunniussisussaataaneq pillugu aalajangiinissamut piginnaatitaalerlutik, Inatsiseqarnermut ministereqarfik isumaqarsimavoq.

Aallaaviatigut politiit unnerluussisussaataasullu sioqqutsisumik taamatut akuliunnerit pillugit eqqartuussiviup aalajangiineranik pissarseqqaartussaanginnerat tamatuma kinguneraa. Inatsisitigut isumannaatsuuneq eqqarsaatigalugu tassunga atasumik Inatsiseqarnermut ministereqarfiup isumaa malillugu nangaanartoqanngilaq. Taamaalilluni tunniussisussaataanermik peqqussuteqarnermut piumasaqaatit pillugit malittarisassat allanngortinneqanngillat, soorlu aamma, tamatuma malitsigisaanik akuliunnermi pineqartoq qinnuteqarnikkut eqqartuussivimmit akuliunneq pillugu misilitsitsisinnaasoq. Politiit assersuutigalugu paasissutissanik tunniussisussaataanermik peqqussuteqarnissamik kissaateqarnerat, eqqartuussivik aalajangiisinnagu oqaaseqaateqarnissamik periarfissaqarnerat, aalajangiinissamik piumasaatip ilaatigut kingunerigaa aamma maluginiarneqarpoq, kisianni aningaaseriviit amerlanersaasa, allanut tunniussinissaq pillugu nalunaarutinik taaneqartartutigit, oqaaseqarnissartik taamaatissimavaat.

2.3.2.3. Politiit kontot pillugit paasissutissat il.il. eqqarsaatigalugit aningaaserivinnut il.il. tunniussisussaataanermik peqqussuteqarsinnaanerat pillugu periarfissaliissutip assinganik Kalaallit Nunaanni eqqartuussisarnermik inatsimmi ilanngussisoqassasoq, Kalaallit Nunaanni Eqqartuussiveqarneq pillugu siunnersuisoqatigiit innersuussutigisimavaat.

Kalaallit Nunaanni Eqqartuussiveqarneq pillugu siunnersuisoqatigiinnit innersuussutigineqartoq Inatsiseqarnermut ministereqarfiup isumaqatigaa.

Tassunga atasumik »nuussinermi« tunniussisoqartussaananeramik eqqartuussiviup aalajangiinera pillugu Kalaallit Nunaanni eqqartuussisarnermik inatsimmi aalajangersakkamik ilanngussisoqartariaqartoq, Inatsiseqarnermut ministereqarfik isumaqarpoq. Periarfissat taakku marluk akornanni qaleriittoqarunarpoq, aamma politiit eqqartuussivik aalajangeqqartinnagu aningaaserivinnut il.il. tunniussisussaataitaanermik peqqussuteqarsinnaanerannut periarfissaq nutaaq atorlugu, »nuussinermi« tunniussisussaataitaaneq pillugu aalajangiinissamut pisariaqartitsineq annikinnerulerpoq. Kisianni eqqartuussiviup »nuussinermi« tunniussisussaataitaaneq pillugu aalajangiinissaa pissarsiariniarlugu, tunniussisussaataitaanermik peqqussuteqarnissaq pillugu politiinut periarfissaliissutissatut siunnersuutigineqartup, suliaasaqarfik tamakkiisumik matussusinngilaa, aamma politiit aningaaserivinnik il.il. tunniussisussaataitaanermik peqqussuteqarsinnaalernerisa periarfissaalernerisa pillugu ilanngussinerup kingorna, qallunaat eqqartuussisarnermik inatsisaanni »nuussineq pillugu aalajangiineq« pillugu periarfissaq aamma attatiinnarneqarpoq.

»nuussineq pillugu aalajangiineq« pillugu qallunaat eqqartuussisarnermik inatsisaanni allannguneq piffissami 2003-miit 2013 ilanngullugu qallunaat eqqartuussisarnermik inatsisaanni allanngunerit pillugit allakkiami ataatsimut Kalaallit Nunaanni eqqartuussiveqarneq pillugu Siunnersuisoqatigiinnut saqqummiunneqartumi ilaammat maluginiarneqassaaq. Isumaliutiginninnerit ingerlaqqinnissaat siunertaralugu, inatsimmi allanngunerit pillugit allakkiap Inatsiseqarnermut ministereqarfimmut Kalaallit Nunaannilu Namminersorlutik Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

2.3.2.4. Tamanna tunngavigalugu aningaaserivinnut aamma suliffeqarfinnut aningaasanik nuussisarnermik sulialinnut il.il. tunngatillugu, eqqartuussisarnermik inatsimmi tunniussisussaataitaaneq pillugu malittarisassamik immikkut ittumik ilanngussisoqassasoq, *siullertut* siunnersuutigineqarpoq, taannalu eqqartuussivimmit aalajangiineq ataaseq tunngavigalugu aningasanik nuussinerup, naak tamatuma kingorna nuussinerit aningaaserivinnik arlalinnik il.il. ilanngutititsigaluartut, akiliinermi nuussinermi tassannga aallaaveqartup, malinneqarsinnaanerannik periarfissiissaaq.

Aalajangersagaq ima ilusilersorneqarpoq, taamaalilluni eqqartuussiviup ataasiarluni aalajangiineratigut politiit kontomi nuussinerit pillugit, tassunga nuussinikkut aningaasaatinik, tunniussisussaataitaaneq pillugu aalajangiinermi ilaatinneqartunik nuussiffiusimasumi, imaluunniit nuussinermi, tunniussisussaataitaaneq pillugu aalajangiinermi ilaatinneqartumit nuussinermi aallaaveqartumit, paasissutissanik aningaaseriviit il.il. tunniusseqqullugit peqqussummik nalunaaruteqarnissamik periarfissalissapput. Politiit taamaalillutik eqqartuussivimmit ataasiarluni aalajangiineq tunngavigalugu aningaasatigut pinerluttuliornermit iluanaarutit pillugit

pinerluttoqarsimaneranik paasiniaanermut atatillugu aningaaserivinnit il.il. akiliinermi nuussinerit pillugit paasissutissanik pisariaqartunik sukkasuumik pissarsisinnaalissapput.

»Nuussineq pillugu aalajangiineq« taamaattoq annerpaamik sapaatit akunnerini 4-ni atuutissasoq siunnersuutigineqarpoq, kisianni eqqartuussiviup nutaamik aalajangiineratigut annerpaamik sapaatit akunneri 4-kkaarlugit sivitsueqqittoqarsinnaavoq.

Politiit aalajangiinerup malitsigisaanik aningaaserivinnut il.il. peqqussutit saqqummiussimasatik pillugit tamatuma kingorna eqqartuussivik nalunaaruteqarfigissagaat, aamma nalunaarutiginninnermi, nuussinerit, nuussinermi eqqartuussiviup aalajangiinerani ilaatinneqartumit aallaaveqarnerat pillugu isumaqartoqarneranik tunngavik nalunaarutiginninnermi taassagaat, aammattaaq siunnersuutigineqarpoq.

Nuussinerup, tunniussisussaataaneq pillugu eqqartuussiviup aalajangiinerani ilaatinneqartup, tassunga nuussinikkut aningaasanik nuussisoqarsimalluni, imaluunniit nuussinikkut, nuussinermi tunniussisussaataaneq pillugu eqqartuussiviup aalajangiinerani ilaatinneqartumit aallaaveqartumit, paasissutissat taamaallaat noqqaassutigineqarneqarnissaat politiit pisuni ataasiakkaani tamani nakkutigissavaat, aamma tamatuma kingorna eqqartuussivimmuut nalunaaruteqarnermini tamanna pillugu nassuiaatigisariaqassallugu.

Nuussinerit pillugit paasissutissat pineqartut aamma tunniussisussaataaneq pillugu malittarisassat atuuttut malillugit tunniunneqaqqullugit piumasaaqatigineqarsinnaassapput. Taamaalilluni malittarisassat atuuttut malillugit paasissutissat amerlanerusut eqqarsaatigalugit aalajangersagassatut siunnersuutigineqartoq pissarsissutaasinnaangilaq, kisianni aalajangersakkap suleriaaseq oqilisissavai aamma taamaalilluni paasissutissanik pissarsiniarneq pilertornerulersissallugu.

Tunniussisussaataaneq pillugu suleriaatsip piuminernerulersinneqarnissaanut siunnersuutigineqartoq atorlugu, eqqartuussiviup aalajangiinissai akornanniittut pissarsiareqqaarnagit nuussinerup ingerlanera politiit malinnaaffigisinnaalissavaat, aamma pinerluttulerinermi suliami nuussinerit pillugit paasissutissat ataatsimoortut taamaalillutik ingerlatsinermi ataatsimi pissarsiarineqarsinnaalissallutik. Tamassuma pissutsinit pinerluttuliordermeersunit iluanaarutigineqartut, aningaasannorlugit tiguneqannginneranni, nunanut allanut nuunneqannginneranni il.il. arsaarinnissutigineqarsinnaanerannut naammattumik tunngaviliinissamik pilersitsinissaq pitsaanerusumik periarfississavaa. Suliani taamaattuni pinerluttoqarsimaneranik paasiniaaneq aammattaaq nalinginnaasumik naammassiuminarsarneqarsinnaassaaq, pissutigalugu paasissutissat pissarsiariniarneqarnerat pillugu ullumikkut eqqartuussivimmit

aalajangiinernik arlalinnik piumasaqartitsisut, ataasiarluni aalajangiineq tunngavigalugu, politiit paasissutissat taakku pissarsiarisinnaangussammassuk.

Tunniussisussaataaneq pillugu aalajangiinerit ilaat, ullumikkut eqqartuussivimmit aalajangerneqartartut, siunissami politiinit aalajangerneqarsinnaalissasut *aappaattut* siunnersuutigineqarpoq.

Suliffeqarfinit imaluunniit inunnit, aningaasatigut peqquserluutininik malunnarunnaarsaaneq pillugu inatsimmi § 1, imm. 1, nr. 1-imiit 11 ilanngullugu imaluunniit 20-imiit 24 ilanngullugu, imaluunniit aningaasanik peqquserluutininik malunnarunnaarsaasaneq pillugu Inatsisartut inatsisaanni § 1, imm. 1, nr. 1-mi aamma 2-mi ilaatinneqartunit, nuussinerit, kontot, toqqorsiviit, boksit imaluunniit assigisaat pillugit paasissutissanik tunniussisussaataaneq, politiit piginnaatitaaneranni ilaatinneqassasoq siunnersuutigineqarpoq. Aningaaseriviit, tigussaasumik sallunaveeqquteqarluni taarsigassarsisitsisarfiit, suliffeqarfiit aningaaseriviunngitsut inuuniutigalugu imaluunniit ingerlatsinerminni pingaartut ilaatillugu aningaasanik pigisanilluunniit allanik utertitassanik tiguisartut aamma aningaasanik elektroniskiusunik atulersitsisartut aamma akiliissussinermik sullissivinnik atulersitsisartut assersuutigalugu ilaatinneqassapput.

Aningaasatigut peqquserluutininik malunnarunnaarsaaneq pillugu inatsimmi § 1, imm. 1 nr. 14 aamma 15 malillugit eqqartuussissuserisut naatsorsuuserisullu aaqqissuussinermi siunnersuutigineqartumi kisianni ilaatinneqanngillat. Aningaasatigut peqquserluutininik malunnarunnaarsaaneq pillugu inatsimmi § 1, imm. 1 nr. 1, nr. 17, aamma aningaasanik peqquserluutininik malunnarunnaarsaasaneq pillugu inatsimmi § 1, imm. 1, nr. 3-miit 5 ilanngullugu malillugit ilunik tuniniaasartut, siunnersuisartut allat aamma suliffeqarfinnik sullissisartut aaqqissuussinermi aammattaaq ilaatinneqannginnissaat taamatuttaaq siunnersuutigineqarpoq.

Aningaasatigut peqquserluutininik malunnarunnaarsaaneq pillugu inatsit peqqussutikkut nr. 956-ikkut, 17. maj 2021-imeersukkut Kalaallit Nunaannut atuutilersinneqarmat, suliassa qarfinnullu suli tiguneqarsimanngitsunut atuulluni, tamatumalu peqatigisaanik aningaasanik peqquserluutininik malunnarunnaarsaasaneq pillugu Inatsisartut inatsisaat suliassa qarfinnut tiguneqareersunut atuummat, maluginiarneqassaaq.

Taamaattoq »nuussineq pillugu aalajangiineq« pillugu siunnersuutigineqartoq malillugu periaaseq taanna malillugu politiit suliffeqarfinit inunnillu ilaatinneqartunit aammattaaq eqqartuussissuserisunit, naatsorsuuserisunit, siunnersuisunit allanit aamma suliffeqarfinnut sullissinermik suliaqartunit nuussinernik malinninnissamik periarfissinneqarput.

Taamaaliornissamut piumasaqaatit nalinginnaasut naammassineqarsimatillugit, aaqqissuussineq siunnersuutigineqartoq malillugu politiit tunniussisussaaneq pillugu

aalajangiinermik aalajangiisinnaangussapput. Taamaalilluni aaqqissuussineq siunnersuutigineqartoq malillugu, tunniussisussaataaneq pillugu peqqussuteqarnermut inatsimmi piumasaqaatit naammassineqarsimanersut, politiit aalajangiiffigissavaat. Inuk akuliunnermit pineqartoq, qinnuteqarnermigut tamatuma kingorna tunniussisussaataanermik peqquneqarneq pissutissaqarnersoq pillugu eqqartuussivik misiliitissinnaagaa siunnersuutigineqarpoq, soorlu ullumikkut tunniussisussaataanermik peqqussutit, siunertap maanngaannartinneqannginnissaa pissutigalugu eqqartuussivik aalajangiiseqqarnagu politiit suliarineqartunut taamaattoq.

Siumut isigisumik tunniussisussaataaneq pillugu inatsisit atuuttut malillugit piumasaqaatit assingi piumasaqaatigalugit, aaqqissuussineq siunnersuutigineqartoq atorlugu politiit aalajangiinermik aalajangiisinaanermut periarfissaqalissapput, tassani eqqartuusseriaatsimi atuuttumi, siumut isigisumik tunniussisussaataaneq piffissamut aalajangersimasumut taamaallaat peqqussutigineqarsinnaasoq aalajangersarneqarpoq. Siumut isigisumik tunniussisussaataaneq pillugu politiit aalajangiippata, aalajangiinermi akuliunneq qanoq sivistigisumik atuutissanersaq politiit aalajangiinermi piffissalertussaassavaat, soorlu aamma tamanna pillugu inatsisit atuuttut malillugit eqqartuussiviit aalajangiigaat pineqartillugit taamaattoqartartoq. Tassunga tunngatillugu piumasaqaatit suli atatillugit, akuliunnerup sivitsorneqarnissaa politiit aalajangiiffigissinnaassavaat.

Sioqqutsisumik eqqartuussivimmit aalajangiisitsinissamik noqqaassuteqarsinnaanermut periarfissaq aaqqissuussinerup siunnersuutigineqartup saniatigut attatiinneqassaaq. Akuliunneq inatsisinut naapertuunnersaq pillugu, sioqqutsisumik eqqartuussiviup isummenera politiit kissaatigunikku, politiit taamaaliornissaminnut suli periarfissaqarput. Tamanna assersuutigalugu inuup ilisimannittut nassuiaasussaataannginnermut imaluunniit ilaatinneqarsinnaatitaannginnermut ilaatinneqarnersoq erseqqinngippat naleqquttuusinnaavoq. Pisuni taakkunani ullumikkutut eqqartuussivik tassaavoq akuliunnerup aallartinneqarnissaanut sivitsorneqarnissaanullu aalajangiisusaaq. Eqqartuussivimmit sioqqutsisumik aalajangiineq pillugu periarfissaq politiit atorpassuk aamma eqqartuussivik pisumi taamaattumi nuussineq pillugu tunniussisussaataaneq pissasoq eqqartuussivik aalajangiippat, akuliunnerup sivitsorneqarnissaa pillugu aamma eqqartuussivik aalajangiisuusaaq.

Assigisaanik siunertaq pillugu tunniussisussaataanermik politiit aalajangiissallutik suli periarfissarivaat, aamma inuit, suliffeqarfiit aamma paasissutissat aaqqissuussinermi siunnersuutigineqartumi ilaatinneqartut pineqartillugit. Taamaattoq tamatuma killilimmik kinguneqarnissaa naatsorsuutigineqarpoq. Kisianni pisuni, aaqqissuussinermi siunnersuutigineqartumi siunnersuutigineqartut, tassani allakkatigut aalajangiinerup suliarinissaata angumerinissaata periarfissaannginnerani naleqquttuusinnaavoq.

Aaqqissuussineq siunnersuutigineqartoq paasissutissat suut politiit ullumikkut pissarsiarisinnaasaasa annertusineqarnerannik kinguneqanngilaq, kisianni taamaallaat ingerlatseriaatsip piuminarsarneqarneranik kinguneqarluni. Aaqqissuussineq siunnersuutigineqartoq aammattaaq nuussinerit, kontot, toqqorsiviit, boksit assigisaalluunniit pillugit paasissutissanut aamma killilerneqarpoq aamma suliffeqarfinnut inunnullu aningaasatigut peqquserluutinik malunnarunnaarsaasarneq pillugu inatsisini taaneqartuni ilaatinneqartunut sammitinneqartunik peqqussutinik killilerneqarluni. Siunertarineqartoq maangaannartinneqassanngippat, suliffeqarfinit inunnullu allanit ilaatinneqartunit aallaanerusunit nuussinerit, kontot, toqqorsiviit, boksit assigisaalluunniit pillugit paasissutissanik tunniussineq pillugu peqqussutit ullumikkut pisartutut sioqqutsilluni eqqartuussivimmit aalajangerneqarnissaat piumasaqaataavoq. Paasissutissat allat imaluunniit tigussaasut sugaluartulluunniit, nuussinerit, kontot, toqqorsiviit, boksit assigisaalluunniit pillugit paasissutissanit allaanerusut, suliffeqarfik inulluunniit aningaasatigut peqquserluutinik malunnarunnaarsaaneq pillugu inatsisini aalajangersakkani taaneqartuni ilaatinneqaraluarpataluunniit, taamatuttaaq aallaaviatigut eqqartuussiviup sioqqutsisumik aalajangiineranik piumasaqaateqarfiupput.

Inatsisissatut siunnersuummi § 1, nr. * (eqqartuussisarnermik inatsimmi § 422-p allanngortinneqarnera) innersuussutigineqarpoq.

2.4. Immikkut ittumik ingasattunik inatsisunik unioqqutitsinnerit pillugit pinerluttoqarsimaneranik paasiniaanermi pinngitsaalilluni akuliunnerit

2.4.1. Inatsisit atuuttut

Pinerluttulerineq pillugu inatsiseqartitsinnermut atatillugu eqqartuunneqarnissamut imaluunniit pillagassanngortitsinissamut suliassanngortitsinnermut atatillugu politiinit, unnerluussisussaataasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat tassaavoq periaatsit ilaannut taaguutaasoq, politiit pinerluttoqarsimaneranik paasiniaanermiini atortagaat. Periaasiupput, tassuunakkut suliami paasissutissanik pissarsiniarlutik imaluunniit qulakkeerinninniarlutik politiit pasineqartumut pinngitsaaliissutigisaat imaluunniit taakku namminneq soqutigisaqarfiini akuliunneri allat, imaluunniit allatut inuk eqqartuunniarlugu imaluunniit pillagassanngortinniarlugu pinerluttuliornerlu akiorniarlugu suliaminni siuarsaanermiini periaaserisartagaat. Taamaammat suliassaqarfimmi tassani qajassuutassat sakkortuut aamma amerlanertigut imminnut akerleriittut piusarput. Periaatsit ilaatigut tassaasarput tigusarinnineq, tiggummigallagassanngortitsineq, inuup nakkutigineqarani inummut allamut nalunaarsinnaatitaaneranut akuliunneq, timikkut akuliunneq, arsaarinnineq, uppersaatissanik ujaasineq, pussuup ipaanik assililineq toqqorsinerlu, inuup assililineqarnera atortussallu allat.

Pinerluttulerineq pillugu inatsiseqartitsinermit atatillugu eqqartuunneqarnissamut imaluunniit pillagassanngortitsinissamut suliaassanngortitsinermit atatillugu politiinit, unnerluussisussaataitaasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnissaannut eqqartuussisarnermik inatsit piumasaqaatinik arlalinnik aalajangersaavoq. Akuliunnernut assigiinngitsunut piumasaqaatit assigiinngillat, kisianni nalinginnaasumik ima sananeqartarlutik, pasineqartup pissutsinik pasitsaassissutigineqartunik suliarinnissimanagera pillugu immikkut ittumik sakkortusisamik pasitsaassinermit piumasaqaat, ilisarnaatit pillugit piumasaqaat, aamma pinerluttuliorqarsimaneranik piumasaqaat aalajangersarneqarlutik. Ajoqusiineq akornusersuinerlu, akuliunnerup kingunerisai, suliap pingaaruteqarneranut akuliunnerullu pisariaqarneranut (atsikkutigiiissitsinissamut piumasaqaat) imminnut naapertuutissasut aammattaaq nalinginnaasumik atuuppoq. Aammattaaq akuliunneq suugaluartorluunniit sapinngisamik qajassuartumik (qajassuussinissamut tunngavik atorlugu) suliarineqassaaq.

Akuliunneq annertunerujartortillugu pinerluttoqarsimaneranik piumasaqaat nalinginnaasumik sakkortunerulersarpoq. Allakkat ammarneqarneranni, oqarasuaatip tusarnaarneqarnerani, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimangersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimangersut imaluunniit atassuteqartutut nalilerneqartut pillugit paasissutissat, inimiittut tusarnaarneqarnerat aamma immikkut ittumik piumasaqaatitalimmik nakkutiginninneq (assiliivik automatiskimik ingerlasoq atorlugu najukkami nakkutiginninneq imaluunniit assiliivik inimiittoq atorlugu nakkutiginninneq) pillugu taamaalilluni pinerluttoqarsimaneranik paasiniaaneq eqqartuussisarnermik inatsimmi §§ 384-imiit 388 ilanngullugu aamma § 399, imm. 3 malillugu »ingasattumik inatsimmik unioqqutitsineq« piumasaqaataavoq. »Ingasattumik inatsimmik unioqqutitsineq«-mi nalinginnaasumik inatsimmik unioqqutitsinertut, tassani Folketingstidende 2007-08 (katersat aappaat), ilanngussaq A, qupperneq 1341 malillugu piviusumik piumasaqaatitaqanngitsumik siviisumik siviisussusilimmik inissiisarfirmut inissinneqarnissaq naatsorsuutigineqassalluni, paasineqassasoq, eqqartuussisarnermik inatsimmut piareersaataasumik suliani takuneqarsinnaavoq. Assersuutigalugu toqutsinermi, pinngitsaaliilluni atoqatiginninnermi, meeqqanut kinguaassiuutitigut pinerluttuliornermi, ingasattorujussuarmik nakuusernermi, aappasaanik ingasattumik nakuusernermi, pingajussaanik allatut nakuusernermi aamma Kalaallit Nunaanni eqqartuussiveqarneq pillugu isumaliutissiissut nr. 1442/2004, atuagaq 2, qupperneq 532 malillugu qallunaat pillaasarnermik inatsisaanni § 191-p unioqqutinneqarnerata assinganik ikiaroomartut

pillugit ingasannerusumik pinerluttuliornerni, eqqartuusseriaaseq atuuttoq malillugu tamanna pissaaq.

Pinerluttuliortoqarsimaneranik piumasaqaat nalinginnaasoq »ingasattumik inatsimmik unioqqutitsineq« pinngitsaaliilluni akuliunnerit ilaanni pillaatip, inatsimmik unioqqutitsinerup kingunerisaata suussusaa annertussusaalu pillugu inatsimmi aalajangersakkat piviusut taaneqarnerinik ilaneqartarpoq, taamaalilluni pinerluttoqarsimaneranik paasiniaaneq pinerluttulerinermi inatsimmi aalajangersakkanut taaneqartunut tunngassuteqarpat, »ingasattumik inatsimmik unioqqutitsineq« piviusumik pineqanngikkaluartoq, pinerluttuliorsimanermik piumasaqaat naammassineqartarluni.

Eqqartuussisarnermik inatsimmi §§ 384-imiit 386 ilanngullugu malillugit, piumasaqaatit allat naammassineqarsimatillugit, allakkat ammarneqarnerat aammattaaq taamaalilluni meeqqanik kanngunartuliorneq pillugu pinerluttoqarsimaneranik paasiniaanermi, aamma oqarasuaatikkut oqaluttumik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissat suliarineqarsinnaapput, aamma inuttut eqqissisimanerup innarlerneqarnera imaluunniit meeqqanik kanngunartuliorneq pillugu pinerluttoqarsimaneranik paasiniaanermi suliarineqarsinnaallutik.

2.4.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Allakkat ammarneqarnerat, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissat, inimiittut tusarnaarneqarnerat aamma immikkut ittumik piumasaqaatitalimmik nakkutiginninnermi, inatsit malillugu inatsimmik unioqqutitsineq minnerpaamik ukiuni 6-nni parnaarunneqarnissamik pillaatissiissutigineqarsinnaappat, imaluunniit pillaaasarnermik inatsimmi kapitali 12-imi imaluunniit 13-imi aalajangersakkanik piaaraluni unioqqutitsineq, kapitalit taakku naalagaaffiup namminersortuuneranut isumannaatsuuneranut aamma naalagaaffiup inatsit tunngaviusoq malillugu aaqqissuussineranut il.il. tunngassuteqarput, pinerluttuliortoqarsimaneranik piumasaqaat naammassineqassaaq.

Taamaalilluni pillaaasarnermik inatsimmi kapitali 12-imi imaluunniit 13-imi malittarisassanik piaaraluni unioqqutitsinerni pinerluttuliortoqarsimaneranik piumasaqaat ilaatigut naammassineqassaaq, tassani pillaatissiissutissaq pillugu aalajangersagaq pillaatissaatitaasut killingat ukiunik 6-nnik parnaarunneqarnissamik sivikinnerulluni.

»Ingasattumik inatsimmik unioqutitsineq« pillugu oqaatsip imarisaa qallunaat pillaatissaatitaasut killinginit allanngorarnerummat, aallaaviatigut nalequttumik pillarneqarnissaq pillugu inatsimmik unioqutitsinerup kingunerisaata suussusaa annertussusaalu pillugu inatsimmi aalajangersakkat piviusut taaneqarnerinik ilaneqarnissaat pisariaqassanngitsoq Kalaallit Nunaanni Eqqartuussiveqarneq pillugu Isumalioqatigiissitat isumaqarput. Kalaallit Nunaanni eqqartuussiveqarneq pillugu isumaliutissiissummi nr. 1442/2004-mi, atuagaq 2-mi, qupperneq 532 malillugu inuttut eqqissisimanerup innarlerneqarnera pillugu pinerluttoqarsimaneranik paasiniaanermut atatillugu paasiniaanermi oqarasuaat imaluunniit nalunaarasuartaatitigut attaveqatigiinneq assingusoq alla atorlugu pisumi, taamaattoq oqarasuaatikkut oqaluttunik naalaarnissaq imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissat pissarsiarineqarnissaat immikkut ittumik pisariaqartinneqarsimavoq. Tamanna pillugu siaruarterineq aamma (ingammik) meeqqanik kanngunartulianik pigisaqarneq »ingasattumik inatsimmik unioqutitsineq«-tut isigineqarsinnaanersoq pillugu nalornissuteqarnermik pissutissaqalersitsisinnaammat, Kalaallit Nunaanni Eqqartuussiveqarneq pillugu Ataatsimiititaliarsuup isumaliutissiissutaani nr. 1442/2004-imi, atuagaq 2-mi, qupperneq 532 malillugu, inuttut eqqissisimanerup innarlerneqarnerani nalinginnaasumik pinerluttuliortoqarsimaneranik piunasaqaatit saneqqunneqassasut taamaammat siunnersuutigineqarpoq. Siaruarterinerup aamma (ingammik) meeqqanik kanngunartulianik pigisaqarnerup »ingasattumik inatsimmik unioqutitsineq«-tut isigineqarsinnaanera pillugu nalornissuteqarnermik pissutissaqartitsilersinnaammat, allakkat ammarneqarneranni, oqarasuaatip tusarnaarneqarnerani, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissat pissarsiarineqarneranni, meeqqanik kanngunartuliorneq pillugu suliani nalinginnaasumik pinerluttoqarsimaneranik piunasaqaat saneqqunneqassasoq Kalaallit Nunaanni Eqqartuussiveqarneq pillugu Ataatsimiititaliarsuup isumaliutissiissutaani nr. nr. 1442/2004-imi, atuagaq 2-mi, qupperneq 550-imi siunnersuutigisimavaat.

Pinerluttulerinermi inatsimmi kapitali 7-imi aamma 8-mi malittarisassanik – qallunaat pillaaasarnermik inatsisaanni kapitali 12-imik aamma 13-imik naapertuuttuni, unioqutitsinerit pillugit pinerluttoqarsimaneranik paasiniaanerni – allakkat ammarneqarnissaannik suliaqarnermi, oqarasuaatip tusarnaarneqarnerani, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissat pissarsiarineqarneranni, inimiittut tusarnaarneqarneranni imaluunniit

immikkut ittumik piumasaqaatitalerlugu nakkutiginninnermi, piviusumik »ingasattumik inatsimmik unioqqutitsineq« pineqassasoq kisianni piumasaqaataavoq.

Kisianni pinerluttulerinermi inatsimmi kapitali 7-imi aamma 8-mi malittarisassanik piaaraluni unioqqutitsinerit tamarmik »ingasattumik inatsimmik unioqqutitsineq«-tut isigineqarsinnaanersut, Inatsiseqarnermut ministereqarfiup isumaa malillugu nalornissuteqarnermik pissutissaqartitsilersinnaavoq. Taamaammat naalagaaffimmut pinerluttuliornerit pillugit pinerluttoqarsimaneranik paasiniaanermi Danmarkimisut (aamma Savalimmiunisut) Kalaallit Nunaanni akuliunnerit taaneqartut taakku pillugit periarfissat taakkoqqissaat pigineqarnerisut nalornissuteqarnermik pissutissaqartitsilersinnaapput.

Inatsisinik unioqqutitsinerit taakku, qallunaat pillaasarnermik inatsisaanni kapitali 12-imi aamma 13-imi, Savalimmiuni pillaasarnermik inatsimmi atuuttumi kapitali 12-imi aamma 13-imi aamma pinerluttulerinermi inatsimmi kapitali 7-imi aamma 8-mi ilaatinneqartut, naalagaaffiup isumannaatsuunissaanut aamma naalagaaffiup inatsit tunngaviusoq malillugu aaqqissuussineranut tunngassuteqarput, aamma taakku unioqqutinneqarnerannik pasitsaassisoqartillugu, Inatsiseqarnermut ministereqarfiup isumaa malillugu politiit pinerluttoqarsimaneranik paasiniaanissaminut periarfissaasa naalagaaffimmi tamarmi assigiinnissaat annertuumik pingaaruteqarpoq.

Kalaallit Nunaanni eqqartuussisarnermik inatsisip allangortinneqarnissaa siunnersuutigineqarpoq, taamaalilluni allakkat ammarneqarnissaannik suliaqarnermi, oqarasuaatip tusarnaarneqarnerani, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit pillugit paasissutissat pissarsiarineqarneranni, inimiittut tusarnaarneqarneranni imaluunniit immikkut ittumik piumasaqaatitalerlugu nakkutiginninnermi, pinerluttulerinermi inatsimmi kapitali 7-imi aamma 8-mi malittarisassanik piaaraluni unioqqutitsinernut innersuussinermik ilaneqarnissaat, taamaammat siunnersuutigineqarluni.

Pinerluttulerinermi inatsimmi kapitali 7-imi aamma 8-mi malittarisassanik piaaraluni unioqqutitsinerit pillugit pinerluttoqarsimaneranik paasiniaanerni piviusumik »ingasattumik inatsimmik unioqqutitsineq« pineqanngikkaluartoq, akuliunnermut piumasaqaatit allat naammassineqarsimatillugit, siunissami allakkat ammarneqarnissaannik suliaqarneq, oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taqaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut

pillugit pillugit paasissutissat pissarsiarineqarnerat, inimiittut tusarnaarneqarnerat imaluunniit immikkut ittumik piumasaqaatitalerlugu nakkutiginninneq pillugit periarfissaliissuteqalernera, siunnersuutip kinguneraa.

Pinerluttulerineq pillugu inatsiseqartitsineranut atatillugu eqqartuunneqarnissamut imaluunniit pillagassanngortitsinissamut suliasanngortitsineranut atatillugu politiinit, unnerluussisussaataasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarneranni pineqartuni, pasineqartup pissutsinik pasitsaassissutigineqartunik suliarinnissimanera pillugu immikkut ittumik sakkortusisamik pasitsaassineranut piumasaqaatit aamma ilisarnaatit pillugit piumasaqaatit atuuttut allanngortinneqannginnissaat siunnersuutigineqarpoq, aamma ajoqusiinerup akornusersuinerullu, akuliunnerup kingunerisaata, suliap pingaaruteqassusianut akuliunnerullu pisariaqartinneqarneranut naapertuuttuunissaa allanngortinnagu aamma piumasaqaataassaaq.

Inatsisissatut siunnersuummi § 1, nr. * (eqqartuussisarnermik inatsimmi §§ 384-imiit 388 ilanngullugu aamma § 399, imm. 3-p allanngortinneqarnerat) innersuussutigineqarpoq.

2.5. Nalunaarutiginninnermi isertuussisussaataaernerut il.il. pisinnaatitaanani akuliunnerit pillugit nalunaarutiginninneq.

2.5.1. Inatsisit atuuttut

Akuliunnernut pineqartunut inatsimmi piumasaqaatit allatut naammassineqarsimatillugit, eqqartuussisarnermik inatsimmi § 391, imm. 3, § 399, imm. 6, § 400, imm. 3, aamma § 415, imm. 2 malillugit inuup nakkutigineqarani inummut allamut nalunaaruteqarsinnaatitaaneranut akuliunnissamik, piumasaqaatitalerlugu nakkutiginninnissamut aamma immikkut ittumik piumasaqaatitalerlugu nakkutiginninnissamut, paasissutissiineranut systemimi paasissutissanik tamanit tikinneqarsinnaanngitsunik programmit atortussallu allat atorlugit atuaanernerut aamma periculum in mora (utaqqinermi navianaatit) pillugit malittarisassat malillugit isertortumik uppersaatinik ujaasinissamik suliaqarnissamut politiit periarfissaqarput. Akuliunnerup siunertaa maangaannartinneqassanngippat, aamma tamatuma kingorna apeqquq eqqartuussivimmu saqqummiunneqarpat, eqqartuussiviup sioqqutsisumik aalajangiinera pissarsiareqqaarnagu politiit akuliunneq suliarisinnaagaat, tamatuma kinguneraa. Tamatuma kingorna pinngitsaaliilluni akuliunnermut piumasaqaatit naammassineqarsimanersut eqqartuussiviup misilissavai, aamma eqqartuussiviup aalajangiinerata utaqqineqarnissaa pissutigalugu, akuliunnerup siunertaata maangaannartinneqarnissaa pineqarneris q misilissallugu. Aalajangersakkat taaneqartut taakku malillugit politiit piaarnerpaamik aamma akuliunnerup aallartinnerata kingorna

kingusinnerpaamik nalunaaquttap akunneri 24-t qaangiutsinnagit suliaq politiit eqqartuussivimmut saqqummiutissavaat. Akuliunneq akuerineqarsinnaanersoq aamma attaneqarsinnaanersoq eqqartuussiviup aalajangissavaa. Eqqartuussiviup aalajangiinissaata utaqqineqannginneranut piumasaqaatit tassunga atatillugu eqqartuussivimmit immikkut misilinneqassaaq. Eqqartuussiviup isumaa malillugu akuliunneq suliarineqarsimasussaangikkaluarpat, tamanna pillugu eqqartuussiviup Inatsiseqarnermut ministereqarfik ilisimatissavaa.

Inatsiseqarnermut ministereqarfiup ilisimatinneqarnissaa pillugu aaqqissuussineq eqqartuussisarnermik inatsisip massakkut atuuttup 2010-mi atuutilernerani ilanngunneqarpoq aamma nalunaaruteqartussaannermik aaqqissuussineq taamanikkut qallunaat eqqartuussisarnermik inatsisaanni atuuttoq assingusoq tunngavigalugu ilanngunneqarluni.

Nalunaaruteqartussaannermik aaqqissuussineq Inatsiseqarnermut ministereqarfimmut maleruagassanik unioqqutitsisumut pillaatinik imaluunniit allakkut akuliunnernik periarfissiisoq aamma akuliunnerit kukkusumik atorneqarnerisa annertussusaat pillugit paasissutissat katersorneqarnissaat tikikkuminartuunissaasalu qulakkeerneqarnissaat, isumaliutissiisut nr. 1023/1984 qupperneq 72 malillugu qallunaat malittarisassaannut taamanikkut atuuttunut piareersaataasumik suliani takuneqarsinnaavoq.

Eqqartuussiviup Inatsiseqarnermut ministereqarfimmut nalunaaruteqarnerata kingorna, Inatsiseqarnermut ministereqarfiup politeeqarfik akuliunnernik taassuminnga suliaqarsimasoq, statsadvokati attuumassuteqartoq kiisalu Rigsadvokati suliaq oqaaseqarfigeqqullugu noqqaaffigissavai. Oqaaseqaatigineqartut tunngavigalugit, eqqartuussivimmut oqaaseqaammik Inatsiseqarnermut ministereqarfik allassaaq, tassanilu ilaatigut pisinnaatitaanani akuliunneq Inatsiseqarnermut ministereqarfimmit suli allanik suliaqarfigineqaaqqissanersoq isumaliutigineqartoq allanneqassaaq.

Sulisaatsimi ullumikkut imaattarpoq, statsadvokati aamma/imaluunniit piffissami tassani, oqartussaasut oqaaseqaataasa Inatsiseqarnermut ministereqarfimmut nassiunneqarnerisa nalaanni, politeeqarfimmi tassani suliniuteqartoqarnissaanik pisariaqartitsineq Rigsadvokatip isummerfigereersimasarjaa.

2.5.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

2.5.2.1. Pisassaq tiguniarlugu akiitsullip illuanit tigusineq pillugu inatsisip atorunnaarsinneqarnissaa aamma eqqartuussummik imaluunniit isumaqatigiissuteqarnermik tunngaveqanngitsumik akiliussineq (pillaatissiisoqarnissaanik suliap

naammassiuminarsarneqarnera, pigisanik agguaanerni digitaliusumik attaveqatigiinneq, eqqartuussivimmi inatsisilerituutut fuldmægtigit tunuartussaaitaanerannut ukioritinneqartut il.il.) pillugit eqqartuussisarnermik inatsisip inatsisillu allat allanngortinneqarnerat pillugu inatsisikkut nr. 1169-ikkut, 8. juni 2021-imeersukkut qallunaat eqqartuussisarnermik inatsisaat allanngortinneqarpoq, taamaalilluni akuliunneq, eqqartuussiviup aalajangernissaa utaqeqqaarnagu politiit suliarisimasaat, suliarineqarsimasariaqanngikkaluartoq eqqartuussivik isumaqaruni, siunissami Rigsadvokati eqqartuussiviup ilisimatissavaa. Akuliunneq Politiets Efterretningstjeneste-mit suliarineqarsimappat, nalunaarutiginninneq taamaattoq suli Inatsiseqarnermut ministereqarfimmut nalunaarutigineqartassaaq.

Inatsiseqarnermut ministereqarfimmut nalunaartussaaneq pillugu malittarisassat, akuliunnermut piumasaqaatit atuutsinnagit akuliuttoqarsimatillugu, qitiusumit qisuariarsinnaanerup periarfissaanissaa eqqarsaatigalugu inatsisiliornermi ilanngunneqarsimasooq, inatsisip allanngortinneqarnissaanut piareersaataasumik suliani takuneqarsinnaavoq. Taamanikkut suliap ingerlasarnera eqqarsaatigalugu ingerlatsinermi aningaasaqarneq pillugu isiginninneq aamma aaqqissuussinerup taamatut aaqqissugaanerata unnerluussisussaaitaasunit ingerlaavartumik nakkutigineqartarnissaanut suliassa qarfiup ilaatinneqarnissaanut periarfissat annertunerusumik patajaallisarneqarnissaannut tunngatillugu, Inatsiseqarnermut ministereqarfiup isumaa malillugu siunissami Rigsadvokatip nalunaarutiginninnernik taakkuninnga tigusisarnissaa pissusissamisoorpoq.

Suliani pisinnaatitaanani inuup nakkutigineqarani inummut allamut nalunaaruteqarsinnaatitaaneranut akuliunnermi maleruagassanik unioqqutitsineq pineqartillugu, politeeqarfinit innersuussinikkut, politiini tjenestemandit pillugit maleruagassanik unioqqutitsinermik suliat pillugit Rigspolitiit aallaaviatigut taakkuusussaammata aalajangiisartussat maluginiarneqarpoq.

Qallunaat eqqartuussisarnermik inatsisaanni § 109, imm. 3-mi oqaaseqatigiit aappaat malillugu maleruagassanik unioqqutitsineq pillugu suliani suliarinneqqaarnermi Rigspolitiit aalajangiineri Inatsiseqarnermut ministereqarfimmut naammagittaalliuutigineqarsinnaapput. Inuup nakkutigineqarani inummut allamut nalunaaruteqarsinnaatitaaneranut akuliunnerit pillugit suliani, maleruagassanik unioqqutitsineq pillugu suliamik aallartitsinissaq siunertaralugu, suliami tassani piviusumi pissutsinik suliap Rigspolitiinut nassiunneqarnissaa pillugu pissutissaqalersitsisunik peqarnersoq, politeeqarfik pineqartoq isummissaaq.

Taamaalilluni maleruagassanik unioqqutitsineq pillugu siunertat pineqartillugu aaqqissuussinertut siunnersuutigineqartoq allannguinnissamut pissutissaqartitsinngilaq, tassami ingerlatsineq manna tikillugu ingerlatsinertut ingerlaqqissammat. Kisianni

eqqartuussivimmit nalunaarutiginninnerit tiguneqarneri pineqartillugit Inatsiseqarnermut ministereqarfik taarserlugu Rigsadvokati sulianik tiguisalissaaq.

Politiets Efterretningstjenestip pinngitsaaliissummik akuliunnernik atuinera aamma pinerluttoqarsimaneranik paasiniaanera pineqartillugit, Politiets Efterretningstjeneste pillugu inatsimmi § 6 malillugu tamanna eqqartuussisarnermik inatsimmi malittarisassat aamma taakku malillugit malittarisassiunneqarpoq. Taamaalilluni Politiets Efterretningstjeneste aamma nalunaarutiginnittussaataaernermik pisussaannermi ilaatinneqarpoq aamma taamaalilluni taamanikkut aqqissuussineq malillugu pisinnaatitaanani akuliunnerit pillugit eqqartuussisarnermik inatsimmi malittarisassat malillugit Inatsiseqarnermut ministereqarfimmut nalunaarutiginnittartussaallutik.

Folketingstidende 2012-13, A, L 161 saqqummiunneqarsimasoq, qupperneq 54 malillugu politiit isertortumik paasiniaasartui aqqissuussaannermi rigspolitiit pisorta qarfiata ataaniikkaluartoq apeqqutaatinnagu, Politiets Efterretningstjenestimi pisortap toqqaannartumik Inatsiseqarnermut ministereqarfik qullersarigaa, Politiets Efterretningstjeneste pillugu inatsimmut piareersaataasumik suliat malitsigaat. Taamaalilluni naalakkersuisut sinnerlugit inatsiseqarnermut ministeri Politiets Efterretningstjeneste pillugu nakkutilliisussaavoq, aamma politiit isertortumik paasiniaasartui ministerip ilitsersuutaanik naalagarsiortussaataapput. Matumuuna Politiets Efterretningstjeneste pillugu inatsimmi § 1, nr. 4 malillugu Politiets Efterretningstjenestip taamaalilluni pissutsit nunap iluani isumannaatsuunissamut pingaaruteqartut, politiit isertortumik paasiniaasartuisa suliaqarnerannut pissutsit annertuumik pingaaruteqartut aamma suliat ataasiakkaat pingaarutillit pillugit inatsiseqarnermut ministeri nalunaarfigisassavaat.

Tamanna tunngavigalugu, taamanikkut aqqissuussineq atuuttoq, tassani PET-ip pisinnaatitaanani akuliunnerit pillugit Inatsiseqarnermut ministereqarfimmut nalunaarutiginnittarluni, attatiinnartariaqartoq Inatsiseqarnermut ministereqarfiup nalilerpaa.

Folketingstidende 2020-21, A, L 212 saqqummiunneqarsimasoq, qupperneq 42 innersuussutigineqarpoq.

2.5.2.2. Qallunaat eqqartuussisarnermik inatsisaanni inatsisikkut nr. 1169-ikkut 8. juni 2021-imeersukkut allannguinerit, Kalaallit Nunaanni eqqartuussisarnermik inatsimmi allannguutit assingi suliarineqassasut, Kalaallit Nunaanni Eqqartuussiveqarneq pillugu Siunnersuisoqatigiit innersuussutigisimavaat.

Kalaallit Nunaanni Eqqartuussiveqarnek pillugu Siunnersuisoqatigiit innersuussutaat Inatsiseqarnermut ministereqarfiup isumaqatigai.

2.5.2.3. Tamanna tungavigalugu eqqartuussisarnermik inatsimmi § 391, imm. 3 allanngortinneqassasoq siunnersuutigineqarpoq, taamaalilluni siunissami pisinnaatitaanani inuup nakkutigineqarani inummut allamut nalunaaruteqarsinnaatitaaneranik akuliunnerit pillugit sulianik Rigsadvokati eqqartuussivimmit nalunaarutiginninnermik tigusisalissaaq. § 399, imm. 6-imi, § 400, imm. 3-mi, aamma § 415, imm. 2-mi § 391-imut innersuussinerit pissutigalugit, piumasaqaatitalimmik aamma immikkut ittumik piumasaqaatitalimmik nakkutiginninnermi, paasissutissiinnermut systemimi paasissutissanik tamanit tikinneqarsinnaanngitsunik programmit atortussallu allat atorlugit atuaanermut aamma isertortumik uppernarsaatinik ujaasinissamik suliaqarnermi allanngueq taamatuttaaq atuutissaaq.

Pisinnaatitaanani akuliunnerit pillugit eqqartuussiviit nalunaarutiginninneri siunissami Rigsadvokatimut nassiunneqartarnissaat, siunnersuutip kinguneraa.

Politeeqarfimmi akuliunnermik suliarinnissimasumi oqaaseqaatit pissarsiarineqarnissaat, aamma statsadvokatip attuumassuteqartup oqaaseqaataanik pissarsinissaq kiisalu oqaaseqaatip eqqartuussivimmut nassiunneqarnissaa, tassani ilaatigut pisinnaatitaanani akuliunneq annertunerusumik iliuseqarnissamik pissutissaqalersitsinersoq pillugu isumaliutigineqarluni, siunissami unnerluussisussaataasunit katersorneqartalernissaat tamatuma kinguneraa.

Politiets Efterretningstjeneste pineqartillugu aaqqissuussinerup atuuttup allanngortinneqarnissaa siunnersuutigineqanngilaq. Taamaalilluni Politiets Efterretningstjenestemit pisinnaatitaanani akuliunnerit pillugit nalunaarutiginninnerit eqqartuussiviup Inatsiseqarnermut ministereqarfimmut nalunaarutigissavai.

Inatsisissatut siunnersuummi § 1, nr. * (§ 391, imm. 3-p allanngortinneqarnera) innersuussutigineqarpoq.

Internettikkut nittartakkat matuneqarnerat, radiokkut aallakaatitsinernik- imaluunniit nalunaarasuartaatitigut atassuteqaatinik akornusersuineq imaluunniit atassutaarutitsineq aamma ataaniittut imm. 2.7-imiit 2.9 ilanngullugu aamma inatsisissatut siunnersuummi § 1, nr. * (§ 400 a, imm. 4-tut, § 400 b, imm. 4-tut, aamma § 400 c, imm. 4 siunnersuutigineqartut) malillugit tv-kkut nakkutiginninnermik tigusinerit pillugit aalajangersagassatut nutaatut siunnersuutigineqartut assigalugit, nalunaarutiginnittarnermik aaqqissuussineq ilusilersorneqassasoq siunnersuutigineqarmat maluginiarneqassaaq.

2.6. Pinngitsaaliilluni akuliunnerit suliarineqarsimasut pillugit nalunaarutiginninneq

2.6.1. Inatsisit atuuttut

Inuup nakkutigineqarani inummut allamut nalunaaruteqarsinnaatitaanerani akuliunnerup naanerata kingorna, eqqartuussisarnermik inatsimmi § 396 malillugu inummut akuliunnermi pineqartumut, akuliunneq pillugu nalunaarutiginnittoqassaaq. § 399, imm. 6-imi, § 400, imm. 4-mi, aamma § 415, imm. 2-mi innersuussinerit pissutigalugit, piunasaqaatitalimmik aamma immikkut ittumik piunasaqaatitalimmik nakkutiginninnermi, paasissutissiinnermut systemimi paasissutissanik tamanit tikinneqarsinnaanngitsunik programmit atortussallu allat atorlugit atuaanermut aamma isertortumik uppernarsaatiniq ujaasinissamik suliaqarnermi allanngineq taamatuttaaq atuutissaaq.

Pinngitsaaliilluni akuliunneq pillugu nalunaarutiginninnerup pinerluttoqarsimaneranik paasiniaaneq ajoqusissappagu, imaluunniit pissutsit allakkut nalunaarutiginninnissaq akerlilerpassuk, taamaattoq politiit noqqaassuteqarnerisigut nalunaarutiginninneq pissanngitsoq imaluunniit piffissamut aalajangersimasumut kinguartinneqassasoq, taannalu eqqartuussisarnermik inatsimmi § 396, imm. 4 malillugu kingusinnerusukkut aalajangiinikkut sivitsorneqarsinnaasoq, eqqartuussiviup aalajangersinnaavaa.

2.6.2. Inatsiseqarnermut ministereqarfiup isumaliutiginninnera aqqissuussinerlu siunnersuutigineqartoq

2.6.2.1. Pillaasarnermik inatsisip aamma eqqartuussisarnermik inatsisip allanngortinneqarnissaat pillugu inatsisikkut nr. 436-ikkut, 10. juni 2003-imeersukkut (Rockerit pinerluttuliortarnerisa aamma aqqissuussaasumik pinerluttuliortarnerit allat akiorniarneqarnerat) pillugu aalajangersagaq assingusoq qallunaat eqqartuussisarnermik inatsisaanni § 788, imm. 4 allanngortinneqarpoq, taamaalilluni nalunaarutiginninneq inatsimmik unioqquitsineq pillugu, inatsit malillugu inuup nakkutigineqarani inummut allamut nalunaaruteqarsinnaatitaaneranut akuliunnermik tunngaviliisinnaasoq pillugu pinerluttoqarsimaneranik paasiniaanerami allami ingerlasumi ajoqutaasinnaappat imaluunniit ajoqutaappat, pinngitsaaliilluni akuliunnerup suliarineqarsimasup nalunaarutigineqarnera aammattaq pinngitsoortinneqarsinnaalerpoq imaluunniit kinguartinneqarsinnaalerluni.

Suliani aqqissuussaasumik pinerluttuliortarnermik tunngasuni, inuup nakkutigineqarani inummut allamut nalunaaruteqarsinnaatitaanerani akuliunneq pillugu tamatuma kinguneratigut pasineqartumut nalunaarutiginninnermi, pinerluttoqarsimaneranik paasiniaaneq alla paasineqarsinnaasoq, politiit unnerluussisussaataasullu suleqatigiissitani sinniisuutitaasa, rockerit pinerluttuliortarnerisa politiit suliniuteqarfigineqarnerisa patajaallisarneqarnissaannut siunnersuutiniq siunnersuusiortussat, tikkuarsimagaat,

inatsisissap allangortinneqarnissaanut piareersaataasumik suliani takuneqarsinnaavoq. Avatangiisini aaqqissuussaasuni soorlu assersuutigalugu rockerini eqimattakkuutaani pinerluttoqarsimaneranik paasiniaanermi akuliunnerit amerlanertigut inunnut arlalinnut piffissami tassani suliarineqartarput. Pisuni taamaattuni inuup nakkutigineqarani inummut allamut nalunaaruteqarsinnaatitaanera pillugu akuliunneq naammassineqarsimasoq pillugu ilaasortamut nalunaarutiginnittoqarpat, paasissutissaq taanna amerlanertigut pinerluttoqarsimaneranik paasiniaanerup tamarmiusup paasisaanissaanut naammattarpoq aamma taamaalilluni ilungersunartumik pinerluttuliornerup paasinarsisinneqarnissaanut ajornakusoortitsilersarluni.

Nalunaarutiginninnerup pinngitsoortinneqarnissaa pillugu taamanikkut § 788, imm. 4-imi aalajangersagaq atuuttoq, eqqartuusseriaaseq atuuttoq malillugu killilerujussuarmik nassuiarneqartarpoq, taamaalilluni nalunaarutiginninnissap pinngitsoortivinneqarnissaa pillugu periarfissaq qaqutigorujussuaq atorneqartarluni. Taamatuttaaq nalunaarutiginninnissap kinguartinneqarnera piffissami sivikinnerusumi, assersuutigalugu qaammatini 3-ni taamaallaat akuersissutigineqartarpoq. Pinerluttuliorarneq avatangiisini aaqqissuussaasuni pinerluttuliarineqartarpoq pillugu pinerluttoqarsimaneranik paasiniaaneq amerlanertigut sivirusinnaasarmat, pinerluttoqarsimaneranik paasiniaanerup taamaattup suliarineqarnerani ataasiarluni akuliunneq pillugu nalunaarutiginnittoqannginnissaa annertuumik pingaaruteqarpoq.

Nalunaarutiginninnerup pinngitsoortinneqarnissaanik periarfissaq, assersuutigalugu pinerluttoqarsimaneranik paasiniaanermut, pasinninnermut tunngassuteqartumut atorneqarsinnaasoq, tassami akuliunneq uppersaatini naammattunik tunniussisimangimmat, imaluunniit suliami pineqartumi pinerluttoqarsimaneranik paasiniaaneq naammassineqarsimammat, kisiannili isumaliutissiissut nr. 1023/1984 qupperneq 119-imiit 120 ilanngullugu malillugit inatsisunik unioqqutitsinerit allat pillugit suli pinerluttoqarsimaneranik paasiniaasoqartussaanaera pissutigalugu suli ingerlassasoq, taamanikkut aalajangersakkamut atuuttumut piareersaataasumik suliani taaneqarpoq. Pisuni taamaattuni nalunaarutiginninneq aqqutigalugu, tusarnaarsimaneq paasisoorneqarpat, siunissami pinerluttoqarsimaneranik paasiniaanissanut ajoqutaasinnaaassaaq.

§ 788, imm. 4-imi aalajangersakkap eqqartuusseriaatsimi atuuttumi killeqartumik nassuiarneqartarnera pillugu suleqatigiissitanit paasissutissiineq, erseqqissaanissaq siunertaralugu, pisut ilaanni nalunaarutiginninnerup pinngitsoortinneqarnissaanut imaluunniit nalunaarutiginninnerup taamaattup kinguartinneqarnissaanut periarfissiisoqartariaqaraluarnera pissutigalugu aalajangersakkap allangortinneqarnissaata siunnersuutigineqarnissaa, Inatsiseqarnermut ministereqarfiup isumaa malillugu pissutissaqalersippaa. Taamaaliorneq ingammik pinerluttuliornerit aaqqissugaanerusut imaluunniit ataqatigiissillugit aaqqissuussaanagerusutut pissusillit pillugit suliani, akuliunneq

pillugu paasissutissaq taannarpiaq pinerluttoqarsimaneranik paasiniaanermut ajoquseerujussuarsinnaammat, pinerluttoqarsimaneranik paasiniaanernut atatillugu nalunaarutiginninnerup pinngitsoortinnissaa imaluunniit kinguartinneqarnissaa pisariaqartinneqartussaavoq. Aammattaaq avatangiisit aaqqissugaasumik pinerluttuliorfiusut, soorlu assersuutigalugu rockerit eqimattakkuutaat, pinerluttoqarsimaneranik paasiniaaffigineqarneranni akuliunnermut pissutaasimasumit allaanermut pinerluttoqarsimaneranik paasiniaaneq eqqarsaatigalugu, nalunaarutiginninnissap pinngitsoortinneqarnissaa amerlanertigut pisariaqartinneqartarpoq. Ingammik pisuni, inummut avatangiisiniittumut pinngitsaaliilluni akuliunnerup suliarineqarsimaneq pillugu paasissutissap nammineq eqimattanut pinerluttuliorfiusut politiit taakkuninnga soqutiginninnerat paasitissavaa, taamaalillunilu pinerluttuliorfiusut ilungersunartoq alla pillugu pinerluttuliorfiusut pinerluttoqarsimaneranik paasiniaaneq ajornakusoortilissallugu. Taamaattoq aalajangersagassatut siunnersuutigineqartoq malillugu, pinerluttuliorfiusut, pinerluttoqarsimaneranik paasiniaanermut allamut tunngassuteqartoq, nammini inuup nakkutigineqarani inummut allamut nalunaaruteqarsinnaatitaaneranut akuliunnermut tunngaviliinissaa piumasagaataavoq.

Folketingstidende 2003-04, ilanngussaq A, quppernerit 6741-miit 6742 ilanngullugu innersuussutigineqarput.

2.6.2.2. Pillaasarnermik inatsisip, eqqartuussisarnermik inatsisip inatsisillu allat (Pinerliiniartarnerup il.il. akiorniarneqarnerani suliniutit patajaallisarneqarnerat) allanngortinneqarnerat pillugu inatsisikkut nr. 542-ikkut 8. juni 2006-imeersukkut qallunaat eqqartuussisarnermik inatsisaanni § 788, imm. 4 allanngortinneqaaqqippoq, taamaalilluni pinngitsaaliilluni akuliunneq suliarineqarsimasoq pillugu nalunaarutiginninneq matuma kingorna politiit pinerluttoqarsimaneranik paasiniaanerananni periaatsit pillugit paasissutissat oqaatigeqqusaanngitsut illersorneqarnissaanut qajassuussinissat nalunaarutiginninnermut akerliuppata, aammattaaq pinngitsoortinneqarsinnaalerpoq imaluunniit kinguartinneqarsinnaalerluni.

Politiit pinerluttoqarsimaneranik paasiniaanerananni periaasaat pillugit paasissutissat allanut oqaatigeqqusaanngitsut illersorneqarnissaat eqqarsaatigalugu nalunaarutiginninnissaaq pinngitsoortinneqarsinnaasoq, pinerliiniat akiorneqarnissaat pillugit ministeriaqarfiit assigiinngitsut akornannit suleqatigiissitat siunnersuutigisimagaat, inatsisip allanngortinneqarnissaanut piareersaataasumik suliani takuneqarsinnaavoq. Politiit pinerluttoqarsimaneranik paasiniaanerananni periaasaat pillugit paasissutissat allanut oqaatigeqqusaanngitsut illersorneqarnissaat eqqarsaatigalugu tamanna pisariaqartinneqarpat, illersuisup pasineqartullu allagaatinik takunnissinnaatitaanerat avaqqunneqarnissaa politiit noqqaassuteqarnerisigut eqqartuussiviup aalajangiisinnaanera pillugu, qallunaat eqqartuussisarnermik inatsisaanni § 729 c, imm. 1 nr. 6 malikkitsik

suleqatigiissitat innersuussuussutigisimavaat. Suleqatigiissitat isumaat malillugu, eqqarsaatigisassat taakku taamatutaaq inuup nakkutigineqarani inummut allanut nalunaaruteqarsinnaatitaaneranut akuliunnermut atuupput, tassami pisut pisinnaapput, tassani politiit teknikkini inunnit amerlanernit ilisimaneqanngitsunik atuisinnaammata, matumani avatangiisini pinerluttuliorfiusuni, aamma akuliunneq pillugu nalunaarutiginninnerup siunissami politiit pinerluttoqarsimaneranik paasiniaanermi teknikkimik taassuminnga atuinissamik periarfissaq periarfissaajunnaarsissammagu.

Politiit pinerluttoqarsimaneranik paasiniaaneranni periaasaat pillugit paasissutissat allanut oqaatigeqqusaanngitsut illersorneqarnissaat tunngavigalugu, nalunaarutiginninnerup pinngitsoortinneqarnissaa pillugu erseqqissumik periarfissaliissummik aalajangiisoqarnissaa pillugu suleqatigiissitat innersuussusutaat, Inatsiseqarnermut ministereqarfiup isumaqataaffigaa. Taamaalilluni paasissutissat taamaattut pinerluttuliornermik avatangiisini siammarterneqarpata, politiit siunissami pinerluttoqarsimaneranik paasiniaanermut periarfissaannut annertuumik ajornartorsiutinik pilersitsisinnaassapput.

Folketingstidende 2005-06, ilanngussaq A, quppernerit 7190-imiit 7191 ilanngullugu innersuussutigineqarput.

2.6.2.3. Politiit suli pinerluttoqarsimaneranik paasiniaanissamut periarfissaasa qulakkeerneqarnerannut eqqarsaatigisassat taakku, qallunaat eqqartuussisarnermik inatsisaanni malittarisassap ilusilerneqarneranut tunngavilersuutaasut, Inatsiseqarnermut ministereqarfiup isumaa malillugu aamma Kalaallit Nunaanni atuupput.

Taamaalilluni Kalaallit Nunaanni eqqartuussisarnermik inatsimmi § 396 qallunaat eqqartuussisarnermik inatsisaanni 2003-mi aamma 2006-imi § 788-imik allanngortinneqarnera naapertorlugu allanngortinneqartariaqartoq, Inatsiseqarnermut ministereqarfik isumaqarpoq.

Pinngitsaalilluni akuliunnerit suliarineqarsimasut pillugit nalunaaruteqartarnerup pinngitsoortinneqarnissaa pillugu piffissami 2003-miit 2013 ilanngullugu qallunaat eqqartuussisarnermik inatsisaanni allannguinerit pillugit allakkiami ataatsimut Kalaallit Nunaanni eqqartuussiveqarneq pillugu Siunnersuisoqatigiinnut saqqummiunneqartumi ilaamat maluginiarneqassaaq. Isumaliutiginninnerit ingerlaqqinnissaat siunertaralugu, inatsimmi allannguinerit pillugit allakkiap Inatsiseqarnermut ministereqarfirmut Kalaallit Nunaannilu Namminersorlutik Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

2.6.2.4. Taamaammat inatsisissatut siunnersuutikkut eqqartuussisarnermik inatsimmi § 396, imm. 4 allanngortinneqassasoq siunnersuutigineqarpoq, taamaalilluni nalunaarutiginninneq inatsimmik unioqquitsineq pillugu suliami allami ingerlasumi pinerluttoqarsimaneramik paasiniaanermut, inatsit malillugu inuup nakkutigineqarani inummut allamut nalunaaruteqarsinnaatitaaneranut akuliunermik tunngaviliisinnaasumut, ajoqutaassappat, imaluunniit politiit pinerluttoqarsimaneramik paasiniaaneranni periaatsit pillugit paasissutissat oqaatigeqqusaanngitsut illersorneqarnissaannut qajassuussinissat nalunaarutiginninnermut akerliuppata, aammattaaq pinngitsoortinneqarsinnaassalluni imaluunniit kinguartinneqarsinnaassalluni.

Inatsisissatut siunnersuummi § 1, nr. * (eqqartuussisarnermik inatsimmi § 396, imm. 4-p allanngortinneqarnera) innersuussutigineqarpoq.

2.7. Internettikkut nittartakkanik matusineq

2.7.1. Inatsisit atuuttut

Eqqartuussisarnermik inatsimmi pinerluttuliormi eqqartuussisarneq pillugu malittarisassat malillugit internettikut nittartakkanik matusinissaq ullumikkut periarfissaqanngilaq.

Kisianni arsaarinnissuteqarsinnaaneq pillugu eqqartuussisarnermik inatsit aalajangersakkanik imaqarpoq. Ilaatigut inatsimmik unioqquitsinernut ilaatillugu, eqqunngitsuliorfigineqartoq ilanngutinnikkaluarlugu unnerluussisussaataasunit suliami ingerlanneqartumi, § 419, imm. 1 malillugu tigussaasoq suugaluartorluunniit uppersaataatut isumaqarfigineqarnissaa pissutissaqarpat, inuup pasineqanngitsup, atorsinnaasaani, tigussaasoq suugaluartorluunniit uppersaataasinnaasoq tunngavissaqartutut isumaqarfigineqarpat, arsaarinnissutigisariaqartoq imaluunniit inatsisip unioqquatinneqarnerani tillinneqarsimappat, taassumalu tillitap tigoqqinnissaa piumasaaqatigisinnaappagu, tigussaasunik suugaluartunilluunniit arsaarinnittoqarsinnaavoq. Eqqartuusseriaaseq atuuttoq malillugu, tigussaasunut suugaluartunilluunniit internettikkut nittartakkanit takussutissiat aamma ilaatinneqarput, assersuutigalugu qallunaat eqqartuussisarnermik inatsisaanni § 803, imm. 1-imi aalajangersakkap assigisaa pillugu, Eqqartuussiviit qullersaata aalajangiinera Ugeskrift for Retsvæsen 2007, qupperneq 1831-imi issuarneqartoq, aamma Østre Landsret-ip aalajangiinera Tidsskrift for Kriminalret 2018, qupperneq 681-imi issuarneqartoq malillugit, taakku taamaammat arsaarinnissutigineqarsinnaapput.

Aallaaviatigut eqqartuussiviup aalajangiineratigut arsaarinninneq pisarpoq. Inuk akuliunermi pineqartoq, akuliunneq pillugu akuersissuteqarnini allakkatigut

nalunaarutigippagu, taamaattoq arsaarinnissuteqarnissamik aalajangiineq politiinit aalajangerneqarsinnaavoq.

Internettikkut nittartakkanik arsaarinninnerit pingaartumik pisuni, internetikkut nittartagaq Kalaallit Nunaannit aqunneqartillugu politiinit atorneqartarpoq. Sulisaatsimi internettikkut quppersakkat, »gl«-imik naggatillit, Tusassimit aqunneqartut pineqarput. Tusass er et aktieselskab ejert af Selvstyret, som står for telefoni, internet og transport af pakker og breve i Grønland.

Eqqartuussiviup aalajangenera internettikkut nittartakkamut pineqartumut aqutsisumut (Tusassimut) nassiunneqassaaq, tamatumalu kingorna internettikkut nittartakkamut pisinnaatitaanerit politiinut nuunissaat pillugit tekniskiusumik iliuitsit pisariaqartinneqartut aqutsisup aalajangissavai. Tamatuma kingorna internettikkut nittartagaq iserfiginiaraanni, piffissami killilimmi pisinnaatitaanerit politiinut nuunneqarsimanerat pillugu ilisimatitsissut ilisaqqunnartumik saqqummissaaq.

Internettikkut nittartagaq nunani allani aqunneqarpat, sulisaaseq malillugu arsaarinninnerup naammassineqarnissaa ajornakusuussaaq, tassami nunamit taassuminnga, internettikkut nittartakkap aqunneqarfianit, ikiorneqarneq pisariaqarmat. Nunani allani internettikkut nittartakkap arsaarinnissutigineqarnissaa pillugu, nunanut allanut inatsisitigut siunnersorneqarnermik noqqaassuteqarnissaaq ajornanngilaq, kisianni tamanna amerlanertigut piffissarujussuarmik atuiffiusarpoq, aamma misilittakkat malillugit, inatsisitigut siunnersuinermik taamaattumik pissarsiffiusinnaanngitsunik nunaqarpoq.

Maannakkut internettikkut nittartakkat matuneqartarnerat Danmarkimi, Savalimmiuni Kalaallit Nunaannilu isumaqatigiissutit, Matusinissamut aqqissuussineq-tut ilusillit, atorneqartarput. Meeqqanik kinguaassiuutitigut atonerluineq pillugu atortussat internetikkut iserfigineqarsinnaanerisa akornuserniarneqarnerannut ilungersornermi 2005-ip kingorna Rigspolitiit Red Barnet aamma Danmarkimi, Savalimmiuni aamma Kalaallit Nunaanni internettimut aqqutinik tuniniaasartut amerlanersaat suleqatigaat. Internettimut aqqutinik tuniniaasartut suleqatigineqarnerannut atatillugu, suleqatigiinnissamut isumaqatigiissutit piviusut tunngavigalugit, internettimi nittartakkat adressii, Rigspolitiit naliliinerat malillugu inatsisit unioqqutillugit atortussanik pineqartutut pissusilinnik imaqartut, Rigspolitiit internettimut aqqutinik tuniniaasartunut paasissutissat ingerlaavartumik ingerlateqqittarpaat. Tamatuma kingorna internettimut aqqutinik tuniniaasartut nittartakkamut DNS-ip matuneqarnissaa aallartittarpaat.

Nittartakkamik matuneqarsimasumik iserfiginiarlugu misiliinermut atatillugu, Matusinissamut aqqissuussineq-mut atatillugu DNS-ip matuneqarnerata aallartinneqartup

malitsigisaanik, nittartakkap atortussanik, pillaasarnermik inatsimmi § 235-imi ilaatinneqartunik (meeqqanik kinguaassiuutitigut tunngassuteqartunik assinik aamma filmilianik pigisaqarneq siammarterinerlu pillugit) imaqarnera pissutigalugu nittartakkap iserfiginiarneqaraluartup matuneqarnera pillugu paasissutissaq saqqummissaaq. Inummit immikkut ittumik teknikkikkut paasisimasalimmit matusinerup taamaattup saneqqunnissaa taamaattoq ajornanngilaq.

2.7.2. Inatsiseqarnermut ministereqarfiup isumaliutiginninnera

2.7.2.1. Eqqartuussisarnermik inatsisip inatsisillu allat allanngortinneqarnissaat pillugu inatsisikkut (Nittartakkanik matusineq aamma inummut sakkutuujunngitsumut nammineq suliniuteqarnini tunngavigalugu nunamut allamut sorsukkiartorluni aallartumut pisortanit ikiorsiissutit unitsinneqarnerat) nr. 674-ikkut, 8. juni 2017-imeersukkut qallunaat eqqartuussisarnermik inatsisaanni, nittartakkamiit pillaasarnermik inatsimmi §§ 114-imiit 114 i ilanngullugu, 119-imiik imaluunniit 119 a-mik unioqqutitsisoqarnera pillugu pissutissaqartumik isumaqartoqartillugu, nittartakkat matuneqarnissaat pillugu § 791 d-mi aalajangersakkamik ilanngussisoqarpoq.

Ingasaassiniarnerup aamma inuup isiginnittaatsinik ingasaassisunik isumaqataalernissaa imaluunniit ingasaassisumik eqqarsartaaseq malillugu iliuutsiminik pissutissaqartitsilernissaata akiorneqarnissaat pillugit, nunamut tamarmut iliuusissanut pilersaarummik tamanna atugassanngortitsisoq, inatsisissatut siunnersuummut piareersaataasumik suliani oktober 2016-imeersumi takuneqarsinnaavoq.

Avatangiisit ingasaassiniartut internettimik inoqatinullu atassuteqaatinik, isumaqatissarsiornertik siammarterniarlugu, nutaanik ilassarsiorniarlutik aamma suliniutit ataqatigiissillugit aaqqissuussamik iluaqutiginnittarput, aamma ilisarnaatit, assit, filmit, nipilersuutit nutaarsiassallu, demokratimut akiuunnerit aamma nalunaarutit nakuusernertallit sukkasuumik siaruarterneqarnerat anguaat, aamma iliuusissanut pilersaarummi internetti inoqatinullu attaveqaatit atorlugit ingasaassiniartutut isumaqatissarsiornertup akiorniarneqarnera aamma inuup isiginnittaatsinik ingasaassisunik isumaqataalernissaa imaluunniit ingasaassisumik eqqarsartaaseq malillugu iliuutsiminik pissutissaqartitsilernissaata pitsaaliorneqarnissaa pillugit suliniutit assigiinngitsut suliniutiginiarneqarput. Ingasaassisunik imaqartunik internettikku siammarterinerup killilersorneqarnissaa suliniutit ilagaat.

Tamanna immikkoortortamik nutaamik, Politiets Efterretningstjeneste-mi inissinneqartumik, pilersitsinikkut ilaatigut pissaaq, taassumalu – ilaatigut internetti pillugu nioqqutissiortut suleqatigalugit – internettimut attaveqarfinni ingasaassiniarnerit nakuusernertallit sukkanerpaamik suussusersineqarnissaat internettimiillu peerneqarnissaat,

taamaalilluni meeqqat inuusuttullu annikinnerusumik navianartorsiortinneqarnissaat qulakkeertussaassavaa. Aammattaaq internettimut matusissutissamik filterimik eqqussisoqartussaasimavoq, taassumalu nunanit allanit nittartakkat atorlugit, pinerliiniarneq il.il. pillugit isumaqatissarsiornermik siaruarterisinnaaneq killilersortussaasimavaa.

Nittartakkanut nunanit allanit tungavilinnut, pinerliiniarneq il.il. pillugit isumaqatissarsiornermik siaruarteriffiusunut, taamanikkut sunniuteqarluartumik qanoq iliuseqarfiginissaannut nittartakkat arsaarinnissutigineqarsinnaanerannut periarfissat naammassimangillat, tassami amerlanertigut nunani allani nittartakkat taamaattut arsaarinnissutigineqarnissaat piffissamik sivisoorujussuarmik atuiffiusarpoq aamma ajornartorsiutinut annertuunut atassuteqartarluni, soorlu aamma nunaqartoq, nittartakkap arsaarinnissutigineqarnissaata naammassineqarnissaanut ikiorneqarnissaq ajornartartoq.

Naak qallunaat inatsiseqartitsinerannut akerliusunik siunertaqarluni nunani allani nittartakkanik atuneq, inuup isiginnittaatsinik ingasaassisunik isumaqataalernissaanut imaluunniit ingasaassisumik eqqarsartaaseq malillugu iliuitsiminik pissutissaqartitsilernissaanut siunertanut nunani allani nittartakkat atorneqarnerinut ajornartorsiut killilerneqanngikkaluartoq, nittartakkat matuneqarnissaat pillugit aalajangersagaq nutaaq taamanikkut sulianut pillaasarnermik inatsimmi pinerliiniarnermut il.il. pillugit malittarisassanik unioqquitsinermut killilerneqartariaqartut nalilerneqarsimavoq, matumani pinerliiniarnermi isumaqatissarsiornerit, aamma suliat pillaasarnermik inatsimmi siorasaarineranut kiisalu akornusersuineranut aamma pisortani sulisunik periaqassatut toqqaanernut tungassuteqartut ilanngullugit.

Nittartakkap matuneqarnera pillugu aalajangersagaq nutaaq taamaalilluni suliaassaqarfinnut, taamanikkut pillaasarnermik inatsimmi unioqquitsineranut nittartakkani suliarineqartunut sakkortunerusumik illersuinissamut ajornaatsumik pisariaqartitsiviusutut nalilerneqartunut killilerneqartariaqarsimavoq.

Inummit immikkut ittumik teknikkikkut paasisimasalimmit matusinerup taamaattup saneqqunnissaa taamaattoq ajornanngitsoq, Inatsiseqarnermut ministereqarfiup ilisimavaa. Kisianni akuliunneq agguaqatigiissillugu internettimik atuisartunut inatsisit unioqqustillugit atortussiarineqartut siamarneqarnissaannut killiliinissamut tungatillugu, akuliunneq sunniuteqassasoq, Inatsiseqarnermut ministereqarfik isumaqarpoq.

Tassani piumasagaatit erseqqinnerusut arlallit naammassineqarsimappata, pinerluttoqarsimaneramik paasiniaanermi atortut allat pillugit malittarisassanut annertuumik assingusut, soorlu assersuutigalugu arsaarinninnernut tunniussisussaataitanernullu, matumani ingammik eqqartuussiviup sioqqutsisumik aalajangiinera malillugu pillaasarnermik inatsimmik unioqquitsinerit aalajangersimasut ilaannut taamaallaat

akuliunnerup atorpeqarsinnaanera, aamma akuliunerup atsikkutigiiittussaanera ilanngullugit, matusineq taamaallaat suliarineqartariaqartoq Inatsiseqarnermut ministereqarfik isumaqarpoq.

Folketingstidende 2016-17, A, L 192-imi saqqummiunneqarsimasumi, qupperneq 11-imiit 13 ilanngullugu innersuussutigineqarput.

2.7.2.2. Pillaasarnermik inatsisip, eqqartuussisarnermik inatsisip aamma inatsisit assigiinngitsut allat (pillaatissiisoqarnissaanik suliami suliap ingerlasarnerani naammassiuminarsarneqarnera aamma Inuusuttut pinerluttuliortarnerat pillugu aalajangiisartuni aalajangiinermi ingerlatsineq il.il., assit ingerlateqqinneqarnissaannut immiunneqarnissaannullu annertunerusumik periarfissaqalerneq, politiit pinerluttoqarsimaneranik paasiniaanissaannut periarfissat pitsaangorsaavigineqarnerat il.il.) matusinissamut periarfissaq annertusineqarpoq, taamaalilluni nittartakkat, taakkunannga pillaasarnermik inatsimmi § 263, imm. 1-imik, § 263 a-mik, § 264 d, imm. 2-mik, imaluunniit §§ 279, 279 a, 281, 290, 290 a, 300 a imaluunniit 301-imi aalajangersakkanik unioqquitsisoqartoq isumaqarfigineqarluni. Aammattaaq eqqartuussiviup aalajangernerata utaqqineqassappat, siunertaq maangaannartinneqassappat, politiit matusinissaq pillugu aalajangiinissaannut periarfissaq ilanngunneqarpoq.

2021-imiit 2023 ilanngullugu politiit unnerluussisussaataasullu aningaasaqarnerat pillugu isumaqatigiissut aallaavigalugu – Naalakkersuisunit (Socialdemokratinit) aamma Dansk Folkepartimit, Radikale Venstre-nit, Socialistisk Folkeparti-mit, Enhedslisten-imit, Det Konservative Folkeparti-mit aamma Nye Borgerlige-nit isumaqatigiissutigineqartoq – 2021-imi Rigspolitiini, ingammik it-mut attuumassuteqartumik aningaasaqarnikkut pinerluttuliornerit annertooujussuarmik siuariartornerat akiorniarlugu, aningaasaqarnikkut-aamma it-mut tunngassuteqartunik aningaasaqarnikkut pinerluttuliornerit pitsaaliorneqarnissaannut aamma akornuserneqarnissaannut suliniutit nutaat pillugit periarfissat misissorneqarnissaat pillugu suliaq aallartinneqarpoq. Suliamit tassannga nittartakkat matuneqartarnissaat pillugu siunnersuut aallaaveqarpoq.

Danmarkimi covid-19-imik nappaatip tunillaassuunnerata isumagineqarneranut atatillugu, pillaasarnermik inatsisip, eqqartuussisarnermik inatsisip aamma nunat allamiut pillugit inatsisip allanngortinneqarneri pillugit (Covid-19-imik tunngassuteqartunik imaluunniit atassuteqartunik inatsisinik unioqquitsinerit pillaatit sakkortusineqarnerat aamma nittartakkat, taakkunannga inatsisinik unioqquitsinerit ilaatigut covid-19-imit tunngassuteqartut imaluunniit attuumassuteqartut pillugit) inatsisikkut nr. 349-ikkut, 2. april 2020-imeersukkut utaqqiisaagallartumik aalajangersagaq eqqartuussisarnermik inatsimmi ilanngunneqarpoq, tamatumalu kingorna, nittartakkamit pillaasarnermik inatsimmi §§ 161-ip, 163-ip, 171-ip imaluunniit 189-ip, § 263, imm. 1-ip, imaluunniit §§ 263 a-p, 276-ip, 278-

imiit 283 ilanngullugu, 289-imiit 290 a ilanngullugu, 300 a-p, 301-ip imaluunniit 303-p, Danmarkimi covid-19-ip tunillaassuunneranik tunngaveqartumik imaluunniit attuumassuteqartumik unioqqutinneqarnerat pissutissaqartoq isumaqarfigineqarpat, nittartakkanik matusineq pisinnaavoq.

Nittartakkatigut, phishing (it atorlugu pinerluttuliornerit, tassani hackerit peqqusersiorlutik paasissutissanik isertuussaasunik tunniussititsiniaallutik) atorlugu pilerisaarinerinikkut, inuunnaat taakku akiliissutit pillugit paasissutissaataannik salloqittarlugit pinninniarnarat, tamatumalu kinguneratigut atornerluiniarnarat pillugu, covid-19-imik tunillaassuunneq atornerlunnarlugu misiliinerisa qaffariarsimanagerat pillugu, Center for Cybersikkerhed aamma Rigspolitiit paasisaqarnerat tunngavigalugu, utaqqiisaagallartumik aalajangersagaq taanna ilaatigut ilanngunneqarpoq.

Utaqqiisaagallartumik aalajangersagaq taanna automatiskiusumik ulloq 1. januar 2022 atorunnaarsinneqarpoq.

Internetti aqutigalugu covid-19-imut attuumassuteqartumik pinerluttuliornerit akiorniarlugit aalajangersakkat sunniuteqarluartumik politiinut sakkuusimasut, tamatuma kingorna takuneqarsinnaalerpoq.

Tamatuma peqatigisaanik nittartakkat ilumuunngitsut amerlassusaat qaffariarsimasoq, taakkunanngalu phishing pillugu pilerisaarutit aallartinneqartartut, covid-19-imik tunillaassuunnermut attuumassuteqanngitsut, Rigspolitiit paasisimavaat. Nittartakkat amerlanersaat Danske Bank-imit, akileraartarnermut oqartussanit, Nets-imit il.il. pigineqartutut saqqumisimapput, aamma innuttaasunit assersuutigalugu MitID imaluunniit akiliutit pillugit paasissutissanik salloqittaalluni pissarsiniarnernik siunertaqarsimallutik. Nalunaarutiginninnerni arlalinni, politiit tigusimasaanni, nunani allani internettimi sullissiivinnut tunngassuteqartut takuneqarpoq, matumani ».net«, ».com« imaluunniit ».eu« ilanngullugit.

Taamaalilluni pisuussutit pillugit pinerluttuliornerit, paasissutissat pillugit systemimut pisinnaatitaanani isernerit imaluunniit systemimik taamanikkut nittartakkanik matusinissaq pillugu aalajangersakkami ilaatinneqanngitsunit paasissutissat pillugit systeminut isersinnaanerup siaruarterneqarnera amerlanertigut pineqartarpoq, aamma taamaammat politiit tamannarpiaq pitillugu, periaaseq taanna ajornaatsumik atorneqarsinnaatillugu, arsaarinninneq pillugu malittarisassat atortariaqassavaat.

Pinerluttuliornerit internettikut pinerluutigineqartut sunniuteqarluartumik akiorniarneqarnissaat arsaarinninnermik malittarisassat naammattumik qulakkiinngikkaat, Inatsiseqarnermut ministereqarfik isumaqarpoq. Taamaammat nittartakkat

matuneqarnissaanut periarfissat annertusineqarnissaat aallartinniarneqarpoq. Tassunga atatillugu arsaarinninnermut naleqqiullugu, DNS-inik matusinerit aallaaviatigut ajornannginnerusut sukkannerusullu, aamma akuliunnermi piffissaasuoaqartillugu DNS-inik matusinerit taamaammat pisut ilaanni sunniuteqarluarnerpaamik aaqiissutaasartut, tassunga atatillugu maluginiarneqassaaq. Nunani allani nittartakkat tunngavillit pillugit suliani, nittartakkap arsaarinnissutigineqarnissaa amerlanertigut piffissamik annertuumik atuiiffiusarluni aamma ajornaatsumik nittartakkap arsaarinnissutigineqarnissaa ajornartorsiutinik atassuteqarluni, DNS-ip matuneqarnera ingammik naleqquttuuvoq.

Ilaatigut nittartakkanik, taakkunanga inatsisinik unioqqutitsinerit covid 19-imut attuumassuteqartut ilaat unioqqutitsissutigineqarlutik, matusineq pillugu politiit malittarisassanit misilittagaat – eqqarsaatigalugit – Inatsiseqarnermut ministereqarfiup isumaa malillugu nittartakkat matuneqarnissaanut periarfissat amerlineqarnissaat pisariaqarpoq, taamaalilluni matusisinnaanermut periarfissaq suliani amerlanerusuni atorneqarsinnaassammat, aamma naak inatsimmik unioqqutitsineq Danmarkimi covid-19-ip tunillaassuunneranit tunngaveqanngikkaluarpat imaluunniit atassuteqanngikkaluarpalluunniit.

Nittartakkanik matusinerit periarfissat amerlineqarneranni, pillaasarnermik inatsimmik unioqqutitsinerit ilaat, pingaarnertut internettikkut unioqqutitsissutigineqartut, aamma tassani pillaasarnermik inatsimmik unioqqutitsinerit (suli allat) pitsaaliorniarlugit imaluunniit unioqqutitsinerit ingerlasut kingunerisassaasat killilerniarlugit, nittartakkanik ajornaatsumik matusisinnaaneq pisariaqartinneqarluni, Inatsiseqarnermut ministereqarfiup naliliinera malillugu taamaallaat ilaatinneqartariaqarput. Pillaasarnermik inatsimmi pisuussutinut pinerluttuliornernut arlalinnut kiisalu eqqissisimanissamik innarliinernut-aamma nikanarsaanernut ministereqarfiup naliliinera malillugu tamanna atuuppoq, matumani immikkut ittumik sakkortusisamik pissutsit ataanni pillaasarnermik inatsimmi pisinnaatitaanani nalunaarutinik imaluunniit inummut namminerisamik pissutsit pillugit assinik ingerlatitseqqinnerit pillugit eqqartuussisarnermik inatsimmi § 264 d, imm. 2 ilanngullugu.

Pillaasarnermik inatsimmi § 264 d, imm. 2 pineqartillugu, aalajangersakkamik unioqqutitsinerit internettikkut unioqqutitsissutigineqartut sunniuteqarluartumik akiorneqarnissaasa qulakkeerneqarnissaanut arsaarinnissinnaanermik periarfissap naammannginnera nalilerneqarpoq, tassami pisut ilaanni, assersuutigalugu toqutsineri videoliat ingerlateqqinneqarsimallutik, nittartakkat, taakkunanga inatsisinik unioqqutitsinerit suliarineqarsimallutik, arsaarinnissutigineqarnissaanut nunani allani ingerlatsisut ikiuunnissaat ajornarsimavoq.

Pisuussutit pillugit pinerluttuliornernut ataatsimoorusseq tassaavoq, taakku internettikkut phishing atorlugu pilerisaarinq atorlugu amerlanertigut pinerluutigineqartarsimmata.

Akuliunnerup siunertarisaa, eqqartuussiviup aalajangiinissaata utaqqineqarnera pissutigalugu maangaannartinneqassappat, politiit suliani taamaattuni akuliunnermik aallartitsisinnaasariaqartut, Inatsiseqarnermut ministereqarfik isumaqarpoq. Phishing atorlugu pilerisaarinnermut tunngatillugu akuliunnerit immikkut ittumik piffissaasuanarnerat eqqarsaatigalugu tamanna isigineqassaaq, tassami pinerluttuliortut minutsialuit atorlugit aamma aningaasartuuteqarpiaratik e-mail-it sms-illuunniit amerlasoorujussuit inunnut amerlasoorujussuarnut nassiussinnaavaat, taakkulu imminnut pillutik, akiliissutit assigisaalluunniit pillugit paasissutissanik salloqittarneqarlutik pissarsiffigineqartarput, pissarsiarineqartullu pinerluttuliortunit tamatuma kingorna atonerlunneqarsinnaapput. Taamaalilluni naliliineq pivusoq malillugu, internettimi adressip, pilerisaarinnermi innersuussutigineqartup, pilerisaarinq pillugu inuppassuit qisuariartinnagit, nittartakkap matuneqarnissaata qulakkeerneqassappat, eqqartuussivimmit aalajangiineq pissarsiarineqartinnagu, politiinit matusinissap aallartinneqarnissaa pisariaqarsinnaavoq.

Pillaasarnermik inatsimmi § 264 d, imm. 2 (immikkut ittumik sakkortusisamik pissutsit ataanni pillaasarnermik inatsimmi pisinnaatitaanani nalunaarutitik imaluunniit inummut namminerisamik pissutsit pillugit assinik ingerlatitseqqinnerit) pineqartillugu, Inatsiseqarnermut ministereqarfiup isumaa malillugu assigisaanik periarfissaqarnissaq pisariaqartinneqanngilaq, tassami aallaaviatigut aamma taamatut pillaasarnermik inatsimmik unioqqutitsinerit, immikkut ittumik piffissaasualersitsisut, pineqanngimmata.

2.7.2.3. Qallunaat eqqartuussisarnermik inatsisaannik 2017-imi allanngineq, Kalaallit Nunaanni eqqartuussiveqarneq pillugu Siunnersuisoqatigiit 2018-imi ataatsimiinnerminni suliaat. Taamanikkut nittartakkat matuneqarnissaat pillugit Kalaallit Nunaanni eqqartuussisarnermik inatsimmi aalajangersakkamik ilanngussisoqarnissaa siunnersuisoqatigiit innersuussutiginnigilaat, tassami taamanikkut Kalaallit Nunaanni internettimut attaveqaatit atorlugit inuup isiginnittaatsinik ingasaassisunik isumaqataalernissaa imaluunniit ingasaassisumik eqqarsartaaseq malillugu iliutsiminik pissutissaqalersitsinissaa ilisimaneqanngitsoq imaluunniit pasitsaanneqanngitsoq, Kalaallit Nunaanni Politiit isimatitsissutigisimavaat.

Covid-19 pillugu qallunaat eqqartuussisarnermik inatsisaata 2021-imi allanngortinneqarnera Kalaallit Nunaanni eqqartuussiveqarneq pillugu Siunnersuisoqatigiit 2020-imi ataatsimiinnerminni suliaat. Kalaallit Nunaanni inatsimmik unioqqutitsinerit covid-19- imik tunngaveqartut imaluunniit atassuteqartut pillugit nittartakkat matuneqarnissaat pillugit malittarisassat pisariaqannginneranik Inatsiseqarnermut ministereqarfiup innersuussutaa, Kalaallit Nunaanni eqqartuussiveqarneq pillugu Siunnersuisoqatigiit ilalerpaat. Nittartakkat

matuneqarnissaannut nalinginnaasumik aalajangersakkamik Kalaallit Nunaanni eqqartuussisarnermik inatsimmi pisariaqartitsineq erseqqinnerusumik misissuiffigeqqissaarneqartariaqartoq, Rigspolitiit taamaattoq siunnersuutigaat. Nittartakkat matuneqarnissaannut pisariaqartitsineq Danmarkimut naleqqiullugu Kalaallit Nunaanni annikinnerunngitsoq, Kalaallit Nunaanni Politiit massakut isumaqarmata, Rigspolitiit ilaatigut innersuussutigaat.

Naggataagut inatsit nr. 897, 21. juni 2022-imeersoq ilaannakoortumik Kalaallit Nunaannut naammassineqarnissaa pillugu innersuussut, Kalaallit Nunaanni eqqartuussiveqarneq pillugu Siunnersuisoqatigiit 2022-imi ataatsimiinnerminni akuersaarpaat. Kalaallit Nunaanni nittartakkat matuneqarnissaannik pisariaqartitsineq pillugu misissueqqissaartoqassappat misissueqqissarnermut atatillugu, politiit nittartakkanik matusisinnaanerinnut periarfissat annertusineqarnissaat naleqquttuusinnaasoq, erniinnaartumik naliliinerusoq, innersuussummi takuneqarsinnaavoq.

Tamanna pillugu qallunaat eqqartuussisarnermik inatsisaanni aalajangersakkamut naapertuuttumik, politiit nittartakkanik matusisinnaanerannut periarfissat pillugit Kalaallit Nunaanni eqqartuussisarnermik inatsimmi aalajangersakkamik ilanngussisoqartariaqartoq, tamanna tunngavigalugu Inatsiseqarnermut ministereqarfik isumaqarpoq.

Sulisaatsimi nunani allani nittartakkat matuneqarnissaannut aalajangersagaq tunngassuteqarmat, aamma nunani allani nittartakkat matuneqarnissaannut naalagaaffimmi tamarmi periarfissat assigiinnissaat, Inatsiseqarnermut ministereqarfiup pingaartippaa.

Savalimmiuni eqqartuussisarnermik inatsit, 2017-imi naammassineqartoq, matusinissaq pillugu qallunaat eqqartuussisarnermik inatsisaanni § 791 d-mut assingusumik aalajangersakkamik imaqarmat, aamma savalimmiuni eqqartuussisarnermik inatsisip nunarterneqarnissaa pillugu inatsisissatut siunnersuummut missingiummi, ulloq 22. maj 2023 tusarniutigalugu nassiunneqartumi, savalimmiuni eqqartuussisarnermik inatsimmi, qallunaat eqqartuussisarnermik inatsisaanni § 791 d-p allanngortinneqarneranut naapertuuttumik aalajangersakkap annertusineqarnissaa siunnersuutigineqarmat, matumuuna maluginiarneqassaaq.

2.7.2.4. Tamanna tunngavigalugu eqqartuussisarnermik inatsimmi aalajangersakkamik nutaamik ilanngussisoqarnissaa siunnersuutigineqarpoq, tamatumalu kingorna nittartakkamit pineqartumit pinerluttulerinermi inatsimmi §§ 28-miit 35 ilanngullugu imaluunniit 37-imik, § 94, nr. 5-imik, imaluunniit §§ 95-imik, 104-imik, 105-imik, 108-imik, 111-imik imaluunniit 111 a-mik unioqqutitsinerit ingerlanneqartut pissutissaqartumik isumaqarfigineqarpat, politiit nittartakkamik matusinissamut periarfissamik tunineqassapput.

Pinerluttulerinermi inatsimmi pinerliiniarneq, pinerliiniarnermut attuumassuteqartumik iliuuseqarneq, pinerliiniarnermik imaluunniit iliuutsinik tamatumunnga attuumassuteqartunik aningaasalersuineq aamma pinerliiniaqatissanik ilassarsiornerit imaluunniit tamatumunnga attuumassuteqartumik iliuuseqarnerit aamma pinerliiniaqatissanik ilassarsiornerit, aamma pinerliiniarnissamut ilinniartitsinerit imaluunniit tamatumunnga attuumassuteqartumik iliuuseqarnerit, pinerliiniarnermut peqataanerit, aamma inatsisit unioqqutillugit pinerliiniarnermut ikiuinerit pillugit §§ 28-imiit 35 ilanngullugu inatsimmik unioqqutitsinerit pillugit aalajangersagaq siullertut atorpeqarsinnaavoq. Sakkut saassussitutit annertoorujussuarmik aseruisartut siaruarterneqartarnerat, pinerliiniartartunit tapiissutinik tigusinerit aamma akerleriissuteqarnermi pinerliiniarfimmut iserneq najugaqarnerlu pillugit eqqartuussisarnermik inatsimmi §§ 114 h-imiit 114 j ilanngullugu pinerluttulerinermi inatsit aalajangersakkanik imaqaannginnera eqqaassaanngikkaanni, taassuma eqqartuussisarnermik inatsimmi § 791 d assigaa.

Pisortat oqartussaataannik narrunarsaaneq pillugu pinerluttulerinermi inatsimmi § 37-imi unioqqutitsinermi aalajangersagaq aappaattut atorpeqarsinnaavoq. Taanna taamatuttaaq qallunaat eqqartuussisarnermik inatsisaanni § 791 d-p assigaa, tassami inunnik pisortani sullissisunut imaluunniit suliassaqartunik akornusersuineq pillugu pillaasarnermik inatsimmi § 119 a-imi malittarisassat assigisaannik taamaattoq pinerluttulerinermi inatsit imaqaanngilaq.

Pinerluttulerinermi inatsimmi unioqqutitsilluni qarasaasiap programmianut pulanerit, inuup inuunermini atugaasa allanit susassarineqanngitsut illersorneqarnerannik innarliineq, peqquserlunneq, paasissutissat pillugit peqquserlunneq, tillitanik pisineq aamma aningaasatigut peqquserluutinik malunnarunnaarsaaneq pillugit § 94, nr. 5, imaluunniit §§ 95, 104, 105, 108, 111 imaluunniit 111 a unioqqutinneqartillugit aalajangersagaq pingajuattut atorpeqarsinnaavoq. Taassuma taamatuttaaq qallunaat eqqartuussisarnermik inatsisaanni § 791 d assigaa, tassani paasissutissat pillugit systeminut isissutissat aamma akiliissutit pillugit pinerluttuliornerit pillugit pillaasarnermik inatsimmi §§ 263 a-mi aamma 301-mi assigisaannik malittarisassat assigisaannik taamaattoq pinerluttulerinermi inatsit imaqaanngilaq.

Matusinissaq pillugu aalajangersakkap siunnersuutigineqartup saniatigut, eqqartuussisarnermik inatsisip arsaarinnissutiginnittarneq pillugu malittarisassai attatiinnarneqassapput. Periaaseq taanna ajornaatsumik atorpeqarsinnaasoq nalilerneqarpat, arsaarinnissutiginninneq pillugu malittarisassat atorpeqarnissaat naatsorsuutaavoq.

Sulianut amerlasuunit aalajangersakkap atorneqaratarsinnaanera Inatsiseqarnermut ministereqarfiup ilisimavaa. Taamaammat akuliunnermi isumalluutitik atuinerup inatsimmik unioqquitsinerup peqqarnissusaanut naapertuunnissaa, aamma akuliunneq pisumi piviusumi naleqquttuunersoq pillugit politiit naliliinissaat naatsorsuutigineqarpoq.

Aammattaaq matusinissaq pillugu aalajangiisoqartinnagu atsikkutiginneq pillugu oqimaaqatigiissitsisoqassaaq. Akuliunneq suliap pingaaruteqassusaanut aamma akuliunnerup akornusiineratut kingunissaatut isumaqarfigineqartunut naapertuutinngippat, taamaalilluni matusineq suliarineqassanngilaq.

Massakkuugallartoq nittartakkap ilivitsup matuneqarnissaa DNS-ip matuneqarneratigut taamaallaat teknikkikkut periarfissaanera, aamma naak nittartakkami imarisaasut ilaminiinnanguat inatsimmik unioqquitsinerugaluartoq, naliliinermi ilaatigut ilaatinneqassaaq. Assersuutigalugu inoqatinut attaveqaatini inuup ilisarititsissutaata matuneqarnissaa ajornassaaq. DNS-imik matusinikkut taamaallaat inoqatinut attaveqaatip tamarmiusup matuneqarnissaa ajornanngilaq, tamannalu akuliunnertut atsikkutigiiissuunngitsutut nalinginnaasumik isumaqarfigineqartariaqarpoq.

Eqqartuussiviup aalajangiinissaata utaqqineqarnera pissutigalugu akuliunnerup siunertaa maangaannartinneqassappat, suliani pinerluttulerinermik inatsimmi § 94, nr. 5-imik, imaluunniit §§ 104-imik, 105-imik, 108-imik, 111-imik imaluunniit 111 a-mik unioqquitsisimanermut tunngasunik matusinissamik politiit aalajangiisinnaanissaannut periarfissaq ilanngunneqassasoq siunnersuutigineqarpoq. Pinerluttulerinermi inatsimmi aalajangersakkanik taaneqartunik unioqquitsineq pillugu suliani matusineq pippat, politiit siunertamik allaaserinninnerit/isiginninnerit aallaavigalugit akuliunneq aallartissinnaassagaat, siunnersuutip kinguneraa.

Akuliunnerup aallartinneqarneranit piaarnerpaamik aamma nalunaaquttap akunnerisa 24-t iluanni, politiit suliaq eqqartuussivimmuut saqqummiutissavaat. Akuliunneq akuerineqarsinnaanersoq, aamma attatiinnarneqarsinnaanersoq, eqqartuussiviup aalajangissavaa. Eqqartuussiviup isumaa malillugu akuliunneq suliarineqartussaasimannikkaluarpat, eqqartuussiviup tamanna pillugu Rigsadvokati nalunaaruteqarfigissavaa. Akuliunneq Politiets Efterretningstjeneste-mit suliarineqarsimappat, nalunaarutiginninneq Inatsiseqarnermut ministereqarfimmuut tunniunneqassaaq.

Attaveqatigiissutitik aamma kiffartuussissutitik elektroniskiusunik tuniniaasut aamma internettimi adressinik ingerlatsisut nittartakkap matuneqarnerata naammassineqarnissaanut politiinut ikiuutissasut aammattaaq siunnersuutigineqarpoq. Tuniniaasoq ingerlatsisorluunniit pineqartoq taamaaliornissamut inatsisinik naapertuuttumik

pissuteqarluni politiinik ikiunnissamat akuersiumangippat, eqqartuussisarnermik inatsimmi § 150 malillugu ilisimannittunut pinngitsaaliissutit atorneqassapput (akiliisitsinerit, taarseeqqusinerit il.il.).

Akuliunnermi pineqartumut, imaappoq nittartakkamik attartortumut (nalunaarsuisumut), eqqartuussiviup matuneqarnissaa pillugu akuersissuteqarfigisaanut, akuliunneq suliarineqarsimasoq pillugu politiit nalunaaruteqarnissaat naatsorsuutigineqarpoq. Nittartagaq attaveqarfissat pillugit paasissutissanik imaqanngippat, aamma allatigut paasissutissat taakku politiit pissarsiarisinnaanngippatigit, nalunaarutiginninneq pinngitsoortinneqarsinnaavoq. Inunnut nunani allaniittunut nalunaarutiginninnerit, inunnut nunani allaniittunut nalunaarutiginnittarneq pillugu malittarisassat nalinginnaasut malillugit pissaaq.

Aalajangiinnermut tunngaviup tunngaviata atorunnaarsimanera politiit ilisimalerpassuk – assersuutigalugu inatsisit unioqutillugit nittartakkap imai peerneqarsimaneri pissutigalugit – politiit piaarnerpaamik matusineq piissavaat. Taamaattoq matumuuna nittartakkat matoqqasut imaannik ingerlaavartumik nakkutiginninnissamik pisussaaffilerneqarnissaannik politiit peqquneqanngillat.

Inuup akuliunnermi pineqartup, tamanna pillugu noqqaassuteqarneratigut, politiit noqqaassummik tiguisimanermik kingorna piaarnerpaamik suliaq eqqartuussivimmuut saqqummiutissavaat. Akuliunneq attanneqassanersoq eqqartuussiviup aalajangissavaa. Akulilunnermi pineqartoq politiinut saaffiginnippat, politiit apeqqutip eqqartuussivimmuut saqqummiunneqarsinnaanera pillugu pineqartoq ilitersuutissavaat.

Inatsisissatut siunnersuummi § 1, nr. * (eqqartuussisarnermik inatsimmi § 400 a-tut siunnersuut) innersuussutigineqarpoq.

2.8. Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuineq imaluunniit atassutaarutitsineq

2.8.1. Inatsisit atuuttut

Radiokkut aallakaatitsinernik- imaluunniit nalunaarasuartaatitigut atassuteqaatinik politiit akornusersuinerat imaluunniit atassutaarutitsinerat pillugit eqqartuussisarnermik inatsit malittarisassanik imaqanngilaq.

Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuinerup imaluunniit atassutaarutitsinerup pinerliiniarnermik saassussineq, inuit inuunerannik aarlerinartumiilersitsisoq, ingerlasoq imaluunniit pilluinnersoq pinngitsoortissinnaappagu, politiit piviusumik nalilersuineq malillugu, matumani allanut

ajokusinerit sunniutaasinnaasut ilanngullugit, ajornartuulernermit pisinnaatitaaneq pillugu isiginninnerit aallaavigalugit taamaattunik, politiit ilumut tamanna periarfissarigunukku, atuisinnaapput.

2.8.2. Inatsiseqarnermut ministereqarfiup isumaliutiginninnera

2.8.2.1. Pillaasarnermik inatsisip, eqqartuussisarnermik inatsisip inatsisillu allat allanngortinneqarnerat pillugu inatsisikkut (pinerliiniarnerup akiorneqarnerani suliniutit patajaallisarneqarnerat il.il.) nr. 542-ikkut, 8. juni 2006-imeersukkut qallunaat eqqartuussisarnermik inatsisaanni, sumiiffimmi pineqartumi inatsit malillugu ukiuni 6-inni imaluunniit taakku sinnerlugit parnaarussaarnermik pillaatissiissutaasinnaasumik inatsimmik unioqqutitsineq, imaluunniit pillaasarnermik inatsimmi kapitali 12-imi imaluunniit 13-imi aalajangersakkat piaaralugit unioqqutinneqarnerat aamma inuit inuunerannik atugarissaarnerannilluunniit imaluunniit inuiaqatigiinni naleqartitanut pingaaruteqartunut annertuumik navianartorsiortitsinermit kinguneqarsinnaasut, pitsaaliorneqarnissaat siunertaralugu, politiit radiokkut aallakaatitsinermit- imaluunniit nalunaarasuartaatitigut atassuteqaatinik akornusersuisinnaanerit imaluunniit atassutaarutitsisinnaanerit pillugu qallunaat eqqartuussisarnermik inatsisaanni § 791 c-mi aalajangersakkamik ilanngussisoqarpoq.

Pissutsini immikkut ittuni radiokkut aallakaatitsinermit- imaluunniit nalunaarasuartaatitigut atassuteqaatinik akornusersuisinnaaneq imaluunniit atassutaarutitsisinnaaneq, pinerluttuliornerup ilungersunartup pinngitsoortinneqarnissaannut politiinut pingaarutilimmik kinguneqarsinnaasoq, matumani pinerliiniarsinnaanerit ilanngullugit, Inatsiseqarnermut ministereqarfik isumaqartoq, inatsisip allanngortinneqarnissaanut piareersaataasumik suliani takuneqarsinnaavoq.

Pisut tassaasinnaapput, Politiets Efterretningstjeneste-p sumiiffimmi aalajangersimasumi qaartartut atorlugit pinerliiniarnissaq pillugu paasissutissat piviusut pissarsiarisimagai, taakkulu oqarasuaatit angallattakkat imaluunniit radiokkut atortut allat atorlugit qaartinneqarnissaat pilersaarutigineqartoq, aamma taamaammat sumiiffimmi pineqartumi tassani pinerliiniat saassussinissaat taamaattoq pitsaaliorniarlugu nalunaarasuartaatitigut atassuteqaatinik akornusersuisinnaanermit imaluunniit atassutaarutitsisinnaanermit pingaarutilinnik pissutissaqarpoq.

Sumiiffimmi politiit immikkut ittumik pisuni radiokkut aallakaatitsinermit- imaluunniit nalunaarasuartaatitigut atassuteqaatinik akornusersuisinnaanerit imaluunniit atassutaarutitsisinnaanerit pillugu erseqqissumik periarfissaliissummik ilanngussisoqarnissaa tamanna tunngavigalugu Inatsiseqarnermut ministereqarfiup ilalersinnaasimavaa.

Inuit pinerliiniarluni saassussinermi pisinnaasumi il.il. peqataasut, radiokkut- imaluunniit nalunaarasuartaatitigut attaveqatigiinnermik atuisinnaanerisa akornuserneqarnissaat, taamatut akuliunnermi siunertarineqarpoq. Tamatuma peqatigisaanik - radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaaneq imaluunniit atassutaarutitsisinnaaneq inunnut taakkunungarpiaq tunngatillugu killilerneqarsinnaanngimmat – inuit amerlasuut sumiiffimmi pineqartumi aamma piffissami pineqartumi assersuutigalugu oqarasuaatinik angallattakkanik atuisinnaanerit kipineqassamat, saneqqunneqarsinnaanngitsumik akuliunnerup kingunerissavaa. Ilaatigut attaveqatigiinnernut atortut taamaattut innuttaasunut nalinginnaasunut sunniutai taakku eqqarsaatigalugit, akuliunneq annertoq aamma ajornaatumik tunngaviumillu kingunertoq, taamaalilluni uani pineqarsinnaavoq.

Akuliunnerup pineqartup aallartinneqarnissaanut piumasaaqatit sakkortungaatsiartut piumasaaqatigineqartariaqartut taaneqartut pissutissaqalersippaat. Akuliunneq taamaallaat atsikkutigiissitsinissamik tunngaviit nalinginnaasut aamma eqqartuussivimmit nakkutiginninneq isiginiarlugit suliarineqartariaqartoq, taaneqartut aammattaaq pissutissaqartilerpaat.

Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaaneq imaluunniit atassutaarutitsisinnaaneq pillugu aalajangersagassatut siunnersuutigineqartup eqqartuussisarnermik inatsimmi kapitali 71-imi, inuup nakkutigineqarani inummut allamut nalunaaruteqarsinnaatitaaneramik akuliunneq, nakkutiginninneq aamma paasissutissiinermut systemimi paasissutissanik tamanit tikinneqarsinnaanngitsunik programmit atortussallu allat atorlugit atuasinnaaneq pillugit malittarisassanik imaqartumi, inissinneqarnissaa naleqqunnerpaajusoq, Inatsiseqarnermut ministereqarfik isumaqarpoq. Akuliunneq – akuliunneq pillugu oqaatsip imarisaanut tunngatillugu, pillaasaneq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliaassanngortitsinermut atatillugu politiinit, unnerluussisussaataasunit imaluunniit eqqartuussivinnit inuup kiffaanngissusianut pinngitsaaliilluni akuliunnertut pissuseqartutut oqaatigisariaanersoq pillugu nalornisitsilersinnaanera apeqqutaatinnagu – taaneqartutut piumasaaqatit erseqqinnerusut ataanni aamma pisortatigoortumik malittarisassat isiginiarlugit, matumani eqqartuussiviup aalajangiisimanissaanik piumasaaqat, inuup nakkutigineqarani inummut allamut nalunaaruteqarsinnaatitaaneranut akuliunnermut il. il. malittarisassanut annertuumik naapertuuttut ilanngullugit, taaneqartutut suliarineqarsinnaasariaqarnera tassunga ingammik pissutaavoq.

2.8.2.2. Piumasaaqatit erseqqinnerusut naammassineqarsimatillugit, politiit radiokkut aallakaatitsinernik- imaluunniit nalunaarasuartaatitigut atassuteqaatinik

akornusersuisinnaaner atassutaarutitsisinnaaner pillugu Kalaallit Nunaanni eqqartuussisarnermik periarfissaliissummik assingusumik ilanngussisoqartariaqartoq, Inatsiseqarnermut ministereqarfik isumaqarpoq.

Center for Terroranalyse-p »Vurdering af terrortruslen mod Danmark«-imi naliliinera marts 2023-imeersoq malillugu massakut Kalaallit Nunaannut pinerliiniartoqarnissaanut navianaat annikitsuarakasittut nalilerneqarmat, Inatsiseqarnermut ministereqarfiup ilisimavaa.

Kisianni suliaasaqarfimmi tassani, naalagaaffiup isumannaatsuunissaanut naalagaaffiullu inatsit tunngaviusoq malillugu aqqissuussineranut atassuteqartumi, malittarisassat assigiit naalagaaffimmi tamarmi atuunnissaat naleqqunnerpaajussasoq, Inatsiseqarnermut ministereqarfik isumaqarpoq. Taaneqareersutut malittarisassaq taamaattoq Danmarkimi 2006-imili atuussimavoq, aamma malittarisassap taamaaqataa savalimmiuni eqqartuussisarnermik inatsimmi 2014-imi ilanngunneqarpoq.

Kalaallit Nunaanni pisoqassagaluarp, tassani sumiiffimmi assersuutigalugu pinerliiniartartut saassussinissaat pitsaaliorniarlugu, radiokkut aallakaatitsinernik-imaluunniit nalunaarasuartaatitigut atassuteqaatinik akornusersuisinnaaner atassutaarutitsisinnaaner pisariaqartutut nalilerneqartillugit, oqartussaasut, matumani Politiets Efterretningstjeneste ilanngullugu, taamaalillutik malittarisassat tunngavii assigiit tunngavigalugit sulisinnaangussapput.

Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaaneq imaluunniit atassutaarutitsisinnaaneq pillugu qallunaat eqqartuussisarnermik inatsisaanni allannguneq pillugu qallunaat eqqartuussisarnermik inatsisaanni allannguneq piffissami 2003-miit 2013 ilanngullugu qallunaat eqqartuussisarnermik inatsisaanni allanngunerit pillugit allakkiami ataatsimut Kalaallit Nunaanni eqqartuussiveqarneq pillugu Siunnersuisoqatigiinnut saqqummiunneqartumi ilaammat maluginiarneqassaaq. Isumaliutiginninnerit ingerlaqqinnissaat siunertaralugu, inatsimmi allanngunerit pillugit allakkiap Inatsiseqarnermut ministereqarfimmut Kalaallit Nunaannilu Namminersorlutik Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

2.8.2.3. Tamanna pingaarutilinnik pissutissaqarpat, tamanna tunngavigalugu sumiiffimmi pineqartumi immikkut ingasassusilimmik inatsimmik unioqutitsisoqarnissaanut imaluunniit inuit inuunerannik atugarissaarnerannilluunniit imaluunniit inuiaqatigiinni pingaaruteqartunut navianartorsiortitsisinnaasunik piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqutitsisoqarnissaanut pitsaaliuineramik siunertaqarlutik, politiit sumiiffimmi radiokkut aallakaatitsinernik- imaluunniit

nalunaarasuartaatitigut atassuteqaatinik akornusersuisinnaanerat imaluunniit atassutaarutitsisinnaanerat pillugit, eqqartuussisarnermik inatsimmi aalajangersakkamik nutaamik ilanngussisoqarnissaa siunnersuutigineqarpoq.

Radiokkut aallakaatitsinernik- imaluunniit nalunaarasuartaatitigut atassuteqaatinik akornusersuineq imaluunniit atassutaarutitsineq pillugit aalajangiinissamut piginnaatitaaneq eqqartuussiviup ataaniissasoq siunnersuutigineqarpoq. Eqqartuussiviup aalajangiinerani sumiiffik, akuliunnermi pineqartoq, aamma suliami pissutsit piviusut, taakku akuliunnermut piumasaqaatit naammassineqarsimanerannik tapersuillutik, taaneqassapput. Aammattaaq aalajangiinermi piffissami sorlermi akuliunnerup suliarineqarnissaa aalajangerneqassaaq.

Pisuni politiit eqqartuussiviup aalajangernissaata utaqqineqarnera pissutigalugu akuliunnermut siunertaq maangaannartissappatigit, politiit eqqartuussiviup aalajangiinera pissarsiareqqaarnagu radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaasut aammattaaq siunnersuutigineqarpoq. Taamaaliortoqarpat akuliunnerup akuerineqarnissaa pillugu apeqqut politiit nalunaaquttap akunneri 24-it qaangiutsinnagit eqqartuussivimmut saqqummiutissavaat.

Aalajangersagassatut siunnersuutigineqartoq malillugu eqqartuussivik aalajangiitinnagu, illersuisumik ivertitsisoqassasoq, taannalu oqaaseqaateqarnissaminik periarfissineqassasoq, aammattaaq siunnersuutigineqarpoq. Kisianni radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaanerat imaluunniit atassutaarutitsisinnaanerat pillugit, inunnut akuliunnermi ilaatinneqartunut nalunaarutiginnittoqassanngilaq, tassami tamanna sulisaatsimi ajornartussaammat.

Inatsisissatut siunnersuummi § 1, nr. * (§ 400 b-tut siunnersuutigineqartoq) innersuussutigineqarpoq.

2.9. Tv-kkut nakkutiginninnermik tigusineq

2.9.1. Inatsisit atuuttut

Tv-kkut nakkutiginninneq pillugu inatsimmi § 1, imm. 2-imi oqaaseq tv-kkut nakkutiginninneq, tv-kkut assiliissummit avataanit aquneqartumit imaluunniit automatiskiusumik ingerlasumit, assiliivimmit imaluunniit sakkumit taakkununga assingusumit ingerlaavartumik imaluunniit akuttoqatigiissumik pisartumik uteqqiattumik inummik nakkutiginninnertut nassuiarneqarpoq. Tv-kkut nakkutiginninnermi pisut, tassani nakkutiginninneq videomi assinik immiussanut, filmimut imaluunniit immiussiffimmi

allami immiussinermt atassuteqarlutik, aamma pisut, tassani taamatut assinik immiussineq pingikkaluartoq, aamma tassani nakkutiginninneq tv-ip igalaasartaagut assigisaannilluunniit erninnaartumik isiginnaarnertut taamaallaat pissuseqaraluartoq, inatsisip massuma isumaani ilaatinneqarput.

Tv-kkut nakkutiginninneq pillugu inatsit Kalaallit Nunaannut atuutilersinneqanngilaq, aamma tv-kkut nakkutiginninneq taamaalilluni immikkut ittumik inatsisitigut malittarisassanik malittarisassiuunneqanngilaq.

Inunnik sumiiffinni kikkunnilluunniit tikikkuminaatsumiittunik, pisinnaatitaanani tv-kkut nakkutiginninneq, kisianni pinerluttulerinermi inatsimmi § 94, nr. 4-imik unioqqutitsineruvoq.

Inunnik sumiiffinni kikkunnilluunniit tikikkuminartuniittunik tv-kkut nakkutiginninneq, pissutsit assigiinngitsut malillugit Inunnik paasissutissanik suliarinnittarneq pillugu inatsisimmi, peqqussutikkut nr. 1238-ikkut, 14. oktober 2016-imeersukkut Kalaallit Nunaannut atuutilersinneqartumi, ilaatinneqarsinnaapput.

Tungavilersuinissamut piumasaqaatit nalinginnaasut aamma inunnik paasissutissanik suliarinnittarneq pillugu malittarisassat atuuttut isiginiarlugit, tamanna tungavigalugu sumiiffinni kikkunnilluunniit tikikkuminartuni politiit ullumikkut tv-kkut nakkutiginnissinnaapput.

Aammattaq sumiiffinni, inunnit kikkunnilluunniit tikikkuminaatsuni, eqqartuussisarnermik inatsimmi nakkutiginninneq pillugu § 399-imi malittarisassat malillugit politiit tv-kkut nakkutiginnissinnaapput.

Piumasaqaatit aalajangersimasut piumasaqaatigalugit, politiit noqqaassuteqarnerisigut, eqqartuussisarnermik inatsimmi § 420 malillugu inummut pasineqanngitsumut, tigussaasut suugaluartulluunniit tunniuteqqullugit (tunniussisussaataaneq) peqqussutigisinnaavaat. Aammattaq tigussaasut suugaluartulluunnit, inuup pasisaanngitsup atorsinnaasai, piumasaqaatit aalajangersimasut piumasaqaatigalugit eqqartuussisarnermik inatsimmi § 419 malillugu arsaarinnissutigineqarsinnaapput.

Tunniussisussaataaneq arsaarinninnerlu pillugit malittarisassat ilaatigut tv-kkut nakkutiginninnermit assinut toqqukkanut tunngatillugu atorneqarsinnaapput.

Kisianni pinerluttulerinermi eqqartuussisarneq pillugu eqqartuussisarnermik inatsimmi aalajangersakkat malillugit tv-kkut nakkutiginninnerup ingerlasup, oqartussanit allanit

imaluunniit inuinnarnit aallartinneqartup, politiinit tiguneqarnissaa ullumikkut periarfissaanngilaq.

2.9.2. Inatsiseqarnermut ministereqarfiup isumaliutiginninnera

2.9.2.1. Eqqartuussisarnermik inatsisip allanngortinneqarnera pillugu (Politiit tv-kkut nakkutiginninnermik tigusinerat) inatsisikkut nr. 803-kkut, 9. juni 2020-imeersukkut qallunaat eqqartuussisarnermik inatsisaanni § 791 e-mi, tamanna pingaarutilinnik pissutissaqarpas, ingasattumik inatsisinik unioqutitsinerit pitsaaliorniarlugit imaluunniit pinerluttoqarsimaneranik paasiniaaffiginiarlugit, sumiiffimmi politiit tv-kkut nakkutiginninnermik tigusisinnaanerats pillugu malittarisassanik ilanngussisoqarpoq.

Politiit, matumani Politiets Efterretningstjeneste ilanngullugu, immikkut ittumik ilungersunartunik pinerluttuliornerit – assersuutigalugu pinerliiniarnerit pisut – pinngitsoortinniarlugit imaluunniit pinerluttoqarsimaneranik paasiniaaviginiarlugit – politiit piaarnerpaamik pinerluttuliorlutut pasineqartup imaluunniit pinerluttuliorlutut pasineqartut sumi angalaarneri pillugit tamakkiisumik isiginninnissamik pilersitsinissaat – amerlanertigut pingaaruteqartartoq, inatsisip allanngortinneqarnissaanut piareersaataasumik suliani takuneqarsinnaavoq. Tassunga atatillugu pinerluttuliorlutut pasisat sumi ingerlaarneri pillugit paasissutissanik sukkasuumik nassaarniarnermi, tv-kkut nakkutiginninnerq sakkuuvoq amerlanertigut naleqquttoq.

Taamaalilluni immikkut ittumik pinerluttuliornerit ilungersunartut pinngitsoortinnissaannut aamma pinerluttoqarsimaneranik paasiniaaffiginissaanut politiit suliassaminnik naammassinninnissaminnut periarfissaannut, tv-kkut nakkutiginninnerit, pisortanit allanit ingerlatseqatigiiffinnillu namminersortunit, peqatigiiffinnit il.il. pilersinneqartut, atorneqarsinnaanerats, annertuumik pingaaruteqarsinnaassaaq.

Assersuutigalugu pisumi, tassani pinerluttuliorlutup pinerluttuliorlutulluunniit pinerliiniarnissamik siunertaqarnerats pillugu politiit paasissutissanik pissarsisimallutik, tamanna pisinnaavoq. Aamma pisumi, tassani pinerluttuliorlutup pinerluttuliorlutulluunniit saassussereersimaneranni pisinnaavoq, tassani pinerluttuliorlutup pinerluttuliorlutulluunniit saassusseqqinnissamik siunertaqarnerats pillugu politiit paasissutissanik pissarsisimallutik. Pisuni taakkunani marlunni saassussineq sioqqullugu imaluunniit eqqartuussisutigoortitsinissaq siunertaralugu aamma suli saassusseqqittoqassagualarpat saassusseqqinnissaq pinngitsoortinniarlugu sukkasuumik pinerluttuliorlutut nassaarinissaat tigusarinissaallu pisariaqartussaavoq.

Piumasaqaatit aalajangersimasut piumasaqaatigalugu oqartussanut allanut inuinnarnillu tv-kkut nakkutiginninnernit immiussat toqqorneqarsimasut tunniuteqqullugit politiit

peqqussisinnaanerat, tunniussisussaatitaaneq pillugu malittarisassat periarfissippaat. Aammattaaq piumasaqaatit aalajangersimasut piumasaqaatigalugit, politiit immiussat taamaattut arsaarinnissutigisinnaavaat. Tunniussisussaatitaaneq arsaarinninnerlu pisuni tuaviorfiusuni politiit aalajangerneqarsinnaapput tamatumalu kingorna eqqartuussivimmit aalajangiinerit misilinneqarnissaat periarfissaavoq. Pisariaqartitsineq naapertorlugu sukkasuumik tv-kkut nakkutiginninnermit immiussanik toqqorneqarsimasunik politiit pissarsinissaat, eqqartuussisarnermik inatsisip taamaalilluni qulakkeereersimavaa.

Kisianni politiit oqartussanit allanit imaluunniit inuinnarnit piffissami tassanerpiaq (imaappoq immiussinermi toqqaannartumik ingerlasup) pineranni tv-kkut nakkutiginninnermit pissarsiaqarnissaat pisariaqartinneqarsinnaavoq, taamaalilluni politiit pinerluttuliornerit ilungersunartut pitsaaliorsinnaaniassammatigit imaluunniit pinerluttoqarsimaneranik paasiniaaviginiassammatigit. Taamaammat tamanna pillugu eqqartuussisarnermik inatsimmi aalajangersakkamik nutaamik ilanngussisoqartariaqarluarpoq.

Oqartussat allat imaluunniit inuinnaat tv-kkut nakkutiginninnerinik politiit tiguisinnaanerat, oqartussaasup imaluunniit namminersortup suliassaminik suliarinninnissaanut imaluunniit suliffeqarfiup namminneq suliassaminik suliarinninnerminni imaluunniit suliffeqarfiup nammineq tv-kkut nakkutiginninnermik pisariaqartitsinerannut tunngatillugu aamma inunnut tv-kkut nakkutigineqartunut tunngatillugu, pissutsit assigiinngitsut pissutigalugit tamanna annertuumik akuliunnerusinnaavoq. Pinerluttuliornerit ilungersunartut pitsaaliorniarlugit imaluunniit pinerluttoqarsimaneranik paasiniaaffiginiarlugit, tv-kkut nakkutiginninnerit sumiiffinni annertungaatsiartuni tiguneqarneri pisariaqartinneqarsinnaavoq, assersuutigalugu illoqarfiup ilaani tamarmiusumi, taamaalilluni akuliunnerup tv-kkut nakkutiginninnerit arlallit aamma inuit amerlasuut sunnersinnaavai.

Tamanna tunngavigalugu politiit tv-kkut nakkutiginninnerinik tiguisinnaanermut periarfissaat, Inatsiseqarnermut ministereqarfiup isumaa malillugu immikkut ittumik pisunut killilerneqartariaqarpoq, tassani ilungersunartunik pinerluttuliornerit, inuit inuunerannik atugarissaarnerannilluunniit imaluunniit inuiaqatigiinni naleqartitanut pingaaruteqartunut navianartorsiortitsinermik kinguneqartut imaluunniit kinguneqarsimasut pitsaaliornissaannut imaluunniit pinerluttoqarsimaneranik paasiniaavigineqarnissaannut taamaaliornissamut pingaaruteqartunik tunngaveqartoqassalluni.

Akuliunneq piffissamut sivikitsumut killilerneqartariaqarpoq, taannalu eqqartuussiviup aalajangiineratigit aalajangersarneqassaaq. Piffissap siviussusia eqqartuussiviup nutaamik aalajangiineratigit sivitorneqarsinnaasariaqassaaq. Pisuni tuaviorfiusuni eqqartuussiviup aalajangiinera utaqqeqaarnagu politiit akuliunneq aallartissinnaasariaqarpoq, kisianni

taamaalilluni suliaq nalunaaquttap akunneri 24-it qaangiutsinnagit eqqartuussivimmut saqqummiunneqassalluni. Eqqartuussiviup suliamik suliarinninnerani eqqartuussissuserisoq ivertitaq ilaasariaqarpoq, taassumalu inuup tv-kkut nakkutiginninnermik atuisinnaasup, aamma taakku tv-kkut nakkutigineqarsimasut, soqutigisaat suliarissavai.

Folketingstidende 2019-20, A, L 103 saqqummiunneqarsimasoq, qupperneq 10-miit 11 ilanngullugu innersuussutigineqarput.

2.9.2.2. Tv-kkut nakkutiginninnermik tigusineq pillugu Kalaallit Nunaanni eqqartuussisarnermik inatsimmi aalajangersakkamik ilanngussisoqarnissaa Kalaallit Nunaanni Eqqartuussiveqarneq pillugu Siunnersuisoqatigiit innersuussutigisimangilaat, tassami Kalaallit Nunaanni tv-kkut nakkutiginninnerit pillugit nalunaarsuinissamut pisussaaffeqanngilaq, aamma Kalaallit Nunaanni Politiit taamanikkut malittarisassat malillugit nammineerlutik asiliivinnik ikkussinissaminnut aamma naleqquttumik annertussusilimmik nakkutiginninnissaminnut annertuumik periarfissaqarsimapput.

Kisianni politiit tv-kkut nakkutiginninnermik, qallunaat eqqartuussisarnermik inatsisaanni tamanna pillugu aalajangersakkamut naapertuuttumik, Kalaallit Nunaanni eqqartuussisarnermik inatsimmi aalajangersakkamik ilanngussisoqartariaqartoq, Inatsiseqarnermut ministereqarfik isumaqarpoq.

Massakkuugallartoq Kalaallit Nunaanni politiit tv-kkut nakkutiginninnermik tigusinissaannut pisariaqartitsineq ersersinneqanngikkaluartoq, immikut ittumik pisoq pissagaluarpat, immikkut ingasassusilimmik inatsimmik unioqqutitsinerup, inuit inuunerannut imaluunniit atugarissaarnerannut imaluunniit inuiaqatigiinni naleqartitanut pingaaruteqartunut navianartorsiortitsinermik kinguneqarsinnaasup imaluunniit kinguneqarsimasup pitsaaliorneqarnissaanut imaluunniit pinerluttoqarsimaneramik paasiniaavigineqarnissaannut, tv-kkut nakkutiginninnermik tigusineq pingaaruteqarluni, naalagaaffiup ilai allat assigalugit, taamaaliornissamut Kalaallit Nunaanni periarfissat assingi periarfissaassappata naleqquttuussasoq, Inatsiseqarnermut ministereqarfiup pingaartippaa.

Savalimmiuni eqqartuussisarnermik inatsisip nutarterneqarnissaanut inatsisissatut siunnersuummut missingiummi, ulloq 22. maj 2023 tusarniutigalugu nassiunneqartumi, savalimmiuni eqqartuussisarnermik inatsimmi tv-kkut nakkutiginninneq, qallunaat eqqartuussisarnermik inatsisaanni § 791 e-mut naapertuuttumik aalajangersakkamik nutaamik ilanngussisoqarnissaa siunnersuutigineqarmat, matumuuna maluginiarneqassaaq.

2.9.2.3. Tamanna pingaarutilimmik pissutissaqarpat, immikkut ittumik ingasassusilimmik inatsimmik unioqutitsineq imaluunniit piaaraluni pinerluttulerinermi inatsimmi kapitali 7-imi imaluunniit 8-mi malittarisassanik unioqutitsinerup, inuit inuunerannut atugarissaarnerannulluunniit imaluunniit inuiaqatigiinni naleqartitanut pingaaruteqartunut navianartorsiortitsinermik kinguneqarsinnaasup imaluunniit kinguneqarsimasup pitsaaliorneqarnissaa imaluunniit pinerluttuliortoqarsimaneranik paasiniaaffigineqarnissaa siunertaralugu, politiit tv-kkut nakkutiginninnermik tigusinissamik periarfissaannik tunniussisumik eqqartuussisarnermik inatsimmi nutaamik aalajangersakkamik ilanngussisoqarnissaa, tamanna tungavigalugu siunnersuutigineqarpoq.

Akuersissummik peqqaaratik politiit pisortani oqartussat imaluunniit inuinnaat, tv-kkut nakkutiginninnermik pineqartumik atuisinnaasut, tv-kkut nakkutiginninnerat tigusinnaagaat aamma atorsinnaagaat, siunnersuutip kinguneraa. Aalajangersagassatut siunnersuutigineqartumi periarfissaliissut atorlugu politiit inuinnaat angerlarsimaffiini tv-kkut nakkutiginninneq tigusinnaassanngilaat.

Akuliunneq aallaaviatigut eqqartuussiviup aalajangerneratigut pinissaa siunnersuutigineqarpoq, kisianni pisuni nukinginnartuni politiit taamaattoq eqqartuussiviup aalajangiinera utaqeqqaarnagu akuliunnermik aallartitsisinnaasut, kisianni taamaallilluni taamaattoqarpat akuliunnerup aallartinneranit piaarnerpaamik aamma kingusinnerpaamik nalunaaquttap akunneri 24-it qaangiutsinnagit politiit suliaq eqqartuussivimmuut saqqummiutissavaat.

Tv-kkut nakkutiginninnermik atuisinnaasup, tv-kkut nakkutiginninnerup pineqartup tiguneqarnissaanut politiinut ikiuunnissamik pisussaaffeqarnissaa siunnersuutigineqarpoq. Pisussaaffiup naammassineqannginnerani pinngitsaaliissutit soorlu ilisimannittunut pinaasertunut atorneqartartut, atorneqarsinnaanissaat aammattaq siunnersuutigineqarpoq.

Nipangiussisussaatitaanermik peqqussuteqarneq pillugu eqqartuussisarnermik inatsimmi § 161 politiit tv-kkut nakkutiginninnermik tigusinerannut atatillugu taamatutaaq atorneqassasoq siunnersuutigineqarpoq.

Pisariaqartitsineq naapertorlugu pissaaneq atorlugu politiit tv-kkut nakkutiginninnermik tigusinnaasariaqarnerat siunnersuutigineqarpoq, matumani ininut, tv-kkut nakkutiginninnermik tigusiffiusinnaasumut, isersinnaaneq ilanngullugu.

Inatsisissatut siunnersuummi § 1, nr. * (eqqartuussisarnermik inatsimmi § 400 c-tut siunnersuutigineqartoq) innersuussutigineqarpoq.

2.10. Ilisimannittut kinaassusaasa isertuunneqarnerat

2.10.1. Inatsisit atuuttut

Uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat pillugu eqqartuussisarnermik inatsit malittarisassanik imaqanngilaq, aamma tamanna pillugu apeqquut inatsisissatut siunnersuutip oqaaseqaataani aamma Kalaallit Nunaanni eqqartuussiveqarneq pillugu Kalaallit Nunaanni Eqqartuussiveqarneq pillugu Ataatsimiititaliarsuup isumaliutissiissutaani nr. 1442/2004-imi eqqartorneqanngilaq.

Nangaassuteqanngitsumik nassuiaasinnaanerup taamaaliunngikkaanni anguneqarsinnaannginnera immikkut ittumik pissutissaqartut isumaqartoqartillugu, ilisimannittup imaluunniit unnerluunneqaqataasup killisiorneqarnerata nalaani unnerluunneqartup ini eqqartuussiffiusoq qimassagaa, eqqartuussivik aalajangiisinnaasoq, eqqartuussisarnermik inatsimmi § 458, imm. 1-ip aalajangersarpaa.

Ima allanguiffigalugu, piginnaatitaaneq eqqartuussisut siulittaasuannit eqqartuussivimmut nuunneqarluni, malittarisassaq taanna eqqartuussisarnermik inatsimmi 1951-imeersumi kapitali 5-imi, § 39, imm. 1-imi ingerlatitseqqinneruvoq.

Piginnaatitaanerup nuunneqarnera piareersaataasumik suliani eqqartorneqanngilaq, tassami isumaliutissiissut nr. 1442/2004, atuagaq V, qupperneq 1747, aamma Folketingstidende 2007-08 (katersat aappaat), ilanngussaq A, qupperneq 1506 malillugu, aalajangersagassatut siunnersuutigineqartoq oqaatsitigut allanguinerit ataasiakkat allanguutigalugit, malittarisassaq maannamut atuuttoq assigigaa killormut taaneqarmat.

Ilisimannittup imaluunniit unnerluunneqaqataasup killisiorneqarnerata nalaani unnerluunneqartup inimik qimatsinissaa pillugu eqqartuussiviup siulittaasuata aalajangiisinnaaneranut periarfissaliissutip asserluinnarisaa, 1919-ip kingorna qallunaat eqqartuussisarnermik inatsisaanni § 856, imm. 1-imi (siusinnerusukkut § 848, imm. 1-imi) nassaassaavoq.

Unnerluunneqartoq inimut eqqartuussiffiusumut iseqqippat, unnerluunneqartoq taassuma peqannginnerani kina nassuiaasimanersoq pillugu paasissutissanik pissasoq, eqqartuussisarnermik inatsimmi § 458, imm. 2-p aalajangersarpaa. Aammattaaq nassuaaneq unnerluunneqartumut tunngassuteqartillugu, unnerluunneqartoq nassuiaanerup imaanik ilisimatinneqassaaq.

Eqqartuussisarnermik inatsimmi 1951-imeersumi, kapitali 5-imi, § 39, imm. 2-mi siusinnerusukkut malittarisassami atuuttumi, unnerluunneqartoq nassuiaatigineqartup imaanik ilisimatinneqassasoq taamaallaat takuneqarsinnaavoq. Tassunga tunngatillugu,

unnerluunneqartoq kina nassuaasimanersoq pillugu paasissutissamik tunineqassammat inatsimmi erseqqissumik aalajangerneqarmat, taamaalilluni nutaartaavoq.

Piareersaataasumik suliani allannguut taanna eqqartorneqanngilaq, tassami isumaliutissiissut nr. 1442/2004, atuagaq V, qupperneq 1747, aamma Folketingstidende 2007-08 (katersat aappaat), ilanngussaq A, qupperneq 1506 malillugit aalajangersagassatut siunnersuutigineqartoq tassuunatigut malittarisassaq maannamut atuuttoq atuuttoq assigigaa killormut taaneqarmat.

1986 tikillugu qallunaat eqqartuussisarnermik inatsisaat § 848, imm. 2-mi, aalajangersakkamik, Kalaallit Nunaanni eqqartuussisarnermik inatsimmi 1951-imeersumi, kapitali 5-imi, § 39, imm. 2-p asserluinnaanik imaqarsimavoq.

Inatsisikkut nr. 321-ikkut, 4. juni 1986-immersukkut qallunaat eqqartuussisarnermik inatsisaanni § 848, imm. 2 (atuuttumi § 856, imm. 10-mi oqaaseqatigiit siulliit) allanngortinneqarpoq, taamaalilluni unnerluunneqartoq kina nassuaasimanersoq pillugu erseqqissumik paasissutissinneqassalluni.

Uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaasa inerteqqutigineqarnissaat matumuuna siunertarineqarpoq, tassami Eqqartuussiviit qullersaata aalajangiinermi, Ugeskrift for Retsvæsen 1984, qupperneq 81-imi issuarneqartumi, taamanikkut malittarisassat atuuttut qaqutigorluinnaq ilisimannittup isumannaatsuunissaanut qajassuutassat tamanna piumasaaqatigippassuk, uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat itigartinngimassuk.

Tamanna tunngavigalugu Inatsiseqarnermut ministereqarfiup isumaa malillugu, eqqartuussisarnermik inatsit ima paasineqassaaq, uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat periarfissaanngitsoq.

Matumuuna eqqartuussisarnermik inatsimmi § 358, imm. 2-p oqaasertai Inatsiseqarnermut ministereqarfiup pingaartissimavai.

Qallunaat eqqartuussisarnermik inatsisaata allanngortinneqarnissaa pillugu inatsit nr. 381, 6. juni 2002-imeersoq, uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarsinnaanerannik ilanngutitsisoq, matumuuna isumaliutissiissut nr. 1442/2004, atuagaq V, qupperneq 1747 malillugu, qallunaat eqqartuussisarnermik inatsisaanni aalajangersakkamut § 848, imm. 2-mi

oqaaseqatigiit aappaapput innersuussisoqarnera, taannalu inatsisikkut nr. 381-ikut, 6. juni 2002-imeersukkut § 848, imm. 5-imi oqaaseqatigiit aappaannut nuunneqarnera, piffissamut tunngatillugu pissutsit pissutigalugit, Kalaallit Nunaanni Eqqartuussiveqarneq pillugu ataatsimiititaliarsuup suliaani ilanngunneqarsimannginnera naatsorsuutigineqartariaqartoq, Inatsiseqarnermut ministereqarfiup aammattaaq pingaartissimavaa.

Naak apeqqut Kalaallit Nunaanni Eqqartuussiveqarneq pillugu ataatsimiititaliarsuup isumaliutissiissutaani eqqartorneqanngikkaluartoq, ataatsimiititaliarsuup nalinginnaasumik isumaliutiginninnermini qallunaat eqqartuussisarnermik inatsisaanni isumassarsiniarluni ujarlersinnaaneq pillugu 2002-imi inatsisip allanngortinneqarnera sioqqullugu Danmarkimi inatsiseqartitsinermi pissutsit taamaallaat isiginiarsimassagaat, tassani uppersaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat 1986-ip kingorna inerteqqutaasimalluni, tamanna tunngavigalugu pissusissamisorpoq naatsorsuutigissallugu.

2.10.2. Inatsiseqarnermut ministereqarfiup isumaliutiginninnera

2.10.2.1. Eqqartuussisarnermik inatsisip allanngortinneqarnera pillugu inatsisikkut nr. 381-ikkut, 6. juni 2002-immersukkut (ilisimannittut illersorneqarnerisa pitsanngorsarneqarnerat) uppersaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat pillugit malittarisassat qallunaat eqqartuussisarnermik inatsisaanni malittarisassat ilanngunneqarput.

Pillaatissiisoqarnissaanik suliani ilisimannittut qunusaarneqassappata pillaatillullu akiniaaffigineqassappata akuerineqarsinnaanngitsoq, inatsisip allanngortinneqarnissaanut piareersaataasumi suliani takuneqarsinnaavoq. Taamaammat ilisimannittut, pillaatissiisoqarnissaanik suliami nassuiaateqartut, innarlerneqarnissamut illersorneqarnissaasa qulakkeerneqarnissaat ujarborneqarpoq.

Tamatuma peqatigisaanik ilisimannittut ilisimasatik pillugit saqqummernissamut qununissaat, pillaatitut akiniutit imaluunniit nuanniitsut allat annilaangagineqarnerisa kingunerisinnaavaat. Pissutsini, aqqissuussineq atuuttoq malillugu pisuni suniluunniit ilisimannittut kinaassusaat isertuullugit eqqartuussivimmi nassuiaatinneqarsinnaannginneranni, taamaalilluni pisut ilaanni pissutsinut pillaatissiissutaasinnaasunut ilisimannittut politiinut paasissutissanik, pinerluttoqarsimaneranik paasiniaanermut annertuumik pingaaruteqartunik, tunniussinngitsoornissaat taamaalilluni kingunerisinnaavaa.

Ilisimannittut eqqartuussivimmi nassuiaasussaatitaannginnerat pillugu eqqartuussisarnermik inatsimmi § 171, imm. 2-mi aalajangersagaq pisuni arlalinni

ilisimannittumik, pillaatitut akiniuteqarfigineqarnissaannik il.il. annilaangagineqartunut eqqarsaatiginninnerup isumagineqarnissaanut naammaasinnaavoq. Ilisimannittunut ataasiakkaanut eqqarsaatiginninneq kisianni pissutsit malillugit pillaatissiisoqarnissaannik suliap paasinarsisinneqarsinnaalernissaanut naleqqiullugu tunulliunneqartarpoq, taamaalilluni naak ilisimannittup ajoquserneqarnissaa aarlerinaateqaraluartoq, ilisimannittoq nassuiaateqaqqullugu peqquneqarsinnaallu. Ilisimannittut, pillaatitut akiniuteqarfigineqarnissamik il.il. annilaanganertik pissutigalugu taamanikkut ilisimannittut nassuiaasussaatitaangitsut, ilisimannittup kinaassusaata isertuunnissaanut periarfissat killillit ilanngunneqassagaluarpata, siunissami pisut ilaanni nassuaaqquneqarnissaat naatsorsuutigineqarsinnaammat tassunga ilaavoq.

Tamanna tunngavigalugu Inatsiseqarnermut ministereqarfiup isumaa malillugu ilisimannittut kinaassusaata isertuunneqarnissaannut inerteqquteqarluinnarneq 1986-imi eqqunneqartoq, sakkukillineqartariaqarpoq. Taamaalilluni pisuni immikkut ittuni ilisimannittup kinaassusaata isertuunneqarnissaata qulakkeerneqarsinnaaneranut periarfissaq pilersinneqartariaqarpoq.

Ilisimannittup isumannaatsuunissaanut eqqarsaatigisassanik pingaarutilinnik piumasqaateqarfiunissaa, unnerluunneqartumut ilisimannittup atiata, atorfiata najugaatalu isertuunneqarnissaanut piumasqaataassasoq siunnersuutigineqarpoq. Unnerluunneqartoq ilisimannittup kinaassusaa pillugu paasissutissanik pissappat, ilisimannittup pillaatitut akiniutinik imaluunniit nuanniitsunik allanik navianartorsiortinneqarnissaa suliamek pissutsit sakkortusisamik pissuteqartissagaat, tamatuma kinguneraa.

Ilisimannittut kinaassusaat isertuullugit eqqartuussivimmi nassuiaatinneqarsinnaanerata pillugu aalajangersagaq ingammik ingasattumik aamma aaqqissuussaanut isumik pinerluttuliornerni, matumani pinerlunniatigiit pinerluttuliorneri ilanngullugit, suliat ilaannut naleqquttussatut isumaqarfigineqarsinnaassaaq.

Ilisimannittup atianik il.il. unnerluunneqartup ilisimasaqarnissaanut killiliinernut tamanut, taakku unnerluunneqartup illersorneqarneranut pingaaruteqannginnissaat pisuni tamani piumasqaataasaaq. Sulisaatsimi siunnersuut taamaammat nalaatsornikkut ilisimannittunngortunik taaneqartartunut – imaappoq ilisimannittunut unnerluunneqartumut atassuteqanngitsunut – tunngatillugu pingaaruteqarsinnaavoq.

Ilisimannittup isikkuanik unnerluunneqartoq ilisimasaqalersillugu, ilisimannittoq imaluunniit ilisimannittup qanigisai ilungersunartumik navianartorsiortinneqarnissaa pissutissaqartutut isumaqarfigineqarpat, ilisimannittup killisiorneqarnerata nalaani unnerluunneqartup ini eqqartuussiffiusumik qimatsinissaa pillugu eqqartuussivik aalajangiisinnaasoq, aammattaq siunnersuutigineqarpoq.

Ilisimannittup kinaassusaata isertuunneqarnissaa pillugu malittarisassat atorneqarnissaat pillugu eqqartuussiviup aalajangiinera, pingaarnertut isumaqatigiinniarnissap piareersarneqarnerata nalaani aamma pingaarnertut isumaqatigiinniarnep nalaani aalajangeqqitassanngortinneqarsinnaasoq, aammattaaq siunnersuutigineqarpoq.

Folketingstidende 2001-02 (katersat aappaat), ilanngussaq A, quppernerit 3306-imiit 3308 ilanngullugu innersuussutigineqarput.

2.10.2.2. Eqqartuussisarnermik inatsisip allanngortinneqarnissaa pillugu inatsisikkut nr. 292-ikkut, 11. april 2011-imeersukkut (Ilisimannittut kinaassusaasa isertorneqarnerannik atuisinnaanerup annertusineqarnera) pillaatissiisoqarnissaanik suliani ilisimannittut kinaassusaasa isertorneqarnerannik atuisinnaanerup annertusineqarnissaa siunertaralugu qallunaat eqqartuussisarnermik inatsisaat allanngortinneqarpoq.

Tunngaviusumik qajassuussinissat, taamanikkut ilisimannittut kinaassusaasa isertuunneqarnissaanik atuinermi tunuliaqutaasut, taakkua aamma siunnersuummi tunuliaqutigineqartut, inatsisip allanngortinneqarnissaanut piareersaataasumik suliani takuneqarsinnaavoq.

Siullertut ilisimannittup isumannaatsuunissaanut qajassuussinissat uani pineqarput, tassami ilisimannittoq qunusaarneqarpat aamma pillaatitut akiniaaffigineqarpat, tamanna immini akuerineqarsinnaanngimmat.

Aappaattut inatsisini aalajangikkanik atortitsiniaaneq pillugu eqqarsaatigisassat pineqarsimapput. Ilisimannittoq annilaanganini pissutigalugu nassuiaasinnaanngippat, unnerluussisussaataasut taamaalillutik pinerluttuliortup pisuuneranik uppernarsaasinnaajunnaarnerat tamatuma kingunerisinnaavaa. Pinerluttuliornertut ilisimannittuni pillaatitut akiniaanerit il.il. annilaangagineqarnerisa taamaalillutik pinerluttuliortarnerup akiorniarneqarneranut periarfissat ajornerulersinneqarnissaanik kinguneqarsinnaapput.

Ilisimannittup kinaassusaata isertuunneqarnissaanik eqqartuussiviup aalajangiinera, suliami pissutsit ataatsimut naliliiffigineqarnerisigut aalajangiiffigineqassasoq, matumani ilisimannittup sioqqutsisumik unnerluunneqartumut atassuteqarnera aamma suliap qanoq issussaa pillugu paasissutissat ilanngullugit, inatsisissatut siunnersuutip pingaarnertut kinguneraa. Eqqartuussiviit taamanikkut inatsisiliornermut atuuttumut naleqqiullugu aamma inatsisip atorneqarnissaanut piumasaqaatit, taamanikkut inatsisip piareersaataasumik suliarineqarnerani allanneqarsimasut malitsigisaannut tunngatillugu, matumuuna

ilisimannittut kinaassusaat isertuullugit eqqartuussivit atuisinnaanerisa ilaatigut annertusineqarnerat naatsorsuutigineqarpoq.

Taamanikkut inatsisip piareersaataasumik suliarineqarnerata akerlianik, uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaasa atorneqarsinnaanissaanut, nalaatsornikkut ilisimannittunngortunik taaneqartartut (ilisimannittunut unnerluunneqartumut atassuteqanngitsut) pinngitsoornani pineqartariaqanngitsut, taamaalilluni ilaatigut naatsorsuutigineqarpoq. Ilisimannittut kinaassusaat isertuullugit atorneqarnissaanerata pisuni tamani sulianut, pinerluttuliornernut immikkut ittumik ilusilinnut, aamma ilisimannittumut pineqartumut qunusaarinerit piviusut qunusaarutaasimanerannut, killilerneqassanngitsut aammattaaq aalajangersarneqarsimavoq.

Unnerluunneqartumut unnerluunneqartullu illersorneqarnissaminut periarfissaasa eqqarsaatigineqarnerisa, Inatsiseqarnermut ministereqarfiup isumaa malillugu siunissami aamma ilisimannittut kinaassusaat isertuullugit atorneqarsinnaanerannut annertuumik killilerneqartariaqarnerat tamatuma kinguneraa. Inatsisissatut siunnersuutip ilisimannittunik kinaassusaat isertuullugit ilaatigut atuisinnaaneq kingunerigaluaraa apeqqutaatinnagu, malittarisassiuineq ilisimannittunik kinaassusaat isertuullugit atuisinnaanerit piunnaasaqatit qaqutigunnaq naammassineqarsinnaanerani kinguneqartoq, taamaalilluni sulii pineqarpoq.

Folketingstidende 2010-11 (katersat siulliit), A, L 124 saqqummiunneqarsimasutut, qupperneq 2 innersuussutigineqarpoq.

Ilisimannittut aamma inatsisini aalajangikkanik atortitsiniaanerup illersorneqarnissaasa qulakkeerneqarnissaannut qajassuussassat, qallunaat eqqartuussisarnermik inatsisaani ilisimannittut kinaassusiisa isertuunneqarsinnaanerata pillugu malittarisassat ilusilersorneqarnerannut tunngavigineqartut, Inatsiseqarnermut ministereqarfiup isumaa malillugu aamma Kalaallit Nunaannut atuupput.

Taamaalilluni Kalaallit Nunaanni eqqartuussisarnermik inatsit qallunaat eqqartuussisarnermik inatsisaanni 2002-mi aamma 2011-imi allannguutitut naapertuuttunik allanngortinneqartariaqartoq, Inatsiseqarnermut ministereqarfik isumaqarpoq.

2011-imi ilisimannittut kinaassusiisa isertuunneqarnissaat pillugu qallunaat eqqartuussisarnermik inatsisaanni allanngiineq, Kalaallit Nunaanni eqqartuussiveqarneq pillugu Siunnersuisoqatigiinnut qallunaat eqqartuussisarnermik inatsisaanni allannguutit, piffissami 2003-miit 2013 ilanngullugu suliarineqarsimasut pillugit allakkiami ataatsimut saqqummiussinermi, ilaammat maluginiarneqassaaq. Isumaliutiginninnerit

ingerlaqqinnissaat siunertaralugu, inatsimmi allannguinerit pillugit allakkiap Inatsiseqarnermut ministereqarfimmu Kalaallit Nunaannilu Namminersorlutik Oqartussanut ingerlateqqissallugu Kalaallit Nunaanni eqqartuussiveqarneq pillugu Siunnersuisoqatigiit aalajangerput.

Soorlu qulaani imm. 2.10.1-imi takuneqarsinnaasoq, ilisimannittut kinaassusaannik isertuussineq pillugu qallunaat eqqartuussisarnermik inatsisaanni 2002-mi allannguutit, pissutsit piffissamut tunngassuteqartut pissutigalugit, Kalaallit Nunaanni eqqartuussiveqarneq pillugu Siunnersuisoqatigiit Kalaallit Nunaanni eqqartuussisarnermik inatsisissamik nutaanik missingiusiornerminni ilaatissimanngikkaat ilimagisariaqarmat, aammattaaq maluginiarneqassaaq.

2.10.2.4. Kalaallit Nunaanni eqqartuussisarnermik inatsimmi malittarisassanik nutaanik ilanngussisoqarnissaa tamanna tunngavigalugu siunnersuutigineqarpoq, tamatumalu kingorna ilisimannittup isumannaatsuunissaanut pingaarutilimmik eqqarsaatigisassat ilisimannittup najugaqarfiata unnerluunneqartumut paasissutissiissutigineqannginnissaa pissutissaqartippassuk, imaluunniit ilisimannittup isumannaatsuunissaanut tamanna pisariaqartinneqarpat, ilisimannittup atiata, atorfiata najugaatalu unnerluunneqartumut paasissutissiissutigineqarnissaat, noqqaassuteqarnikkut eqqartuussiviup aalajangersinnaavaa.

Ilisimannittup najugaa, taamalu tulleriillutik, ilisimannittup atia, atorfia najugaalu, unnerluutigineqartumut paasissutissiissutigineqarnerat, unnerluunneqartup illersorneqarneranut pingaaruteqanngitsutut isumaqarfigineqarnerat, pisuni taakkunani marlunni piumasaqaataavoq.

Ilisimannittup kinaanera illersuisumut paasissutissiissutigineqarnera allanngortinneqassanngilaq.

Uppernarsaatit saqqummiunneqarnerannut atatillugu ilisimannittut kinaassusaat isertuullugit eqqartuussivimmi nassuiaatinneqarnissaat pillugu aalajangiineq, pingaarnertut isumaqatigiinniarneq sioqqullugu imaluunniit pingaarnertut isumaqatigiinniarnep nalaani aalajangerneqassasoq siunnersuutigineqarpoq.

Unnerluussisussaataitaasut paasissutissat taakku unnerluunneqartumut nalunaarutigineqannginnissaat pillugu eqqartuussivimmit aalajangerneqaqullugit unnerluussisussaataitaasut noqqaassutigissamaarpassuk, ilisimannittup najugaa imaluunniit atia, atorfia aamma najugaa pillugit paasissutissanik unnerluunneqartumut ingerlatitseqqinnginnissaa pillugu illersuisoq unnerluussisussaataitaasunit peqquneqarsinnaasariaqartoq, aammattaaq siunnersuutigineqarpoq.

Illersuisup peqqussuteqarneq eqqartuussivimmut saqqummiussinnaavaa.

Inatsisissatut siunnersuummi § 1, nr. * (§ 344, imm. 2-p, aamma §§ 444-p, 448-p aamma 458-p allanngortinneqarneri) innersuussutigineqarpoq.’

2.11. Digitaliusumik nalunaarutiginninneq aamma piuminarsakkamik digitaliusumik nalunaarutiginninneq

2.11.1. Inatsisit atuuttut

Nalunaarutip allaffigisamut anngunnissaata qulakkeerneqarnissaa nalunaarutiginninnerup siunertaraa, taamaalilluni allaffigisaq nalunaarutiginninnerup imaanik ilisimasaqalernissaminik periarfissaqarniassammata, kiisalu nalunaarutiginninnermik aallartitsisimasumut, nalunaarutiginninnerup apuussimaneranik pisariaqartinneqartumik uppersaaserneqarnissaq qulakkiissallugu, taamaalilluni inatsisitigut sunniutit, nalunaarutiginninnermut atassuteqartut, aallartissinnaaniassammata.

Kalaallit Nunaanni inuit sakkutuujunngitsut aamma pinerluttulerinermi suliat pillugit eqqartuussivimmi suliasat pillugit nalunaarutiginnittarnissamut malittarisassat eqqartuussisarnermik inatsimmi kapitali 11-imi (§§ 129-imiit 140 ilanngullugu) nassaassaapput.

Politiini tjenestemandimit, kommunefogedimit imaluunniit sassaqqusissummik tunniussisartumit (sassaqqusissummik tunniussisartumit nalunaarutiginninneq) pineqartumut nalunaarutip tunniunneqarneratigut nalunaarutiginninneq pisinnaavoq, taannalu aqutigalugu pineqartoq eqqartuussisarnermik inatsimmi § 133, imm. 1, nr. 1, aamma imm. 2 malillugit tassani tigusinerminik uppersaanissaanik inanpeqassaaq. Nalunaarut sassaqqusissummik tunniussisartumit nalunaarutiginninnerup assinganik pineqartumut tunniunneqarneratigut nalunaarutiginninneq aammattaaq pisinnaavoq, taamaattoq eqqartuussisarnermik inatsimmi § 133, imm. 1, nr. 2 aamma imm. 3 malillugit allakkerisoqarfiup tunniussineq (allakkerivitsigut nalunaarutiginninneq) isumagissavaa. Eqqartuussisarnermik inatsimmi § 133, imm. 1, nr. 3 aamma imm. 4 malillugit, allakkatigut nalunaaruteqarneq, pineqartup tigusinerminik uppersaat ilanngunneqartoq atsioqqullugu uterteqqullugu noqqaassummik ilalerlugu, inummut nalunaarutiginninneq nassiussilluni nalunaarutiginninnikkut (allakkatigut nalunaarutiginninneq) pisinnaavoq. Taanna sioqqullugu imaluunniit tamatuma kingorna takussutissiamik nassinneqarnikkut imaluunniit tunineqarnikkut aamma eqqartuussisarnermik inatsimmi § 133, imm. 1, nr. 4, aamma imm. 5 malillugit tamatuma kingorna nalunaarutiginninnerup uppersarneqarneranik nassinneqarnikkut (oqarasuaatikkut nalunaarutiginnikkut)

nalunaarutiginnissutigineqartussaq, ilanngutassanik ilanngussisoqassappat ilanngussilluni, pineqartumut oqarasuaatikkut nalunaarutiginninnermik tunniussinikkut, nalunaarutiginninneq naggataagut pisinnaavoq.

Inatsisitigut pisinnaatitaasunut pisussaatitaasunullu eqqartuussisarnermik inatsimmi § 133, imm. 6 malillugu nalunaarutiginneriaatsit sassaqqusissummik tunniussisartumit nalunaarutiginninnerusut, allakkerivitsigut nalunaarutiginninnerusut aamma allakkatigut nalunaarutiginninnerusut atorneqarsinnaapput.

Nalunaarutiginneriaatsit assigiinngitsut taakku naligiissitaapput. Inuup nalunaarutiginninnermik aallartitsisup, Kalaallit Nunaanni eqqartuussivimmi suliassat pillugit nalunaarutininik nalunaarutiginnittarneq pillugu nalunaarummi nr. 299-imi 15. december 2009-imeersumi § 1, imm. 1 malillugu nalunaarutiginninneq qanoq ililluni pissannersoq, nammineerluni taamaalilluni toqqassavaa. Nalunaarummi § 1, imm. 2 malillugu taamaattoq eqqartuussivik imaluunniit politiit peqataatinnagit, inuinnaat taamaallaat allakkatigut nalunaarutiginninneq aallartissinnaavaat.

Inummut pineqartumut pineqartup najugaani, utaqqiisaagallartumik najugaqarfiani imaluunniit suliffiani, tamanna sapinngisaaq malillugu pissasoq, sassaqqusissummik tunniussisartumit nalunaarutiginninneq aamma allakkerivitsigut nalunaarutiginninneq pineqartillugit eqqartuussisarnermik inatsimmi § 135, imm. 1-p malitsigaa. Inummut pineqartumut nalunaarutiginninneq, sumi pissagaluarpalluunniit taamaattoq atuuppoq. Inuk pineqartoq pissarsiarineqarsinnaangippat, inunnut inoqutigiinni inooqataasunut, najugaqarfigisaanni imaluunniit najugaanni, imaluunniit, pineqartoq inuup allap najugaqarfiani attartortutut najugaqarpat, taakku najugaqarfianni imaluunniit najukkami pissarsiarineqarsinnaappata, attartortitsisumut imaluunniit taassuma aappaanut, soorlu aamma pineqartup suliffiani sulisitsisumut imaluunniit taassuma sinniisaanut, imaluunniit, eqqartuussisarnermik inatsimmi § 135, imm. 2 nr. 1 aamma 2 malillugit namminersorlutik inuussutissarsiutillit pineqartillugit, pineqartup allaffiani, sannaviani imaluunniit pisiniarfiutaani inunnut suliffeqarfimmi atorfilinnut, nalunaarutiginninneq pisinnaavoq. Umiartortut pineqartillugit nalunaarutiginninneq umiarsuarmi, tassani ilaaffigisaminni, § 135, imm. 2, nr. 3 malillugu inummut umiarsuarmut atasumut imaluunniit umiarsuup piginnittuata allaffiani umiarsuup piginnittuanut imaluunniit taassuma sinniisaanut nalunaarutiginninneq pisinnaavoq. Pisuni taamaattuni § 135, imm. 3 malillugu inunnut 18-it inorlugit ukiulinnut nalunaarutiginninneq taamaattoq pisinnaangilaq. Eqqartuussisarnermi inatsimmi § 135, imm. 4 malillugu inummut pineqartumut nalunaarutiginninneq inuttaanut tunniunneqanngippat, nalunaarummi imaluunniit nalunaarutip allagartaata assingani, qanga aamma kimut nalunaarutiginninneq pisimasoq allanneqassaaq.

Allakkatigut nalunaarutiginninnermi, eqqartuussisarnermik inatsimmi § 133, imm. 4 malillugu ulloq taanna, tigusisup nalunaarummik tigusisimanerminik taasaa, nalunaarutiginninnermik tunniussiffittut isigineqassaaq. Ulloq tigusiffik oqaatigineqarsimangippat, imaluunniit utertillugu nassiussinnermi allakkap naqitsisaa ullormit tigusiffiusutut nalunaarsorneqarsimasumit kingusinneruppat, ullortut tigusiffigisimasutut allakkap naqitsisaani ullormi taaneqarsimasumi, nalunaarutiginninneq pisimasutut isigineqassaaq.

Eqqartuussisarnermik inatsimmi § 134 malillugu allakkatigut nalunaarutiginninneq aamma oqarasuaatikkut nalunaarutiginninneq taamaallaat inummut pineqartumuinnaq pisinnaavoq, taamaattoq inuit sakkutuujunngitsut pillugit suliani, akuusup eqqartuussissuserisuanut imaluunniit eqqartuussinnermi nammineq sinnerluni pisinnaatitamut imaluunniit inummut, akuusup nammineq sinnerluni nalunaarutiginninnermik tigusisussatut toqqagaanut nalunaarutiginnittarneq pillugu inatsimmi § 131 takuuk.

Nalunaarutiginnittarnermut nalinginnaasumik malittarisassat qulaani taaneqartut saniatigut, eqqartuussisarnermik inatsit ilaatigut naalagaaffiup ilaani allani imaluunniit nunani allani nalunaarutiginnittarneq pillugu kiisalu §§ 136 aamma 137 malillugit Statstidende-mi imaluunniit Atuagagdiutini (AG-mi/Grønlandsposten-imi) nalunaarutiginnittarneq pillugit malittarisassanik imaqarpoq.

Nutaamik ataatsimiinnissamut piffissaq imaluunniit eqqartuussivimmi iliuusissap suliarineqarnissaa pillugu aalajangiineq, eqqartuussinnermi aalajangerneqartoq, inunnut eqqartuussinnermi peqataasunut nalunaarutigineqartutut isigineqarnera, eqqartuussisarnermik inatsimmi § 132, imm. 1-ip aammattaaq malitsigaa. § 132, imm. 2 malillugu aalajangersakkap imm. 1-a malillugu aalajangiineq aammattaaq, aalajangiineq aalajangiiffigineqartinnagu inunnut akuerisaasumik ataatsimiinnermut aggersarneqarsimasunut, kisianni agginngitsoorsimasunut imaluunniit pisussaatitaanatik ataatsimiinnermit anisimasunut, aammattaaq nalunaarutiginnittoqarsimaneratut isigineqassaaq. Tamanna immikkut ittumik soqutiginartutut isigineqarsinnaassappat, eqqartuussiviup pineqartut taamaattoq aalajangiineq pillugu nalunaarfigissavai. Eqqartuussisarnermi inatsimmi § 138, imm. 1 malillugu, allaffigisap nalunaarut ilisimasaqarfigilersimangikkaluaraa, nalunaarutiginninneq atuuppoq. Takussutissiaq nalunaarutiginnissutigineqartussaq, allaffigisamit tiguneqarsimappat, naak nalunaarutiginninneq inatsimmi 133-imiit 135 ilanngullugu malittarisassanik naapertuuttumik suliarineqarsimangikkaluartoq, eqqartuussisarnermik inatsimmi §§ 138, imm. 2 malillugu nalunaarutiginninneq pisimasutut isigineqassaaq.

2.11.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Inatsisikkut nr. 447-ikkut, 9. juni 2004-imeersukkut qallunaat eqqartuussisarnermik inatsisaanni digitaliusumik nalunaarutiginnittarneq pillugu § 156 a ilanngunneqarpoq, taassumalu allaffigineqartumut nalunaarummik digitaliusumik attaveqatigiinnikkut tikinneqarsinnaasumik, tamatuma peqatigisaanik tiguisimanerminik uppernarsaammik noqqaavigineqartumut, nalunaarutiginninnerup pinissaa, periarfissittussaassavaa.

Folketingstidende 2003-04, ilanngussa q A, qupperneq 6487 malillugu, tassuuna nalunaarutiginnittarneq suliaasaqarfimmi digitaliusumik attaveqatigiittarneq periarfissat iluaqutigineqarnissaat, tassani aamma siunertarineqarpoq.

Inatsisikkut nr. 1242 -ikkut, 18. december 2012-imeersukkut, qallunaat eqqartuussisarnermik inatsisaanni nalinginnaasumik naleqqussarneqarnerani nalunaarutiginnittarneq pillugu malittarisassat § 156 b-imut nuunneqarput.

Qallunaat eqqartuussisarnermik inatsisaanni § 156 b-mi aalajangersagaq nalunaarut nr. 25, 20. januar 2015-imeersoq malillugu 1. februar 2015 atuutilersinneqarpoq, tassami taamanikkut aatsaat Danmarkimi eqqartuussiviit digitaliusumik atsiornertalimmik, digitaliusumik attaveqatigiinnikkut tekniskiusumik nalunaarutiniq nassiussinissamat periarfissinneqarput, tamannalu digitaliusumik nalunaarutiginninnerup suliarineqarsinnaaneranut piumasaqaataavoq.

Taamatuttaaq inatsisikkut nr. 1242-ikkut, 18. december 2012-imeersukkut piuminarsakkamik digitaliusumik nalunaarutiginnittarneq pillugu qallunaat eqqartuussisarnermik inatsisaanni § 156 c ilanngunneqarpoq, taassumalu nalunaarutip allakkanut nakkartitsisarfimmi digitaliusumi pineqartumut tikinneqarsinnaalernissaa periarfissiissutigisussaavaa, taannalu pisortanut isumannaatumik digitaliusumik attaveqatigiinnermi atorneqartarpoq. Aalajangersagaq malillugu, nalunaarut ammarneqarsimappat, nalunaarutiginninneq pisimasutut isigineqartussaavoq.

Taamatuttaaq qallunaat eqqartuussisarnermik inatsisaanni § 156 c ulloq 1. februar 2015 atuutilersinneqarpoq, tassami piffissamat tassangaanniit piuminarsakkamik digitaliusumik nalunaarutiginnissinnaanerup atorneqalernissaa naatsorsuutigineqarmat. Tekniskiusumik atuuffik, tassuuna automatiskiusumik nalunaarutip ammarneqarsimaneramik uppernarsaammik nassiussisoqarsinnaalluni, taamaattoq ima aaqqissuunneqarsimavoq, oqartussaasoq nassiussisoq pisuni assigiinngitsuni – digitaliusumik allakkanut nakkartitsisarfimmi nalunaarutip imaata qanoq tikinneqarsinnaanera apeqqutaalluni – nalunaarutip nalunaarutiginnissutigineqartussap ammarneqarsimanerata uppernarsarneqarneranik uppernarsaammik angusinngitsoorfiusimavoq. Inatsisikkut nr. 203-ikkut, 28. februar 2017-imeersukkut qallunaat eqqartuussisarnermik inatsisaanni § 156 c taamaammat allanngortinneqarpoq, taamaalilluni piuminarsakkamik digitaliusumik

nalunaarutiginninneq, oqariartuut, tassunga nalunaarut ilanngunneqarsimalluni, imaluunniit ilanngussaq imaluunniit nalunaarut alla, oqariartuummut ilanngunneqarsimasoq, nalunaarutip ammarneqarneratigut imaluunniit allatut suliarineqarneratigut pisimanissaa isigineqarluni.

Kalaallit Nunaani Politiit Kalaallit Nunaanni eqqartuussisarnermi digitaliusumik nalunaarutiginnissinnaaneq aamma piuminarsakkamik digitaliusumik nalunaarutiginnissinnaaneq, Kalaallit Nunaanni Politiit nalunaarutigisimavaat.

[Massakkuugallartoq Kalaallit Nunaanni Eqqartuussiviit digitaliusumik nalunaarutiginninnissamut imaluunniit piuminarsakkamik digitaliusumik nalunaarutiginninnissamut tekniskiusumik periarfissaqanngillat, kisianni eqqartuussivinnut ukiunut arlalinnut isumaqatigiissusiornissami aggersumi isumaqatigiissuumut piffissarititaasup ingerlanerani Kalaallit Nunaanni Eqqartuussiviit taaneqartut pillugit periarfissaqalernissaat Domstolstyrelsip naatsorsuutigivaa.]

Tamanna tunggavigalugu, eqqartuussisarnermik inatsimmi tamanna pillugu qallunaat eqqartuussisarnermik inatsisaanni malittarisassat assigalugit, digitaliusumik nalunaarutiginninneq aamma piuminarsakkamik digitaliusumik nalunaarutiginninneq pillugu aalajangersakkamik eqqartuussisarnermik inatsimmi ilanngussisoqartariaqartoq Inatsiseqarnermut ministereqarfik isumaqarpoq.

Kalaallit Nunaanni eqqartuussisarnermi aamma digitaliusumik attaveqatigiissinnaanerup massakut atorneqartup periarfissai iluaqutigineqartariaqartut, Inatsiseqarnermut ministereqarfiup pingaartippaa.

Digitaliusumik nalunaarutiginnittarnermi nalunaarutiginnittarnermut periaasiusoq, tassani nalunaarutiginninneq aatsaat tiguisup nammineq eqeersimaartumik iliuseqarnermigut nalunaarut, nalunaarutiginnissutigineqartussaq, tiguisimallugu uppersartarlugu, aamma piuminarsakkamik digitaliusumik nalunaarutiginninnermi, allaffigineqartup digitaliusumik allakkanut nakkartitsisarfimmi, tamanna pillugu inatsisiliorneq malillugu isumannaatumik pisortat attaveqatigineqarneranni atorneqartartumi, nalunaarut suliarisimassagaa, Justitsministeriaqarfimmiit, naatsorsuutigineqarpoq.

Digitaliusumik nalunaarutiginnittarnermi aamma piuminarsakkamik digitaliusumik nalunaarutiginnittarnermi qallunaat eqqartuussisarnermik inatsisaanni malittarisassat assinginik eqqartuussisarnermik inatsimmi siunnersuutikkut ilanngussisoqarnissaa taamaammat siunnersuutigineqarpoq.

Kalaallit Nunaanni Eqqartuussiviit massakkuugallartoq digitaliusumik nalunaarutiginninnissaminnut imaluunniit piuminarsakkamik digitaliusumik nalunaarutiginninnissaminnik tekniskiusumik periarfissaqanngillat, kisianni 2024-imiit 2027 ilanngullugu eqqartuussivinnut ukiunut arlalinnut isumaqatigiissutip ingerlanerata aallaqqaataani Kalaallit Nunaanni Eqqartuussiviit digitaliusumik nalunaarutiginninnissamut aamma piuminarsakkamik digitaliusumik nalunaarutiginninnissamik periarfissaqalernissaat, Domsdolsstyrelsenip naatsorsuutigaa. Piuminarsakkamik digitaliusumik nalunaarutiginninneq eqqarsaatigalugu, suli annertunerusumik ineriartortitsisoqarnissaa pisariaqartinneqassaaq.

Inatsisissatut siunnersuummi § 1, nr. 1, nr. 6-imiit 8 ilanngullugu (eqqartuussisarnermi inatsimmi §§ 133 aamma 134) innersuussutigineqarpoq.

3. Pisortanut aningaasaqarnikkut kingunissai aamma atortuulersitsinermi kingunissaa

Aallaaviatigut eqqartuussutini aalajangiinernilu, inatsit malillugu tunngavilersorneqartussani, kikkulluunniit allagaatinik takunnissinnaatitaassatut, inatsisissatut siunnersuutip kinguneraa. Eqqartuussutini aalajangiinernilu allagaatinik takunnissinnaaneq pillugu noqqaassutinik, ullumimut naleqqiullugu amerlanerusunik eqqartuussiviit pinissaat naatsorsuutigineqassaaq, taamaattoq noqqaassutit qanoq amerlatiginissaa pillugit nalilersuineq ajornarpoq. Illuatungaanili ataani taaneqartoq malillugu, takussutissiani allaanerusunik suussusilinni allagaatinik takunnissinnaatitaaneq pillugu noqqaassutinik ikinnerusunik eqqartuussiviit tigusinissaat, inatsisissatut siunnersuutip kinguneraa.

Eqqartuussiviit unnerluussisussaataasullu akornanni allagaatinik takunnissinnaatitaaneq pillugu suliat ilaatigut agguarneqarnissaat, inatsisissatut siunnersuutip kinguneraa. Pinerluttulerinermik suliani naammassineqareersimasuni allagaatinik takunnissinnaatitaaneq pillugu noqqaassutit – ullumikkut taamaattut pineqartut amerlanerit eqqartuussivimmit aalajangiiffigineqartartut – siunissami tamarmik unnerluussisussaataasunit aalajangiiffigineqartalissapput. Inatsisissatut siunnersuutip malitsigisaanik, allagaatinik takunnissinnaatitaaneq pillugu noqqaassutit amerlanerusut unnerluussisussaataasut suliarisalissagaat taamaammatt naatsorsuutigineqarpoq.

Allagaatinik takunnissinnaatitaaneq pillugu malittarisassat siunnersuutigineqartut eqqartuussivinnut unnerluussisussaataasunullu qanoq annertutigisumik suliaqarnerunermik kinguneqarnissaat aalajangersassallugu ajornakusoorpoq. Taamaattoq eqqartuussivinnut unnerluussisussaataasunullu ataatsimut isigalugu suliaqarnerulerneq

ilimagineqartussaassaaq. Suliaqarnerulernerup taamaattup aningaasaliissutitut tunngasut killissarititaasa iluannit aningaasartuutigineqarnissaat naatsorsuutigineqarpoq.

Pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat pillugu eqqartuussisarnermik inatsimmi aalajangersakkat arlallit nutarterneqarnerat, kiisalu Kalaallit Nunaanni ilisimannittut kinaassusaasa isertuunneqarnissaat pillugit malittarisassanik ilanngussisoqarnera, inatsisissatut siunnersuutip aammattaaq kinguneraa.

Inatsimmik allannguinerit taakku, politiit, matumani Politiit isertortumik paasiniaasartui ilanngullugu, ilaatigut Kalaallit Nunaanni ilungersunartunik aamma aqqissuussaanagerusunik pinerluttuliornerit aamma pisoq naleqquttoq saqqummissagaluarpat, isumannaatsuunissamut siorasaarneqarnerit saqqummersinnaasut akiorniarlugit, pinerluttoqarsimaneranik paasiniaaffiginissaannut pitsaanagerusumik periarfississavaat, soorlu aamma unnerluussisussaataitaasut pinerluttulerinermik suliat naammassinissaannut pitsaanagerusumik periarfissaqalissasut.

Pinerluttoqarsimaneranik paasiniaaneq aamma uppernarsaaneq pillugit inatsimmi allannguutissanik siunnersuutit imminni aningaasaqarnikkut imaluunniit atortuulersitsinermut tunngatillugu politiit, unnerluussisussaataitaasunut imaluunniit eqqartuussivinnut kinguneqassanngillat. Pinerluttoqarsimaneranik paasiniaanermt periarfissat, ullumikkut tamakkiisuunngitsumik periarfissaliissutigineqartut atorneqarnerulernerat, assersuutigalugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq, kisianni aningaasartuuteqarnerunermik kinguneqarsinnaavoq, aningaasaliissutitut tunngasut killissarititaasa iluannit aningaasartuutigineqarnissaat naatsorsuutigineqarpoq.

Inatsisissatut siunnersuut aningaasaqarnikkut imaluunniit atortuulersitsinissamut tunngasunik kommuninut kinguneqassanngilaq.

4. Inuussutissarsiornermut il.il. aningaasaqarnikkut allaffissornikkullu kingunissaa

Internettikkut nittartakkat matuneqarnissaat pillugu siunnersuut, nittartakkat ajornaatumik matuneqarnissaasa naammassineqarnissaannut atatillugu, internettimik tuniniaasartunut annikinnerusumik aningaasaqarnikkut allaffissornikkullu kinguneqarsinnaavoq.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq, oqarasuaatip

angallattakkap sumiinnera pillugu paasissutissanik pissarsinertut iluseqartoq, aallaaviatigut oqarasuaatit atorlugit attaveqatigiinnernik tuniniaavinnut, oqarasuaatip angallattakkap ikumasup, pasineqartumit atorveqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup piviusup naammassineqarneranut atatillugu allaffissornikkut aningaasartuuteqarnermik kinguneqassapput.

Malugeqquneqarpoq oqarasuaat atorlugu nakkutilliineq teknikkikkut maanna periarfissaalereermat.

Inatsisissatut siunnersuut inuussutissarsiornermut il.il. pineqartut saniatigut aningaasaqarnikkut allaffissornikkullu kinguneqarnissaa naatsorsuutigineqanngilaq.

5. Innuttaasunut allaffissornikkut kingunissaa

Innuttaasunut inatsisissatut siunnersuut aningaasaqarnikkut allaffissornikkullu kinguneqassanngilaq.

6. Silap pissusaanut- avatangiisinullu tunngatillugu kingunissaa

Silap pissusaanut tunngatillugu inatsisissatut siunnersuut kinguneqassanngilaq.

7. Avatangiisinut- pinngortitamullu kingunissaa

8. EU-mi inatsisitigut tunngassuteqartut

Inatsisissatut siunnersuut EU-mi inatsisitigut tunngasunik isiginniffinnik imaqaanngilaq.

9. Oqartussat suleqatigiiffiillu il.il. tusarniaaffigineqartut

Inatsisissatut siunnersuummut missingiut piffissami ulloq [*] 2023-imiit ulloq [*] 2023-imut oqartussaasunut suleqatigiiffinnullu il.il. tulluuttuni tusarniutigalugu nassiunneqarpoq:

[*]

10. Immersugaq eqikkaaffiusoq

	Ajunngitsumik kinguneqartut /aningaasartuutit ikinnerulersut (angerukku annertussusileruk/naaggaarukku allaguk:	Kinguneqarnerluttut /aningaasartuutit ilaneri (angerukku, annertussusileruk
--	---	---

	»soqanngilaq«)	/naaggaarukku, allagut: »soqanngilaq«)
Naalagaaffimmut, kommuninut nunallu immikkoortuinut aningsaasaqarnikkut kinguneri	Soqanngilaq	Eqqartuussiviit unnerluussisussaataasullu allagaatinik takunnissinnaatitaaneq pillugu noqqaassutitik ilaatigut suliaqarnerulernissaat naatsorsuutigineqarpoq, taakkuli killiliussat piusut iluannit aningsaasartuutigineqarnissaat naatsorsuutigineqarpoq.
Naalagaaffimmut, kommuninut nunallu immikkoortuinut atuutilersitsinerup kinguneri	Soqanngilaq	Eqqartuussiviit unnerluussisussaataasullu allagaatinik takunnissinnaatitaaneq pillugu noqqaassutitik ilaatigut suliaqarnerulernissaat naatsorsuutigineqarpoq, taakkuli killiliussat piusut iluannit aningsaasartuutigineqarnissaat naatsorsuutigineqarpoq.
Inuussutissarsiortunut aningsaasaqarnikkut kinguneri	Soqanngilaq	Nittartakkat matuneqarnissaa pillugu siunnersuut, nittartakkat ajornaatsumik matuneqarnerisa naammassineqarnerannut atatillugu, internettimik tuniniaasunut aningsaasaqarnikkut annikinnerusumik kinguneqarsinnaassaaq. Inatsisissatut siunnersuut allakkut inuussutissarsiortunut

		anigaasaqarnikkut kinguneqarnissaa naatsorsuutigineqanngilaq.
Inuussutissarsiortunut allaffissornikkut kinguneri	Soqanngilaq	Nittartakkat matuneqarnissaa pillugu siunnersuut, nittartakkat ajornaatsumik matuneqarnerisa naammassineqarnerannut atatillugu, internettimik tuniniaasunut anigaasaqarnikkut annikinnerusumik kinguneqarsinnaassaaq. Inatsisissatut siunnersuut allakkut inuussutissarsiortunut anigaasaqarnikkut kinguneqarnissaa naatsorsuutigineqanngilaq.
Innuttaasunut allaffissornikkut kinguneri	Soqanngilaq	Soqanngilaq
Silap pissusaanut tunngatillugu kingunissaa	Soqanngilaq	Soqanngilaq
Avatangiisinut- pinngortitamullu tunngassuteqartumik kingunissaa	Soqanngilaq	Avatangiisinut- pinngortitamullu tunngassuteqartumik kingunissaa
EU-mi inatsisitigut tunngassuteqartut	Inatsisissatut siunnersuut EU-mi isiginniffinnik imaqanngilaq.	inatsisitigut tunngasunik
EU-mi inuussutissarsiornermut sammititamik malittarisassiornermi tunngaviusut tallimaasut atortuulersinneqarnissaannut akerliuvoq/EU-mi malittarisassiuinermi minnerpaamik piumasaqaatinik qaangiivoq	Aap	Naagga X

(X-ileruk)	

§ 1-imut

Nr. 1 (§ 50)-imut

Eqqartuussisoq pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaangissusianut pinngitsaaliilluni akuliunnerit aallartinneqarnissaat pillugu aalajangiisimasoq, aalajangiinerlu taanna immikkut ittumik pasitsaassisoqartoqarneranik isumaqartoqarneranik piunasaqarfiulluni, taanna unnerluunneqartup pissutsimi, pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaangissusianut pinngitsaaliilluni akuliunnerit aallartinneqarnissaannut tunngaviliisimappat, pingaarnertut isumaqatigiinniarnep nalaani eqqartuussisutut peqataasinnaangitsoq, eqqartuussisarnermik inatsimmi § 50, imm. 1-ip aalajangerpaa.

Pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaangissusianut pinngitsaaliilluni akuliunnerit aallartinneqarnissaannik pingaarnertut isumaqatigiinniarnep nalaani aalajangiineq, immikkut ittumik pasitsaassisoqartoqarneranik isumaqartoqartoqarnissaannik piunasaqarfiusoq, taannalu unnerluunneqartup pissutsimi, pillagassanngortitsinissamut suliassanngortitsinermut atatillugu politiinit, unnerluussisussaataitaasunit imaluunniit eqqartuussivinnit inuup kiffaangissusianut pinngitsaaliilluni akuliunnerit aallartinneqarnissaannut tunngaviliisumi, pisuuneranut uppersaatit nalilerneqarnerannik ilaqartinneqarpat, eqqartuussisumit, pingaarnertut isumaqatigiinniarnermi peqataangitsumit, aalajangerneqassaaq.

Imm. 3 nutaaq ilanngunneqassasoq siunnersuutigineqarpoq, tamatumalu kingorna pinerluttulerinermik suliarni, unnerluussummut tunngassutilik pissut pillugu atortussat, politiit noqqaavigineqarnertik malillugu eqqartuussivimmu saqqummiussimasaat, illersuisup allagaatinik takunnissinnaatitaaneranut ilatinneqannginnissaat pillugit pineqartoq § 341, imm. 2 malillugu aalajangiisimappat, pingaarnertut isumaqatigiinniarnermi kinaagaluartorluunniit eqqartuussisutut peqataasinnaangilaq.

Pineqartoq pingaarnertut isumaqatigiinniarnep sioqqullugu § 341, imm. 2 malillugu (inatsisissatut siunnersuummi § 1, nr. 17-imi oqaasertalerneqartutut), atortussanik isumaqatigiinngissummut tunngassuteqartunik politiit eqqartuussivimmu saqqummiussinerisa kingorna, § 339 a, imm. 2-mi oqaaseqatigiit siullit, imaluunniit § 339

b, imm. 2-mi oqaaseqatigiit siulliit (inatsisissatut siunnersuummi § 1, nr. 14-imi oqaasertalerneqartutut) malillugit politiit aalajangiinerat inatsisinut naapertuunnersoq pillugu aalajangiisimappat, pinerluttulerinermik suliami pingaarnertut isumaqatigiinniarnep nalaani eqqartuussisutut peqataasinnaangitsoq, siunnersuutip kinguneraa. Pisumi taamaattumi eqqartuussisoq pineqartoq, suliamut sioqqutsisumik ilisimasaqarnini tunngavigalugu, paasissutissanik illersuisup ilisimangisaanik peqassaaq, taamaammallu pineqartoq pingaarnertut isumaqatigiinniarnep nalaani eqqartuussisutut peqataasinnaangilaq.

Eqqartuussisup pineqartup attuumavallaarnera pisuni taakkunani eqqartuussisumut allamut imaluunniit atorfirmi tassani eqqartuussivimmi inatsisilerituutut fuldmægtiginut sunniuteqassanngilaq. Eqqartuussisup pineqartup § 341, imm. 2 malillugu aalajangiinerminut atatillugu paasissutissanik ilisimasaqalerneranik malittarisassaq tunngaveqarmat, tassunga pissutaavoq.

Aammattaaq *imm. 4-imi* nutaamik ilanngussisoqarnissaa siunnersuutigineqarpoq, tamatumalu kingorna pinerluttulerinermik suliami, unnerluussummut tunngassutilik pissut pillugu atortussat ilanngunneqannginnissaat pillugit pineqartoq § 339 c malillugu imaluunniit allatut aalajangiisimappat, tassani paasissutissanik § 339 c malillugu illersuisup pasineqartullu allagaatinik takunnissinnaatitaanerannit ilanngunneqanngitsunik paasissutissanik saqqummiussisoqarsimalluni, pingaarnertut isumaqatigiinniarnemi kinaagaluartorluunniit eqqartuussisutut peqataasinnaangilaq.

Pineqartoq tamanna sioqqullugu illersuisup pasisallu § 339 c malillugu (inatsisissatut siunnersuummi § 1, nr. 14-imi oqaasertalerneqartutut) allagaatinik takunnissinnaatitaanerannit atortussat ilanngunneqannginnissaat pillugit aalajangiisimappat, imaluunniit allamik aalajangiisimappat, tassungalu atatillugu paasissutissanik, § 339 c malillugu illersuisup allagaatinik takunnissinnaatitaaneranik ilanngunneqanngitsunik saqqummiussisoqarsimalluni, pinerluttulerinermik suliami eqqartuussisoq pingaarnertut isumaqatigiinniarnemi peqataasinnaangitsoq, siunnersuutip kinguneraa. Assersuutigalugu eqqartuussisoq pineqartoq §§ 384-imiit 390 ilanngullugu, 399 aamma 400 malillugit inuup nakkutigineqarani inummut allamut nalunaaruteqarsinnaatitaaneranik akuliunnissaq, nakkutiginnineq imaluunniit paasissutissiinermut systemimi paasissutissanik tamanit tikinneqarsinnaangitsunik programmit atortussallu allat atorlugit atuaasinnaaneq pillugit § 391 malillugu aalajangiisimappat, imaluunniit unnerluussisussaataasut, paasissutissanik, § 339 c malillugu illersuisup pasineqartullu allagaatinik takunnissinnaatitaanerannit ilanngunneqanngitsunik, saqqummiussisimanerat tunngavigalugu isertortumik uppersaatissanik ujaasinissaq pillugu aalajangiisimappat tamanna pisinnaavoq.

Eqqartuussisup pineqartup attuumavallaarnera pisuni taakkunani eqqartuussisumut allamut imaluunniit atorfirmi tassani eqqartuussivimmi inatsisilerituutut fuldmægtiginut sunniuteqassanngilaq.

Aalajangersakkatut siunnersuutigineqartup tunuliaqutaa tassaavoq, taanna eqqartuussisoq illersuisup allagaatinik takunnissinnaatitaanerannit atortussat ilanngunneqannginnissaat pillugit aalajangiisimappat, taava kingorna pingaarnertut isumaqatigiinnermi eqqartuussisutut ilaatinneqassanngilaq, tassami eqqartuussisoq suliamut ilisimasaqareernermini illersuisup piginnisaanik paasissutissanik tigummisaqartussaammat. Tamanna aamma atuuppoq paasissutissanik, § 339 c malillugu illersuisup pasineqartullu allagaatinik takunnissinnaatitaanerannit ilanngunneqanngitsunik, saqqummiussisimanerat tunngavigalugu isertortumik uppersaatissanik ujaasinisaaq pillugu aalajangiisimappat.

Tassunga ilanngullugu siunnersuutigineqarpoq nutaamik imm. 4, oqaaseqaatsit aappaannik ilanngussisoqarnissaa, tamannali atuutissanngilaq illersuisup pasineqartullu allagaatinik takunnissinnaatitaanerannit ilanngunneqanngitsunik paasissutissanik ilanngussisinnaaneq pingaarnertut isumaqatigiinniarnep siorna atorunnaarsinneqarsimappat.

Siunnersuutip imaraa, Pineqartoq tamanna sioqqullugu illersuisup pasisallu § 339 c malillugu (inatsisissatut siunnersuummi § 1, nr. 14-imi oqaasertalerneqartut) allagaatinik takunnissinnaatitaanerannit atortussat ilanngunneqannginnissaat pillugit aalajangiisimappat, imaluunniit allamik aalajangiisimappat, tassungalugu atatillugu paasissutissanik, § 339 c malillugu illersuisup allagaatinik takunnissinnaatitaanerannik ilanngunneqanngitsunik suliami allami aalajangiinnermi eqqartuussisumut saqqummiussisoqarsimalluni, taava § 50, imm. 4 malillugu suliami pingaarnertut isumaqatigiinniarnermi eqqartuussisoq mattunneqarsinnaanngilaq peqataanissaminut.

Naggataagut nutaamik *imm. 5-imi* ilanngussisoqarnissaa siunnersuutigineqarpoq, tamatumalu kingorna pinerluttulerinermik suliami pingaarnertut isumaqatigiinniarnep nalaani, aalajangiinerit imm. 3-mi aamma 4-imi taaneqartut, eqqartuussisumit, pingaarnertut isumaqatigiinniarnermi peqataanngitsumit, aalajangiiffigineqassappat.

§ 341, imm. 2 malillugu pingaarnertut isumaqatigiinniarnep nalaanni politiit § 339 a, imm. 2-mi oqaaseqatigiit siulliit, imaluunniit § 339 b, imm. 2-mi oqaaseqatigiit siulliit malillugit aalajangiineri inatsisinut naapertuunnersut pillugit aalajangiisooqartussaattillugu, aalajangiineq eqqartuussisumit pingaarnertut isumaqatigiinniarnermi peqataanngitsumit aalajangerneqassasoq, siunnersuutip kinguneraa. Pingaarnertut isumaqatigiinniarnep nalaani § 339 c malillugu illersuisup pasineqartullu allagaatinik takunnissinnaatitaanerannit atortussanik minissisoqarnissaanik aalajangiissasoqassappat imaluunniit allamik

aalajangiisoqarpat, tassungalu atatillugu paasisutissanik, § 339 c malillugu illersuisup allagaatinik takunnissinnaatitaanerani ilanngunneqanngitsunik saqqummiussisoqarsimalluni, aalajangiineq eqqartuussisumit pingaarnertut isumaqatigiinniarnermi peqataasimanngitsumit aalajangerneqassasoq, siunnersuutip aammattaaq kinguneraa. Matumuuna pingaarnertut isumaqatigiinniarnernup nalaani paasisutissanik illersuisup nalusaanik eqqartuussisup pigisallip ilaannginnissaa qulakkeerneqassaaq.

Atorfimmi eqqartuussisumit allamit imaluunniit eqqartuussivimmi inatsisilerituutut fuldmægtigimit, pisariaqartinneqartumik piginnaatitaasumit, aalajangiinerit pineqartut aalajangiiffigineqarsinnaapput. Piviusumik tamanna pisinnaanngippat, eqqartuussisarnermik inatsimmi §§ 19 imaluunniit 24 malillugit eqqartuussisup taartaanik ivertitsisoqarsinnaavoq.

Ammattaaq inatsisissatut siunnersuummi nalinginnaasumik oqaaseqaatini imm. 2.1.1 innersuussutigineqarpoq.

Nr. 2 (§ 61 f, imm. 2)-mut

Ilaatigut politidirektørip pinerluttulerineq pillugu inatsiseqartitsineq malillugu eqqartuussiniarluni imaluunniit pillagassanngortitsiniarluni suliaqarneq pillugu aalajangiineri pillugit statsadvokatimut naammagittaalliornerni eqqartuussisarnermik inatsimmi § 61 f, imm. 1-p naammagittaalliornissamut piffissaliussaq sapaatit akunnerinut 4-nut aalajangersarpaa.

Statsadvokatip naammagittaalliornernik sulianik taamaattunik suliarinninnera pillugu eqqartuussisarnermik inatsimmi § 61 e, imm. 2-mi malittarisassat, aamma naammagittaalliornermik suliat pillugit statsadvokatip aalajangiineri, Rigsadvokatimut aamma inatsiseqarnermut ministerimut naammagittaalliutigineqarsinnaanngitsut, kiisalu naammagittaalliornissamut piffissaliussaq pillugu § 61 f, imm. 1 pisortat ingerlatsinerat pillugu inatsit aamma paasitinneqarsinnaaneq pillugu inatsit pillugit aalajangiinerit naammagittaalliutigineqarnerannut taamatutaaq atuutissasoq, eqqartuussisarnermik inatsimmi § 61 f, imm. 2-p aalajangersarpaa.

§ 61 f, imm. 2-p allanngortinneqarnissaa siunnersuutigineqarpoq, imaalillugu aalajangersakkat pineqartut nalinginnaasumik allagaatinik takunnissinnaatitaaneq pillugu naammagittaalliutinut taamatutaaq atuutissasut, tassami pisortat ingerlatsinerat pillugu inatsimmut aamma paasitinneqarsinnaaneq pillugu inatsimmut innersuussinertit peerneqarput.

Statsadvokatimut naammagittaalliorsinnaaneq, Rigsadvokatimut inatsiseqarnermullu ministerimut naammagittaalliorsinnaannginneq kiisalu naammagittaalliornissamut piffissaliusseq aamma allagaatinik takunnissinnaatitaaneq pillugu eqqartuussisarnermik inatsimmi §§ 101 c-miit 102 a ilanngullugu (inatsisissatut siunnersuummi § 1, nr. 3) malittarisassatut siunnersuutigineqartut malillugit politidirektørip aalajangiineri pillugit naammagittaalliornernut atuutissasut, siunnersuutip kinguneraa.

Aammattaq inatsisissatut siunnersuummut nalinginnaasumik oqaaseqaatini imm. 2.1.2 innersuussutigineqarpoq.

Nr. 3 (§§ 101-102 a)-imut

Akuusunut aamma tassani eqqartuussisut atuagaataanni aamma takussutissiani saqqummiunneqartuni, inatsisitigut tamatumani soqutigisaqartunut allanut allagaatinik takunnissinnaatitaaneq pillugu nalinginnaasumik malittarisassanik eqqartuussisarnermik inatsimmi § 101 imaqarpoq, aamma § 102 tusagassiuutit allagaatinik takunnissinnaatitaanerit pillugu malittarisassanik immikkut ittumik imaqarpoq.

§§ 101-ip aamma 102-p atorunnaarsinneqarnissaat, taarsiullugulu eqqartuussisarnermik inatsimmi kikkunnulluunniit, tusagassiuutinut aamma inuit sakkutuujunngitsut pillugit suliani aamma pinerluttulerinermik suliani akuusunut, allagaatinik takunnissinnaatitaaneq pillugu aalajangersakkanik nutaanik ilanngussisoqarnissaa siunnersuutigineqarpoq. Aalajangersakkat kapitalimi nutaami »Allagaatinik takunnissinnaatitaaneq«-mik qulequtaqartumi ilanngunneqarnissaat siunnersuutigineqarpoq.

§ 101-imut

Allagaatinik takunnissinnaatitaaneq pillugu malittarisassat pillugit ataatsimut isiginninnissap anguniarneqarnera aalajangersakkami siunertarineqarpoq. Aalajangersakkap immi allagaatinik takunnissinnaatitaaneq pillugu malittarisassanik aalajangersaanngilaq, kisianni pisuni assigiinngitsuni aalajangersakkanut allagaatinik takunnissinnaatitaaneq pillugu imalinnut innersuussilluni.

§ 101 a-mut

Eqqartuussutit nalunaarutigineqarsimasut tamaasa pillugit tamanut ammasuunissap qulakkeerneqarnissaa aalajangersakkakkut siunertarineqarpoq.

Eqqartussutit tamatigut tamanut ammasumik eqqartuussinermi nalunaarutigineqartassasut eqqartuussisarnermik inatsimmi § 112, imm. 2-p aalajangersarpaa.

Taamaattoq tamanna sulisaatsimi ima paasineqassaaq, eqqartuussut oqalulluni nalunaarutigineqarpat, tamanna tamanut ammasumik eqqartuussinermi pissasoq, aamma inatsisissatut siunnersuummi § 1, nr. 4 malillugu tassunga naapertuuttumik § 112, imm. 2-p allanngortinneqarnissaa siunnersuutigineqarpoq. Taamaappat eqqartuussutip inerniliussaa tassaassooq atuarneqartussaq. Tamanna suliat suussusiinut assigiinngitsunut tamanut atuuppoq, matumani suliat nammineersinnaassusiiagaanernut aamma angajoqqaatut akisussaataasumik isumasiueqqaarluni pisuussutit pillugit aalajangiisinnaaneq, ataataassarsuineq, appariilerneq aamma angajoqqaatut oqartussaasuuneq aamma allaffissornikkut aalajangikkamik nammineersinnaajunnaarsitsinerup misilinneqarnera imaluunniit akuersititseqqaarnani qitornavissiannngortitsineq pillugit suliat ilanngullugit.

Taamaalilluni pisut ilaanni eqqartuussut eqqartuussinertaqanngitsumik nalunaarutigineqarsinnaavoq, imaappoq eqqartuussut akuusunut allaganngorlugu nassiunneqarluni imaluunniit tunniunneqarluni. Tamanna ilaatigut eqqartuussisarnermik inatsimmi §§ 221 aamma 231 malillugit inuit sakkutuujunngitsut pillugit suliani najuutinngitsoornerni eqqartuussutitut aamma nassuernertut suliani atuuppoq, aamma akuusut akuersissuteqarnerisigut inuit sakkutuujunngitsut pillugit suliaq pissutsit assigiinngitsut malillugit aamma pisuni allani eqqartuussisarnermik inatsimmi § 242 malillugu allakkat tunngavigalugit aalajangiiffigineqarsinnaapput. Tamanna aamma inuit sakkutuujunngitsut pillugit aamma pinerluttulerinermik suliani pisinnaavoq, tassa eqqartuussut pingaarnertut isumaqatigiinniarnermi ulloq taanna nalunaarutigineqanngitsaq, eqqartuussisoqanngikkaluartoq nalunaarutigineqarluni.

Eqqartuussutip nalunaarutigineqarnerata kingorna sapaatip akunnerata 1-p iluani tamanna pillugu noqqaassuteqarneq saqqummiunneqarpat, kialluunniit eqqartuussutip inerneranik isiginnaarnissani piunasaqaatigisinnaagaa siunnersuutigineqarpoq. Eqqartuussut eqqartuussinermi imaluunniit eqqartuussinertaqanngitsumik nalunaarutigineqarsimanersoq apeqqutaatinnagu, aamma eqqartuussuummi allakkut allagaatinik takunnissinnaatitaaneq apeqqutaatinnagu, malittarisassaq atuuppoq.

Aammattaaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

§ 101 b-mut

Eqqartuussutini aalajangiinernilu, inatsit malillugu tunngavilersorneqartussaasuni, akuusunit allaanerusunut allagaatinik takunnissinnaatitaanermut aalajangersagaq tunngavoq, aamma pingaarutilimmik nutaaliornertut oqaatigineqartariaqarluni. Malittarisassanut attuuttunut naleqqiullugu, tassani akuusunit allaanerusunut allagaatinik

takunnissinnaatitaaneq inatsisitigut tamatumani soqutigisaqartutut piomasaaqateqarnerup akerlianik, aallaaviatigut eqqartuussutini aalajangiinernillu, inatsit malillugu tunngavilersorneqartussaasuni, kikkulluunniit allagaatinik takunnissinnaatitaanissaat siunnersuutigineqarpoq.

Immikkut ittumik tassunga soqutiginnineq qularnarunnaarsinngikkaluarlugu kialluunniit eqqartuussutit aalajangiinerillu, inatsit malillugu tunngavilersorneqartussat, assilillugit sanaqqinneqarnerinik tunineqarnissaq piomasaaqatigisinnaagaa, nalinginnaasumik aallaaviusoq *imm. 1-ip* aalajangersarpaa. Inuit sakkutuujunngitsut pillugit suliani aamma pinerluttulerinermik suliani

eqqartuussutitut aalajangiinernullu, inatsit malillugu tunngavilersorneqartussanut, aamma inuit sakkutuujunngitsut pillugit suliat pineqartillugit, eqqartuussinernut eqqartuussummik inernejartunut, pigisanik agguaanermik sulianut aamma eqqartuussummik naammassitsiniaanermik sulianut malittarisassaq atuuppoq.

Imm. 1-imi nalinginnaasumik aallaavik, tassa kinaluunniit eqqartuussutini aalajangiinernilu, inatsit malillugu tunngavilersorneqartussani allagaatinik takunnissinnaatitaasoq, *imm. 2-p 3-illu* naleqqussarpaat. *Imm. 2-mi* suliat, takussutissiat imaluunniit takussutissiat ilaat allagaatinik takunnissinnaatitaanermi ilanngunneqanngillat. Piviusumik naliliineq malillugu paasissutissat aalajangersimasut ilanngunneqannginnissaat *imm. 3-p* periarfissippaa.

Suliat eqimattakkuutaat marluk *imm. 2, nr. 1-p* aamma *2-p* allagaatinik takunnissinnaatitaanermi ilaatinneqanngillat. Ilaatigut inuit sakkutuujunngitsut pillugit suliat ilaat immikkut ittut, ilaatigullu pinerluttulerinermik suliat ukioq 1 sinnerlugu inaarutaasumik naammassineqarsimasut pineqarput.

Inuit sakkutuujunngitsut pillugit suliat, nammineersinnaassusiagaanernut aamma angajoqqaatut akisussaataasumik isumasiueqqaarluni pisuussutit pillugit aalajangiisinnaanermut, ataataassarsiuinermut, appariilernermut aamma angajoqqaatut oqartussaasuuneq aamma allaffissornikkut aalajangikkamik nammineersinnaajunnaarsitsinerup misilinneqarnera imaluunniit akuersititseqqaarnani qitornavissiannortitsineq (eqqartuussisarnermik inatsimmi kapitali 25-imiit 29 ilanngullugu) suliat tunngassuteqartut pillugit eqqartuussutit aalajangiinerillu, inatsit malillugu tunngavilersorneqartussat, kiisalu angajoqqaatut akisussaasuuneq, meeqqap najugaqarfia imaluunniit katerisimaaqatigiissinnaaneq pillugu eqqartuussummik naammassitsiniaanermik suliat (eqqartuussisarnermik inatsimmi § 631) *nr. 1-imi* ilaatinneqarput. Inuit ataasiakkaat allanit sunissaqaratik pissuserisaannut tunngassuteqarnerat, aamma tamanna pillugu paasissutissat amerlanertigut aamma eqqartuussutini aalajangiinernilu ilaasarnerat, suliat taakku ilanngunneqannginnerannut

tunngavilersuutigineqarpoq. Taakku ilaannut arlalinnut, matut matullugit suliarinninnissaq pinngitsuugassaannigilaq (ataatassarsiuineq, aappariinneq, angajoqqaatut oqartussaassuseqarneq aamma akuersissuteqaqqaarani meeravissiangortitsinerup misilinneqarnera pillugit suliat) suliat mianernartuunerisa aamma ersersippaat.

Eqqartuussisarnermik inatsimmi immikkut ittumik kapitalit taaneqartut malillugit sulianut imaluunniit eqqartuussummik naammassisitsiniaanermik, meeqqap najugaqarfia imaluunniit katerisimaaqatigiissinnaaneq pillugu eqqartuussisarnermik inatsimmi § 631-imi malittarisassaq malillugu sulianut ilaatitsinnginneq atuuppoq. Eqqartuussisarnermik inatsimmi § 598 malillugu pinngitsaaliilluni naammassinninnissaq tunngavissaqaraangat aamma eqqartuussisarnermik inatsimmi § 632, imm. 2 malillugu erniinnaartumik eqqartuussummik naammassisitsiniaasoqarnerani angajoqqaatut oqartussaataaneq pillugu eqqartuussummik naammassisitsiniaanermik suliat ilaatinneqanngillat. § 631 malillugu angajoqqaatut akisussaataaneq pillugu atortitsiniaaneq aamma § 632, imm. 2 malillugu meeqqat najugaqarfissaat pillugit isumaginninnermut ataatsimiititaliap aalajangiineri pillugit atortitsiniaaneq pillugu suliat ilanngussinnginnermi aamma ilaatinneqarput.

Ilanngussinnginneq pigisanik agguaaaneq pillugu sulianut (eqqartuussisarnermik inatsimmi kapitali 24-imit) atuutinngilaq. Eqqartuussutit imaluunniit aalajangiinerit, assersuutigalugu aappariit pigisanik agguaafigineqarnerannut tunngasut akuusut inuit ataasiakkaat allanit sunissaqaratik pissuserisaat pillugit paasissutissanik imaqarpata, kisianni allagaatinik takunnissinnaatitaaneq ataani taaneqartut malillugit imm. 3, nr. 3-p malitsigisaanik killilerneqarsinnaavoq.

Allagaatinik takunnissinnaatitaaneq ilisimatusarnermi ilisimatusarnermut atugassaattut imaluunniit tusagassiutini tusagassiornermut tunngatillugu imaluunniit aaqqissuisut suliaannut atugassatut, aaqqissuisumit aamma sulisunit aaqqissuisuneersunit qinnutigineqanngippat, pinerluttulerinermik sulianut, ukioq ataaseq sinnerlugu inaarutaasumik naammassineqareersimasunut allagaatinik takunnissinnaatitaaneq ilaatinneqanngitsoq, *nr. 2-p* aalajangersarpaa.

Pinerluttulerinermik suliani taamaalilluni allagaatinik takunnissinnaatitaaneq, aallaaviatigut suliap inaarutaasumik naammassineqarnerata kingorna ukiup 1-p qaangiutinnginnerani saqqummiunneqassaaq. Oqaatsit »inaarutaasumik naammassinninneq«-rup, nr. 3-mi aamma atorneqartup, § 101 c, imm. 1-mi oqaaseqatigiit pingajuanni malittarisassatut siunnersuutigineqartumut oqaaseqaatit innersuussutigineqarput.

Ukiutum ataatsimut killiliussa q suliap inaarutaasumik aalajangiiffigineqarneranit naatsorsorneqassaaq, taamaalilluni suliami tassani eqqartuussutit aalajangiinerillu tamarmik

kikkulluunniit allagaatinik takunnissinnaatitaanerat pillugu malittarisassani siunnersuutigineqartuni ilaatinneqassapput imaluunniit ilaatinneqassanngillat.

Tusagassiuutini tusagassiornermut tunngatillugu imaluunniit aaqqissuisut suliaannut atugassatut, aaqqissuisumit aamma sulisunit aaqqissuisuneersunit allagaatinik takunnissinnaatitaaneq qinnutigineqarpat, ukiumut ataatsimut killiliusseq atuutissanngitsoq siunnersuutigineqarpoq.

Tusagassiuutini tusagassiornermut tunngatillugu imaluunniit aaqqissuisut suliaannut atugassanut allagaatinik takunnissinnaatitaaneq pillugu malittarisassaq ima sulisaatsimi atorneqarnissaa naatsorsuutigineqarpoq, tusagassiortut allagaatinik takunnittussaataaneq noqqaassutaat aallaaviatigut eqqartuussivinnit akuerineqassalluni.

Taamaattoq immikkut illuinnartumik pisoqartillugu, allagaatinik takunnissinnaatitaanermit noqqaassut tusagassiuutini tusagassiornermut tunngatillugu imaluunniit aaqqissuisut suliaannut piviusumik atugassaannginnera tunngaviliullugu allagaatinik takunnissinnaatitaaneq itigartinneqarsinnaavoq.

Taanna tunngavigalugu allagaatinik takunnissinnaatitaaneq pillugu noqqaassuteqarnerup itigartinneqarnera, eqqartuussutip imaluunniit aalajangiinerup inatsisinut akerliusumik atorneqarnissaa pissutissaqartumik pasitsaanneqarpat ingammik naleqquttuusinnaavoq. Taamaattoq tusagassiuutit, tusagassiortup sinniisuuffigisaata, pillugit paasissutissat pigineqartut, qinnuteqaammi tunngavigisap erseqqinnerusumik tunngavilerneqarnissaanut pissutissaqalersitsippata, aamma tamatuma kingorna tusagassiuutini tusagassiornermut tunngatillugu imaluunniit aaqqissuisut suliaannut pineqartumut eqqartuussut aalajangiinerluunniit naleqquttusoq tusagassiortup tulluartumik nassuiarsinnaanngippagu, itigartitsineq aammattaaq eqqarsaatigineqarsinnaavoq.

Ilisimatusarnermut atasumik ilisimatusarneq tusagassiuutini tusagassiornermut imaluunniit aaqqissuisut suliaannut siunnersuutip kingunerisaanik sanilliunneqarpoq. Ilisimatusartut ilisimatusarnermut atasumik ilisimatusarnerminnut atugassaminnik pinerluttulerinermik suliani pisoqaanerusuni eqqartuussutinik aalajangiinernillu allagaatinik takunnittussaataaneq pillugu noqqaassutaat, taamaalillutik tusagassiortut tusagassiornermut imaluunniit aaqqissuisut suliannut atugassamik allagaatinik takunnissinnaatitaanermit noqqaassutaat assigalugit akuersissutigineqassapput.

Soorlu tusagassiortut pineqarnerattut, ilisimatusartut allagaatinik takunnissinnaatitaaneq pillugu noqqaassutaat nalinginnaasumik aallaaviatigut akuersissutigineqassapput. Taamaalilluni ilisimatusarnerup naleqassusaa imaluunniit tutsuiginartuunera pillugu eqqartuussivit nalilersuinissaat siunertarineqanngilaq.

Soorlu tusagassiortut assigiinngissinnaasut, taamaattoq aamma ilisimatusartut assigiinngissinnaapput. Taamaalilluni pisortat ilisimatusarfianni imaluunniit sullissivimmi suliffeqarfimmiluunniit namminersortumi akuerisaasumi (anginerusumi), ilisimatusarnermik suliaqartumi sulinera, imaluunniit ilisimatusartooq nammineq allanit sunissaqarani pissusilersorluni sulinera allaanerussutaassaaq.

Suussutsimi siullermi (pisortani imaluunniit sullissivimmi suliffeqarfimmiluunniit namminersortumi akuerisaasumi) ilisimatusartut taamaalillutik sulisaatsimi pinerluttulerinermik suliani pisoqaanerusuni (ataani allanneqartut malillugit allakkut siunnersuutigineqartut killiliussat killiliullugit) tamatigut eqqartuussutini aalajangiinernilu tamatigut allagaatinik takunnissinnaatitaapput.

Ilisimatusartut, taamatut attaveqanngitsut, pisuni amerlasuuni aamma allagaatinik takunnissinnaatitaassapput, kisianni taakku ilisimatusarnermik suliniutiminni suna pineqarnersoq erseqqinnerusumik nassuiartariaqassavaat, taamaalilluni noqqaassutit, ilisimatusarnerit taaneqartut piviusumik allagaatinik takunnissinnaatitaanernut noqqaassutinit allanik siunertaqartunik eqqartuussiviit immikkoortitsinissaminnik periarfissaqarniassammata. Nalornisoqartillugu, Inunnik paasissutissanik suliarinnittarneq pillugu inatsimmi, Kalaallit Nunaannut peqqussutikkut nr. 1238-ikkut, 14. oktober 2016-imeersukku §§ 10 aamma 50 malillugit paasissutissat inummut tunngasut mianerisariaqakkat pillugit Datatilsyn-imit akuersissummik pissarsisoqarsimanersoq aamma nalilersuinermi ilaatinneqarsinnaavoq.

Assersuutigalugu meeqqanik kinguaassiuutitigut atonerluinerit pillugit eqqartuussutit pisoqaanerusut arlallit pillugit allagaatinik takunnissinnaatitaanermik noqqaassut taaneqarsinnaavoq. Qinnuteqartup assersuutigalugu taamanikkut eqqartuusseriaaseq atuuttoq, eqqartuussisarneq pillugu politikki qularpaluttumik isigalugu misissuiffiginiarlugu kissaatigippagu, noqqaassuteqarneq malittarisassatut siunnersuutigineqartoq malillugu akuerineqartariaqarpoq. Qinnuteqartup piviusumik inuit taakkorpiat pineqartut, suliani pineqartuni eqqartuunneqartut, pillugit aarlerisaariniarnera (imaluunniit allakkut tassunga tunngatillugu iliuuseqarniarnera) pissutissaqartumik pasitsaanneqarpat, taava allagaatinik takunnissinnaatitaanerup siunnersuutigineqartup siunertaata avataanut noqqaassut pissaaq, aamma taamaammat noqqaassut itigartinneqassaaq.

Qinnuteqartup sulianut pineqartunut inuttut immikkut ittumik atassuteqannginnera, assersuummi naatsorsuutigineqarmat maluginiarneqassaaq. Allagaatinik takunnissinnaatitaaneq pillugu noqqaassutit, suliamut immikkut ittumik atassuteqarnermik tunngavilersorneqartut, § 101 c-tut siunnersuutigineqartoq malillugu suliarineqassapput.

Takussutissiani aalajangersimasumik suussusilinni, tassa pinerluttulerinermik suliat pillugit aalajangiinerni, allagaatinik takunnissinnaatitaanerup piffissamut tunngasumik killiliiffigineqarneranik imm. 2, nr. 3 ersersitsivoq.

Pinerluttulerinermik suliani, suliaq inaarutaasumik naammassineqarsimatillugu, allagaatinik takunnissinnaatitaaneq aallartinneqassasoq siunnersuutigineqarpoq.

Oqaatsit »inaarutaasumik naammassineqarnera« pillugu paasinnittaaseq, aamma nr. 2-mi atorpeqartoq pillugu § 101 c, imm. 1-mi oqaaseqatigiit pingajuannut oqaaseqaatit innersuussutigineqarput.

Aalajangiinerit, assersuutigalugu pinerluttulerinermik suliap pinerluttoqarsimaneranik paasiniaaffigineqarnerata nalaani aalajangiiffigineqartut, pissutsinut, kingusinnerusukkut suliat assigiinngitsut ataannut suliarineqartussatut immikkoortinneqartunut tunngassuteqarsinnaanerit pisarpoq. Assersuutigalugu inuup nakkutigineqarani inummut allamut nalunaaruteqarsinnaatitaaneranut akuliunneq, oqarasuaatinut arlalinnut assigisaannulluunniit tunngassuteqartoq, pillugu aalajangiineq. Pisuni taamaattuni aatsaat suliat pineqartut tamarmik inaarutaasumik naammassineranni aalajangiineq pillugu allagaatinik takunnissinnaatitaasoqarsinnaavoq.

Nunat tamat akornanni inatsisitigut siunnersorneqarnermi ikiunneq pillugu suliani, nunami allami pillaatissiisoqarnissaanik suliap inaarutaasumik naammassineqarsimanissaa, aalajangiinerni allagaatinik takunnissinnaatitaanermi atuuttoq, nr. 3-p kinguneraa.

Pinerluttulerinermik sulianiani aalajangiinernut allagaatinik takunnissinnaatitaaneq pillugu piffissamut tunngasumik killiliineq, tusagassiutini tusagassiornermut tunngatillugu imaluunniit aaqqissuisut suliaannut atugassatut tusagassiutit allagaatinik takunnissinnaatitaanermik qinnuteqarpata tamanna pisuni immikkut ittuni atuutissanngitsoq siunnersuutigineqarpoq. Aalajangiineq nalunaarutigineqarsimappat, § 101 e-mut nassuiaatit erseqqinnerusut malillugit, eqqartuussisarnermik inatsimmi § 145, imm. 1-imi, 2-mi imaluunniit 4-imi inunnu ilaatinneqartunut pisuni immikkut ittuni aalajangiineq attuuppoq. Suliaq inaarutaasumik naammassineqarsimatinnagu, aalajangiinerit tusagassiutit tusagassiortuinit aaqqissuussinermilu sulisuinit allaanerusunut takuneqarsinnaannginnissaat, aamma siunnersuummi § 101 e, imm. 6-mi oqaaseqatigiit aappaat, aamma tassunga oqaaseqaatit malillugit, tusagassiornermut aaqqissuussinermullu tunngasumik sulianut tapersiissutitut taamaallaat atorpeqarnissaat, kisianni siunnersuutigineqarpoq.

Inimi eqqartuussiviusumi taamaallaat eqqissisimanissaq torersuunissarlu eqqarsaatigalugit matunik matusineq pisimanngippat, eqqartuussinerni matoqqasuni nassuiaanerit *imm. 2, nr. 4-imi* allagaatinik takunnissinnaatitaanermi ilanngunneqanngillat. Malittarisassaq inuit

sakkutuujunngitsut pillugit suliani aamma pinerluttulerinermik suliani atuuppoq, kisianni sulisaatsimi pinerluttulerinermik sulianut pingaaruteqarnerpaassalluni. Ilaatigut eqqunngitsuliorfigineqartoq eqqartuussisarnermik inatsimmi § 115, imm. 1 malillugu matut matuneqarnissaannik noqqaassuteqarsimappat, suliani ilungersunartumik kinguaassiuutitigut pinerluttuliornermut tunngassuteqartuni eqqunngitsuliorfigineqartup nassuiaatai allagaatinik takunnissinnaatitaanermi ilanngunneqanngillat.

Imm. 2, nr. 5-imi suliat assigisaanni, nassuiaatit imaqarniliornissamik inerteqquteqarnermut ilaasut taamatuttaaqaq ilanngunneqanngillat.

Nr. 4 aamma 5 *paasissutissat* aalajangersimasut ilanngunneqannginnerannut eqqaanarsinnaapput, kisianni *takussutissiat ilaannik* minitsinertut paasineqassallutik.

Taamaalilluni taamaallaat nassuiaanerit *issuarneqarnerat* (immuni), eqqartuussinermi matoqqasumi nassuiaatigineqartoq imaluunniit eqqartuussut aalajangernerluunniit pillugu suliap saqqummiunneqarnerani imaqarniliornerup inerteqqutigineqarneranut ilaatinneqartut, allagaatinik takunnissinnaatitaanermi ilanngunneqanngillat. Nassuiaatinut nassuiaatigineqarsimasunut tunngavilersuutip isummernertaa pissutigalugu tamatuma peqatigisaanik nassuiaatit imaannik qanoq annertutigisumik paasissutissanik tunniunneqarsimanera apeqqutaatinnagu, eqqartuussutip aalajangiinerulluunniit tunngavilersuutai (tunngavigisai) tamakkerlutik allagaatinik takunnissinnaatitaanermut ilaatinneqarput.

Piviusumik nalilersuinerup kingorna allagaatinik takunnissinnaatitaanermi *paasissutissat* aalajangersimasut ilanngunneqannginnissaannik *imm. 3* periarfissiivoq. Taama pisoqarpat paasissutissat pineqartut, assilillugu sanaqqiisoqannginnerani paasissutissat pineqartut eqqartuussummit imaluunniit aalajangiinermi ilanngunneqassanngitsut malittarisassami oqaatigineqarpoq, taamaalilluni eqqartuussutip imaluunniit aalajangiinerup sinneranut (naak takussutissiaq allakkut isertuunneqarsinnaagaluortoq, takussutissiamit paasissutissat ilaasa oqartussaasunit ilanngunneqannginnerat, sinneratalu allagaatinik takunnissinnaatitaanermut ilaatinneqalernera) allagaatinik takunnissinnaaneq tunniunneqarluni. Eqqartuussummi imaluunniit aalajangiinermi tamarmi *imm. 3* innersuussutigalugu allagaatinik takunnissinnaatitaaneq itigartissallugu qaqutiginnaq tunngavissaqassaaq.

Tunngaviusumik inuit sakkutuujunngitsut pillugit suliani aamma pinerluttulerinermik suliani *imm. 3* atuuppoq, kisianni nr. 1 aamma 2 nalinginnaasumik pinerluttulerinermik suliani taamaallaat naleqquttuussaaq.

Naalagaaffiup isumannaatsuunissaanut imaluunniit naalagaaffiit takornartat pillugit imaluunniit inuiaat akornanni sullissiviit pillugit qajassuussassat pingaarutillit

illersorneqarnissaannut tamanna pisariaqartinneqarpat allagaatinik takunnissinnaatitaanermik killiliinissaq *nr. 1-p* periarfissippaa.

»Naalagaaffiup isumannaatsuunissaa imaluunniit naalagaaffinnut takornartanut pissutsinik pingaartitsineq imaluunniit tamakkuninnga immikkut ittumik qajassuussineq« pillugu eqqartuussisarnermik inatsimmi § 101-imi malittarisassanut ilaatitsinnginnissaq pillugu malittarisassamut atuuttumut malittarisassaq assinguvoq. Tassunga naleqqiullugu inuiaat akornanni sullissiviit pillugit qajassuussassat taamaattoq ilanngunneqarput.

Naalagaaffiit takornartat pillugit qajassuussinerup saniatigut § 101-imi atuuttumi »tamakkuninnga immikkut ittumik qajassuussineq«-rup ilanngunneqarnissaa pisariaqanngitsutut isigineqarpoq. Oqaatsit taakku eqqartuussisarnermik inatsimmi matut matuneqarnissaat pillugu § 114, imm. 1, nr. 2-mi ilaatinneqarput, taamaaliornerlu nunat tamat akornanni inatsisitigut siunnersorneqarneq pillugu ikiuunneq pillugu suliani, qallunaat eqqartuussisarnermik inatsisaanni § 29, imm. 1 nr. 2-imi aalajangersakkap assigisaa pillugu Folketingstidende 1998-99, ilanngussaq A, qupperneq 2031 malillugu matut matuneqarnissaannut »naalagaaffinnut takornartanut pissutsinik pingaartitsineq« tunngaviliisinnaasutut oqaatigineqarsinnaanngikkaluartuq, naalagaaffiup pineqartup qajassuunneqarnissaa innersuussutigalugu matut matuneqarnissaasa naleqquttuusinnaaneramik, tunngavilersorneqarpoq.

Kisianni pinerluttulerinermik suliani aalajangiinerit, qulaani nr. 3 pillugu allanneqartut malillugit, aatsaat suliaq inaarutaasumik naammassippat allagaatinik takunnissinnaatitaanermut ilaatinneqalissapput. Taaneqareersutut sulianut nunat tamat akornanni inatsisitigut siunnersorneqarnermik ikiuunnermut tunngasunut, nunami allami pillaatissiisoqarnissaanik suliaq inaarutaasumik naammassippat, allagaatinik takunnissinnaatitaaneq aatsaat atuutilissasoq, tamatuma kinguneraa.

Inatsisit unioqqutinneqarnissaat pitsaaliorniarlugit, paasinarsarniarlugit, eqqartuussissutiginiarlugit imaluunniit pillatissiissutiginiarlugit, tamanna pissutsit immikkut illuinnartut pisariaqartissappassuk, *imm. 3, nr. 2* allagaatinik takunnissinnaatitaanerup killilerneqarnissaanik periarfissiivoq. Oqaatsit »pissutsit immikkut illuinnartut« aamma »pisariaqartissappassuk« atonerisigut, oqaaseqatigiinni oqaatsit taakku taamaallaat pisuni immikkorluinnaq ittuni atorneqarsinnaanerisa ersersinneqarnissaat siunertarineqarpoq. Aammattaaq ingammik pingaarnertut maleruagassatut taamaallaat paasissutissat ataasiakkaat, eqqartuussummi aalajangiinermiluunniit takuneqarsinnaasut, allagaatinik takunnissinnaatitaanermi ilanngunneqannginnissaat uani pineqarpoq.

Assersuutitut taaneqarsinnaapput ikiaroorartut pillugit pinerluttuliornernik suliat, tassani oqarasuaatinut taakkununnga sianernikkut imaluunniit najugaqarfinnut taakkununnga saaffiginninnikkut (suli) toqqaannartumik toqqaannanngikkaluartumilluunniit inunnik

ikiaroorartunik tuniniaasunik attaveqarnissaq aarlerinaateqarpat, oqarasuaatit normui imaluunniit najugaq pillugu paasissutissat, eqqartuussummi aalajangiinermiluunniit takuneqarsinnaallutik, allagaatinik takunnissinnaatitaanermi ilanngunneqannginnissaat pisariaqartinneqarluni.

Ilisimannittut illersorneqarnissaannut qajassuussassat eqqarsaatigalugit pisuni qaqutigoortorujussuarni paasissutissanik ilanngussinnginneq aammattaaq atorneqarsinnaassaaq.

Ilisimannittup najugaa atialuunniit, atorfia aamma najugaa, eqqartuussisarnermik inatsimmi § 458, imm. 2 (inatsisissatut siunnersuummi § 1, nr. 39-itut oqaasertaliorneqartoq) malillugu unnerluunneqartumut isertuunneqarpat, ilisimannittup najugaa atialuunniit, atorfia najugaalu eqqartuussummi ilaatinneqanngilluinnassammata maluginiarneqassaaq.

Inuk allagaatinik takunnissinnaatitaanermik qinnuteqartoq, eqqartuussut aalajangiinerluunniit eqqarsaatigalugit, assersuutigalugu eqqartuussisarnermik inatsimmi § 485 a-tut (inatsisissatut siunnersuummi § 1, nr. *-itut) malittarisassatut siunnersuutigineqartumut akerliusumik kinaassutsit isertuunnagit saqqummiunneqarnerisigut inatsisinut akerliusumik iliuseqarnissaa pissutissaqartumik pasitsaanneqarpat, pissutsit malillugit ilanngussinnginneq atorneqarsinnaavoq.

Inuit ataasiakkat allanit sunissaqaratik pissuserisaat pillugit paasissutissanik imaluunniit suliffeqarfiup inuussutissarsiornermini isertugaatai pillugit paasissutissanik eqqartuussut aalajangiinerluunniit imaqarpat, aamma kinaassutsit isertuunneqarnerat naammangippat, piviusumik naliliinerup kingorna, allagaatinik takunnissinnaatitaanerup killerneqarnissaanik *imm. 3, nr. 3* periarfissiivoq. Malittarisassaq inuit sakkutuujunngitsut pillugit sulianut aamma pinerluttulerinermik sulianut atuuppoq.

»Inuit ataasiakkaat allanit sunissaqaratik pissuserisaat«-nni oqaatsit imarisaat inatsisiliornermi arlalinni atorneqarpoq, matumani ingerlatsinermi oqartussaasup oqartussaasumut allamut paasissutissanik ingerlatitseqqinneralu pillugu pisortat ingerlatsinerat pillugu inatsimmi § 28, imm. 1 ilanngullugu. Inuit ataasiakkaat allanit sunissaqaratik pissuserisaanni ingammik naggueqatigiit ilaaffigisat, upperisaaq aamma ammip qalipaataa, politikkikkut, peqatigiiffilerinikkut, kinguaassiuutitigut pinerlunermullu pissutsit tunngassuteqartut, peqqissutsimut, inooqatigiinni ajornartorsiutit annertuut aamma aannajaarniutinik assigisaannillu atornearluisuuneq pillugit paasissutissat ilaatinneqarput. Pissutsit assigiinngitsut malillugit inuit ataasiakkaat allanit sunissaqaratik pissuserisaannut aamma namminneq ilaqutaanni pissutsit pillugit paasissutissat ilaapput, matumani ilaqutariinni aqqiagiinnginnerit, perorsaanermi periaatsit aamma qitornavissartaarneq, aamma ajunaarnerit ilanngullugit. Inuit ataasiakkaat allanit sunissaqaratik pissuserisaanni

kisianni assersuutigalugu aningaasaqarnermi pissutsit, sulinermi- atorfinitsinneqarnermilu pissutsit, ilinniarsimaneq pillugu pissutsit imaluunniit ineqarnermi pissutsit ilaatinneqanngillat.

Assersuutigalugu politikikkut partiimi qineqqusaarnermut imaluunniit upperisarsiortut peqatigiiffiilluunniit sinnerlugit oqaaseqartartuunermet atatillugu, pineqartup nammineerluni paasissutissaq tamanut ilisimatitsissutigisimappagu, inuit ataasiakkaat allanit sunissaqaratik pissuserisaat pillugit paasissutissat isertuussaangillat. Inuit ataasiakkaat allanit sunissaqaratik pissuserisaat pillugit paasissutissat, paasissutissat nalinginnaasumik ilisimaneqarpata, assersuutigalugu tusagassiutini annertuumik eqqartorneqarsimanerisa malitsigisaannik, isertuussaangillat.

Pisortat ingerlatsinerat pillugu inatsit peqqussutikkut nr. 1188-ikkut 27. december 1994-imeersukkut Kalaallit Nunaannut atuutilersinneqarmat maluginiarneqassaaq.

»Suliffeqarfiup inuussutissarsiordermini isertugaatai« pillugit oqaatsit imarisaat ilaatigut eqqartuussisarnermik inatsimmi matunik matusineq pillugu § 114, imm. 1, nr. 3-mi atorneqarpoq.

Eqqartuussut imaluunniit aalajangiineq inuit ataasiakkaat allanit sunissaqaratik pissuserisaat pillugit imaluunniit suliffeqarfiup inuussutissarsiordermini isertugaatai pillugit paasissutissanik imaqarpat, *aamma* inuit ataasiakkaat imaluunniit suliffeqarfiit pineqartut pillugit pingaarutilimmik qajassuussinissamut naleqqiullugu tamat eqqartuussinernik paasisimasaqassusaat aammattaaq tunulliunneqartariaqartutut isumaqarfigineqarpat, allagaatinik takunnissinnaatitaaneq killilerneqarsinnaanngorlugu imm. 3, nr. 3 ilusiligaavoq.

Eqqartuussut imaluunniit aalajangiineq inuit ataasiakkaat allanit sunissaqaratik pissuserisaat pillugit imaluunniit suliffeqarfiit inuussutissarsiordermini isertugaataat pillugit paasissutissanik imaqarpat, taamaalilluni allagaatinik takunnissinnaatitaaneq siunnersuut malillugu automatiskimik killilerneqarsinnaanngilaq, kisianni pineqartunut pingaarutilimmik qajassuutassanut naleqqiullugu tamat eqqartuussut imaluunniit aalajangiineq pillugu paasisimasaqassusaat piviusumik tunulliunneqassanersoq pillugu naliliisoqassaaq. *Kina* pillugu, inuit ataasiakkaat allanit sunissaqaratik pissuserisaat imaluunniit inuussutissarsiorderni isertugaatinut eqqartuussut aalajangiinerluunniit tunngassuteqarnersoq (pasineqartoq/unnerluunneqartoq, eqqunngitsuliorfigineqartoq, inuit sakkutuujunngitsut pillugit suliani akuusut, ilisimannittut allallu), *aamma* inuit ataasiakkaat allanit sunissaqaratik pissuserisaat imaluunniit inuussutissarsiorderni isertugaatit *suut* pineqarnerisut, naliliinermi tassani ilaatinneqassapput. Aammattaaq suliaq tamanut immikkut ittumik soqutigisaanersoq pillugu apeqqut, naliliinermi ilaatinneqarsinnaavoq.

Inuit ataasiakkaat allanit sunissaqaratik pissuserisaat pillugit ilaatitsinnginneq taamaallaat inunnut atuutsinneqarpoq, akerlianilli inuussutissarsiornermi isertugaatit pillugit ilaatitsinnginneq aamma inatsisitigut pisinnaatitaasunut pisussaataasunullu atuulluni.

Takussutissiat, inuit ataasiakkaat allanit sunissaqaratik pissuserisaat pillugit paasissutissanik imallit imaluunniit suliffeqarfiit inuussutissarsiornerminni isertugaataat pillugit imallit aamma kinguaassiuutitigut pinerluttuliornermi eqqunngitsuliorfigineqartut qajassuunneqarnissaat pillugit kinaassutsinik isertuussineq aamma pinerluttulerinermik suliani eqqartuussisooqataasut qajassuunneqarnissaat pillugit § 101 d, imm. 4 malittarisassatut siunnersuutigineqartumut naleqqiullugu imm. 3, nr. 3 pingaannginneruvoq. Inuit ataasiakkaat pineqartut imaluunniit suliffeqarfiit namminersortut, kisianni paasissutissat imminni takussutissiamiitinneqarnerat kinaassusaat erseqqarinngitsunngortinneqarnerannik kinaassutsinik isertuussineq isumaqarpoq. Taamaammatt imm. 3, nr. 3-p malitsigisaanik paasissutissanik ilaatitsinnginnermut naleqqiullugu kinaassutsit isertuunneqarnerat tamanut ammasuunissamut annertunnginnerusumik annikilliliineruvoq. Tamanna tunngavigalugu siunnersuut ima ilusilersorneqarpoq, inunnik pineqartunik imaluunniit suliffeqarfinnik namminersortunik qajassuussineq, kinaassutsinik isertuussinikkut suliarineqarsinnaangippat, nr. 3 taamaallaat atorineqassalluni.

Naak kinaassutsinik isertuussisooqaraluartoq, pineqartut amerlasuuniit ilisarineqarnissaat aarlerinaateqarpat, kinaassutsinik isertuussineq ingammik naammangissinnaavoq.

Ilisarineqarsinnaanerup aarlerinaateqarnera apeqqutaatinnagu, pissutsit unnerluussutigineqartut pineqartillugit taamaattoq imm. 3, nr. 3 pinerluttulerinermik suliani atorineqassanngilaq, tassami pinerluttulerinermik suliani eqqartuussutini aalajangiinernilu allagaatinik takunnissinnaatitaaneq isumaqarunnaarsissammagu. Tassunga taarsiullugu kinaassutsit isertuunneqarnerannik suliarinnineq eqqarsaatigalugu, § 101 d, imm. 4-mut oqaaseqaatit innersuussutigineqarput.

Unnerluunneqartumut siusinnerusukkut eqqaartuussinermi aalajangiinerit pillugit paasissutissanut imm. 3, nr. 3 qaqutigunnaq atorineqarsinnaasussaavoq. Eqqaartuussutit aalajangiinerillu nalinginnaasumik taamaallaat siusinnerusukkut eqqaartuussinermi aalajangiinerit pillugit paasissutissanik suliamut pingaaruteqartunik ilaatitsisarmata, aamma paasissutissanik taakkuninnga ilisimasaqarneq aalajangiinerup paasinissaanut pingaarutilimmik kinguneqarsinnaammatt, taamaattoq unnerluunneqartoq pisuutinneqarpat, taakku aallaaviatigut allagaatinik takunnissinnaatitaanermi ilanngunneqassanngillat. Unnerluunneqartoq pisuutinneqanngippat, taamaattoq unnerluunneqartumut siusinnerusukkut eqqaartuussinermi aalajangiinerit pillugit paasissutissaqarpat, paasissutissat taakku allagaatinik takunnissinnaatitaanermi ilanngunneqassanngillat.

Kinaassutsit isertuunneqanngippata, pinerluttuliornerit pillugit paasissutissat, unnerluussutigineqartunut tunngassuteqanngitsut imaluunniit unnerluunneqartumut siusinnerusukkut eqqaartuussinermi aalajangiinerit, nalinginnaasumik nr. 3-p malitsigisaanik allagaatinik takunnissinnaatitaanermi ilanngunneqassanngillat. Tassunga atatillugu aamma ilisimannittut unnerluussaanerlutik imaluunniit siusinnerusukkut pillarneqarsimanerlutik pillugu apeqqummut akissutaat, eqqartuussisarnermik inatsimmi § 157, imm. 1-imi oqaaseqatigiit aappaat aamma pingajuat malillugit tamanut ammasumik eqqartuussinermi tusarnaartunut nalunaarutigineqassanngillat.

Kinaassutsinik isertuussisoqanngippat, kinguaassiuutitigut pissutsit pillugit paasissutissat, inuup pineqartup nammineerluni tamanut ilisimatitsissutigisimanngisai, nalinginnaasumik nr. 3-p malitsigisaanik allagaatinik takunnissinnaatitaanermi ilanngunneqassanngillat. Tamanna ingammik kinguaassiuutitigut peqqusiileqititsineq pillugu inuit sakkutuujunngitsut pillugit suliani naleqquttuusinnaavoq, tassami imm. 2, nr. 1-ip malitsigisaanik ataatassarsiuinerimik aappariinnerlu pillugit suliat, eqqartuussutini aalajangiinernilu kikkulluunniit allagaatinik takunnissinnaatitaanerisa avataaniimmata, aamma eqqartuussisarnermik inatsimmi § 101 d, imm. 4-imi oqaaseqatigiit pingajuattut siunnersuutigineqartoq malillugu kinguaassiuutitigut pinerluttuliornerit pillugit pinerluttulerinermik suliani eqqunngitsuliorfigineqartup qajassuunneqarnera pissutigalugu pinngitsuugassaannngitsumik kinaassutsit isertuunneqartussaammata.

Kinaassutsinik isertuussisoqanngippat, atorerluisuunermik ajornartorsiuteqarneq pillugu paasissutissat pineqartillugit, aamma imm. 3, nr. 3-p malitsigisaanik allagaatinik takunnissinnaatitaanerup killilerneqarneqarnissaa amerlanertigut pissutissaqartinneqassaaq. Atorerluinermik ajornartorsiuteqarneq pillugu paasissutissat suliamut pingaaruteqanngitsut pineqartillugit, paasissutissanik ilanngussinnginneq taamaalilluni nalinginnaasumik tamatigut atorneqartariaqarpoq. Suliani amerlasuuni, assersuutigalugu aalakoorkuni biilersimaneq pillugu pinerluttuliornerimik suliat ilaanni, atorerluisuunermik ajornartorsiuteqarneq pillugu paasissutissat annertuumik pingaaruteqassapput, aamma pineqartumut qajassuussineq aamma tamat eqqartuussinermik suliani paasisimasaqarnissaat pillugu qajassuussineq, uani paasissutissat ilaatinneqarnerinik kinguneqarsinnaavoq.

Peqqissuseq imaluunniit inooqatigiinni ajornartorsiutit pingaarutillit pillugit paasissutissat imm. 3-p malitsigisaanik allagaatinik takunnissinnaatitaanermi ilanngunneqannginnissaat pissutissaqarnerisooq, piviusorsiornerusumik naliliinikkut aalajangerneqassaaq. Tassunga taarsiullugu kinaassutsimik isertuussinissamik suliaqarneq eqqarsaatigalugu, § 101 d, imm. 4-mut oqaaseqaatit innersuussutigineqarput.

Naggueqatigiit ilaaffigisat, upperisaq aamma ammip qalipaataa aamma politikikkut peqatigiiffilerinermullu tunngassuteqartut pissutsit pillugit paasissutissat, suliamut pingaaruteqartut, nr. 3-p malitsigisaanik nalinginnaasumik allagaatinik takunnissinnaatitaanermi ilaatinneqassapput. Tassunga taarsiullugu kinaassutsimik isertuussinissamik suliaqarneq eqqarsaatigalugu, § 101 d, imm. 4-mut oqaaseqaatit innersuussutigineqarput.

Paasissutissat tamanut saqqummiunneqarneri suliffeqarfimmut annertuumik ajoqusiinermik sunniuteqarsinnaanerat, suliffeqarfiit inuussutissarsiornerminni isertugaataat pillugit paasissutissat pillugit ilangussinnginnermik atuinermi piumasaqaataavoq. Inuussutissarsiornermi isertugaatit pillugit nassuiaanerit, matut matoqqaneranni nassuiaatigineqartut, issuarneqarneri taamaattoq imm. 2, nr. 4-p malitsigisaanik pisuni tamani ilaatinneqarneq ajorput.

Tamanut saqqummiussinermi ajoqutitut sunniutit saniatigut, inuussutissarsiornermi isertugaatit qanoq ittuussusaat tamat eqqartuusinerik paasisimasaqarnerannut naleqqiullugu naliliinermi tassani suliarineqartussami, aamma ilaatinneqarsinnaapput. Assersuutigalugu paasissutissanut, suliffeqarfimmi peqqissutsimut imaluunniit avatangiisinut ajornartorsiuteqarnernut tunngassuteqartunut imaluunniit taassuma tunisassiaanut, suliamut pingaaruteqartunut pillugit paasissutissanut naleqqiullugu kaaviiartitat pillugit kisitsisit, ineriartortitsinermut pilersaarutit il.il. pillugit paasissutissat taamaalillutik ilaatinneqannginnissaat qaninneruvoq.

Inuussutissarsiornermi isertugaatit pillugit paasissutissat, eqqartuussummi allagaatinik takunnissinnaatitaanermik qinnuteqartoqarnerani ilaatinneqartariaqanngitsut, suliap aalajangiiffigineqarneranut atatillugu akuusut eqqartuussivimmut tamanna pillugu malugititsinissaminnut periarfissaqareerput.

Pisuni nalornisoqartillugu, § 101 d, imm. 2 siunnersuutigineqartumut oqaaseqaatit malillugit, eqqartuussivik aalajangiisinnagu, tamat eqqartuussinernik paasisimasaqarnissaannut qajassuussineq imaluunniit pineqartunut qajassuussineq piviusumik aalajangiisuunissaa pillugu pinngitsoornani pissusissamisussaaq pineqartunit oqaaseqaat pissarsiareqqaarneqarpat.

Oqartussaasut namminersorlutik inuussutissarsiorlut assigalugit inuussutissarsiummik ingerlatsippata, suliffeqarfiit isertugaataat pillugit paasissutissat ilaatinneqannginnissaat, taamaallaat pisortani oqartussaasunut atorneqarsinnaavoq.

§ 101 b-tut siunnersuutigineqartup allagaatinik takunnissinnaatitaaneq *assilillugu sanaqqiinertut* ilusilik malittarisassiuppaa, matumani takussutissiaq elektroniskiusumik

eqqartuussivimmi pigineqarpat, elektroniskiusumik ilusilerlugu. Kisianni noqqaassuteqarnikkut, tamanna naleqquttuussappat, allagaatinik takunnissinnaatitaaneq assilillugu sanaqqiinnermit qinigassatut allatut allagaatit *misissorneqarnerattut* ilusilik, tunniunneqarsinnaavoq.

Allagaatinik takunnissinnaatitaanermik noqqaasuutit suliarineqartarnerini periaatsit eqqarsaatigalugit, § 101 d-tut siunnersuutigineqartoq aamma tassunga oqaaseqaatit innersuussutigineqarput.

Aammattaaq inatsisissatut siunnersuummi oqaaseqaatini nalinginnaasuni imm. 2.1.2 innersuussutigineqarpoq.

§ 101 c-mut

Pisuni, §§ 101 a-mit aamma 101 b-mit malittarisassiuunneqanngitsuni, akuusunit allaanerusut allagaatinik takunnissinnaatitaanerat aalajangersakkami pineqarpoq. Eqqartuussisarnermik inatsimmi § 101-imi malittarisassat atuuttut nutarterneqarnerannik aalajangersagaq ersersitsisuuvoq, aamma pinerluttulerinermik suliat pineqartillugit tamatuma peqatigisaanik, politiini unnerluussisussaataasunilu allagaatinik takunnissinnaatitaaneq pillugu malittarisassat eqqartuussisarnermik inatsimmi katersorneqarnerannik ersersitsisuulluni. Inatsisissatut siunnersuummi § 2 malillugu, pisortat ingerlatsinerat pillugu inatsimmi § 18 siunissami taamaallaat pinerluttulerinermik sulianut, oqartussaasut allaffeqarfiini allani, politiinit allaanersuni, suliarineqartunut atuunnissaa, tamatuma kinguneraa

Qinnuteqartup taakkununga immikkut ittumik soqutigisaqarnini qularnarunnaarsippagu, matumani eqqartuussineq ingerlasoq siunertaralugu, siullerpaamik takussutissiat takuneqarsinnaanissaat aalajangersakkap siunertaraa. Inuit sakkutuujunngitsut pillugit suliami ingerlasumi akuusoq aamma eqqartuussisarnermik inatsimmi § 184 malillugu tunniussisussaataanermik peqqussuteqarnissap noqqaassutiginnissaa periarfissarivaa. Naak pisumi tassani § 101 c-p aamma § 184-p akornanni ilaatigut qaleriittoqaraluartoq, aalajangersakkani taakkunani piumasaqaatit takuneqarsinnaasut aallaavigalugit, aalajangersakkat taakku imminnut attaveqartinnagit aalajangiinerit aalajangiiffigineqassapput.

§ 101 c-tut siunnersuutigineqartoq takussutissianut, §§ 101 a-mit aamma 101 b-mit (eqqartuussutit aalajangiinerillu, inatsit malillugu tunngavilersorneqartussaasut) allagaatinik takunnissinnaatitaanernut allaanerusumik suussuseqartunut siullertut atuuppoq. Taamaalilluni ilaatigut eqqartuussisut allattaaviinut allatanut allanut, eqqartuussinissamut piareersaataasumik inatsisitigut allakkianut, unnerluussutinut, politiit nalunaarusiaannut

aamma, ataani erseqqinnerusumik allaaserinninneq malillugu, takussutissianut uppersaasatit atorneqartunut aalajangersagaq atuuppoq.

Tulliullugu takussutissiat suussusaannut, §§ 101 a-tut aamma 101 b-tut siunnersuutigineqartunut *ilaatinneqartunut*, kisianni suliaq imaluunniit takussutissiaq malittarisassat taakku malillugit piviusumik tamakkiisumik ilaannakoortumilluunniit allagaatinik takunnissinnaatitaanermi, ilanngussinnginnissamut siunnersuutigineqartut arlaata atorneqarnera pissutigalugu ilaatinneqarsimangitsunut, aalajangersagaq atuuppoq. Sulianut ilaatinneqanngitsut assersuutissat taaneqarsinnaapput pinerluttulerinermik suliat, ukioq 1 sinnerlugu inaarutaasumik naammassineqareersimasut, aamma aappariinneq aamma angajoqqaatut oqartussaasuuneq pillugu suliat. Takussutissiat tamakkiisumik ilaannakoortumilluunniit ilaatinneqarsimangitsut assersuutit taaneqarsinnaavoq nassuiaanerup issuarneqarnera, matut matullugit nassuiaataasimasoq, aamma inuit ataasiakkaat allanit sunissaqaratik pissuserisaat imaluunniit suliffeqarfiit inuussutissarsiornerminni isertugaataat pillugit paasissutissat.

Inuup allagaatinik takunnissinnaatitaanermik qinnuteqartup, allagaatinik takunnissinnaatitaaneq pillugu immikkut ittumik soqutigisaqarnini qularnarunnaarsinnaappagu, §§ 101 a-tut aamma 101 b-tut malittarisassat siunnersuutigineqartut malillugit allagaatinik takunnissinnaatitaanermik itigartitsineq, taamaalilluni § 101 c-itut siunnersuutigineqartoq malillugu allagaatinik takunnissinnaatitaaneq pillugu noqqaassuteqarnermik malitseqarsinnaavoq, tassani qinnuteqartup allagaatinik takunnissinnaatitaanermi soqutigisai naliliinermi ilaatinneqassallutik. Kisianni tamat eqqartuussutini il.il. allagaatinik takunnissinnaatitaanerisa , §§ 101 a-tut aamma 101 b-tut siunnersuutigineqartukkut ersersinneqartut, annertuumik annertusineqarneranni, § 101 c-tut siunnersuutigineqartoq malillugu allagaatinik takunnissinnaatitaaneq, § 101 atuuttoq malillugu allagaatinik takunnissinnaatitaanermut naleqqiullugu annikinnerujussuarmik pingaaruteqassaaq.

§ 101 c-tut siunnersuutigineqartumi eqqartuussivinni eqqartuussisussaasutut oqartussaasut ataanni suliat tamarmik ilaatinneqarput, inuit sakkutuujunngitsut pillugit suliaallutik aamma pinerluttulerinermik suliaallutik, aamma inuit sakkutuujunngitsut pillugit suliani suliat nalinginnaasut aamma inuit sakkutuujunngitsut pillugit suliat immikkut ittut kiisalu eqqartuussummik naammassisitsiniaanermik- pigisallu agguanneqarnerinik suliat tassaniipput. Aammattaaq pinerluttulerinermik suliat, politiinit unnerluussisussaataasunillu suliarineqartut aalajangersakkami ilaatinneqarput, kisianni pinerluttulerinermik suliat, oqartussaasut allaffeqarfiinit allanit suliarineqartut ilaatinneqanngillat.

Takussutissiat, eqqartuussivinnit allaffissornermik suliaqarnermut atatillugu tiguneqartut imaluunniit pilersinneqartut, aalajangersakkami ilaatinneqanngillat.

Inuit kikkut allagaatinik takunnissinnaatitaanersut, aamma takussutissiat sorliit allagaatinik takunnissinnaatitaanermi ilaatinneqarnerisut *imm. 1-imi* taaneqarput. Inunnut, *oqaaseqatigiit siulliit* malillugit inatsimmi malittarisassaq pillugu apeqqutip piviusup erseqqissaavigineqarnissaa siunertaralugu takussutissiamik takunninnissamik pisariaqartitsisut, aamma pinerluttulerinermik suliami eqqunngitsuliorfigineqartunut imaluunniit, eqqunngitsuliorfigineqartoq toqusimappat, *oqaaseqatigiit aappaat* malillugu eqqunngitsuliorfigineqartup qanigisaanut allagaatinik takunnissinnaatitaasoqassasooq siunnersuutigineqarpoq.

Aalajangiinermut tunngavimmut »inatsisitigut tamatumani soqutigisaqartut«-nut, § 101-imi atuuttumi atorineqartumi, *imm. 1-imi oqaaseqatigiit siulliit* erseqqissaanerupput. Qinnuteqartup allagaatinik takunnissinnaatitaanermik soqutiginninnerata naliliiffineqarnera suliamut tamarmiusumut naleqqiunnagu, takussutissianut ataasiakkaanut naleqqiullugu suliarineqassasooq, tassunga ataatillugu maluginiarneqassasooq.

Pinerluttulerinermik suliani eqqunngitsuliorfigineqartunut imaluunniit, eqqunngitsuliorfigineqartoq toqusimappat, eqqunngitsuliorfigineqartup qanigisaanut allagaatinik takunnissinnaatitaaneq pillugu *imm. 1-imi oqaaseqatigiit aappaat* allagaatinik takunnissinnaatitaanerup ilaatigut annertusineqarneranut ersersitsisuuvoq, tassami ullumikkut sulisaatsimi taamaallaat – aalajangiinermut tunngaviup »inatsisitigut tamatumani soqutigisaqarneq« pillugu atituumik nassuiaaneq pissutigalugu – inatsimmi malittarisassaq pillugu apeqqutip piviusup erseqqissaavigineqarnissaa siunertaralugu takussutissiamik takunnissinnaanermiit allaanerumik siunertamut allamut allagaatinik takunnissinnaatitaaneq kingunerimmagu. Siunissami oqaaseqatigiit aappaannut ilaatinneqartussaasut pisumut assersuutitut taaneqarsinnaavoq qallunaat assingusumik aalajangersagaataat siusinnerusukkut atuuttoq pillugu Eqqartuussiviit qullersaata aalajangiinera Ugeskrift for Retsvæsen 1998, qupperneq 880-imi issuarneqartoq, tassani angut ataatami anaanaminik toqutsinera pillugu pillaatissiisoqarnissaanik suliami allagaatinik takunnissinnaatitaavoq.

Oqaaseqatigiit aappaataa siullerpaamik pinerluttulerinermik suliani eqqunngitsuliorfigineqartut ilaatippai. Eqqunngitsuliorfigineqartoq toqusimappat, oqaaseqatigiit aappaata qanigisat ilaatippai. Aapparisaq, inooqatigisaq, meeqqat aamma angajoqqaat nalinginnaasumik qanigisatut isigineqassapput. Pissutsit assigiinngitsut malillugit, pineqartup eqqunngitsuliorfigineqartullu akornanni taamatut immikkut ittumik atassuteqartoqarsimappat, toqusoqarnerata malitsigisaanik assigisaanik immikkut ittumik misigissutsikkut artorsartinneqarneq pineqartoq isumaqarfigineqarpat, aamma allat

qanigisatut isigineqarsinnaassaapput. Assersuutigalugu qatanngutigiiit, inersimasutut ukiorpassuarni eqqunngitsuliorfigineqartumik najugaqateqarsimasut illumilu pissarsianik atueqateqarsimasut tassani pineqarsinnaapput.

Inatsimmi malittarisassaq pillugu apeqqutip piviusup erseqqissaavigineqarnissaa siunertaralugu allagaatinik takunnissinnaatitaanermik qinnuteqartoqarnissaa, inuup allagaatinik takunnissinnaatitaanermik qinnuteqartup, inuttut ataasiakkaatut, pingaarutilimmik soqutigisaqarfiginninnissaa, imaluunniit inuk allagaatinik takunnissinnaatitaanermik qinnuteqartoq, eqqunngitsuliorfigineqarsimasuusoq imaluunniit suliami allagaatinik takunnissinnaatitaanermik qinnuteqarfigineqartumi eqqunngitsuliorfigineqartumut qanigisaassasoq, aalajangersagaq siunnersuutigineqartoq malillugu allagaatinik takunnittussaataitaanermi piumasaqaataavoq.

Taamaalilluni inatsiseqartitsinermi pissutsit erseqqissaavigineqarnissaannut imaluunniit suliami piviusumi nalinginnaasumik soqutiginninneq aallaavigalugu allagaatinik takunnissinnaatitaanermik qinnuteqarneq, aalajangersakkami ilaatinneqanngillat. Allagaatinik takunnissinnaatitaanermik noqqaassutit, assersuutigalugu tusagassiuutini tusagassiornermut tunngatillugu imaluunniit ilisimatusarnermi siunertanut taamaallaat ilapittuutaasut, taamaalillutik aalajangersakkap avataaniipput. Noqqaassutit taamaattut, tusagassiuutinit allagaatinik takunnissinnaatitaaneq pillugu § 101 e-mi immikkut ittumik malittarisassaq imaluunniit Oqartussaasut, naak taamaaliortussaannngikkaluarlutik, nipangiussisusaataaneq akornutaatinagu, paasisutissanik tunniussisinaanerat pillugu § 101 f-imi malittarisassatut siunnersuutigineqartoq malillugu, kikkunnet tamanut eqqartuussutini aalajangiinernilu allagaatinik takunnissinnaatitaaneq pillugu malittarisassatut § 101 b-tut siunnersuutigineqartoq (tusagassiuutini tusagassiornermut tunngatillugu imaluunniit ilisimatusarnermut siunertat 101 b, imm. 2, nr. 2-mut siunnersuut tassungalu oqaaseqaatit malillugit) malillugu saqqummiunneqarsinnaapput.

Soorlu § 101 atuuttoq malillugu suliaq pillugu *eqqartuussisut allattaavianni* allanneqartut allagaatinik takunnissinnaatitaanermi ilaatinneqarput. Eqqartuussisut allattaaviat eqqartuussisut allattaaviattut, eqqartuussivimmi eqqartuussutit nalunaarsuiffiattut, eqqartuussummik naammassisitsiniaasartup allattaaviattut, akitsorterussinermi allattaavittut imaluunniit pigisat agguanneqarnerannut allattaavittut taaneqaraluarpata, tamanna atuuppoq.

Eqqartuussisut allattaaviinit allaanerusunut, oqaatsit »uppernarsaatitut allakkiat saqqummiunneqarsimasut allat, eqqartuussivimmiittut« massakut § 101-imi atuuttumi atorineqartoq, oqaatsinik »takussutissiat, suliamut tunngassuteqartut«-mik takussutissiat suliffeqarfiup iluani suliarineqartut ilaatinneqannginnerannik ilallugu, taarserneqarnissaa siunnersuutigineqarpoq.

Eqqartuussiviit, politiit unnerluussisussaataasullu atortussiaataat pineqartillugit, pinerluttulerinermik suliani allagaatinik takunnissinnaatitaaneq pillugu malittarisassat eqqartuussisarnermik inatsimmi katersorneqarnissaat siunnersuutip kinguneraa. Naalagaaffimmi oqartussaasoq imaluunniit namminersorlutik oqartussani oqartussaasoq pineqarnersoq apeqqutaatillugu, pinerluttulerinermik suliat politiinit allaanerusunit oqartussaasut allaffeqarfiinit allanit suliarineqartut suli pisortat ingerlatsinerat pillugu inatsimmi § 18-imi (inatsisissatut siunnersuummi § 2, nr. 1-imi oqaasertalerneqartut) imaluunniit Pisortat ingerlatsineranni suliassat suliarineqartarnerat pillugu Inatsisartut inatsisaanni § 18-imi suli ilaatinneqartassapput.

Oqartussaasunit allanit politiijunngitsunit suliat allaffissornikkut akileeqqusissutinik tunngassuteqartut sulisaatsimi ingammik pineqarput. Pinerluttulerinermik suliaq oqartussaasut allaffeqarfiannit allamit suliarineqareernermi kingorna politiinit suliarineqarpat, oqartussaasut allaffeqarfiannit allamit atortussat politiit tigusimasaannut allagaatinik takunnissinnaatitaaneq pillugu § 101 c-mi malittarisassatut siunnersuutigineqartut aamma atuupput.

Takussutissiaq suliap suliarineqarneranut pingaaruteqarpat, takussutissiaq suliamut tunngassuteqarpoq. Inuit sakkutuujunngitsut pillugit suliat pineqartillugit, sassaqqusissut aamma eqqartuussisutigoortitsinermi allagaatit allat, suliaq pillugu eqqartuussivimmik allaffigeqatiginninnerit aamma takussutissiat, uppersaasatit atorneqartut, assersuutit taaneqarsinnaapput. Pinerluttulerinermik suliat pineqartillugit politiit nalunaarusiaat (eqqartuussisarnermik inatsimmi § 339 malillugu), allagaq unnerluussut imaluunniit eqqartuussinissamik piomasaaq aamma takussutissiat, uppersaasatit atorneqarsimasut assersuutit taaneqarsinnaapput.

Pinerluttulerinermik suliami, takussutissiat eqqartuussivimmi suliamut ilanngunneqartut, aamma takussutissiat, (taamaallaat) politiit suliaanni ilanngunneqarsimasut, ilaatinneqarput. Takussutissiaq suliamut pineqartumut tunngassuteqarpat, taanna, naak unnerluussisussaataasut isumaat malillugu unnerluussut pillugu apeqqummut imaluunniit suliap eqqartuussivimmi aalajangiiffigineqarnerani pingaaruteqanngitsutut ersersinneqarsimagaluartoq, taamaalilluni allagaatinik takunnissinnaatitaaneq pillugu siunnersuummut ilaavoq.

Oqaaseq »takussutissiat« paasitinneqarsinnaatitaaneq pillugu inatsit malillugu takussutissiamut oqaatsip imarisaatut atitutigisumik paasineqassaaq. Takussutissiat piviusut saniatigut, taakku pappiaqqatut takussutissiaappata imaluunniit elektroniskiusumik takussutissiaappata, taamaalillutik titartakkat, nunap assingi, assit aamma nipinik- assinillu immiussinerit ilaatinneqarput.

Inuit sakkutuujunngitsut pillugit suliani, suliap ingerlanerani, aamma suliap naammassineqareernerani allagaatinik takunnissinnaatitaaneq atuuppoq. Suliani naammassineqareersuni, takussutissiap eqqartuussiviup allagaataasiviani toqqorneqarsimanissaa allagaatinik takunnissinnaatitaanermut piumasaqaataavoq. Takussutissiat eqqartuussiviup allagaataasiviani toqqorneqarsimanerat, tassunga atatillugu, taakku toqqorsinermut- aamma allagaataasivimmut inissiinermut systemimi malittarisalittut aaqqissuussaasumi toqqorneqarnerannik paasineqassaaq. Takussutissiaq toqqorsinermut- aamma allagaataasivimmut inissiinermut systemimi malittarisalittut aaqqissuussaasumi toqqorneqarsimangippat, eqqartuussisup eqqartuussivimmi suli takussutissiamik peqarnerinnaa, assersuutigalugu imaata pingaarnersiorneqarneratut ilusilimmik peqarnera imaluunniit suliami pingaarnertut isumaqatigiinniarnermi atugassatut atortussanut katersugaatinnerinnaa pissutigalugu, takussutissiaq allagaatinik takunnissinnaatitaanermut ilaatinneqassanngilaq.

Pinerluttulerinermik suliani ataani imm. 1, oqaaseqatigiit pingajuat pillugu allaaserinninneq malillugu, suliap inaarutaasumik naammassineqarnerata kingorna aatsaat allagaatinik takunnissinnaatitaaneq atuutissaaq. Takussutissiap suliami takussutissiani toqqorneqarsimanissaa allagaatinik takunnissinnaatitaanermut piumasaqaataavoq.

§ 101 c-tut siunnersuutigineqartoq malillugu allagaatinik takunnissinnaatitaaneq aamma takussutissiap, allagaateqarfeqarneq pillugu inatsit malillugu allagaataasivimmut tunniunneqarsimanerata kingorna, immaqalu inatsit manna malillugu allagaataasivimmut toqqorsisoqartussaana peqatigalugu, aamma atuuppoq.

Imm. 2 pillugu erseqqinnerusumik allaatiginninneq malillugu, suliffeqarfiup iluani sulinermut atatillugu takussutissiat allagaatinik takunnissinnaatitaanermut ilaatinneqanngillat.

Inatsisinut atuuttunut naapertuuttumik, pinerluttulerinermik suliani allagaatinik takunnissinnaatitaaneq aatsaat suliap inaarutaasumik naammassineqareernerani atuutissasoq, imm. 1-imi, *oqaaseqatigiit pingajuanni* siunnersuutigineqarpoq. Soorlu inatsisit atuuttut malillugit, inuit sakkutuujunngitsut pillugit suliani kisianni suliap ingerlanerani allagaatinik takunnissinnaatitaaneq atuuppoq.

Inaarutaasumik aalajangiisoqarpat, imaappoq nalinginnaasumik eqqartuussiviup aalajangiinerata suliareqqitassanngortinneqarsinnaanerani aalajangiisinnaasoq qulliunerusoq aalajangiinermut apeqquusiinnaanngippat, suliaq inaarutaasumik naammassineqassaaq.

Eqqartuussineq nunani allani pillaatissiisoqarnissaanik suliami atorineqartussaq pineqarpat, nunami allami pillaatissiisoqarnissaanik suliaq naammassippat, suliaq aatsaat inaarutaasumik naammassineqartutut isigineqassaaq.

Suliarinneqqarfimmi suliamut eqqartuussutip oqaatigineqarnerani, aamma naammagittaalliuuteqarnissamut piffissaliussap iluani naammagittaalliornissaq aallartinneqarsimanngippat, suliat amerlanerpaat inaarutaasumik naammassineqartarput. Pissutsit naleqquttut pissutigalugit, taamaaliortoqassappat naammagittaalliuuteqarsinnaatitaaneq pillugu taamaatitsineq eqqarsaatigineqartariaqanngilaq.

Suliarinneqqarfimmi eqqartuussut naammagittaalliuutigineqarpat, eqqartuussiviup qulliunerusup naammagittaalliorfiusup eqqartuussummik oqaatiginninnerani, imaluunniit naammagittaalliuut pillugu suliaq allakkut naammassineqarpat, assersuutigalugu naammagittaalliuutip utertinneqarneratigut imaluunniit itigartitsissutigineqarneratigut suliaq inaarutaasumik naammassineqassaaq. Naammagittaalliorfiup suliarinneqqarfimmi eqqartuussut atorunnaarsippagu aamma suliaq nutaamik suliarineqartussanngorlugu utertippagu, suliaq nutaamik suliarineqarsimatinnani inaarutaasumik naammassineqarsinnaanngilaq.

Ataaniittut malillugit, pingajussaanic suliarinninnissamut akuersissuteqarnissamut periarfissat eqqarsaatiginagit, eqqartuussut oqaatigineqarpat, nunap eqqartuussisuuneqarfiani naammagittaalliornermik suliaq inaarutaasumik naammassisarpoq.

Eqqartuussivimmit aalajangiinerit eqqartuussivimmi qulliunerusumi naammagittaalliuutigineqarsinnaanerat, immikkut ittumik akuersissummik peqqaarluni aatsaat aallartinneqarsinnaasut, akuersissut taamaattoq tunniunneqartinnagu ilaatinneqassanngillat. Qallunaat eqqartuussisarnermik inatsisaanni § 932, imm. 3 malillugu eqqartuussisarnermik inatsimmi § 565 malillugu, eqqartuussummik naammassinninnermut tunngatillugu Procesbevillingsnævn-imut qinnuteqaatip aalajangiinerup kinguartinneqarnissaanic kinguneqarnissaa apeqqutaatinnagu, tamanna atuuppoq. Suliareqqitassanngortitsineq pillugu eqqartuussissutigitinniakkamut, eqqartuussisarnermik inatsimmi § 587 malillugu Immikkut ittumik Eqqartuussiviummut Maalaaruteqarfigineqarsinnaasumut tunniunneqartumut, imaluunniit eqqartuussisarnermik inatsimmi § 587 malillugu § 592 a malillugu eqqartuussivimmut eqqartuussummik nalunaaruteqarsimasumut tunniunneqartumut assigisaa atuuppoq. Naak ilumut kinguartsinissaq pillugu aalajangiisoqaraluartoq, pinerluttulerinermik suliaq taamaalilluni allagaatinik takunnissinnaatitaaneq pillugu malittarisassatut siunnersuutigineqartunut atatillugu, suli inaarutaasumik naammassineqarsimasutut isigineqassaaq.

Kisianni Procesbevillingsnævn-i pingajussaanic suliarinninnissamut akuersissuteqarpat, suliaq inaarutaasumik naammassineqartutut isigineqarunnaassaaq. Eqqartuussiviup naammagittaalliornermik suliaqartussap naammagittaalliornissamut piffissaliussaq qaangiutereeraluartoq naammagittaalliorneq akuerippagu, imaluunniit suliaq suliareqqinneqarnissaa pillugu aalajangiisoqarpat, tamanna aamma atuuppoq.

Taamaalilluni suliaq inaarutaasumik naammassineqarsimasoq, inaarutaasumik naammassineqarunnaarnera pisinnaavoq. Tamanna immikkut ittumik eqqartuussutip eqqartuussivimmut qulliunerusumut naammagittaalliuutigineqarsinnaaneranic pissuteqarpoq, aamma saneqqunneqarsinnaani, tassami suliat taamaattoqangippat inaarutaasumik naammassineqarsimasutut isigineqanngisaannassammata. Pinerluttulerinermik suliani naammassineqareersuni allagaatinik takunnissinnaatitaaneq pillugu malittarisassat suliaq naammassillugu suliarineqarnissaat siunertaralugu ima ilusilersorneqarput, Procesbevillingsnævn-i naammagittaalliorsinnaaneq pillugu akuersissuteqassagualarpat, imaluunniit suliaq suliarineqarqinnissaa pillugu aalajangiisoqarpat, § 101 c-tut siunnersuutigineqartoq malillugu allagaatinik takunnissinnaatitaaneq atorunnaarsinneqassalluni. Allagaatinik takunnissinnaatitaaneq piffissami suliaq nutaamik inaarutaasumik naammassineqarnerani atuutilersinneqarqissaaq.

Ilaannikkut suliat eqqartuutitaqanngitsumik naammassineqartarput. Eqqartuussisarnermik inatsimmi § 475 malillugu eqqartuussiviup iluani akiliisitsinissamik aalajangiinerit suliamik naammassitsippat. Eqqartuussisarnermik inatsimmi § 449 b malillugu eqqartuussiviit peqataatinnagit akiliisitsinissamik aalajangiinerit, unnerluussutip taamaatiinnarneqarnera aamma unnerluussinerup taamaatiinnarneqarnera pillugit aalajangiinernut malitaarisassat taakku malillugit allanngortinneqarsinnaapput, aamma taamaamat suliaq qaqugukkt inaarutaasumik naammassineqarneranut atatillugu, taakkununga naligiissinneqarlutik.

Unnerluussutip taamaatiinnarneqarnera aamma unnerluussinerup taamaatiinnarneqarnera killilersorneqanngitsumik qaammatinik 3-nik piffissaliussap iluani unnerluussisussaataasut qullersaanit allanngortinneqarsinnaapput. Allanngortitsinermut piumasaqaatinik (nalinginnaasumik tunngavilersuinissamik piumasaqaatip saniatigut) allanik atuuttoqannginnera pissutigalugu, tamanna nalinginnaasumik eqqartuussivimmut qulliunerusumut naammagittaalliuuteqarsinnaanertut isigineqartariaqarpoq, aamma suliaq unnerluussutip taamaatiinnarneqarneranic imaluunniit unnerluussinerup taamaatiinnarneqarneranic naammassineqartoq, taamaamat eqqartuussisarnermik inatsimmi § 315, imm. 1-imi allanngortitsinissamut piffissaliussap qaangiunnerani aatsaat inaarutaasumik naammassineqartutut isigineqarsinnaavoq. Taaneqareersutut sulianut, eqqartuussiviit peqataatinnagit akiliisitsinissamik aalajangiinermik naammassineqartunut tamanna aamma atuuppoq.

Pinerluttulerinermik suliani naammassineqareersuni allagaatinik takunnissinnaatitaanermut arlaata suliami pasineqarsimanissaa piunasaqaataavoq. Suliat, eqqartuussisarnermik inatsimmi § 338, imm. 3-mi, oqaaseqatigiit siulliit malillugit pinerluttoqarsimaneramik paasiniaavigineqarneri unitsinneqartut, taamaalillutik siunnersuutip avataanut pippat. Pinerluttoqarsimaneramik paasiniaaneq, taamaaliornissamut immikkut ittunik piunasaqaatinik peqanngikkaluartoq, qaqugukkulluunniit ingerlateqqinneqarsinnaammat tassunga atatillugu maluginiarneqassaaq.

»Suliaq inaarutaasumik naammassineqarpoq« pillugu oqaatsit, »suliaq aalajangiiffigineqarpoq«-mik oqaatsimik, ullumikkut pisortat ingerlatsinerat pillugu inatsimmi § 18-imi atorneqartumut naleqqiullugu taamatorluinnaq isumaqanngimmat, aamma suliaq »aalajangiiffigineqartut« isumaqarfigineqarmat, naak unnerluussisussaataasut qullersaat aalajangiineq eqqartuussisarnermik inatsimmi § 315, imm. 1 malillugu allangortitsinissaminut periarfissaqaraluartoq, maluginiarneqassaaq. Siunissami unnerluussisussaataasut qullersaannut naammagittaalliuuteqartoqassappat naammagittaalliuuteqarnissamut atugassanik paasissutissanik pissarsinissap kissaatigineqarneranik tunngavilersorneqartumik allagaatinik takunnissinnaatitaaneq pillugu noqqaassuteqarneq, taamaattumik § 101 f-itut siunnersuutigineqartoq tassungalu oqaaseqaatit malillugit oqartussaasut, naak taamaaliortussaannngikkaluarlutik, nipangiussisusaatitaaneq akornutaatinnagu, paasissutissanik tunniussisinnaaneranerat pillugu tunngavik malillugu suliarineqassaaq.

Soorlu inatsisit atuuttut assigalugit suliffiup iluani takussutissiat suliarineqartut, *imm. 2* malillugu allagaatinik takunnissinnaatitaanermut ilaatinneqanngillat, taannalu tassunga atatillugu suut suliffiup iluani takussutissiatut suliarineqartutut paasineqassanersut pillugit nassuiaammik erseqqinnerusumik imaqarpoq.

Takussutissiat eqqartuussivimmit, politiinit imaluunniit unnerluussisussaataasunit suliap suliarineqarnerani taamaallaat namminneq atugassamittut suliarisaat *imm. 2, nr. -imi* ilaatinneqarput. Takussutissiaq ataaseq, kikkunnulluunniit, taama tulleriillutik, eqqartuussiviup imaluunniit politiit/unnerluussisussaataasut, avataanniittunut ingerlateqqinneqarsimangippat, taamaalilluni taamaallaat nr. 1 malillugu takussutissiatut suliffeqarfiup iluani suliarineqarsimasutut isigineqarsinnaavoq.

Eqqartuussiviit pineqartillugit eqqartuussisut allattaaviinut imaluunniit eqqartuussiviup aalajangiinerinut ilanngussassanut missingiutit, eqqartuussiviup nammineq taamaallaat atugassai, assersuutitut taaneqarsinnaapput. Allakkianut, eqqartuussisup imaluunniit eqqartuussivimmi sulisup, suliap suliarineqarneranut atatillugu suliarisimasaanut, aamma eqqartuussiviup nammineq taamaallaat atugassanut tamanna taamatuttaaq atuuppoq.

Politiit unnerluussisussaataasullu pineqartillugit, politiit unnerluussisussaataasullu unnerluussut pillugu apeqqutit pillugit, suliap eqqartuussivimmi ingerlanneqarnissaa pillugu imaluunniit naammagittaalliorsinnaaneq pillugu iluminni isumaliutiginninneri, assersuutitut taaneqarsinnaapput. Politiit unnerluussisussaataasullu iluanni immikkoortortaqarfiit assigiinngitsut akornanni allaffigeqatigiinneq eqqarsaatigalugu, nr. 3 innersuussutigineqarpoq.

Eqqartuussiviup siunersioqatigiissitsinerani taasisitsineranilu taasinermi allattaaviit imaqarniallu allat, suliffeqarfiup iluani takussutissiatut isigineqarnissaat *imm. 2, nr. 2-p* erseqqissarpaa. Eqqartuussisarnermik inatsimmi § 105, imm. 2 matumuuna malillugu, eqqartuussiviup siunersioqatigiissitsinerisa taasisitsinerisalu isertugaaneri, eqqartuussisarnermi tunngaviusumik tunngaviuvoq. Taamaammat eqqartuussiviup siunersioqatigiissitsinerinit taasisitsinerinillu imaqarniliat, taamatut imaqarniliornermi siunertarineqartoq apeqqutaatinnagu, allagaatinik takunnissinnaatitaanermi nalinginnaasumik aamma ilaatinneqartariaqanngillat.

Kina inerniliussamat imaluunniit tunngavilersuummut sorlermut akuersilluni qinersisimanersoq pillugu paasissutissap, allagaatinik takunnissinnaatitaanermi ilaatinneqannginneranut oqaatsip »taasisitsinerit« ilaatinneqarnerata ersersippaa. Tamanna ingammik suliani, eqqartuussisooqataasut peqataaffigisimasaanni pingaaruteqassaaq.

Takussutissiat politiini unnerluussisussaataasunilu immikkoortortat tamarmiusut akornanni, suliffeqarfiup iluani takussutissiatut suliarineqarsimasutut pissusertik annaanagu paarlaasseqatigiissutigineqarsinnaanerata, *imm. 2, nr. 3-p* aalajangersarpaa. Ilaatigut pinerluttoqarsimaneranik paasiniaanermi politeeqarfiit arlallit ilanngunneqarsinnaanerata, soorlu aamma Rigspolitiit ilanngutitinneqarsinnaanerata pissutigalugu, malittarisassaq taanna pisariaqarpoq. Eqqartuussisarnermik inatsimmi § 61 c, imm. 1, aamma § 62, imm. 1 malillugit, pisortani unnerluussisussaataasut politiillu qullersaattut, Inatsiseqarnermut ministereqarfik malittarisassami aamma ilaatinneqarpoq.

Suliffeqarfiup iluani takussutissiani suliarineqartuni paasissutissat piviusut naalisarneqarnissaat pillugit malittarisassaq ilanngunneqanngilaq. Paasissutissat piviusut suliap suliarineqarneranut annertuumik pingaaruteqartut tamatigut aammattaaq suliame takussutissiani allani takuneqarsinnaanerata, aamma paasissutissat taamaattut kisimiillutik suliffeqarfiup iluani takussutissiani suliarineqartumi imaritinneqanngisaannarnerata, eqqartuussivimmi suliap suliarineqartarnerata pillugu malittarisassat kinguneraat. Pinerluttulerinermik suliap pineqartillugit, politiit nalunaarusiaat eqqartuussivimmit, illersuisumit pasineqartumillu aamma atorneqartarmata, taakku suliffeqarfiup iluani takussutissiatut suliaannngitsuusut tassunga atatillugu maluginiarneqassaaq.

Allagaatinik takunnissinnaatitaanermi ilanngussinnginnernik sisamanik *imm. 3* imaqarpoq. Siulliit marluk inatsisit massakut attuuttut asserluinnaringajappaat aamma inuit sakkutuujunngitsut pinerluttulerinermillu suliat pillugit atuullutik. Ilangussinnnginnissat pingajuat nutaaliormik ersersitsineruvoq, taamatuttaq inuit sakkutuujunngitsut pinerluttulerinermillu suliani atuulluni, kisianni inuit sakkutuujunngitsut pillugit suliani annerpaamik pingaaruteqartussaalluni. Ilangussinnnginnissaq kingulleq, taamaallaat pinerluttulerinermik suliani atuuttoq, imaqarnermigut inatsisinut atuuttunut assinguvoq, kisianni eqqartuussisarnermik inatsimmi pinerluttulerinermik suliat katersorneqarnissaat pillugu siunnersuutip malitsigisaanik, ullumikkumut naleqqiullugu atitunerusumik atuuffeqalissalluni.

Naliliineq piviusoq malillugu paasissutissat ilaanni allagaatinik takunnissinnaatitaanermi killiliineq ilanngussinnginnerit ersersippaat. Killiliineq taamaassappat tassaassaaq assilillugit sanaqqiineq imaluunniit misissuineq sioqqullugu paasissutissat pineqartut takussutissiamit peerneqarnerat, taamaalilluni takussutissiap sinnerani allagaatinik takunnissinnaaneq (naalisaaneq) tunniunneqassaaq. Taamaattoq pissutsit assigiinngitsut malillugit *imm. 3* innersuussutigalugu takussutissiami tamarmi allagaatinik takunnissinnaatitaanerup itigartitsissutigineqarnera tunngavissaqarsinnaavoq.

Eqqartuussinerit suliarineqartarneri pillugit malittarisassat immikkut ittit eqqartuussisarnermik inatsimmi allamiittut malitsigisaannik, akuusoq suliami paasissutissanik ilisimasaqalernissaminik akornuserneqarsimappat, allagaatinik takunnissinnaatitaaneq killilerneqarsinnaasoq, *imm. 3, nr. 1-p* aalajangersarpaa. Akuusumut naleqqiullugu akuusumit allaanerusut allagaatinik takunnissinnaatitaanermik annertunerusumik tunineqannginnissaat malittarisamut tunngavilersuutaavoq. § 101 atuuttoq oqaatsit aallaqqaataasut »Pisut, inatsimmi matumani tamanna pillugu immikkut ittunik aalajangersaavigineqartut avataanni«, malitsigisaannik assigisaanik nangaassummik erseqqissumik imaqarpoq.

Pissutsit nipangiussisussaataitanermik pisussaaffiusut pillugit ilisimannittutut nassuiaanissamut akuersissuteqartoqarnissaata itigartitsissutigineqarnissaa pillugu eqqartuussisarnermik inatsimmi § 142, *imm. 2-mi*, oqaaseqatigiit siulliit, angajoqqaat akisussaanagerat pillugu inatsit malillugu meeqqamik oqaloqateqarnerup imaa pillugu eqqartuussisarnermik inatsimmi § 287, pinngitsaaliilluni meeravissianngortitsisarnermik suliani uppernarsaasersuineq pillugu eqqartuussisarnermik inatsimmi § 297, angajoqqaat meeravissiallit aamma angajoqqaaviit akornanni pissutsini, aamma eqqartuussutit pillugit takussutissiierni il.il. kinaassutsimik isertuussineq pillugu eqqartuussisarnermik inatsimmi § 298, *imm. 3*, illersuisup pasineqartullu allagaatinik takunnissinnaatitaanerup killilerneqarnera pillugu eqqartuussisarnermik inatsimmi, § 339 c, (inatsisissatut

siunnersuummi § 1, nr. *-imi oqaasertaliorneqartoq), illersuisup imaluunniit pasisap allagaatinik takunnissinnaatitaanerat pillugu isumaqatigiinnngissutinut atatillugu atortussanik saqqummiussinerat pillugu eqqartuussisarnermik inatsimmi § 341, imm. 2-mi oqaaseqatigiit aappat (inatsisissatut siunnersuummi § 1, nr. 17-imi oqaasertaliorneqartoq) aamma ilisimannittup najugaa imaluunniit atia, atorfia aamma najugaa pillugu eqqartuussisarnermik inatsimmi § 456, imm. 2 malittarisassatut, imm 3, nr. 1-mut innersuussinermi ilaasutut assersuutitut taaneqarsinnaapput.

Innersuussinermi aammattaaq eqqartuussisarnermik inatsimmi § 344, imm. 2-mi aamma 3-mi malittarisassat (inatsisissatut siunnersuummi § 1, nr. 18-imi oqaasertaliorneqartoq) ilaatinneqarput. Naalagaaffiup isumannaatsuunissaanut, naalagaaffinnut takornartanut, suliap paasinarsisinneqarnissaanut imaluunniit inummut pingajuusumut qajassuussinissap qaqutiguinnaq tamanna pisariaqartissappagu, pasineqartup allagaatinik takunnissinnaatitaaneraniit paasissutissanik ilanngussinnginnissaq malittarisassat taakku periarfissippaat. Pasineqartoq, kingusinnerpaamik isumaqatigiinniarnep pingaarnep nalaani nassuiaareernermini, paasissutissat pillugit ilisimatinneqassaaq. Taamatuttaaq pasineqartup illersuisumini allagaatinik takunnissinnaatitaanerata killilerneqarnera pillugu eqqartuussisarnermik inatsimmut § 339 a, imm. 3-mut (inatsisissatut siunnersuummi § 1, nr. *-imi oqaasertaliorneqartumut) tamanna atuuppoq.

Innersuussinermi aammattaaq eqqartuussisarnermik inatsimmi § 344, imm. 5-imi malittarisassat ilaatinneqarput (inatsisissatut siunnersuummi § 1, nr. 19-imi oqaasertaliorneqartoq), tassani nalinginnaasumik, pasineqartup nalunaarfigineqarnissaa pillugu malittarisassanit, eqqartuussisarnermik inatsimmi § 339 c malillugu eqqartuussinertit illersuisup pasineqartullu allagaatinik takunnissinnaatitaaneranut atassuteqartut, ilanngunneqannginnissaat pineqarluni.

Akuusoq suliami paasissutissanik ilisimasaqalernissaminik piviusumik akornuserneqarsimappat, imm. 3, nr. 1 atuuppoq. Pinerluttulerinermik suliaq eqqartuussutikkut aalajangiiffigineqarsimappat, eqqartuussisarnermik inatsimmi § 344, imm. 2 aamma 3, aamma § 339 a, imm. 3 taamaammat pingaaruteqanngillat, pasineqartoq taamaattoqarpat paasissutissat pillugit ilisimasaqalernissamik *periarfissaqarsimassammat* (kingusinnerpaamik pingaarnertut isumaqatigiinniarnep nalaani nassuiaaareersimanermi kingorna). Pinerluttulerinermik suliani, eqqartuussiviit avaqqullugit naammassineqartuni (akiliisitsinissamik aalajangiinikkut, unnerluussutip taamaatiinnarneqarneratigut imaluunniit unnerluussutip unitsiinnarneqarneratigut) suliami paasissutissanik, pasineqartup ilisimalissallugit periarfissaqarfiginngisaannarsimasaanik kisianni peqartoqarsinnaavoq, taamaattoqarpallu paasissutissat taakku imm. 3, nr. 1 malillugu allagaatinik takunnissinnaatitaanermi ilaatinneqassanngillat. Illersuisup pasineqartullu allagaatinik takunnissinnaatitaanerata eqqartuussisarnermik inatsimmi § 339 c malillugu suliap

naammassineqarnissaa tikillugu killilerneqarsimappat, pinerluttulerinermik suliamut eqqartuussiviup ataani avataaniluunnit naammassineqartumut tamanna aamma atuuppoq.

Naalagaaffiup isumannaatsuunissaanut imaluunniit naalagaaffinnut takornartanut imaluunniit inuiaat akornanni sullissivinnut qajassuussinissat pingaarutillit pissutigalugit qinnuteqartup allagaatinik takunnissinnaatitaanerata tunulliuqqarnissaa *imm. 3, nr. 2-p* allagaatinik takunnissinnaatitaanerup killilerneqarnissaa periarfissiissutigaa. Qinnuteqartup allagaatinik takunnissinnaatitaanermik soqutiginninnerata illuatungaani lu qajassuussinissat pineqartut akornanni piviusumik nalilersuisoqassasoq, oqaasertaliornermi takuneqarsinnaavoq. Ataani *imm. 4* pillugu allaaserinninnerit malillugit, allagaatinik takunnissinnaatitaanerup itigartilluinnarneqarsinnaaneranut taarsiullugu takussutissiat pineqartut assilillugit sanaqqinneqarnerisa tunniunneqarnissaannik itigartitsineq allatut qinigassaasinnaasoq, tassunga atatillugu maluginiarneqassaaq.

»Naalagaaffiup isumannaatsuunissaa imaluunniit naalagaaffinnut takornartanut pissutsinik pingaartitsineq imaluunniit tamakkuninnga immikkut ittumik qajassuussineq pissutigalugu« pillugu eqqartuussisarnermik inatsimmi ilanngussinnginnissaq pillugu malittarisassaq atuuttoq assigaa. Tassunga tunngatillugu taamaattoq inuiaat akornanni sullissivinnut qajassuussinissat ilanngunneqarpoq.

Naalagaaffinnut takornartanut pissutsit qajassuussassat saniatigut, soorlu § 101-imi atuuttumi »tamakkuninnga immikkut ittumik qajassuussineq«-rup ilanngunneqarnissaa pisariaqanngitsutut isigineqarpoq. Oqaatsit taakku matut matuneqarnissaat pillugu eqqartuussisarnermik inatsimmi § 114, *imm. 1, nr. 2-mi* ilaapput, tamannalu qallunaat eqqartuussisarnermik inatsisaanni § 29, *imm. 1, nr. 2-imi* aalajangersakkap assinga pillugu Folketingsstidende 1998-99, ilanngussaq A, qupperneq 2031 malillugu »naalagaaffiup naalagaaffinnut takornartanut pissusai« matut matuneqarnissaannut tunngavilersuutitut oqaatigineqarsinnaanngikkaluartoq, suliani nunat tamat akornanni inatsisitigut siunnersorneqarneq pillugu ikiuunnerni naalagaaffiit pineqartut soqutigisaat innersuussutigalugit matut matuneqarnissaasa naleqquttuusinnaaneramik tunngavilersorneqarpoq.

Kisianni matut matuneqartarnerat kialluunniit eqqartuussinermi najuussinnaaneranut tunngassuteqarpoq, akerlianilli inuit, allagaatinik takunnissinnaatitaanermi immikkut soqutigisaqarnermik qularnarunnaarsitsisinnaasut, allagaatinik takunnissinnaatitaanerata uani pineqarluni. Aammattaaq pinerluttulerinernik suliani allagaatinik takunnissinnaatitaaneq aatsaat suliap inaarutaasumik naammassineqarnerani atuuppoq, tamannalu nunat tamat akornanni inatsisitigut siunnersorneqarneq pillugu ikiuunneq pillugu suliani, nunami allami pillaatissiisoqarnissaanik suliap naammassineqareersimanissaanik isumaqarpoq.

Imm. 3, nr. 3 nutaaliornermik ersersitsivoq. Inuit ataasiakkaat allanik sunissaqaratik pissuserisaat pillugit imaluunniit suliffeqarfiit inuussutissarsiornerminni isertugaataat pillugit takussutissiaq imaqarpat, aamma suliami takussutissianik ilisimasanik atuinnermigut immiut iluaqutissaminik isumaginninnissaminut qinnuteqartup soqutiginninnera, inunnut ataasiakkaanut imaluunniit suliffeqarfinnut pineqartunut qajassuussassanut pingaarutilinnut naleqqiullugu tunullinneqartariaqartoq, aamma kinaassutsinik isertuussinerup suliarineqarnera naammangippat, allagaatinik takunnissinnaatitaanerup killilerneqarnissaa malittarisassap periarfissippaa.

Siunnersuummi § 101 b, imm. 3, nr. 3-mut malittarisassaq assinguvoq, aamma oqaatsit imarisaat »inuit ataasiakkaat allanik sunissaqaratik pissuserisaat« aamma »inuussutissarsiornermi isertugaatit« paasineqarnissaat eqqarsaatigalugit, aalajangersakkamut tassunga oqaaseqaatit innersuussutigineqarput.

Tunnngaviusumik malittarisassaq inuit sakkutuujunngitsut pillugit sulianut pinerluttulerinermillu sulianut atuuppoq, kisianni pinerluttulerinermik suliat pillugit imm. 3, nr. 4-imi ilanngussinninnissaq imm. 3, nr. 3-mit atitunerummat, sulisaatsimi qularnangitsumik inuit sakkutuujunngitsut pillugit suliani taamaammat immikkut pingaaruteqartussaavoq.

Inuit ataasiakkaat allanik sunissaqaratik pissuserisaat pillugit imaluunniit suliffeqarfiit inuussutissarsiornerminni isertugaataat pillugit takussutissiaq paasissutissanik imaqarpat, aamma qinnuteqartup takussutissiaq imarisaanik ilisimasaqalerneq immiut iluaqutissaq pillugu isumaginninnissaminut atuinissaa, inunnut ataasiakkaanut suliffeqarfinnulluunniit pineqartunut qajassuussassanut pingaarutilinnut tunullinneqartariaqarpat, allagaatinik takunnissinnaatitaaneq killilerneqarsinnaasunngorlugu imm. 3, nr. 3 ilusilersorneqarpoq.

Taamaalilluni siunnersuut malillugu allagaatinik takunnissinnaatitaaneq automatiskiusumik killilerneqassanngilaq, tassami takussutissiaq inuit ataasiakkaat allanik sunissaqaratik pissuserisaat imaluunniit suliffeqarfiit inuussutissarsiornerminni isertugaataat pillugit paasissutissanik imaqarpat, kisianni qinnuteqartup allagaatinik takunnissinnaatitaaneq pillugu soqutiginninnerata pineqartunut pingaarutilimmik qajassuussinissamit tunullinneqartariaqarnera pillugu nalilersuisoqartussaavoq.

Takussutissiat imaanni kinaassutsit ilisarnarunnaarsinneqarnissaat pillugit § 101 d, imm. 4-tut siunnersuutigineqartumi malittarisassamut naleqqiullugu imm. 3, nr. 3 pingaanginneruvoq, taanna inuit ataasiakkaat allanik sunissaqaratik pissuserisaat imaluunniit suliffeqarfiit inuussutissarsiornerminni isertugaataat pillugit paasissutissanik imaqarpoq. Inuit ataasiakkaat imaluunniit suliffeqarfiit kinaassusaat erseqqikkunnaarsinneqassasut, kisianni paasissutissat imminni takussutissiami atatiinnarneqassasut, kinaassutsinik isertuussinerup isumaraa. Taamaammat imm. 3, nr. 3-

p malitsigisaanik paasissutissanik ilaatitsinnginnermut naleqqiullugu kinaassutsimik isertuussineq allagaatinik takunnissinnaatitaanermi annikinnerusumik killiliineruvoq, aamma siunnersuut tamanna tunngavigalugu ima ilusilerneqarpoq, inunnut ataasiakkaanut imaluunniit suliffeqarfinnut namminersortunut pineqartunut qajassuussineq kinaassutsinik isertuussinikkut suliarineqarsinnaanngippat, imm. 3, nr. 3 taamaallaat atorineqassalluni.

Naak kinaassutsinik isertuussisoqaraluartoq pineqartut inunnit amerlasuunit ilisarineqarnissaat aarlerinaateqarpat, kinaassutsinik isersuussineq ingammik naammangissinnaavoq.

Inatsisinik unioqutitsinerit pitsaaliorneqarnerannut, paasinarsisinneqarnerannut aamma inuk eqqartuunnarlugu imaluunniit pillagassanngortinniarlugu suliaqarnissamut imaluunniit pasineqartup, ilisimannittut allalluunniit immikkut ittumik qajassuunneqarnissaannut, suliami paasissutissanik ilisimalikkat imminut iluaqusernissani pillugu atorineqarsinnaanerit pillugit qinnuteqartup soqutigisai tunulliuunneqartariaqarpata, pinerluttulerinermik suliani allagaatinik takunnissinnaatitaanerup killerneqarnissaanik *imm. 3, nr. 4* periarfissiivoq. Allagaatinik takunnissinnaatitaanermi ilanngussisussaannnginnerit, pisortat ingerlatsinerit pillugu inatsimmi § 18-imi takuneqarsinnaasut, aalajangersakkap ingerlateqqippai.

Allagaatinik takunnissinnaatitaanik qinnuteqarnermi, qinnuteqartup takussutissiamik ilisimasaqarnerminik imminut iluaqusernissamininut isumaginninnissaminut atuinissaa illuatungaani qajassuussassat taaneqartut piviusumik imminnut oqimaaqatigiissinneqarnissaat, piumasaqaataavoq. Ataani imm. 4 pillugu allaaserinninnerit malillugit, allagaatinik takunnissinnaatitaanerup itigartilluinnarneqarsinnaaneranut taarsiullugu takussutissiat pineqartut assilillugit sanaqqinneqarnerisa tunniunneqarnissaanik itigartitsineq allatut qinigassaasinnaasq, tassunga atatillugu maluginiarneqassaaq.

Assersuutigalugu taama tulleriillutik, imm. 3, nr. 2 aamma 3 malillugit, »immikkut ittumik« qajassuussineq (pasineqartumut, ilisimannittunut imaluunniit allanut, illuatungaani qajassuussineq, soorlu oqaaseq »pingaarutilimmik« imaluunniit »pingaartumik« atorineqartillugu taama sakkortussuseqartariaqanngitsoq, oqaatsimiippoq. »Immikkut ittumik«-mi taamaattoq illuatungaani qajassuussinissap piviusumik, ilaatigullu pingaaruteqartumik, tunngavilersorneqarnissaa oqaatsimiippoq. Nalornisoqartillugu, § 101 d, imm. 2-tut siunnersuutigineqartumut oqaaseqaatit malillugit, allagaatinik takunnissinnaatitaaneq pillugu aalajangiisoqartinnagu, pineqartunit oqaaseqatinik pissarsisoqarnissaa pissusissamisoorinnaavoq. Allagaatinik takunnissinnaatitaaneq pillugu malittarisassat assigalugit »pasineqartoq« nalinginnaasumik oqaasiuvoq, tassanilu pasineqartoq aammattaq unnerluunneqartuusq ilaavoq.

Allagaatinik takunnissinnaatitaanermut ilutsip qanoq ittuunissaa pillugu *imm. 4* malittarisassanik imaqarpoq. Oqartussaasuni allagaatinik takunnissinnaatitaanermik noqqaassuteqarnermik suliaqartuni allagaatinik takunnissinnaatitaaneq misissuinertut imaluunniit assilillugu sanaqqiinertut ilusilerlugu tunniunneqarsinnaavoq.

Allagaatinik takunnissinnaatitaanerup ilusaa oqartussaasumit, allagaatinik takunnissinnaatitaaneq pillugu noqqaassummik suliaqartumit, aalajangerneqassasoq *imm. 4*-imi *oqaaseqatigiit siullit* aalajangerpaat.

Inuit sakkutuujunngitsut pillugit suliat pineqartillugit kisianni aallaavik taanna *imm. 4*-imi *oqaaseqatigiit aappaannit* naleqqussarneqarpoq, taassumalu qajassuussinissat *imm. 3*, nr. 2-mi imaluunniit 3-mi taaneqartut, tamanna akerlerinngippassuk, qinnuteqartoq noqqaassuteqarnerup kingorna inuit sakkutuujunngitsut pillugit suliani allaganngorlugit takussutissiat assilillugit sanaqqinneqarnerinik tunineqassasoq, aalajangerpaa.

Allaganngorlugit takussutissiat ima paasineqassapput, taakkuusut pappiaqqatut imaluunniit elektroniskiusutut ilusillit.

Allagaatinik takunnissinnaatitaanermik qinnuteqartup, takussutissiat allat assilillugit sananeqarnerisa tunniunneqarnissaat, assersuutigalugu assit, nunap assii, titartakkat aamma assit- aamma nipit immiunneqarneri, piumasaqaatigisinnaanngilaa. Takussutissiat taakku pineqartillugit taamaalilluni allagaatinik takunnissinnaatitaaneq misissuinerinik imaluunniit assilillugu sanaqqiinerinik iluseqassanersoq, oqartussaasut nalilersuiffigisussaavaat.

Pinerluttulerinermik suliani, allagaatinik takunnissinnaatitaanerup misissuinertut ilullip tunniunneqarnera aallaaviussaaq.

Qajassuussinerit *imm. 3*, nr. 2-mi imaluunniit 4-mi taaneqartut tamanna akerlerinngippassuk, imaluunniit assilillugit sanaqqinneqartut inatsisinut akerliusumik atorneqarnissaat ernummatigineqanngippat, allakkatigut takussutissiat aalajangersimasut tunniunneqarnissaat pillugit erseqqissakkamik noqqaassuteqarneq, kisianni akuerineqartariaqarpoq.

Atortussani amerlasoorujussuarni allagaatinik takunnissinnaatitaaneq noqqaassutigineqarpat, pinngitsoorani pisut amerlanerpaartaanni, allagaatinik takunnissinnaatitaaneq pillugu qinnuteqartoq, atortussat ilaanni, *imm. 3* malillugu tamakkiisumik ilanngussinnginnermi ilaatinneqanngitsuni, siullertut misissuisinnaatitaassaaq. Tamatuma kingorna pineqartup takussutissiat erseqqinnerusumik

taasat, atortussat ataatsimoortut misissorneqarneranni nassaarisimasani pillugit assilillugit sanaqqiinerit tunniunneqarnissaat noqqaassutigerusukkunigit noqqaassutigisinnaavai.

Allagaatinik takunnissinnaatitaaneq pillugu noqqaassutit suliarineqarnissaannut suleriaaseq eqqarsaatigalugu, 101 d-tut siunnersuutigineqartoq tassungalugu oqaaseqaatit innersuussutigineqarput.

Aammattaq inatsisissatut siunnersuummi oqaaseqaatini nalinginnaasuni imm. 2.1.2 innersuussutigineqarpoq.

§ 101 d-mut

Allagaatinik takunnissinnaatitaaneq pillugu noqqaassutit suliarineqarnissaanni sulisaatsit aalajangersakkami pineqarput. Malittarisassat §§ 101 a-tut aamma 101 b-tut siunnersuutigineqartut malillugit kikkut tamarmik allagaatinik takunnissinnaatitaanerat, aamma inuit allagaatinik takunnissinnaatitaaneq pillugu immikkut ittumik soqutiginninnerminnik ersersitsisinnaasut aalajangersakkami ilaatinneqarput.

Qinnuteqartup takussutissiaq imaluunniit suliaq taanna, pineqartup §§ 101 a-miit 101 c ilanngullugu malillugit allagaatinik takunnissinnaatitaanermik kissaateqarfigisani, sunaassusersissagaa, allagaatinik takunnissinnaatitaanernut tamanut tunngaviusumik piunasaqaat imm. 1-imi piunasaqaatigineqarpoq. Oqartussaasoq sorleq allagaatinik takunnissinnaatitaanermik noqqaassummik tunniussiffigineqassanersoq, imm. 2-mi taaneqarpoq, aamma noqqaassutip oqartussaasunit akissuteqarnissaannut piffissaliussaq imm. 3-p aalajangerpaa. Naggataagut kinaassutsip isertuunneqarnissaa pillugu malittarisassat imm. 4-mi imaritinneqarput, tamatumalu peqatigisaanik imm. 5-imi inuit normui pineqarlutik.

Inuup allagaatinik takunnissinnaatitaanermik noqqaassuteqartup, takussutissiaq suliarluunniit, pineqartup ilisimalerumallugu kissaatigisani, taassagaa *imm. 1-imi oqaaseqatigiit siulliit* aalajangerpaat.

Taamaalilluni allagaatinik takunnissinnaatitaaneq pillugu noqqaassuteqarneq sioqqullugu, suliaq imaluunniit takussutissiaq piuneranik qinnuteqartup ilaatigut ilisimasaqarsimassaaq. Suliaq takussutissialluunniit sioqquatsisumik suussusersineqarnissaanik piunasaqaatip, ilaatigut tamanna aqutigalugu suliaq aalajangersimasup imaluunniit suliat aalajangersimasumik suussusillit nassaarineqarnissaat siunertaralugu, piffissami aalajangersimasumi suliat misissuiffigineqarnissaanik piunasaqaateqartoqarsinnaannginnera kinguneraa. Inuup atiata taanerinnaatigut, inuk

aalajangersimasoq pillugu pinerluttulerinermik eqqartuussutit allagaatinik takunnissinnaatitaaffigineqarnissaat periarfissaassanngilartaaq.

Illuatungaani pisumi – inuup, allagaatinik takunnissinnaanermik qinnuteqartup, pinerluttulerinermik suliaq ilisimasaqarfigaa – kisianni pasineqartup atia nalullugu – allagaatinik takunnissinnaatitaaneq tassani akornusinngilaa. Inuup, allagaatinik takunnissinnaatitaanermik qinnuteqartup, tusagassiuutitigut oqallisiginnineq aqcutigalugu assersuutigalugu eqqartuussiviup aalajangersimasup ullumi aalajangersimasumi (imaluunniit piffissap allanut naleqqiullugu naannerusup iluani) eqqartuussummik nalunaaruteqarsimasoq nalunngikkuniuk, taannalu inuup allagaatinik takunnissinnaatitaanermik qinnuteqartup paasissutissat pigisai tunngavigalugit paatsuugassaanngitsumik suussusersineqarsinnaappat, oqartussaasup, allagaatinik takunnissinnaatitaaneq pillugu noqqaassummik suliaqartup, ajornartorsiutitaqanngitsumik suliaq nassaarisinnaappagu, suliap suussusersineqarnissaanut piumasaaqat naammassineqarpoq.

Eqqartuussinerit piviusut naammattumik eqqortuussusilimmik tusagassiuutinit eqqartuinerit tunngavigalugit kikkulluunniit suliami eqqartuussutini aalajangiinernilu, allagaatinik takunnissinnaatitaanerat taamaalluni siunnersuutip periarfissiissutigaa, aamma tamanna siunnersuutip ilagaa qitiusoq, taannalu ilaatigut tusagassiuutit suliamik naammattumik eqqartuisimanerannik nakkutilliinissamik periarfissiivoq.

Sioqqutsisumik suliap taassuma suussusersineqarnera ilanngunnagu, qanittumi eqqartuussutit nalunaarutigineqartut pillugit tusagassiuutit nalinginnaasumik eqqartuisinnaanerannut, , periarfissaq pillugu § 101 e, imm. 1-imi malittarisassatut siunnersuutigineqartoq innersuussutigineqarpoq.

Noqqaassut naleqquttumik tunngavilersorneqarsimanngippat, matumani ilisimatusartutut ilisimatusarnermut imaluunniit tusagassiuutinut tunngasumik imaluunniit aaqqissuussinermut suliami atorneqartussanik allagaatinik takunnissinnaatitaanermik qinnuteqartoqarpat, suliani amerlasuuni allagaatinik takunnissinnaaneq pillugu noqqaasoqarpat, imm.1-imi *oqaaseqatigiit aappaata* allagaatinik takunnissinnaatitaanerup itigartitsissutigineqarnissaa periarfissiissutigaa.

Soorlu taaneqareersutut ilaatigut tamanna aqcutigalugu suliap aalajangersimasup imaluunniit suliat aalajangersimasumik suussusillit nassaarineqarnissaat siunertaralugu, piffissami aalajangersimasumi suliat misissuiffigineqannginnissaannik malittarisassaq manna tunngavilersorneqarpoq.

Kisianni suliat, tamanut ammasumik pingaarnertut isumaqatigiissusiorfigineqarnissaasa ullulerneqarnerannik aalajangiiffigineqarsimasut pillugit utaqqiisaagallartumik

nalunaarsuutit ikiorsiullugit, piffissami aalajangersimasumi eqqartuussutit nalunaarutigineqarsimasut tamaasa pillugit nalunaarsuutip sananeqarnissaa ajornanngilaq, aamma eqqartuussutit qanoq amerlatigisut tamatuma peqatigisaanik allagaatinik takunnissinnaatitaaffiunersut killilerneqanngippata, kikkulluunniit nalunaarsuiffik taamaattoq tunngavigalugu piffissami aalajangersimasumi eqqartuussutini nalunaarutigineqarsimasuni tamani allagaatinik takunnissinnaatitaaneq piomasagaatigisinnaavaat.

Taamaalilluni qinnuteqartup suliani siuliani ilisimasaqarfigisamini taamaallaat allagaatinik takunnissinnaatitaanissaanik piomasagaatip avaqqunneqarsinnaaneranut periarfissat killilerneqarnissaat malittarisassami siunertarineqarpoq.

Kialluunniit uteqqiattumik eqqartuussutini ikinnerusuni allagaatinik takunnissinnaatitaaneq pillugu noqqaassuteqarsinnaanera aamma taamaalilluni piffissap ingerlanerani eqqartuussutini amerlasuuni allagaatinik takunnissinnaalenera, malittarisassap akornusinnigilaa. Malittarisassap atorneqarnerani taamaattoq pineqartup uteqqiattumik suliani nutaani allagaatinik takunnissinnaatitaanermik noqqaassuteqarsimanera, imaluunniit noqqaassuteqarneq ataasiaannarluni pisoq pineqarnersoq, pingaartinneqarsinnaavoq.

Noqqaassut naleqquttunik tunngavilersorneqarsimangippat, matumani ilisimatuutut ilisimatusarnermut imaluunniit tusagassiutinut tunngasumik imaluunniit aaqqissuussinermit suliami atorneqartussanik allagaatinik takunnissinnaatitaanermik qinnuteqarneq ilanngullugu, itigartinneqarsinnaanngorlugu malittarisassaq oqaasertalersorneqarpoq. Suliani amerlasuuni, tamarmik immikkut ataasiakkaarlugit suussusersineqartuni, noqqaassut suliamut tunngatillugu tunngavilersorneqarsimappat, matumani ilisimatuutut ilisimatusarnermut imaluunniit tusagassiutinut tunngasumik imaluunniit aaqqissuussinermit suliami atorneqartussanik, allagaatinik takunnissinnaatitaanermik qinnuteqaat taamaalilluni akuerineqassaaq.

Soorlu § 101 b, imm. 2, nr. 2-mi malittarisassatut siunnersuutigineqartumi, ilisimatusartooq imaluunniit tusagassiortoq, ilisimatuutut ilisimatusarnermut imaluunniit tusagassiutinut tunngasumik imaluunniit aaqqissuussinermit suliami atorneqartussanik allagaatinik takunnissinnaatitaanermik qinnuteqarpat, allagaatinik takunnissinnaatitaaneq pillugu qinnuteqarneq piviusumik, ilisimatuutut ilisimatusarnermut imaluunniit tusagassiutinut tunngasumik imaluunniit aaqqissuussinermit suliami atorneqartussaannngitsumik siunertaqarnera pissutsit immikkut ittut ilimanarsisinnngippatigit, eqqartuussiviup aallaaviatigut tamanna tunngavigissagaa piomasagaataavoq.

Sioqqutsisumik suliat ataasiakkaat suussusersineqarnissaat pillugit imm. 1-imi oqaaseqatigiinni siullerni piomasagaammit ilisimatuutut ilisimatusarnermut imaluunniit

tusagassiutitut tunngasumik imaluunniit aqqissuussinermut suliami atorneqartussanik allagaatinik takunnissinnaatitaanermi assingusumik ilanngussinnginnissaq pillugu aalajangersakkamik peqarnissaa siunnersuutigineqanngilaq. Tamanna pillugu § 101 e, imm. 1-imi malittarisassatut siunnersuutigineqartoq malillugu, eqqartuussutip nalunaarutigineqarnerata kingunitsiannguani piffissaq sivikinnerusoq qaangiussimappat, sioqqutsilluni suliap suussusersineqareersimanissaa – soorlu inatsisini atuuttuni taamaattoq – allagaatinik takunnissinnaatitaanermut piumasaqaataasariaqarpoq aamma ilisimatusartunut tusagassiortunullu.

Pisuni immikkut ittuni tamatuma saniatigut, sulianik sioqqullugu ataasiakkaarlugit suussusersineqarsimanngitsunik, suliat misissorneqarnissaannik tunngavilersorneqarluartumik kissaateqartoqarpat, tamanna pillugu oqartussaasut, naak taamaaliortussaannikkaluarlutik, nipangiussisusaatitaaneq akornutaatinnagu, paasissutissanik tunniussisinaaneranerat pillugu § 101 f-imi malittarisassatut siunnersuutigineqartoq malillugu noqqaassut suliarineqassaaq.

Oqartussaasumut sorlermut allagaatinik takunnissinnaatitaanermik noqqaassuteqarneq tunniunneqassanersoq *imm. 2-p* taavaa. Tamanna naleqquttutut isigineqarpat, matumani ingammik allagaatinik takunnissinnaatitaanermi ilanngunneqartussaannngitsut pillugit aalajangersakkat ilaasa atorneqarnissaat pissutissaqartumik isumaliutigineqarpat, aalajangiinissap aalajangiiffigineqannginnerani oqartussaasup suliami akuusunit imaluunniit inunnit allanit, takussutissiami taaneqartunit, oqaaseqaatit pissarsiariniarsinnaavai. Pisuni taamaattuni, tassani pinerluttulerinermik suliaq (ataaniittoq malillugu) pillugu allagaatinik takunnissinnaatitaaneq pillugu eqqartuussivik aalajangiisussaalluni, eqqartuussiviup taamatuttaaq politidirektørimit oqaaseqaat pissarsiariniarsinnaavaa. Kisianni pisut ilaanni pinngitsuugassaannngitsumik politidirektørimit oqaaseqaatit pissarsiarineqarnissaa pillugu aalajangiinissamik piginnaatitaanerup atuuttup, ingerlateqqinneqarnissaa siunnersuutigineqanngilaq, aamma taamaalilluni siunissami politidirektørimit oqaaseqaammik pissarsiniartoqarnissaata pisariaqartinneqarnera eqqartuussiviup piviusumik nalilersussavaa.

Inuit sakkutuujunngitsut pillugit suliani aamma pinerluttulerinermik suliani *eqqartuussutini aalajangiinernilu* allagaatinik takunnissinnaatitaaneq pillugu aalajangiinerit *imm. 2-mi oqaaseqatigiit siulliit* malillugit *eqqartuussivimmit* aalajangerneqartassasut siunnersuutigineqarpoq. Inunnut allagaatinik takunnissinnaatitaanermik immikkut ittumik soqutiginnittunut, *inuit sakkutuujunngitsut pillugit suliani* allagaatinik takunnissinnaatitaanermut tamanna aamma atuuppoq.

Eqqartuussiviup allagaatinik takunnissinnaatitaaneq pillugu aalajangiinera noqqaassuteqartoqarnikkut tunngavilersorneqassasoq, aamma eqqartuussisarnermik

inatsimmi §§ 517-imiit 527 ilanngullugu malillugit aalajangiineq aalajangeqqitassanngortinneqarsinnaasoq, imm. 2-mi *oqaaseqatigiit aappaata* aalajangersarpaa. Sumiiffinni eqqartuussiviit aamma Nunatsinni Eqqartuussiviup aalajangiineri taamaalillutik Nunatta Eqqartuussisuuneqarfianut akimmisaarneqanngitsumik aalajangeqqitassanngortinneqarsinnaapput, akерlianilli allagaatinik takunnissinnaatitaaneq pillugu Nunatta Eqqartuussisuuneqarfianit aalajangiinerit, eqqartuussisarnermik inatsimmi § 526 malillugu taamaallaat Procesbevillingsnævn-ip akuersissuteqarneratigut Eqqartuussiviit Qullersaanut aalajangeqqitassanngortinneqarsinnaallutik. §§ 101 a-p imaluunniit 101 b-p malitsigisaanik pinerluttulerinermik suliami allagaatinik takunnissinnaatitaaneq noqqaassutigineqarpat, tamanna aamma atuuppoq. Aalajangeqqitassanngortitsinissamut piffissaliussaq sapaatit akunnerinik 6-nnik sivisussuseqartoq pillugu eqqartuussisarnermik inatsimmi malittarisassaq atuuttoq ingerlateqqinneqassanngitsoq siunnersuutigineqarpoq, aamma eqqartuussisarnermik inatsimmi § 518 malillugu aalajangeqqitassanngortitsinissamut piffissaliussaq taamaammatt sapaatit akunneri 2-pput.

Pinerluttulerinermik suliani allagaatinik takunnissinnaatitaaneq pillugu aalajangiinerit, inunnuт allagaatinik takunnissinnaatitaanermik *immikkut ittumik soqutigisaqartunut*, imm. 2-mi *oqaaseqatigiit pingajuat* malillugu politidirektørimit aalajangerneqassasut siunnersuutigineqarpoq. Pinerluttulerinermik suliap eqqartuussivimmut saqqummiunneqarsimanera, aamma aalajangiisussaataasuni ataatsimi arlalinniluunniit suliarineqarsimanera apeqqutaatinnagu, aamma aalajangiisussaataasup sorliup imaluunniit sorliit allagaatinik takunnissinnaaneq pillugu pineqarnersut apeqqutaatinnagu, tamanna atuuppoq.

Pinerluttulerinermik sulianut politiijunngitsunit oqartussaasut allaffeqarfiinit allanit suliarineqarsimasunut, allagaatinik takunnissinnaatitaaneq pillugu noqqaassutit eqqartuussisarnermik inatsimmi malittarisassani siunnersuutigineqartuni ilaatinneqanngillat. Pinerluttulerinermik suliani taamaattuni allagaatinik takunnissinnaatitaanermik noqqaassutit, naalagaaffimmi oqartussaasoq imaluunniit namminersorlutik oqartussani oqartussaasoq pineqarnersoq apeqqutaalluni, pisortat ingerlatsinerat pillugu inatsimmi § 18-imi ilaatinneqarput (inatsisissatut siunnersuummi § 2, nr. 1-mi oqaasertalerneqartutut) imaluunniit Pisortat ingerlatsineranni suliassat suliarineqartarnerat pillugu Inatsisartut inatsisaanni § 18 malillugu, ilaatinneqarput, aamma oqartussaasut allaffeqarfiannut pineqartumut saqqummiunneqassallutik. Kisianni pinerluttulerinermik suliaq oqartussaasut allaffeqarfianni allami suliarineqareernermi kingorna politiinit suliarineqarpat, atortussani, politiit oqartussaasut allaffeqarfiannit allamit tigusimasaanni allagaatinik takunnissinnaatitaaneq pillugu noqqaassutinut, eqqartuussisarnermik inatsimmi malittarisassatut siunnersuutigineqartut aamma atuupput.

Imm. 2-mi *oqaaseqatigiit sisamaanni* paasiuminartitsinissaq pissutigalugu eqqartuussisarnermik inatsimmi § 61 e, imm. 2, aamma § 61 f, imm. 1 malillugit § 61 f, imm. 2-mut innersuussineq ilanngunneqarpoq, taannalu aamma inatsisissatut siunnersuummi § 1, nr. 3 malillugu, unnerluussisussaataasut aalajangiinerisa aalajangeqqitassanngortinneqarnerannut atuuppoq. Malittarisassat taakku siullertut naammagittaalliorsinnaanermut sapaatit akunnerinik 4-nik piffissaliussaq aalajangersarpaat aamma tulliusutut aalajangiissussaataasut marluunerannik tunngavik aalajangersarlugu, taassumalu aalajangiinerup ataasiaannarluni taamaallaat naammagittaalliuutigineqarsinnaanera kinguneraa. Naammagittaalliornermik suliaq naammagittaalliuutigineqarqissinnaanngippat, taamaalilluni politidirektørip aalajangiinera statsadvokatimut naammagittaalliuutigineqarsinnaavoq.

Allagaatinik takunnissinnaatitaaneq pillugu noqqaassutit akineqarnissaat pillugit *imm. 3-mi* malittarisassat § 101, imm. 3-mi piffissaliussaq sapaatip akunneraniit ullunut qulinut sivitsorpaat, aamma aalajangiineq ullut 10 iluanni aalajangerneqarsinnaanngippat, allagaatinik takunnissinnaatitaanermik qinnuteqartoq, tamanna pillugu, tassunga pissutaasoq aamma aalajangiinerup pinissaa qaqugu naatsorsuutigineqarnersoq pillugit nalunaaruteqarfigineqassasoq, aalajangersakkani erseqqissumik taaneqarpoq.

Allagaatit amerlasoorujussuit pineqarnerat, tassani illuatungaani qajassuunneqarsinnaasunut atatillugu takussutissat tamarmik immikkut nalilersorneqartariaqarnerat, imaluunniit inuup soqutigisaata allagaatinik takunnissinnaatitaanermi sunnerneqarneranni, inummit pineqartumit oqaaseqaatip pissarsiarineqarnissaa, aalajangiinerup ullut 10 iluanni aalajangerneqarsinnaannginneranut pissutaasinnaasutut assersuutitut taaneqarsinnaapput.

Kinaassutsinik isertuussinissaq pillugu malittarisassanik *imm. 4* imaqarpoq. Takussutissiaq inuit ataasiakkaat allanit sunissaqaratik pissuserisaat pillugit imaluunniit suliffeqarfiit inuussutissarsiornerminni isertugaataat pillugit paasissutissanik imaqarpat, allagaatinik takunnissinnaatitaaneq tunniunneqannginnerani takussutissiami kinaassutsinik isertuussinissaq *oqaaseqatigiit siulliit* periarfissiissutigaat.

§ 101 b, imm. 3, nr. 3-tut, aamma § 101 c, imm. 3, nr. 3-tut siunnersuutigineqartut taakkunungalugu oqaaseqaatit malillugit, inuit ataasiakkaat allanit sunissaqaratik pissuserisaat imaluunniit suliffeqarfiit inuussutissarsiornerminni isertugaataat pillugit paasissutissanik ilanngussinnginnermit, kinaassutsinik isertuussineq paasissutissat ilanngunneqannginnerannut naleqqiullugu (annikinnerusumik) qinigassaavoq alla. Kinaassutsit isertuunneqarnerat naammappat, taamaalilluni paasissutissat ilanngunneqassapput, kisianni kinaassutsit isertuullugit ilaatinneqassallutik.

Pineqartut kinaassusaat takuneqarsinnaajunnaartinneqarlutik takussutissiaq aaqqissorneqartoq, kinaassutsip isertuunneqarnerata isumaraa. Kinaassutsinik isertuussineq taamaalilluni tassaavoq, pineqartut inuit- suliffeqarfiiilluunniit atiisa, erseqqissumik najugaasa taaneqarnerisa aamma taamaattoqassappat pineqartut pillugit kinaassusersinissamut paasissutissat allat ilanngunneqannginnerat, taamaalilluni paasissutissanut ilanngunneqanngitsunut taarsiullugit oqaatsit arlaannaannulluunniit atanngitsut soorlu A, B, C il.il. kiisalu oqaatsit soorlu X-aqqusernga assigisaallu ilanngunneqassallutik.

Tamanna immikkut ittumik pissutissaqartillugu, *oqaaseqatigiit siulliit* malillugit kinaassutsip isertuunneqarnera taamaallaat pisinnaasoq naatsorsuutigineqarpoq. Kinaassutsinik isertuussinerup takussutissianik atuarsinnaaneq ajornarnerulersittarpaa aamma allagaatinik takunnissinnaaneq pillugu nalunaaruteqarnek kinguarsartarlugu, soorlu aamma naak kinaassutsit isertuunneqaraluartut suliat ilaanni ilisarinnissinnaaneq ajornanngitsoq. Kinaassutsinik isertuussineq aammattaaq isumalluutunik amerlasuunik atuiffiuvoq.

Eqqartuussutini aalajangiinernilu kinaassutsinik isertuussiffiusut, § 101 b-tut siunnersuutigineqartup malitsigisaanik tunniunneqartut, inatsisit il.il. pillugit paasissutissiinermut systemini eqqartuussiviit aalajangiineri pillugit saqqummiunneqartunut naleqqiullugit, annikinnerusumik pinissaat taamaalilluni naatsorsuutigineqarpoq. Inatsisit il.il. pillugit paasissutissiinermut systemit ataavartumik piffissamilu killiligaanngitsumi tikinneqarsinnaanermik siunertaqarput, matumani amerlanertigut elektroniskiusumik iluseqartut ilanngullugit. Tassani taamaammat kinaassutsinik isertuussinissamut pisariaqartitsineq annertuneruvoq, aamma inatsisissatut siunnersuummi § 1, nr. 44 (§ 485 a-tut siunnersuutigineqartoq) malillugu pinerluttulerinermik suliani eqqartuussutini aalajangiinernilu kinaassutsit isertuunneqarnissaat nalinginnaasumik piusussaaffiussasoq siunnersuutigineqarpoq.

Pasisaq unnerluunneqartorluunniit 18-it inorlugit ukioqanngippat, pasineqartoq unnerluunneqartorluunniit eqqarsaatigalugit kinaassutsip isertuunneqarnissaa pissanngitsoq ingammik naatsorsuutigineqarpoq. Tamanna eqqartuussiviup pissutissaqartikkuniuk, pasineqartoq imaluunniit unnerluunneqartoq 18-it sinnerlugit ukiulik pineqartillugu kinaassutsip isertuunneqarnissaanik suliaqarnissaq eqqartuussiviup taamaattoq periarfissarivaa.

Soorlu § 101 b, imm. 3, nr. 3-mut oqaaseqaatini takuneqarsinnaasoq, inuit ataasiakkaat *pinerluttuliorderi pillugit pissutsit*, pissutsinut pasilliutigineqartunut, imaluunniit pasineqartup siusinnerusukkut pillaatissiarisimasaanut tunggassuteqanngitsut, *kinguaassiuutitigut pissutsit*, pineqartup tamanut ilisimatitsissutigisimanngisai, imaluunniit

atornerluisuunermik ajornartorsiutit, suliamut annertuumik pingaaruteqarsimangitsut pillugit paasissutissanik takussutissiaq imaqarpat, eqqartuussutini aalajangiinernilu kinaassutsinik isertuussineq ingammik tulluartaussaaq. Tamatuma saniatigut inuiat ataasiakkaat *peqqissusaat* imaluunniit *inooqatigiinni annertuumik ajornartorsiutaat* imaluunniit suliffeqarfiit *inuussutissarsiornerminni isertugaataat* pillugit takussutissiaq paasissutissanik imaqartillugu kinaassutsinik isertuussineq tulluartaussaaq, illuatungaani inuit ataasiakkaat *naggueqatigiit ilaaffigisaat, upperisaat, amiisa qalipaataat* imaluunniit *politikkikkut* imaluunniit *peqatigiiffilerinerminni pissusaat* pillugit takussutissiaq imaqartillugu, kinaassutsit isertuunneqarnissaannut pissutissaqarnersoq, erseqqinnerusumik piviusumik naliliinikkut tunngavilersorneqassaaq.

§ 101 c-tut siunnersuutigineqartoq malillugu allagaatinik takunnissinnaatitaanermik qinnuteqarnermi, oqaaseqatigiit siulliit malillugit kinaassutsit isertuunneqarnerat qaqutigunnaq naleqquttuussaaq. § 101 b-tut siunnersuutigineqartoq malillugu eqqartuussutini aalajangiinernilu allagaatinik takunnissinnaatitaaneq kikkunnulluunniit ammavoq, akerlianilli allagaatinik takunnissinnaatitaanermik qinnuteqartup allagaatinik takunnissinnaatitaanissaminik immikkut ittummik soqutigisaqarnini qularnarunnaarsissagaa, § 101 c-tut siunnersuutigineqartoq malillugu allagaatinik takunnissinnaatitaanermut piumasaqaataavoq.

Taamaattoq § 101 c, imm. 3, nr. 3 matumuuna malillugu, uani aamma paasissutissat ilaatinngitsuinneqarsinnaanerannut naleqqiullugu kinaassutsinik isertuussineq qinigassaavoq alla. Takussutissiaq inuit ataasiakkaat allanit sunissaqaratik pissuserisaat pillugit imaluunniit inuussutissarsiornermi isertugaatit pillugit imaqarpat, qinnuteqartup allagaatinik takunnissinnaatitaanermik soqutiginninnera, inunnt suliffeqarfinnulluunniit taakkununga qajassuussassanit tunullinneqassanersoq, taamaalilluni nalilersorneqassaaq.

*Eqqartuussutit inerniliussa*at pillugit § 101 a-tut siunnersuutigineqartoq malillugu allagaatinik takunnissinnaanermut atatillugu kinaassutsit isertuunneqarnissaat aamma pisinnaangorlugu, siunnersuut ilusilersorneqarpoq. Tamanna malittarisassatut pingaarnepaatut atorneqassanngilaq, kisianni immikkut ittummik pisoqartillugu tamatuma pisariaqartinneqarsinnaanera itigartinneqarsinnaanngilaq.

Pinerluttulerinermik suliani eqqartuussisooqataasut eqqarsaatigalugit, tamatigut kinaassutsit isertuunneqartussaapput. Eqqartuussisooqataasut illersorneqarnissaannut qajassuussinermik siunnersuut tunngavilersorneqarpoq aamma allakkut eqqartuussisarnermik inatsimmi § 485-imi, eqqartuussisooqataasut kinaassusaasa tamanut saqqummiunneqarnissaannik inerteqquteqarnermut, malittarisassamut atassuserlugu isiginiarneqassalluni.

Aammattaaq kinguaassiuutitigut pinerluttuliornerit pillugit pinerluttulerinermik suliani eqqunngitsuliorfigineqartut kinaassusaat isertuunneqassasut *oqaaseqatigiit pingajuanni* siunnersuutigineqarpoq. Pinerluttulerinermik suliani taakkunani mianersuutassarujussuarni eqqunngitsuliorfigineqartup qajassuunneqarnissanik siunnersuut tunngavilersorneqarpoq aamma allakkut eqqartuussisarnermik inatsimmi § 484-imi, kinguaassiuutitigut pinerluutit pillugit pinerluttulerinermik suliani eqqunngitsuliorfigineqartut kinaassusaasa tamanut saqummiunneqarnissanik inerteqqummut atatillugu isiginiarneqassalluni.

Inuit normui allagaatinik takunnissinnaatitaanermut ilaanngitsut *imm. 5-p* aalajangersarppaa. Allagaatinik takunnissinnaatitaanermi inuit normuia ilaatinneqannginnerat Qitiusumik Inunnik Nalunaarsuiffik pillugu inatsimmi § 54, *imm. 1-imi* oqaaseqatigiinni siullerni aalajangersakkamut atassuteqarpoq, tamatumalu kingorna pisortani oqartussaasut inuinit normuisa susassaqaanngitsunit pissarsiarineqarnissaat isumagissavaat. Aalajangersagaq aamma eqqartuussivinnut atuuppoq.

Qitiusumik Inunnik Nalunaarsuiffik pillugu inatsit peqqussutikkut nr. 1198-ikkut, 29. november 2006-imeersukkut Kalaallit Nunaannut atuutilersinneqarmat maluginiarneqassaaq.

§ 101 a-tut siunnersuutigineqartoq malillugu eqqartuussutit inerniliinerini allagaatinik takunnissinnaatitaanernut, § 101 b-tut siunnersuutigineqartoq malillugu eqqartuussutinut aalajangiinernullu allagaatinik takunnissinnaatitaanernut, § 101 c-tut siunnersuutigineqartoq malillugu inunnut immikkut ittumik soqutigisaqartunut allagaatinik takunnissinnaatitaanernut kiisalu § 101 e-tut siunnersuutigineqartoq (matumuuna § 101 e, *imm. 1-miit 3* ilanngullugu aamma *5-imi* siunnersuutigineqartunut, § 101 d, *imm. 5-imi* innersuussinerit malillugit) malillugu tusagassiuutinut allagaatinik takunnissinnaatitaanernut inuit normuisa allagaatinik takunnissinnaatitaanermi ilanngunneqartussaannnginnerat atuuppoq.

Inuit normuisa allagaatini takunnissinnaatitaanermi ilanngunneqannginnissaanni normut kinaassutsimut ilisarnaataasut (kisitsisitat kingulliit sisamat) ilaatinneqarput. Kisitsisitat kingulliit sisamat ilanngunneqartinnagit, kisitsisitat siulliit arfinillit inuit normuattut (ilaannakuusuunngitsutut) isigineqanngillat. Pisut ilaanni ulloq inunngorfik (kisitsisitat siulliit sisamat taakku) kisianni kinaassutsip isertuunneqarnissaa pillugu *imm. 4-p* malitsigisaanik ilanngunneqassanngillat.

Aammattaaq inatsisissatut siunnersuutip nalinginnaasumik oqaaseqaatitaani *imm. 2.1.2* innersuussutigineqarpoq.

§ 101 e-mut

Pinerluttulerinermik suliani allakkani unnerluussutaasuni imaluunniit eqqartuussinissamik piumasaqaatini, ilanngussani ikiuutaasuni aamma naatsumik nassuaanerni, inuit sakkutuujunngitsut pillugit suliani suliami takussutissiani kiisalu imm. 2-miit 5 ilanngullugu siunnersuutigineqartut malillugit eqqartuussisut allattaaviini aamma nassuiaatit nipaasa immiussat assilillugit allaganngorneqarneranni, tusagassiuutit allagaatinik takunnissinnaatitaanerit pillugu eqqartuussisarnermik inatsimmi § 102, imm. 1-miit 5 ilanngullugu malittarisassat atuuttut pingaarnersiorlugit aalajangersakkap ingerlateqqippai. Tamatuma saniatigut imm. 1-imut siunnersuut malillugu pingaaruteqartumik nutaaliornertut, sapaatit akunnerisa kingulliit 4 iluanni eqqartuussutini nalunaarutigineqarsimasuni tamani tusagassiuutit misissuisinnaanerit pillugu, inatsisitigut malittarisassaliortoqarpoq. Imm. 6-imiit 8 ilanngullugu siunnersuutigineqartut malillugit tusagassiuutit takussutissianik atuinerit eqqartuussisarnermik inatsimmi § 102, imm. 6-imiit 8 ilanngullugu malittarisassat atuuttut assigalugit, killilerneqassasoq siunnersuutigineqarpoq.

Inunnut eqqartuussisarnermik inatsimmi § 145, imm. 1, 2-mi imaluunniit 4-imi ilaatinneqartunut aalajangersagaq atuuppoq. Atuagassiani Tusagassiuisarnermi akisussaassuseqarneq pillugu Inatsisartut inatsisaanni § 1, nr. 1-imi ilaatinneqartuni aaqqissuisut aamma aaqqissuinermik suliaqartut, nipi aamma assit atorlugit aallakaatitani Tusagassiuisarnermi akisussaassuseqarneq pillugu Inatsisartut inatsisaanni § 1, nr. 2-imi ilaatinneqartuni aaqqissuisut aamma aaqqissuinermik suliaqartut, aamma Tusagassiuisarnermi akisussaassuseqarneq pillugu Inatsisartut inatsisaanni § 1, nr. 3-mi ilaatinneqartuni aaqqissuisut aamma aaqqissuinermik suliaqartut pineqarput. Tamanna tusagassiortut allagaatinik takunnissinnaatitaanerit pillugu eqqartuussisarnermik inatsimmut § 102-imut assingulluinnarpoq.

Tusagassiortut imitsittartut immikkut ittumik eqqarsaatigalugit, taakku pisuni ataasiakkaani suliarisamik tusagassiuutinut, Tusagassiuisarnermi akisussaassuseqarneq pillugu Inatsisartut inatsisaanni ilaatinneqartunut, suliarineqarnera uppernarsarsinnaappassuk, taamaalilluni, matumuuna eqqartuussiviit tusagassiiartullu akornanni suleqatigiinneq pillugu isumaliutissiissut nr. 1330/1997 quppernerit 54-imiit 55 ilanngullugu malillugit, suliamut akisussaasumik aaqqissuisoqarpat, taakku aalajangersakkamut ilaatinneqarmata maluginiarneqassaaq.

Nutaaliornermik pingaarutilimmik *imm. 1-imi* ersersitsineruvoq. Noqqaassuteqarneq aallaavigalugu *oqaaseqatigiit siulliit* malillugit eqqartuussutit tamaasa, sapaatit akunnerini kingullerni 4-ni nalunaarutigineqarsimasut tusagassiuutit misissorsinnaassagaat, siunnersuutigineqarpoq. Taamaalillutik pingaarnertut isumaqatigiinniarnep naanerata kingorna aamma eqqartuussinerit maannakkut pisut ilisimasaqarfigilernissaat aamma § 101

b-tut malittarisassatut siunnersuutigineqartoq innersuussutigalugu eqqartuussutit tusagassiornermut tunngassuteqartumik soqutiginaateqartut pillugit assilillugit sanaqqinneqarnerinik noqqaassuteqarsinnaaneq, tusagassiuutit periarfissarilerpaat.

Tusagassiuutit aamma sapaatit akunnerisa 4 taakku kingorna allagaatinik takunnissinnaatitaammata maluginiarneqassaaq, kisianni tassani taamaallaat kikkulluunniit allagaatinik takunnissinnaatitaanerit pillugu § 101 b-tut siunnersuutigineqartoq malillugu.

§ 101 b, imm. 2, nr. 1-imi aamma 4-imi, aamma imm. 3-mi, kiisalu § 101 d, imm. 2-mi oqaaseqatigiit aappaanni aamma imm. 4-imi aamma 5-imi tusagassiuutit eqqartuussutini sapaatit akunneri 4 inorlugit nalunaarutigineqarsimasuni misissuisinnaanerannut malittarisassatut siunnersuutigineqartut taamatutaaq atuutissasut, *oqaaseqatigiit aappaanni* siunnersuutigineqarpoq.

Taamaalilluni inuit sakkutuujungitsut pillugit suliani nammineersinnaassusiiagaanernut aamma angajoqqaatut akisussaataasumik isumasiueqqaarluni pisuussutit pillugit aalajangiisinnaanermut, ataatassarsiuinermut aamma meeqqanut akilersuutit aalajangersarneqarnerannut, aappariinnermut aamma angajoqqaatut oqartussaasuuneq aamma allaffissornikkut aalajangikkamik nammineersinnaajunnaarsitsinerup misilinneqarnera imaluunniit akuersititseqqaarnani qitornavissianngortitsineq kiisalu angajoqqaatut akisussaasuuneq, meeqqap najugaqarfia imaluunniit katerisimaatigiissinnaaneq pillugu eqqartuussummik naammassisitsiniaanermik suliat (§ 101 b, imm. 2, nr. 1)

pillugit naammassinneq pillugu eqqartuussummik naammassisitsiniaanernut tunngassuteqartuni suliat, allagaatinik takunnissinnaatitaanermi ilaatinneqanngillat, aammattaaq eqqartuussinerni matoqqasuni, matunik matusineq taamaallaat eqqissisimanissaq torersuunissarlu pissutigalugit matut matuneqarsimanngippata (§ 101 b, imm. 2, nr. 4) nassuiaanerit issuarneqarnerat imaluunniit inuit normui (§ 101 d, imm. 5) allagaatinik takunnissinnaatitaanermi ilaatinneqanngillat.

Aalajangersakkanut taakkununga nassuiaatit erseqqinnerusut malillugit, § 101 b, imm. 3-mi, aamma § 101 d, imm. 4-imi oqaaseqatigiinni siullerni taaneqartutut, allagaatinik takunnissinnaatitaaneq aammattaaq *killilernerqarsinnaavoq*. Imm. 6 pillugu ataaniittoq malillugu, tusagassiuutit malittarisassatut siunnersuutigineqartoq malillugu eqqartuussutinik misissuisinnaanerit ingerlatitseqqinnissamut inerteqquteqarnermik il.il. ataqatigiissinneqarmat, kisianni tusagassiuutit allaluunniit § 101 b innersuussutigalugu eqqartuussutip assilillugu sanaqqinneqarneranik tunineqarnissamik noqqaassuteqarnerini, ilanngussinnginnerit taaneqartut atorneqarnissaannut pisariaqartitsineq assingusoq pinngitsoornani pisariaqartinneqarnaviangilaq.

Taamaammat tusagassiuutit eqqartuussummik ilanngarneqanngitsumik imaluunniit kinaassutsinik isertuussinertaqanngitsumik misissuisinnaanerat pisinnaavoq, akerlianilli tusagassiuutit tamatuma kingorna eqqartuussutip assilillugu sanaqqinneqarneranik noqqaassuteqarpata, ilanngaaneq imaluunniit kinaassutsinik isertuussineq pissaaq.

Naggataagut malittarisassat § 101 d, imm. 4-mi oqaaseqatigiit aappaattut aamma pingajuattut siunnersuutigineqartut malillugit kinaassutsinik isertuussineq *suliarineqassaaq*. Kinguaassiuutitigut pinerluttuliornerit pillugit pinerluttulerinermi suliat eqqarsaatigalugit aamma pinerluttulerinermik suliani eqqartuussisooqataasut eqqarsaatigalugit taamaalilluni, aamma aqqissuussineq siunnersuutigineqartoq malillugu tusagassiuutit allagaatinik takunnissinnaatitaanerannut tunngatillugu, kinaassutsinik isertuussineq pinngitsoornani suliarineqassaaq.

Eqqartuussiviup allagaatinik takunnissinnaatitaaneq pillugu aalajangiinera noqqaassuteqarnikkut tunngavilersorneqassaaq, aamma § 101 d, imm. 2-mi oqaaseqatigiit aappaattut siunnersuutigineqartoq malillugu eqqartuussisarnermik inatsimmi malittarisassat §§ 517-imiit 527 ilanngullugu malillugit aalajangiineq aalajangeqqitassanngortinneqarsinnaavoq.

Soorlu eqqartuussisarnermik inatsimmi § 102, imm. 1-imi malittarisassaq attuuttoq assigalugu, imm. 2 allakkanut unnerluussutaasunut tunngassuteqarpoq. Tusagassiuutit allakkanik unnerluussutaasunik, eqqunngitsuliorfigineqartut ilisimannittullu eqqarsaatigalugit kinaassutsinik isertuussiffiusunik, ilisimasaqalersinnaanerat ingerlateqqinneqassasoq siunnersuutigineqarpoq aamma eqqartuusinissamik piunasaqaateqarnerit ilanngunneqarnissaannik annertusineqarluni, imaappoq nassuernernik suliat pillugit eqqartuussisarnermik inatsimmi § 449 malillugu aalajangiinissaq siunertaralugu piunasaqaateqarnerit ilanngunneqarlutik. Aammattaaq siunissami unnerluussisusaatitaasut (eqqartuussiviunngitsoq) allakkat unnerluussutaasut aamma eqqartuusinissamik piunasaqaatit pillugit allagaatinik takunnissinnaatitaanermik akuersissuteqartarnissaat pillugu allannguut siunnersuutigineqarpoq.

Naalagaaffiup isumannaatsuunissaa il.il. pillugit ilanngussinnginnissaq, § 101, imm. 2 malillugu ullumikkut eqqartuussisarnermik inatsimmi § 102, imm. 5-imi nassaassaasoq, § 101 b, imm. 3, nr. 1-itut siunnersuutigineqartumut innersuussinikkut ingerlateqqinneqassaaq. Allakkani unnerluussutaasuni aamma eqqartuusinissamik piunasaqaammi tusagassiuutit allagaatinik takunnissinnaatitaanerannut tunngatillugu, § 101 b, imm. 3, nr. 2-tut siunnersuutigineqartumut, inatsisit unioqquatinneqarneranni, pitsaaliuineq, paasinarsisitsineq aamma eqqartuussiniarluni imaluunniit pillagassanngortitsiniarluni suliaqarneq tassani pineqarluni, innersuussutip ilanngunneqarnissaa pisariaqanngitsutut isumaqarfigineqarpoq. Taamaalilluni allagaatinik

takunnissinnaatitaasoqartinnagu eqqunngitsuliorfigineqartut ilisimannittullu eqqarsaatigalugit kinaassutsinik isertuussinerup takussutissiani suliarineqarnissaat pinngitsuugassaangilaq, aamma taakku tusagassiuutini tusagassiortunit aaqqissuinermilu sulisunit allaanerusunit tikinneqarsinnaatitaangillat.

§ 101 d, imm. 5-itut siunnersuutigineqartumut innersuussineq malillugu, inuit normuisa allagaatinik takunnissinnaatitaanermut ilanngunneqannginnissaasa erseqqissarneqarnissaa siunnersuutigineqarpoq. Oqaaseqatigiit pingajuattut siunnersuut malillugu, eqqunngitsuliorfigineqartut ilisimannittullu kinaassusaat isertuunneqartussaareermata, pasineqartup inuttut normuanut (allakkani unnerluussutini eqqartuussinissamillu piumasaqaatini tamatigut takuneqarsinnaasartumut) malittarisassaq sulisaatsimi pingaaruteqartussaavoq. Inuit normuisa allagaatinik takunnissinnaatitaanermi ilanngunneqannginnissaanni normut kinaassutsimut ilisarnaataasut (kisitsisitat kingulliit sisamat) ilaatinneqarput. Kisitsisitat kingulliit sisamat ilanngunneqartinnagit, kisitsisitat siulliit arfinillit inuit normuattut (ilaannakuusuunngitsutut) isigineqanngillat.

Tusagassiuutit takussutissiat assilillugit sanaqqinneqarnerinik tunineqarnissaannut inatsimmi allaaserisap oqaasertaani taamaallaat malittarisassiuunneqassasut, piuminarsaatit siunnersuutigineqarpoq. Taamaaliornermi noqqaasoqarneratigut unnerluussisussaataasut, tamanna naleqqutissappat, tusagassiuutinik allakkanik unnerluussutaasunik imaluunniit eqqartuussinissamik piumasaqaatinik misissuisitsisinnaanerat akornuserneqanngilaq.

Soorlu malittarisassat atuuttut malillugit pasineqartup imaluunniit unnerluunneqartup nammineq paasinnineq imaluunniit unnerluussut pillugu ilisimatinneqarsimanissaa, illersuisup ivertinneqarnissaanut isummernissaminut piffissaqartinneqarsimanissaa aamma illersuisuminik oqaloqateqarsimanissaa, assersuutigalugu taamaattoqassappat, atip taaneqarnissaanik inerteqquteqarnissamik noqqaasoqarnissaa pillugu piffissaqartoqarnissaa, tusagassiuutit allakkani unnerluussisutaasuni eqqartuussinissamillu piumasaqaatini allagaatinik takunnissinnaatitaanerannut piumasaqaataavoq. Oqaaseqatigiit sisamaanni piginnaatitsissut pillugu siunnersuutigineqartoq malillugu, allakkani unnerluussutini eqqartuussinissamillu piumasaqaatini piffissamut tunngatillugu tusagassiuutit allagaatinik takunnissinnaatitaanerannut piumasaqaatit suli inatsineqarnermut ministerimit nalunaarusiornikkut aalajangersarneqartassapput.

Soorlu eqqartuussisarnermik inatsimmi § 102, imm. 2-mi aalajangersagaq atuuttoq, ilanngussat ikiuutaasut aamma naatsumik nassuaanerit, unnerluussisussaataasunit illersuisumillu suliarineqartut *imm.* 3 tunngassuteqarpoq. Pingaarnertut isumaqatigiinniarnep nalaani tusagassiuutit takussutissianik taakkuninnga attartorsinnaanerat ingerlateqqinneqassasoq siunnersuutigineqarpoq aamma

eqqartuussisarnermik inatsimmi § 449 a malillugu eqqartuussinerit (nassuerneramik suliat) ilatinneqarnissaanik annertusineqarnissaa siunnersuutigineqarluni. Taakkununga ilanngunneqartussaangitsut, ilaatigut § 101, imm. 2, malillugu, ullumikkut eqqartuussisarnermik inatsimmi § 101, imm. 5-imi oqaaseqatigiit aappaanni nassaassaasoq, imaalillugu ingerlateqqinneqassasoq siunnersuutigineqarpoq:

Naalagaaffiup isumannaatsuunissaa il.il. pillugit ilanngussinnginnissaq § 101 b, imm. 3, nr. 1-itut siunnersuutigineqartumut innersuussinikkut ingerlateqqinneqassaaq. Allakkani unnerluussutaasuni aamma eqqartuussinissamik piumasaqaammi tusagassiutit allagaatinik takunnissinnaatitaanerannut tunngatillugu, § 101 b, imm. 3, nr. 2-tut siunnersuutigineqartumut, inatsisit unioqqutinneqarneranni, pitsaaliuineq, paasinarsisitsineq aamma eqqartuussiniarluni imaluunniit pillagassanngortitsiniarluni suliaqarneq tassani pineqarluni, innersuussutit ilanngunneqarnissaa pisariaqaangitsutut isumaqarfigineqarpoq. Ilangussat attartortinneqartut taamaalillutik tusagassiutit tusagassiortunit aamma aqqissuinermit sulisunit allannerusunit tikinneqartussaangillat, aamma inunnut peqataasunut qajassuussinissap tamanna pissutissaqartippagu (ataaniittoq malillugu) allagaatinik takunnissinnaatitaanermit ilanngussinnginnissaq periarfissaassaag.

Takussutissiap qanoq ittuunera pillugu ilanngussinnginnissaq ingerlateqqinneqassasoq siunnersuutigineqarpoq. Takussutissiamit assigiiat ilaata ataatsip attartortinneqarnissaa siunertaralugu sananeqarnerata ajornakusoorinissaa imaluunniit akisunissaa takussutissiap »qanoq ittuuneranut« tikkuavaoq. Takussutissiap *imaata* (mianersuussassat) qajassuunneqarnerata ataanni allagaatinik takunnissinnaatitaanerit itigartinneqarnerat kisianni naalagaaffiup isumannaatsuunissaa il.il. pillugit malittarisassap qulaani taaneqartup imaluunniit inunnut peqataasunut immikkut ittumik qajassuussinerit ataani taaneqartut innersuussutugalugit pisariaqaralarput.

»Pasineqartumut, unnerluussamut imaluunniit ilisimannittunut pingaarutilimmik qajassuussinerit« pillugit ilanngussinnginneq allanngortinneqassasoq siunnersuutigineqarpoq, taamaalilluni »pingaarutilimmik qajassuussinerit« »immikkut ittumik qajassuussinerit« allanngortinneqassalluni, aamma taamaalilluni pasineqartumit, unnerluunneqartumit imaluunniit ilisimannittunit allaanerusunut qajassuussineq allagaatinik takunnissinnaatitaanerup killilerneqarneranut tunngavilersuutaasinnaavaoq. Eqqunngitsuliorfigineqartoq, aamma ilisimannittuunngitsaq, imaluunniit eqqunngitsuliorfigineqartumut imaluunniit pasisamut, unnerluunneqartumut imaluunniit ilisimannittunut qanigisaasut, assersuutit taaneqarsinnaapput. Allannuummut tassunga ingammik § 101 c, imm. 3, nr. 4-imi malittarisassatut siunnersuutigineqartumi oqimaaqatigiissitsinissap pilersinneqarnissaa siunertarineqarpoq. Inunnut, allagaatinik takunnissinnaatitaanermit immikkut ittumik soqutigineqarnermik

qularnarunnaarsitsisimasunut ilanngussat ilanngunneqarsimanngitsut, tusagassiuutit taamaalillutik attartorsinnaanaviannngilaat. Oqaatsitigut allannguneq una, – soorlu allakkut allagaatinik takunnissinnaatitaaneq pillugu malittarisassatut siunnersuutigineqartuni – immikkut ittumik »unnerluussaasoq«-mut innersuussisisoqassanngitsoq siunnersuutigineqarpoq, tassami »pasineqartoq« tassaavoq nalinginnaasumik taagut, tassanilu pasineqartoq, aamma unnerluussaasoq ilaatinneqarpoq.

§ 101 d, imm. 5-imut innersuussineq malillugu, inuit normui allagaatinik takunnissinnaatitaanermi ilaatinneqannginnerisa erseqqissarneqarnissaa siunnersuutigineqarpoq.

Eqqartuussisarnermik inatsimmi § 102, imm. 3 atuuttoq assigalugu, *imm. 4* inuinnaat pillugit suliani suliami takussutissianut tunngassuteqarpoq. Akuusut akuersissuteqarnerisigut eqqartuussinerup nalaani tusagassiuutit takussutissiamik ataatsimik arlalinnilluunniit attartorsinnaanerat ingerlateqqinneqassasoq siunnersuutigineqarpoq.

Ataani imm. 6 aamma 7 pillugit allaaserisat malillugit, akuusut suliami takussutissiat nakkutigisaasumik attartortinneqarsinnaaneranngit iliuuseqarnissamik periarfissinneqarput, tassani tusagassiuutit pinerluttulerineq pillugu inatsiseqartitsinerup ataani takussutissiat utertinneqarnissaat aamma taakku taamaallaat tusagassiornermik suliaqarnermi atornerqarnissaat pisussaaffittut akisussaaffigigaat aalajangersakkap ersersippaa.

Pigisat agguanneqarneri pillugit suliat aamma nammineersinnaassusiagaanernut aamma angajoqqaatut akisussaataasumik isumasiueqqaarluni pisuussutit pillugit aalajangiisinnaaneq, ataatassarsiuineq, meeqqanut akilersuutit aalajangiiffigineqarnerat, apparilerneq aamma angajoqqaatut oqartussaasuuneq aamma allaffissornikkut aalajangikkamik nammineersinnaajunnaarsitsinerup misilinneqarnera imaluunniit akuersititseqqaarnani qitornavissianngortitsineq pillugit suliat pillugit ilanngussisoqannginnissaa atorlugu piuminarsaaneq siunnersuutigineqarpoq. Akuusut (tamarmik) marluullutik akuersissuteqarnerisigut attartortitsineq taamaallaat pisinnaammat, taamaattumik ilanngussinnnginnissaq pillugu aalajangersaanissaq pisariaqanngilaq.

Soorlu eqqartuussisarnermik inatsimmi § 101, imm. 4-imi atuuttumi, eqqartuussisut allattaaviinut aamma nassuiaatit nippaasa immiunneqarsimasut allanneqarnerinut *imm. 5* tunngassuteqarpoq. Eqqartuussisut allattaaviini allassimasunik tusagassiuutit ilisimasaqarsinnaatitaanerat ingerlateqqinneqassasoq siunnersuutigineqarpoq. § 101 e, imm. 5-itut siunnersuutigineqartumi eqqartuussisut allattaaviini ilanngussani eqqartuussutaanngitsunit aamma aalajangiinerunngitsunit, *oqaaseqatigiit siulliit* malillugit tunngavilersorneqartussanit, allaanerusut ilaatinneqarput, tassami eqqartuussutini

aalajangiinernilu allagaatinik takunnissinnaatitaaneq § 101 b-tut siunnersuutigineqartumit malittarisassiuunneqarpoq.

Inatsisip oqaasertaata taamaallaat tusagassiuutit eqqartuussisut allattaaviini ilanngunneqartut assilillugit sanaqqinneqarnerinik tunineqarsinnaanerata taamaallaat malittarisassiussagaa, piuminarsaanertut siunnersuutigineqarpoq. Taamaaliornerup eqqartuussiviup noqqaassuteqarnikkut, tamanna naleqquttutut isigineqarpat, tusagassiuutit tassunga taarsiullugu eqqartuussisut allattaaviinik misissuisinnaanerata akornusinngilaat.

Inatsisinut atuuttunut naapertuuttumik, inimi eqqartuussiviusumi matunik matusineq taamaallaat eqqissisimanissaq aamma torersuunissaq eqqarsaatigalugit pisimangippat, eqqartuussineq tamakkiisumik ilaannakoortumilluunniit malillugit ingerlanneqarsimappat, tusagassiuutit eqqartuussisut allattaaviini allagaatinik takunnissinnaatitaanerata atuutissanngitsoq *oqaaseqatigiit aappaanni* siunnersuutigineqarpoq.

§ 101 b, imm. 2, nr. 1-itut aamma 5-itut, aamma imm. 3-tut, kiisalu § 101 d, imm. 1-imi oqaaseqatigiit siulliattut, imm. 2-mi oqaaseqatigiit aappaattut, aamma imm. 4-tut aamma 5-itut siunnersuutigineqartuni malittarisassat tusagassiuutit eqqartuussisut allattaaviini allagaatinik takunnissinnaatitaanerannut atuutissasut, aammattaaq *oqaaseqatigiit pingajuanni* siunnersuutigineqarpoq.

Soorlu inatsisit atuuttut malillugit tusagassiuutit eqqartuussisut allattaaviini allagaatinik takunnissinnaatitaaneq pillugu noqqaassuteqarnermini, taamaalillunik suliaq allagaatinik takunnissinnaatitaanermini takunnissinnaatitaaffiginissaanik kissaatigineqartoq suussusersissavaat (§ 101 d, imm. 1-imi oqaaseqatigiit siulliit).

Aammattaaq aamma taamatut inatsisinut atuuttunut naapertuuttumik inuit sakkutuujunngitsut pillugit suliani apparinneq, angajoqqaatut oqartussaasuuneq, katerisimaaqatigiissinnaaneq, ataatassarsiuineq, angajoqqaatut akisussaataasumik isumasieqqaarluni pisuussutit pillugit aalajangiisinnaaneq, aamma allaffissornikkut aalajangikkamik nammineersinnaajunnaarsitsinerup misilinneqarnera imaluunniit akuersitseqqaarnani qitornavissiannngortitsineq pillugit suliat pillugit allagaatinik takunnissinnaatitaaneq ilaatinneqanngilaq, aamma nassuiaatit, imaqarniliornissamik inerteqquteqarnerni ilaatinneqartut (§ 101 b, imm. 2, nr. 5) allagaatinik takunnissinnaatitaanermini aammattaaq ilaatinneqanngillat. Nassuiaatini imaqarniliornissamik inerteqquteqarnermini ilaatinneqartuni ilaatitsinnginneq nutaajusoq, tusagassiuutit eqqartuussisut allattaaviini allagaatinik takunnissinnaatitaanerannut killiliussat assigisariaqaraat, soorlu nalinginnaasumik eqqartuussutini aalajangiinernilu allagaatinik takunnissinnaatitaanermini taamaattoq, killiliinerit assigingisa atuuttariaqarnerannik tunngavilersorneqarpoq. Taakkununga oqaaseqaatit erseqqinnerusut

malillugit, allagaatinik takunnissinnaatitaaneq taamaattumik § 101 b, imm. 3-mi, aamma § 101 d, imm. 4-imi oqaaseqatigiinni siullerni taaneqartut annertutigisumik killilerneqarsinnaavoq, tamatumalu peqatigisaanik illuatungaani pigisat agguarneqarneri pillugit ilanngussinnnginnissap atuuttup ingerlateqqinneqannginnissaa siunnersuutigineqartoq.

Eqqartuussisarnermik inatsimmi § 101 d, imm. 5-itut siunnersuutigineqartoq malillugu naggataagut § 101 d, imm. 4-imi oqaaseqatigiit aappaanni pingajuannilu malittarisassatut siunnersuutigineqartut malillugit kinaassutsit isertuunneqarneri suliarineqassapput, aamma inuit normui (kisitsisitat kingulliit sisamat) ilanngunneqassanngillat. Kinguaassiuutitigit pinerluttuliornerit pillugit pinerluttulerinermik suliani eqqunngitsuliorfigineqartut eqqarsaatigalugit aamma pinerluttulerinermik suliani eqqartuussisooqataasut eqqarsaatigalugit kinaassutsinik isertuussineq taamaalilluni aamma tusagassiuutit eqqartuussisut allattaaviini allagaatinik takunnissinnaatitaanerannut tunngatillugu pinngitsuugassaannngilaq.

Eqqartuussiviup allagaatinik takunnissinnaatitaaneq pillugu aalajangiinera noqqaassuteqarnikkut tunngavilersorneqassaaq, aamma aalajangiineq § 101 d, imm. 2-mi oqaaseqatigiit aappannut innersuussineq malillugu eqqartuussisarnermik inatsimmi §§ 517-imiit 527 ilanngullugu malittarisassat malillugit aalajangeqqitassanngortinneqarsinnaavoq.

Eqqartuussisarnermik inatsimmi § 102, imm. 6-imi malittarisassaq atuuttoq *imm. 6-imi oqaaseqatigiit siulliit* ingerlateqqippaat. Takussutissiat assilillugillu sanaqqitat imm. 1-imiit 5 ilanngullugu malitsigisaannik tusagassiuutit misissorsinnaasaat, imaluunniit tunniunneqartut attartortinneqartulluunniit, taamaalillutik tusagassiuutit tusagarsiortuinit aamma aaqqissuineramik sulisuinit allaanerusunit tikinneqarsinnaasussaannngillat aamma tusagassiuinermut aamma aaqqissuinermi sulinermut taamaallaat atorneqartussaapput. Pisuni unnerluussisussaataasut noqqaassuteqarnikkut tusagassiuutit allakkani unnerluussutini imaluunniit eqqartuussinissamik piumasaaqatini misissuisinnaanerannik akuersissuteqarneranni, imaluunniit noqqaassuteqarnikkut eqqartuussiviup tusagassiuutit eqqartuussisut allattaaviini ilanngunneqartunik misissuinissaannik akuersissuteqarneranni, malittarisassaq aamma atuuppoq.

Pinerluttulerinermi suliami, suliap inaarutaasumik naammassineqannginnerani, inuit eqqartuussisarnermik inatsimmi § 145, imm. 1-imi, 2-mi imaluunniit 4-imi ilaatinneqartut, § 101 b-tut siunnersuutigineqartup malitsigisaanik aalajangiinerup assilillugu sanaqqinneqarneranik tunineqarpata, assilillugu sanaqqitaq, suliap inaarutaasumik naammassineqarnissaata tungaanut, tusagassiuutit tusagarsiortuinit aamma aaqqissuinermi sulisuinit inunnit allaanerusunit tikinneqarsinnaassanngitsoq, aamma tusagassiornermut aaqqissuinernullu tunngasunut ikiuutitut taamaallaat atorneqassasoq, tassunga atatillugu

imm. 6-imi oqaaseqatigiit aappaata aalajangerpaa. Oqaaseqatigiinni siullerni inerteqquteqarnerup akerlianik, oqaaseqatigiit aappaanni inerteqquteqarnek allakkut oqaaseqatigiinni siullerni inerteqquteqarnerup assigilluinnangajarisaa, taamaalilluni suliap inaarutaasumik naammassineqarnissaata tungaanut, aamma § 101 b-tut siunnersuutigineqartoq malillugu kikkulluunniit taamaamat aalajangiinermi allagaatinik takunnissinnaatitaalernerisa tungaannut, atuuppoq. Piffissap taassuma kingorna, tusagassiuutit pinerluttulerinermik suliani aalajangiinerit pillugit assilillugit sanaqqitanik pineqartunik atuinerat, taamaallaat inatsimmi malittarisassat nalinginnaasut kiisalu inatsissatut siunnersuummi § 1, nr. * (eqqartuussisarnermik inatsimmi § 485 a-tut siunnersuut) malillugu eqqartuussutit aalajangiinerillu tamanut issuarneqarnerannut atatillugu kinaassutsit isertuunneqarnissaat pillugu malittarisassatut siunnersuutigineqartoq malillugit malittarisassiuunneqarput.

Eqqartuussisarnermik inatsimmi § 102, *imm. 7-imi malittarisassaq* atuuttoq, *imm. 6-imi oqaaseqatigiit pingajuata* ingerlateqqippaa. Taamaalilluni tusagassiuutit assilillugit sanaqqitat, *imm. 2* aamma *5* malillugit tunniunneqartut, aamma assilillugit sanaqqitat *imm. 6-imi oqaaseqatigiit aappaanni eqqartorneqartut toqqorneqartarnissaat* pillugit Inatsiseqarnermut ministereqarfik malittarisassanik aalajangersaasinnaavoq. Pisuni tusagassiuutit nammineerlutik assilillugit sanaqqitanik amerlanerusunik sananeranni malittarisassaq aamma atuuppoq.

»Eqqartuussinerup nalaani« takussutissiat atortinneqartarnerat qanoq isumaqarnersoq, *imm. 6-imi oqaaseqatigiit sisamaata* erseqqissarpaa. Takussutissiat attartorneqartut, kingusinnerpaamik eqqartuussinerup naammassineqarnerani utertinneqassasut, qallunaat eqqartuussisarnermik inatsisaanni siusinnerusukkut § 41 a-usimasoq pillugu, aamma Kalaallit Nunaanni eqqartuussisarnermik inatsimmi § 102-p tunngavigisaata, piareersaataasumik suliarineqarnerani takuneqarsinnaavoq. Takussutissiat, *imm. 3* imaluunniit *4* malillugit attartorneqartut, kingusinnerpaamik eqqartuussinerup naammassineqarnerani utertinneqarnissaat pillugit, malittarisassakut (akiliisitsissummik pineqaatissiiertalimmik) taassuma inatsimmi oqaasertani erseqqissarneqarnissaa siunnersuutigineqarpoq.

Tusagassiuutit takussutissianik assilillugillu sanaqqitanik atuinerat pillugit *imm. 6-imi oqaaseqatigiinni siullerni, aappaanni aamma sisamaanni malittarisassanik unioqqutinneqarnerat akiliisitsissummik akiliisitaasussanngortitsissutaasinnaasoq, imm. 7-p aalajangersarpaa.* Najoqqutassani malittarisassanik unioqqutitsinermi akiliisitsissummik akiliisitaasussanngortitsisoqarsinnaasoq, tusagassiuutit assilillugit sanaqqitanik toqqorsisarnissaat pillugit allaffissornikkut najoqqutassani aalajangersarneqassasoq, aalajangersakkap aammattaaq periarfissaliissutigaa. Eqqartuussisarnermik inatsimmi § 102,

imm. 8-imi oqaaseqatigiinni siullerni aappaannilu malittarisassanut atuuttunut taanna assingulluinnarpoq.

Pinerluttulerinermi inatsimmi kapitali 5-imi malittarisassat malillugit ingerlatseqatigiiffiit il.il. (inatsisitigut pisinnaatitaasut pisussaataitaasullu) pinerluttulerineq pillugu inatsiseqartitsineq malillugu akisussaatinneqarsinnaasut *imm. 8-p* aalajangersarparaa. Imm. 7, oqaaseqatigiit siulliit malillugit, imm. 6-imi oqaaseqatigiinni siullernik, aappaannik aamma sisamaannik unioqqutitsinermi, aamma najoqqutassanik imm. 7-imi oqaaseqatigiit aappaat malillugu aalajangersarneqartunik unioqqutitsinerni tamanna atuuppoq. Eqqartuussisarnermik inatsimmi § 102, imm. 8-imi oqaaseqatigiit pingajuanni malittarisassanut atuuttunut tunngatillugu, inatsisitigut pisinnaatitaasup pisussaataitaasullu pinerluttulerineq pillugu inatsiseqartitsineq malillugu akisussaataitaanera, inatsiseqarnermut ministerimit piginnaatitaanikkut tamanna pillugu malittarisassanik aalajangersaasoqarneranut taarsiullugu, toqqaannartumik inatsimmi aalajangersarneqassasoq siunnersuutigineqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.1.2 innersuussutigineqarpoq.

§ 101 f-imut

Aalajangersagaq annertunerusumik paasissutissiinissamut tunngavoq. Inuit sakkutuujunngitsut pillugit suliat aamma pinerluttulerinermik suliat pillugit qaqugukkut oqartussaasut allagaatinik takunnissinnaatitaanermik *pisussaaffeqarneri* §§ 101 a-miit 101 ilanngullugu malittarisassatut siunnersuutigineqartuni erseqqissumik taaneqarnissaat aalajangersakkani siunertaavoq, aamma qaqugukkut oqartussaasut taamaaliornissamut *pisinnaatitaanerat* taaneqartut saniatigut uani pineqanngilaq. Oqartussaasut, naak taamaaliortussaanngikkaluarlutik, nipangiussisussaataitaneq akornusiinngippat, paasissutissanik tunniussisinnaanerattut pillugu naleqquttumik tunngavilersukkanik noqqaassutit oqartussaasunit akuersissutigisariaqarnerannut kalerrisaarinissaq aalajangersakkap aammattaaq siunertaraa.

Oqartussaasut, naak taamaaliortussaanngikkaluarlutik, nipangiussisussaataitaneq akornusiinngippat, paasissutissanik tunniussisinnaanerattut allagaatinik takunnissinnaatitaaneq pillugu noqqaassutit, aammattaaq oqartussaasumit allagaatinik takunnissinnaatitaaneq pillugu aalajangiisussaasumit suliarineqassapput. Taamaalilluni inuit sakkutuujunngitsut pillugit suliani imaluunniit eqqartuussutini aalajangiinernilu, inatsit malillugu tunngavilersorneqartussaasuni, pinerluttulerinermik suliani, oqartussaasut, naak taamaaliortussaanngikkaluarlutik, nipangiussisussaataitaneq akornusiinngippat, paasissutissanik tunniussisinnaanerattut allagaatinik takunnissinnaatitaaneq pillugu noqqaassutit eqqartuussivimmut saqqummiunneqassapput, aamma allakkut

pinerluttulerinermik suliani, matumani pinerluttulerinermik suliani ingerlasuni, allagaatinik takunnissinnaatitaanermik qinnuteqartoqarpas, politidirektørimut noqqaassut saqqummiunneqassaaq. Tassunga atatillugu § 101 d, imm. 2-mi malittarisassatut siunnersuutigineqartut innersuussutigineqarput.

Oqartussaasut, pisussaaffitsik sinnerlugu qaqugukkat annertunerusumik allagaatinik takunnissinnaatitaanissamat pisinnaatitaanerannut killiliineq, siullerpaamik nipangiussisussaataitaneq pillugu malittarisassanit killilerneqarpoq. Eqqartuussiviit pineqartillugit pinerluttulerinermi inatsimmi § 50 pineqarpoq, aamma politiinut unnerluussisussaataitaasunullu pinerluttulerinermi inatsimmi § 50 aamma pisortat ingerlatsinerat pillugu inatsimmi § 27 pineqarluni.

Pisortat ingerlatsinerat pillugu inatsit peqqussutikkut nr. 1188-ikkut 27. december 1994-imeersukkat Kalaallit Nunaannut atuutilersinneqarmat maluginiarneqassaaq.

Suliassa qarfinnut marlunnut tikkuarneqartunut oqartussaasut, naak taamaaliortussaangikkaluarlutik, nipangiussisussaataitaneq akornusiinngippat, paasissutissanik tunniussisinnaanerat ingammik tassani inissaminiissinnaavoq.

Tamanna *siullertut* tusagassiortunut tunngatillugu atuuppoq, tassani oqartussaasut §§ 101 a-miit 101 e ilanngullugu malittarisassatut siunnersuutigineqartut qaangerlugit naleqquttumik tunngavilersukkanik tusagassiortunut allagaatinik takunnissinnaatitaanermik noqqaassuteqartunut akuersaartariaqarlutik.

Ilisimatuutut misissuinerannut assigisaannulluunniit tunngatillugu tamanna *aappaattut* atuuppoq. Ilisimatusartut ilisimatusarnerminni suliniutaannut tutsuiginartunut, tamanut pingaarutilimmik soqutiginarlutik, atugassaminnik allagaatinik takunnissinnaatitaanermik noqqaassuteqarneranni oqartussaasut akuersaartariaqarput.

Tamatuma saniatigut pinerluttulerinermik suliani, suliap inaarutaasumik naammassineqarnera sioqqullugu, eqqunngitsuliorfigineqartoq allagaatinik takunnissinnaatitaanermik noqqaassuteqarpat, akuersaartumik pissuseqarnissaq pissutissaqarsinnaavoq. Tamanna pisuni, tassani unnerluussinerup imaluunniit unnerluussutip taamaatiinnarneqarnerani, kisianni unnerluussisussaataitaasut qullersaata eqqartuussisarnermik inatsimmi § 315, imm. 1 malillugu aalajangiinerup allanngortinneqarnissaanik periarfissaqarnerani, aamma tassani allagaatinik takunnissinnaatitaanermik noqqaassuteqarneq unnerluussisussaataitaasut qullersaannut naammagittaalliortoqassappat naammagittaalliornissamat atugassamik paasissutissanik pissarsinissamik kissaateqarnermik tunngavilersorneqarpat, ingammik atuuppoq.

Pisumi piviusuni tulluartumik naleqquttumillu ilusilerlugu piumasaqaatitalerlugulu oqartussaasut, naak taamaaliortussaangikkaluarlutik, nipangiussisussaataaneq akornusiinngippat, paasissutissanik tunniussisinnaaner atarlugu tunniunneqarsinnaavoq.

Nipangiussisussaataanermt tunngatillugu, nipangiussisussaataaneq taamaallaat paasissutissat isertuunneqartussat pineqartillugit naleqquttuummat siullertut maluginiarneqassaaq. Paasissutissanut isertuussaangitsunut tunngatillugu pinngitsoorani oqartussaasut, naak taamaaliortussaangikkaluarlutik, nipangiussisussaataaneq akornusiinngippat, paasissutissanik tunniussisinnaapput.

Kisianni suliat eqqartuussisutigoortut amerlanertigut paasissutissanik isertugaasunik imaqartarput, aamma atortussani annertoorujussuarni allagaatinik takunnissinnaaneq qinnutigineqarpat, oqartussaasut atortussat aaqqissuunnissaannut isumalluutunik peqarnissaat pinngitsoornani ilimagineqarsinnaangilaq, taamaalilluni paasissutissat ilanngunneqartussaangitsut ilanngunneqassanatik imaluunniit kinaassutsinik isertuussineq suliarineqarsinnaanani. Assersuutigalugu ilisimatusarneq ilaannikkut aamma paasissutissanut isertugaasunut tunngassuteqartarnera, taamaalilluni taakkunani allagaatinik takunnissinnaatitaaneq aalajangersimasumik kissaatigineqartarluni, soorlu aamma takussutissiap ilisarinninnissaq pisinnaajunnaarlugu kinaassutsinik isertuussiffiginissaata ajornartarnera, tassunga aamma ilaavoq.

Paasissutissanut isertugaasunut tunngatillugu oqartussaasut, naak taamaaliortussaangikkaluarlutik, nipangiussisussaataaneq akornusiinngippat, paasissutissanik tunniussisinnaaneranni, paasissutissat »akuerisaangitsut« ingerlateqqinneqanginnissaat piumasaqaataavoq. Tamanna piviusumik nalilersuineramik tunngaveqassaaq, tassani ilaatigut – assersuutigalugu – ilisimatusarnermik suliniutip suussusaa aamma aaqqissugaanera ilaatinneqassalluni. Ilisimatusarnermik suliniut pisortani atorfeqartunit, sulinerminnut atatillugu suliarineqarpat, taamaappat paasissutissanut isertuussaasunut tunngatillugu pinerluttulerinermi inatsimmi § 50 malillugu ilisimatusartut nipangiussisussaataaner at pingaaruteqarpoq. Pinerluttulerinermik suliat pineqartillugit illuatungaani politiit unnerluussisussaataasullunniit inunnut pisortani ingerlatsiviit avataanniittunut paasissutissanik isertugaasunik oqartussaasut, naak taamaaliortussaangikkaluarlutik, nipangiussisussaataaneq akornusiinngippat, paasissutissanik tunniussisinnaaneranni ingerlatitseqqinnertut pisortat ingerlatsinerat pillugu inatsimmi § 27, imm. 3 malillugu pineqartut nipangiussisussaataaneramik peqquneqarsinnaaner at periarfissarivaat. Imm. 2 pillugu ataaniittoq malillugu inunnut eqqartuussiviit aamma pisortat ingerlatsiviisa avataanniittunut eqqartuussiviit paasissutissanik isertugaasunik ingerlatitseqqittarneranni malittarisassaq assingusoq siunnersuutigineqarpoq.

Nipangiussisussaatitaaneq *il.il.* pillugu malittarisassat tamanna allatut malitsiginngippagit, § 101 f-imut siunnersuut oqartussaasut, naak taamaaliortussaangikkaluarlutik, nipangiussisussaatitaaneq akornusiinngippat, paasissutissanik tunniussisinnaanerat periarfissanngorlugu oqaasertalerneqarpoq. »Il.il.«-imik ilanngussineq pisortat ingerlatsinerat pillugu inatsimmut, aamma Inunnik paasissutissanik suliarinnittarneq pillugu inatsimmut, peqqussutikkut nr. 1238-ikkut 14. oktober 2016-imeersukkut Kalaallit Nunaannut atuutilersinneqartumut pisortat ingerlatsinerisa iluanni paasissutissanik ingerlatitseqqittarneq pillugu malittarisassanut ingammik tikkuaassivoq.

Inummut eqqartuussiviit pisortanilu ingerlatsiviit avataaniittumut, eqqartuussiviit pineqartumut taamatut pisussaatitaanani, paasissutissat isertugaasut ingerlateqqitai pillugit nipangiussisussaatitaaneraniq eqqartuussiviup aalajangiisinnaanera, *imm. 2-p* periarfissiissutigaa. Pisortat ingerlatsinerat pillugu inatsimmi § 27, *imm. 3*-mut atuuttumut siunnersuut manna qanittumik assinguvoq, taannalu ingerlatsinermi oqartussaasup paasissutissat isertuussaasut inunnut pisortani ingerlatsiviit avataaniittunut taamatut pisussaatitaanani paasissutissanik isertuussaasunik ingerlatitseqqinnerani ingerlatsivinni oqartussaasup nipangiussisussaatitaanermik peqqussuteqarsinnaanera malittarisassiuupaa.

Imm. 2 imm. 1-iminngaanniit killeqarneruvoq, tassami taanna taamaallaat *eqqartuussiviup* paasissutissanik ingerlatitseqqinneranut atuummat. Tamanna *politiit unnerluussisussaatitaasullu* inunnut pisortat ingerlatsiviisa avataaniittunut paasissutissanik ingerlatitseqqinnerat pisortat ingerlatsinerat pillugu inatsimmi § 27, *imm. 3*-mit malittarisassiuunneqareerneraniq pissuteqarpoq.

Taamatut pisussaatitaanani eqqartuussiviup paasissutissanik *isertuussaasunik* ingerlatitseqqinnerannut *imm. 2* taamaallaat atuuppoq, imaappoq *imm. 1-p* malitsigisaanik oqartussaasut, naak taamaaliortussaangikkaluarlutik, nipangiussisussaatitaaneq akornusiinngippat, paasissutissanik tunniussisinnaanerattut paasissutissiinermi atuulluni. Taamaalliluni §§ 101 a-miit 101 e ilanngullugu malittarisassatut siunnersuutigineqartut malillugit eqqartuussiviup allagaatinik takunnissinnaatitaanermik tunniussineranni *imm. 2* ilaatigut atorneqarsinnaanngilaq.

Nipangiussisussaatitaanermik peqqussummik unioqqutitsinermi, tassunga *oqaaseqatigiit aappaanni* innersuussineq malillugu, pinerluttulerinermi inatsimmi § 50 malillugu pineqaatissiisoqarsinnaavoq. Aamma pinerluttulerinermi inatsimmi §§ 52-imiit 54 ilanngullugu taamatutaaq atuupput. Uani pisortat ingerlatsinerat pillugu inatsimmi § 27, *imm. 4*-mut siunnersuut naapertuulluinnarpoq.

Aammattaaq inatsisissatut siunnersuummut oqaaseqaatini nalinginnaasuni *imm. 2.1.2* innersuussutigineqarpoq.

§ 102-mut.

Inuit sakkutuujunngitsut pillugit suliani akuusut allagaatinik takunnissinnaatitaanerat aalajangersakkami pineqarpoq. Inuit sakkutuujunngitsut pillugit eqqartuussisarnerup iluani assortuuttoqannginnissaanik tunngavik naapertorlugu, pingaarnerpaatut malittarisassaq pingaarneq malillugu suliami atortussani tamarmiusuni akuusut allagaatinik takunnissinnaatitaanerat, aalajangersakkap aalajangersarpaa.

§ 101 atuuttoq assigalugu, aalajangersagaq aalajangersakkatut katersuuffittut pissuseqarpoq, taassumalu inuit sakkutuujunngitsut pillugit suliani qaqugukkulluunniit akuusut suliami takussutissianik allagaatinik takunnissinnaatitaanerat periarfissippaa. Inuit sakkutuujunngitsut pillugit suliap suliarineqarnerata nalaani, nalinginnaasumik takussutissianik paarlaasseqatigiinneq pisartoq aalajangersakkap taamaalilluni isiginiangilaa. Tamanna pillugu eqqartuussisarnermik inatsimmi malittarisassat tunngaviillu nalinginnaasut atuupput.

§ 102-tut siunnersuutigineqartup atorneqakkajunnissaa naatsorsuutigineqanngilaq, tassami inuit sakkutuujunngitsut pillugit suliat nalinginnaasumik suliarineqarnerannut atatillugu akuusut takussutissiat suliamut tunngassuteqartut tamaasa tigusarmatigit. Kisianni suliani naammassineqareersuni akuusup allagaatinik takunnissinnaatitaanera, immaqa tassani suliap takussutissartaanik akuusoq pigisaqarunnaarsimalluni, aalajangersakkap periarfissippaa. Suliami ingerlasumi akuusup sumik arlaanik pissuteqarluni takussutissiamik amigaateqarnerminik isumaqarnerani, akuusoq eqqartuussivimmit imaluunniit illuatungiliuttumit takussutissiamik pereersimasussaanera imaluunniit pereersimanera apeqqutaatinnagu, tamatigit takussutissiap pineqartup assilillugu sananeqarneranik eqqartuussivimmit pinissaata periarfissaanera aalajangersakkap aammattaaq qulakkeerpaa.

§ 101-imut atuuttumut tunngatillugu naalagaaffiup isumannaatsuunissaanut il.il. tunngassuteqartunik aamma takussutissiat inatsisit unioqqutillugit atorneqarnissaat aarlerigalugu ilanngussinnginnissat peerneqarput, tassami ilanngussinnginnerit taakku inuit sakkutuujunngitsut pillugit suliani akuusunut tunngatillugu sulisaatsimi atorneqarneq ajorput.

Inuit sakkutuujunngitsut pillugit suliami akuusup takussutissiat suliamut tunngassuteqartut, matumani eqqartuussisut allattaavianni allatat ilanngullugit, assilillugit sananeqarnerinik piunasaqaateqarsinnaanerani *imm. 1-imi oqaaseqatigiit siulliit* aallaavik nalinginnaasooq aalajangersarpaa. Inuup allagaatinik takunnissinnaatitaanermik qinnuteqartup, suliami akuunini uppersarsassavaa.

Eqqartuussisarnermik inatsimmi nalinginnaasumik akuusoq pillugu oqaatsip imarisaa naapertorlugu suliassiisoq aamma suliassanngortitaq kiisalu inuk eqqartuussinerup nalaani suliame pineqartoq imaluunniit piunasaqaat pillugu, suliame aallaqqaammut piunasaqaammut qanittumik atassuteqartumik aallaqqaammut akuusunut immikkut ittumik piunasaqaammik saqqummiussisoq aamma eqqartuussinermik suliame ingerlasumi akuusut ilaata inummik pingajuusumik akuusutut ilanngussaa, akuusutut isigineqassapput. Inuit, namminneq immikkut ittumik piunasaqaammik saqqummiussinatik, akuusumut tapersersuisutut eqqartuussinermi saqqummertut akuusuunngillat, aamma tamanna eqqartuussinermi ingerlasumi akuusumit inuit pingajuusut akuusutut ilannguteqqullugit nalunaarfigineqartunut, taamaalilluni inummut pingajuusumut kingusinnerusukkut suliassamik eqqartuussisutigoortitsineq pinngitsoorneqarniassamat, atuuppoq.

Eqqartuussummik naammassisitsiniaanermik- aamma pigisat agguarneqarnerannik sulianut malittarisassaq aammattaq atuuppoq. Eqqartuussummik naammassisitsiniaanermik suliani akuusut tassaapput eqqartuussummik naammassisitsiniaanissamik piunasaqaateqartoq aamma akiligassalik (rekvisitus) kiisalu inuk pingajuusoq, eqqartuussisarnermik inatsimmi § 612 malillugu akuusutut ilannguttoq. Pigisat agguarneqarnerannik suliani allani, akuusut tassaapput inuit, taakku pisuussutaat agguarneqarlutik, assersuutigalugu aappariit pigisaasa agguarneqarneranni aappariit akornanni.

Pinerluttulerinermik suliani inuup nammineerluni unnerluussuteqarneratigut pisuni, inuit sakkutuujunngitsut eqqartuussisutigoortinneqartarnerattut ilusilerlugit suliarineqartuni malittarisassaq aamma atuuppoq.

Suliani ingerlasuni aamma suliani naammassineqareersuni allagaatinik takunnissinnaatitaaneq atuuppoq, aamma soorlu malittarisassat atuuttut malillugit akuusup allagaatinik takunnissinnaatitaanermik piunasaqaateqarnissaanut suliap naammassineqareerneranit piffissap qanoq sivilutigisumik ingerlareersimanissaanut killiliussamik aalajangiisoqanngilaq.

Allatut aalajangiisoqarsimatinnagu, allagaatinik takunnissinnaatitaaneq atuuppoq. Nangaassutip taassuma § 101-imi atuuttumi oqaatsit aallaqqaataasut »Pisut, inatsimmi matumani tamanna pillugu immikkut ittunik aalajangersaavigineqartut« assigai.

Allatut aalajangiisoqartinnagu pillugu assersuutitut pissutsit nipangiussisussaataitanermik pisussaaffiusut pillugit ilisimannittutut nassuiaasussaananermut akuersissuteqarnissap itigartitsissutigineqarneranut pissutaasut pillugit oqartussaasut nassuiaataat pillugu eqqartuussisarnermik inatsimmi § 142, imm. 2-mi oqaaseqatigiit siulliit, angajoqqaatut akisussaaneq pillugu inatsit malillugu meeqqamik oqaloqateqarnerup imarisai pillugit

eqqartuussisarnermik inatsimmi § 287, pinngitsaaliissummik qitornavissiannngortitsitsinermi uppenarsaasersuineq pillugu eqqartuussisarnermik inatsimmi § 297 aamma qitornavissiallit angajoqqaaviusullu akornanni pissutsit pillugit eqqartuussutit allagannngortinneqarnerani il.il. aamma kinaassutsinik isertuussisussaaneq pillugu eqqartuussisarnermik inatsimmi § 298, imm. 3 ingammik innersuussutigineqarsinnaapput.

Soorlu § 101-imi atuuttumi taamaattoq, eqqartuussisut allattaavianni suliaq pillugu allanneqartut allagaatinik takunnissinnaatitaanermi ilaatinneqarput. Eqqartuussisut allattaaviat eqqartuussisut allattaaviattut, eqqartuussivimmi eqqartuussutit nalunaarsuiffiattut, eqqartuussummik naammassitsiniaasartup allattaaviattut, akitsorterussinermi allattaavittut imaluunniit pigisat agguanneqarnerannut allattaavittut taaneqaraluarpata, tamanna atuuppoq.

Eqqartuussisut allattaaviisut allaanerusunut »takussutissiat saqqummiunneqartut allat eqqartuussivimmiittut« pillugit oqaaseq, § 101-imi atuuttumi atorneqartoq, »takussutissiat, suliamut tunngassuteqartut«-nik taarserneqarnissaat, taannalu suliffeqarfiup iluani sulianut atatillugu takussutissianik ilaatitsinnginnermik ilaneqassasoq siunnersuutigineqarpoq.

Oqaatsit imarisaat »takussutissiat saqqummiunneqartut« nalorninermik pissutissaqalersitsisinnaavoq, aamma allagaatinik takunnissinnaatitaanermut, takussutissiap eqqartuussivimmi »saqqummiunneqarsimanera« apeqqutaatinnagu malittarisassat aamma taakku atuuttariaqarput.

Takussutissiaq suliap suliarineqarneranut pingaaruteqarsimappat, takussutissiaq suliamut tunngassuteqassaaq. Assersuutitut taaneqarsinnaapput sassaqqusissutit aamma eqqartuussivimmi suliap suliarineqarnissaanut piareersaatitut inatsisitigut allakkiat allat, suliaq pillugu eqqartuussivimmik allaqatigiissuteqarnerit aamma takussutissiat uppenarsaatitut atorneqartut.

Oqaaseq »takussutissiat« paasitinneqarsinnaatitaaneq pillugu inatsit malillugu takussutissiaq pillugu oqaatsip imarisaatut atitutigisummik paasineqassaaq. Takussutissiat allagaasut piviusut saniatigut, taakku pappiarannngorlutik takussutissiaappata imaluunniit elektroniskiusumik takussutissiaappata, taamaalilluni aamma titartakkat, nunap assingi, assit aamma nipinik- aamma assinik immiussinerit ilaatinneqarput.

Kisianni takussutissiat taamaallaat suliap suliarineqarnerani ilaasut, matumani uppenarsaasersuinermi, akuusut allagaatinik takunnissinnaatitaanerannut ilaatinneqarput. Takussutissiat, taamaallaat suliamut tunngassuteqartut, ima paasillugu eqqartuussisarnermik inatsimmi § 628-imi oqaaseqatigiinni siullerni taaneqartutut piginnittuunermik piomasaaqammut sammitinneqartut, eqqartuussisarnermik inatsimmi § 693, imm. 2-p malitsigisaanik arsaarinnissutigineqartut, imaluunniit eqqartuussisarnermik inatsimmi

kapitali 52-ip malitsigisaanik misissuiffigineqartut, taamaalillutik eqqartuussisarnermik inatsimmi § 102 malillugu allagaatinik takunnissinnaatitaaneq pillugu siunnersuutip avataaniipput. Akuusut takussutissianik taamaattunik ilisimasaqalersinnaanerit eqqartuussinissamut iliuuserineqartutut pineqartut pillugit aalajangersakkanit taamaallaat malittarisassiuunneqarput.

Suliap ingerlanerani, aamma suliap naammassineqareersimanerani allagaatinik takunnissinnaasoqarpoq. Takussutissiap eqqartuussiviup allagaataasiviani paarineqarsimamera, suliani naammassineqareersuni allagaatinik takunnissinnaatitaanermut piunasaqaataavoq. Tassunga atatillugu eqqartuussiviup allagaataasiviani takussutissiap paaneqarnera ima paasineqassaaq, taakku malittarisalittut aaqquussinermut ilaatillugit toqqorsivimmut- aamma allagaataasivimmut inissiinermut systeminut paarineqarnerat. Takussutissiaq malittarisalittut aaqquussinermut ilaatillugu toqqorsivimmi- aamma allagaataasivimmi inissiinermut systemimi paarineqanngippat, eqqartuussisup ataatsip takussutissiamik, assersuutigalugu suliapi isumaqatigiinniarnermut pingaarnermut atugassamik allakkiamik pingaarnersiunermik imalimmik imaluunniit atortussanut katersuiffimmik peqarnerinnaa pissutigalugu, takussutissiaq allagaatinik takunnissinnaatitaanermi ilaatinneqalissanngilaq.

Allagaateqarfeqarneq pillugu inatsisiornerup malitsigisaanik takussutissiap allagaataasivimmut tunniunneqareernerata kingorna, pineqartoq taaneqartorpiartut itsillugu allagaateqarfeqarneq pillugu inatsisiliorneq malillugu allagaateqarfimmut toqqorsinerup peqatigisaani, § 102-tut siunnersuutigineqartoq malillugu allagaatinik takunnissinnaatitaaneq aamma atuuppoq.

Allagaatinik takunnissinnaatitaaneq assilillugit sanaqqitanik tunniussinertut ilusilik § 102-tut siunnersuutigineqartup malittarisassiuuppa, aamma sumiiffimmi misissuinertut ilusilerlugu allagaatinik takunnissinnaatitaanerp inatsisitigut malittarisassiuunneqarnissaa siunnersuutigineqanngilaq. Kisianni tamanna naleqquttutut isigineqarpat, assilillugu sanaqqiinnermut qinigassatut allatut misissuisitsinertut ilusilerlugu noqqaassuteqarnikkut allagaatinik takunnissinnaatitaaneq akornutissaqanngilaq.

Imm. 2 malillugu, aamma tassunga atatillugu sulinnermut atatillugu takussutissiat suliarineqartut qanoq paasineqarnissaat pillugu isumasiummik erseqqinnerusumik imaqartoq, soorlu inatsisit attuuttut malillugit suliffimmi sulinnermut atatillugu takussutissiat suliarineqartut allagaatinik takunnissinnaatitaanermi ilaatinneqanngillat.

Takussutissiat, suliap suliarineqarneranut atatillugu eqqartuussivimmit nammineq atugassatut suliarineqartut, *imm. 2, nr. 1-imi* ilaatinneqarput. Taamaalilluni nr. 1 malillugu, takussutissiaq eqqartuussiviup avataaniittumut tunniunneqarsimanngikkuni, taamaallaat takussutissiatut sulinnermut atatillugu suliarineqartutut isigineqassaaq.

Tassunga eqqartuussisut allattaaviinut allatassatut imaluunniit eqqartuussinermi aalajangiinissamut missingiutit, taamaallaat eqqartuussiviup nammineq atugassai, assersuutitut taaneqarsinnaapput. Allakkianut, suliap suliarineqarneranut atatillugu eqqartuussisup imaluunniit eqqartuussivimmi sulisup allap suliarisaanut tamanna aamma atuuppoq. Assersuutigalugu nassuiaat pillugu eqqartuussisut allattaaviannut missingiut akuusunut imaluunniit nassuiaasimasumut tunniunneqarpat, tassani sulinermut atatillugu takussutissiaq suliarineqartutut oqaatigineqarsinnaanngilaq.

Taasinermi allattaaviit aamma eqqartuussiviup siunersioqatigiissitsineranit imaqarniliat allat sulinermut atatillugu takussutissiatut suliarineqartutut isigineqassasut *imm. 2, nr. 2-p* erseqqissarpaa. Tamanna pillugu eqqartuussisarnermik inatsimmi § 105, imm. 2 malillugu eqqartuussiviup siunersioqatigiissitsineri isertuussaasut eqqartuussisarnermi pingaaruteqartumik tunngaviuvoq. Taamaammat, imaqarniliornernik suliaqarnerit siunertaat apeqqutaatinnagu, eqqartuussiviup siunersioqatigiissitsineranit imaqarniliat aamma nalinginnaasumik allagaatinik takunnissinnaatitaanermi ilanngunneqartariaqanngillat.

Sulinermut atatillugu takussutissiani suliarineqartuni paasissutissat ilumoortut pingaarnersiorneqartarneri pillugit malittarisassamik ilanngussisoqanngilaq. Paasissutissat ilumoortut suliap aalajangerneqarnissaanut annertuumik pingaaruteqartut tamatigut aamma suliami takussutissiani allani takuneqarsinnaammata, aamma paasissutissat taamaattut taamaalillutik sulinermut atatillugu takussutissiani suliarineqartuni kisimiillutik ilaatinneqarnaviannngitsut, eqqartuussiviit inuit sakkutuujunngitsut pillugit suliaqartarneri pillugit malittarisassat kinguneraat.

Imm. 3-mi oqaaseqatigiit siulliit malillugit, eqqartuussivimmit suliamik suliaqartumit imaluunniit suliaqarsimasumit allagaatinik takunnissinnaatitaaneq pillugu aalajangiinerit aalajangerneqassasut siunnersuutigineqarpoq. Suliaq aalajangiisussanit arlalinnit suliarineqarsimappat, aalajangiisussat tamarmik immikkut imminnut tunngassutilinnut allagaatinik takunnissinnaatitaaneq pillugu aalajangiissapput.

§ 102 d, imm. 2-mi oqaaseqatigiit aappaat, aamma imm. 3 taamatuttaaq atuutissasut, imm. 3-mi *oqaaseqatigiit aappaata* aalajangerpaa.

Allagaatinik takunnissinnaatitaaneq pillugu eqqartuussiviup aalajangiinera noqqaassuteqarnikkut tunngavilersorneqassasoq, aamma eqqartuussisarnermik inatsimmi §§ 517-imiit 527 ilanngullugu malillugit aalajangiineq naammagittaalliuutigineqarsinnaasoq, § 101 d, imm. 2-mi oqaaseqatigiit aappaannut innersuussinerup kinguneraa. § 101 d, imm. 3 malillugu allagaatinik

takunnissinnaatitaanermik noqqaassuteqarneq akuerineqarsinnaanersoq piaartumik eqqartuussiviup aalajangiiffigissagaa, aamma ullut qulit qaangiutsinnagit noqqaassuteqarneq akuerineqanngippat imaluunniit itigartinneqarpat, tassunga pissutaasoq pillugu kiisalu, aalajangiinerup qaqugukkut suliarineqarnissaa naatsorsuutigineqarnersoq pillugu qinnuteqartoq nalunaarfigineqassaaq.

Aammattaaq inatsisissatut siunnersuummut nalinginnaasumik oqaaseqaatini imm. 2.1.2 innersuussutigineqarpoq.

§ 102 a-mut

Pinerluttulerinermik suliani naammassereerneqarsimasumi pasineqartup allagaatinik takunnissinnaatitaanera aalajangersakkami pineqarpoq. Eqqartuussisarnermik inatsimmi § 101-p aamma pisortat ingerlatsinerat pillugu inatsimmi § 18-p nutarterneqarnerannik ataatsimullu aaqqissuunneqarnerannik aalajangersagaq ersersitsivoq. Pasineqartup politiini unnerluussisussaataasunilu allagaatinik takunnissinnaatitaanera pillugu malittarisassat eqqartuussisarnermik inatsimmi katersorneqarnerat, siunnersuutip kinguneraa, taamaalilluni siunissami inatsisissatut siunnersuummi § 2, nr. 1 malillugu pinerluttulerinermik suliat politiiniunngitsoq aamma unnerluussisussaataasuniunngitsoq suliarineqassappata, pisortat ingerlatsinerat pillugu inatsimmi § 18 taamaallaat atuunnissaa, siunnersuutip kinguneraa.

Suliaq inaarutaasumik naammassineqarsimappat, inuk pasineqarsimasoq, takussutissianik suliamut tunngassuteqartunik, matumani eqqartuussisut allattaaviini allanneqartut ilanngullugit, ilisimatinneqarnissani piumasaqaatigisinnaagaa, *imm. 1-p* aallaavik nalinginnaasoq aalajangersarpaa.

Oqaatsimi »inuk pasineqarsimasoq,«-mi aamma inuk kingusinnerusukkut (aamma) unnerluunneqarsimasoq aamma eqqartuunneqarsimaguni eqqartuunneqartoq ilaatinneqarpoq.

Soorlu malittarisassat atuuttut malillugit, suliap naammassineqarnerata kingorna piffissaq qanoq sivistigisoq qaangiutsinnagu pasineqarsimasup allagaatinik takunnissinnaatitaanermik piumasaqaateqarsinnaanera aalajangersarneqanngilaq.

Inaarutaasumik aalajangiineq takkuppap, imaappoq aalajangiineq, § 101 c, imm. 1-mi oqaaseqatigiit pingajuattut siunnersuutigineqartumut oqaaseqaatit erseqqinnerusut malillugit, nalinginnaasumik eqqartuussivimmut qulliunerusumut naammagittaalliuuteqarnikkut sunnerneqarsinnaanngippat, suliaq inaarutaasumik naammassineqassaaq.

Oqaatsini »suliaq inaarutaasumik naammassineqarpoq« aamma »suliaq aalajangiiffigineqarpoq«, ullumikkut pisortat ingerlatsinerat pillugu inatsimmi § 18-imi atorneqartoq, isummaminni assigeeqqissaanngimmata, aamma tassani naak unnerluussisussaataasut qullersaat eqqartuussisarnermik inatsimmi § 315, imm. 1 malillugu aalajangiinermik allanngortitsinissamik periarfissaqaraluartoq, suliap »aalajangiiffigineqarneratut« isumaqarfigineqarnera maluginiarneqassaaq. Siunissami allagaatinik takunnissinnaatitaanermik noqqaassut, unnerluussisussaataasut qullersaannut naammagittaalliortoqassappat naammagittaalliornissamut atorniarlugu paasissutissanik pissarsinissamik kissaateqarnermik tunngavilersorneqartoq, taamaammat §§ 339 a-miit 339 c ilanngullugu (inatsisissatut siunnersuummi § 1, nr. 14) malillugit suliarineqartussaassaaq.

Soorlu § 101 atuuttoq malillugu suliaq pillugu eqqartuussisut allattaaviini allatat allagaatinik takunnissinnaatitaanermut ilaatinneqarput. Eqqartuussisut allattaaviat pineqartoq eqqartuussisut allattaaviattut imaluunniit eqqartuussivimmi eqqartuussutit nalunaarsuiffiattut taaneqaraluarpat, tamanna atuuppoq.

Eqqartuussisut allattaaviinit allaanerusunut oqaatsit »takussutissiat allat saqqummiunneqartut eqqartuussivimmiittut«, § 101-imi atuuttumi atorneqartoq, oqaatsinik »takussutissiat suliamut tunngassuteqartut«-nik, sulinermut atatillugu takussutissiat suliarineqarsimasut ilanngunneqannginnissaanik ilallugu, taarserneqarnissaat siunnersuutigineqarpoq.

»Takussutissiat saqqummiunneqarsimasut« pillugit oqaatsit imarisaat nalornilersitsisinnaapput, aamma takussutissiap eqqartuussivimmi »saqqummiunneqarsimanera« apeqqutaatinnagu, allagaatinik takunnissinnaatitaaneq pillugu malittarisassat aamma taakku atuuttariaqarput.

Taaneqareersutut politiini unnerluussisussaataasunilu allagaatinik takunnissinnaatitaaneq pillugu malittarisassat eqqartuussisarnermik inatsimmi katersorneqarnerat siunnersuutip kinguneraa. Pinerluttulerinermik suliani, oqartussat allaffeqarfianni allani politiunngitsuni suliarineqartuni allagaatinik takunnissinnaatitaaneq, kisianni, naalagaaffimmi oqartussaasut imaluunniit namminersorlutik oqartussani oqartussaasut pineqarnersut apeqqutaatillugu, suli pisortat ingerlatsinerat pillugu inatsimmi § 18-imi (inatsisissatut siunnersuummi § 2, nr. 1-imi oqaasertalerneqartutut) imaluunniit Pisortat ingerlatsineranni suliassat suliarineqartarnerat pillugu Inatsisartut inatsisaanni § 18-imi ilaatinneqassapput. Sulisaatsimi suliat politiinit allaanerusunit oqartussaasunit allanit allaffissornikkut akileeqqusissutit ingammik pineqarput. Pinerluttulerinermik suliaq oqartussaasut allaffiannit allamit suliarineqareerluni politiinit suliarineqalerpat, atortussanut, politiit oqartussaasut allaffeqarfiannit allamit tigusimasannut allagaatinik

takunnissinnaatitaanermut § 102 a-mi malittarisassat siunnersuutigineqartut aamma atuupput.

Takussutissiaq suliap suliarineqarneranut pingaaruteqarpat, takussutissiaq suliamut tunngassuteqarpoq. Politiit nalunaarusiaat (eqqartuussisarnermik inatsimmi § 339 malillugu), unnerluussutit imaluunniit eqqartuussisoqarnissaanik piumasagaatit aamma takussutissiat uppernarsaatitut atorneqarsimasut assersuutitut taaneqarsinnaapput.

Takussutissiat eqqartuussivimmi suliamut ilanngunneqartut, aamma takussutissiat (taamaallaat) politiit suliaanni ilaasut, ilanngunneqarput. Takussutissiaq suliamut pineqartumut tunngassuteqarpat, unnerluussisussaataasut isumaat malillugu suliap aalajangiiffigineqarnissaanut pingaaruteqanngitsutut takuneqarsinnaalernera pissutigalugu, naak unnerluussisussaataasut taanna eqqartuussivimmi saqqummiussimangikkaluaraat, taanna taamaalilluni allagaatinik takunnissinnaatitaaneq pillugu siunnersuummut ilaatinneqarpoq.

Oqaaseq »takussutissiat« paasitinneqarsinnaatitaaneq pillugu inatsit malillugu takussutissiamut oqaatsip imarisaatut atitutigisumik paasineqassaaq. Allaganngorlugit takussutissiat piviusut saniatigut, taakku pappiaqqatut takussutissiaappata imaluunniit elektroniskiusumik takussutissiaappata, taamaalilluni aamma titartakkat, nunat assingi, assit aamma nipinik- assinillu immiussinerit ilaatinneqarput.

Malittarisassat siunnersuutigineqartut malillugit, takussutissiap suliap takussutissartaani paarineqarnissaa, allagaatinik takunnissinnaatitaanermut piumasagaataavoq.

§ 102-tut siunnersuutigineqartoq malillugu allagaatinik takunnissinnaatitaaneq aamma takussutissiap, allagaateqarfeqarneq pillugu inatsit malillugu allagaataasivimmut tunniunneqarsimanerata kingorna, immaqalu inatsit manna malillugu allagaataasivimmut toqqorsisoqartussaanera peqatigalugu, aamma atuuppoq.

Soorlu inatsisit atuuttut malillugit, *imm. 2 malillugu* sulinermit atatillugu takussutissiat suliarineqartut allagaatinik takunnissinnaatitaanermut ilaatinneqanngillat, taannalu tassunga atatillugu sulinermit atatillugu takussutissiat suliarineqartut qanoq paasineqassanersut pillugit nassuiaammik erseqqinnerusumik imaqarpoq.

Suliap suliarineqarnerani nammineq atugassatuinnaq takussutissiat eqqartuussivimmit, politiinit imaluunniit unnerluussisussaataasunit suliarineqartut, *imm. 2, nr. 1-imi* ilaatinneqarput. Taama tulleriillutik, eqqartuussiviup aamma politiit/unnerluussisussaataasut avataannut inunnet ingerlateqqinneqarsimangippat,

takussutissiaq taamaalluni nr. 1 malillugu taamaallaat sulinermut atatillugu takussutissiatut suliarineqartutut isigineqarsinnaapput.

Eqqartuussivik pineqartillugu eqqartuussisut allattaaviannut allatassanut imaluunniit eqqartuussinermi aalajangiinissanut missingiutit, taamaallaat eqqartuussivimmit namminermit atorneqartussaq assersuutit taaneqarsinnaapput. Allakkianut, eqqartuussisup imaluunniit eqqartuussivimmi sulisup allap suliap suliarineqarneranut atatillugu suliarisimasaannut, aamma eqqartuussivimmit namminermit taamaallaat atorneqartunut, tamanna aamma atuuppoq.

Politiit unnerluussisussaataasullu pillugit politiit unnerluussisussaataasullu imminni unnerluussisutissiaq pillugu apeqqut pillugu, suliap eqqartuussivimmi ingerlanneqarnissaa imaluunniit suliareqqitassanngortitsinissaq pillugu isumaliutersuutaat assersuutit taaneqarsinnaapput. Politiit unnerluussisussaataasullu iluanni immikkoortortaqarfiit assigiinngitsut akornanni allaffigeqatigiinnermut tunngatillugu, nr. 3 innersuussutigineqarpoq.

Nassuiaat pillugu eqqartuussisut allattaaviannut allatassatut missingiut akuusunut imaluunniit inummut nassuiaateqarsimasunut tunniunneqarpat, taamaattoqartillugu suliamut atatillugu takussutissiap suliarineqarnera pineqanngilaq.

Taasinermi allattaaviit aamma eqqartuussiviup siunersioqatigiissitsineranik imaqarniliat allat aamma taasinerit suliffeqarfiup iluani takussutissiatut suliarineqartutut isigineqassasut, *imm. 2, nr. 2-p erseqqissarpaa*. Tamanna pillugu eqqartuussisarnermik inatsimmi § 105, *imm. 2* malillugu eqqartuussiviup siunersioqatigiissitsineri isertuussaasut eqqartuussisarnermi pingaaruteqartumik tunngaviuvoq. Taamaammat, imaqarniliornernik suliaqarnerit siunertaat apeqqutaatinnagu, eqqartuussiviup siunersioqatigiissitsineranit imaqarniliat aamma nalinginnaasumik allagaatinik takunnissinnaatitaanermi ilanngunneqartariaqanngillat.

Allagaatinik takunnissinnaatitaanermi kiap inerniliusaaq tunngavilersuulluunniit sorleq akuersissutigisimaneraa pillugu ersinnartumik paasissutissat aamma ilaatinneqannginnerat, oqaatsip »taasisitsinerit« ilanngunneqarnerata erseqqissarpaa. Tamanna ingammik eqqartuussisooqataasut peqataasimatillugit pingaaruteqassaaq.

Takussutissiat politiini unnerluussisussaataasunilu immikkoortortaqarfiit akornanni tamani takussutissiat, sulinermut atatillugu takussutissiatut suliarineqarsimasutut pissusertik annaanagu, taartigiissutigineqarsinnaanerat *imm. 2, nr. 3-p* aalajangersarpaa. Malittarisassaq taanna pisariaqarpoq, ilaatigut pinerluttoqarsimaneranik paasiniaaneq politeeqarfiit arlallit ilanngutitinneqarnerannik kinguneqarsinnaanera pissutigalugu, soorlu

aamma Rigspolitiit aamma ilanngutitinneqarsinnaasut. Eqqartuussisarnermik inatsimmi § 61 c, imm. 1, aamma § 62, imm. 1 malillugit pisortani unnerluussisussaataasut politiillu qullersaattut, Inatsiseqarnermut ministereqarfik malittarisassami aamma ilaatinneqarpoq.

Suliffeqarfiup iluani takussutissiani suliarineqartuni paasissutissat piviusut naalisarneqarnissaat pillugit malittarisassaq ilanngunneqanngilaq. Paasissutissat piviusut suliap suliarineqarneranut annertuumik pingaaruteqartut tamatigut aammattaq suliami takussutissiani allani takuneqarsinnaanerat, aamma paasissutissat taamaattut kisimiillutik suliffeqarfiup iluani takussutissiani suliarineqartumi imaritinneqanngisaannarnerat, pinerluttulerinermik suliat suliarineqartarnerat pillugu malittarisassat kinguneraat. Politiit nalunaarusiaat eqqartuussivimmit, illersuisumit pasineqartumillu aamma atorineqartarmata, taakku suliffeqarfiup iluani takussutissiatut suliaannigitsuusut, tassunga atatillugu maluginiarneqassaaq.

Allagaatinik takunnissinnaatitaanermi ilanngussinnginnermik pingasunik *imm. 3* imaqarpoq. Siulliit marluk inatsisinut atuuttunut assingulluinnarput. Ilangussinnginnerit pingajuat imaqarnermigut inatsisinut atuuttunut assinguvoq, kisianni pinerluttulerinermik suliani allagaatinik takunnissinnaatitaaneq pillugu malittarisassat eqqartuussisarnermik inatsimmi katersorneqarnissaa pillugu siunnertuusip malitsigisaanik ilanngussinnginnermut atuuffik ullumimut naleqqiullugu atitunerulerpoq.

Piviusumik naliliinerup kingorna paasissutissat ilaasa allagaatinik takunnissinnaatitaanerup killilerneqarneratigut ilaatinneqannginnissaat, ilanngussinnginnerit ersersippaat. Taamaattoqarpat paasissutissat pineqartut takussutissiap assillillugu sanaqqinneqannginnerani imaluunniit misissuiffigineqannginnerani peerneqarnissaattut ippoq, taamaalilluni takussutissiap sinnerani allagaatinik takunnissinnaatitaaneq tunniunneqassalluni (pingaarnersiuineq). Taamaattoq pissutsit malillugit *imm. 3*-mut innersuussinikkut takussutissiami tamarmi allagaatinik takunnissinnaatitaanerup itigartitsissutigineqarnissaa tunngavissaqassaaq.

Qinnuteqartoq pinerluttulerinermik suliat suliarineqartarnerat pillugu eqqartuussisarnermik inatsimmi immikkut ittumik malittarisassat allat malillugit, suliami paasissutissanik ilisimatinneqarnissamut akornuserneqarsimappat, allagaatinik takunnissinnaatitaaneq killilerneqarsinnaasooq *imm. 3, nr. 1-ip* aalajangersarpaa. Tunngaviit immikkut ittut pissutigalugit paasissutissat pasineqartup, suliap ingerlanerani, allagaatinik takunnissinnaatitaanerani ilanngunneqarsimanngippata, suliap inaarutaasumik naammassinerani paasissutissat suli allagaatinik takunnissinnaatitaanermi ilaatinneqartariaqannginnerannik malittarisassaq tunngavilersorneqarpoq. § 101 atuuttoq nangaassummik erseqqissumik assingusumik oqaatsini aallaqqaataasuni »Pisut, inatsimmi

matumani tamanna pillugu immikkut ittunik aalajangersaavigineqartut, avataanni«
imaqarpoq.

Pissutsit nipangiussisussaataitanermik pisussaaffiusut pillugit ilisimannittutut nassuiaasussaannermut akuersissuteqarnissap itigartitsissutigineqarneranut pissutaasut pillugit oqartussaasut nassuiaataat pillugu eqqartuussisarnermik inatsimmi § 142, imm. 2-mi oqaaseqatigiit siulliit, illersuisup pasineqartullu allagaatinik takunnissinnaatitaanerisa killilerneqarnerat pillugu eqqartuussisarnermik inatsimmi § 339 c (inatsisissatut siunnersuummi § 1, nr. 14-itut oqaasertaliorneqartoq), illersuisup pasineqartulluunniit allagaatinik takunnissinnaatitaanerit pillugu isumaqatigiinnngissummut atatillugu atortussanik politiit saqqummiussinerat pillugu eqqartuussisarnermik inatsimmi § 341, imm. 2-mi oqaaseqatigiit aappaat (inatsisissatut siunnersuummi § 1, nr. 18-itut oqaasertaliorneqartoq) aamma ilisimannittup najugaa atialuunniit, atorfia najugaalu pillugit eqqartuussisarnermik inatsimmi § 456, imm. 2 (inatsisissatut siunnersuummi § 1, nr. 40-itut oqaasertaliorneqartoq) malittarisassatut, imm. 3, nr. 1-imi innersuussinermi ilaatinneqartutut assersuutigineqarsinnaapput.

Aammattaaq eqqartuussisarnermik inatsimmi § 344, imm. 2 aamma 3 (inatsisissatut siunnersuummi § 1, nr. 18-itut oqaasertaliorneqartoq) malittarisassat innersuussinermi ilaatinneqarput. Naalagaaffiup isumannaatsuunissaanut, naalagaaffinnut takornartanut, suliap paasinarsisinneqarnissaanut imaluunniit inummumut pingajuusumut qajassuussassat tamanna qaqutigooortumik pisariaqartissappassuk, malittarisassat taakku pasineqartup allagaatinik takunnissinnaatitaanerani paasissutissanit ilanngussinnginnissaq periarfissippaat. Isumaqatigiinniarnepup pingaarnepup nalaani kingusinnerpaamik pasineqartup nassuiaareersimanerani, pasineqartoq paasissutissanik ilisimatinneqarnissamik periarfissinneqassaaq. Taamatuttaaq pasineqartup illersuisumini allagaatinik takunnissinnaatitaanerani killilersuinerit pillugit eqqartuussisarnermik inatsimmi § 339 a, imm. 3 (inatsisissatut siunnersuummi § 1, nr. 14-itut oqaasertaliorneqartoq) atuuppoq.

Eqqartuussisarnermik inatsimmi § 339 c malillugu illersuisup pasineqartullu allagaatinik takunnissinnaatitaanerisa killilerneqarneranni pasineqartup nalunaaruteqarfigineqarnissaa pillugu malittarisassanik eqqartuussinerit atassuteqartut nalinginnaasumik ilanngunneqartannginnerat, aammattaaq eqqartuussisarnermik inatsimmi § 344, imm. 5-imi (inatsisissatut siunnersuummi § 1, nr. 19-itut oqaasertaliorneqartoq) malittarisassat innersuussinermi ilaatinneqarput.

Akuusoq suliami paasissutissanik ilisimasaqalernissaminut piviusumik akornuserneqarsimappat, imm. 3, nr. 1 atuuppoq. Pinerluttulerinermik suliaq eqqartuussutikkut aalangiiffigineqarsimappat, eqqartuussisarnermik inatsimmi § 344, imm. 2 aamma 3, aamma § 339 a, imm. 3 taamaammat isumaqanngillat, taamaattoqarparammi

pasineqartoq paasissutissanik ilisimasaqalernissaminut *periarfissaqarsimassammat* (kingusinnerpaamik pingaarnertut isumaqatigiinniarnep nalaani nassuiaareersimanermi kingorna). Pinerluttulerinermik suliani, eqqartuussiviit avataanni naammassineqartuni (akiliisitsissusiinikkut, unnerluussutip taamaatinneqarneratigut, imaluunniit unnerluussutip tunuartinneqarneratigut), suliami paasissutissanik pasineqartup ilisimalissallugit periarfissaqarfiginngisaannarsimasaanik peqartoqarnera kisianni pisinnaavoq, aamma taamaattoqarpat paasissutissat taakku imm. 3, nr. 1 malillugu allagaatinik takunnissinnaatitaanermi ilaatinneqassanngillat. Eqqartuussisarnermik inatsimmi § 339 c malillugu illersuisup pasineqartullu allagaatinik takunnissinnaatitaanerat suliap naammassineqarnissaa tikivillu killilerneqarsimappat, pinerluttulerinermik suliaq eqqartuussiviup iluani imaluunniit eqqartuussiviup avataanni naammassineqarnera apeqqutaatinnagu, tamanna aamma atuuppoq.

Naalagaaffiup isumannaatsuunissaanut imaluunniit naalagaaffiit takornartat pillugit imaluunniit inuiaat akornanni sullissiviit pillugit qajassuussinissanut pingaarutilinnut qinnuteqartup allagaatinik takunnissinnaatitaanermik soqutigisaa tunulliunneqartariaqarpat, *imm. 3, nr. 2* allagaatinik takunnissinnaatitaanermut killiliinissamik periarfissiivoq. Allagaatinik takunnissinnaatitaanermut qinnuteqartup soqutigisaasa aamma akerliani qajassuussinissat pineqartut akornanni piviusumik oqimaaqatigiissitsineq suliarineqassasoq, oqaasertalersuinerup takutippaa. Tamanna pillugu imm. 5 malillugu allagaatinik takunnissinnaatitaanerup itigartitsissutigivinneqarneranut taarsiullugu takussutissiat taakku assilillugit sanaqqinneqarnerisa tunniunneqarnissaasa itigartitsissutigineqarnerat qinigassaasinnaasoq alla, tassunga atatillugu maluginiarneqassaaq.

»Naalagaaffiup isumannaatsuunissaa imaluunniit naalagaaffinnut takornartanut pissutsinik pingaartitsineq imaluunniit tamakkuninnga immikkut ittumik qajassuussineq« pillugu § 101-imi ilanngussinnginnissamut malittarisassamut atuuttumut malittarisassaq assinguvoq. Tassunga tunngatillugu taamaattoq inuiaat akornanni sullissiviit pillugit qajassuussinissaq ilanngunneqartoq.

Naalagaaffiit takornartat qajassuunneqarnissaat pillugu § 101-imi atuuttup saniatigut aamma »tamakkuninnga immikkut ittumik qajassuussineq«-rup ilanngunneqarnissaa pisariaqanngitsutut isigineqarpoq. Oqaatsit taakku matut matuneqarnissaat pillugu eqqartuussisarnermik inatsimmi § 114, imm. 1, nr. 2-mi ilaapput, tamannalu nunat tamat akornanni inatsisitigut siunnersorneqarneq pillugu ikiuunnermik suliaqarnermi, qallunaat eqqartuussisarnermik inatsisaanni § 29, imm. 1, nr. 2 pillugu Folketingstidende 1998-99, ilanngussaq A, qupperneq 2031 malillugu »naalagaaffiup naalagaaffinnut takornartanut pissusai« matut matuneqarnissaannut tunngavilersuutitut oqaatigineqarsinnaanngikkaluartoq, suliani nunat tamat akornanni inatsisitigut siunnersorneqarneq pillugu ikiuunnerni naalagaaffiit pineqartut soqutigisaat

innersuussutigalugit matut matuneqarnissaasa naleqquttuusinnaanerani
tunnngavilersorneqarpoq.

Kisianni kikkulluunniit eqqartuussinermi isiginnaartuusinnaannginnerannut matunik matusineq tunnngassuteqarpoq, akerlianilli uani pinerluttulerinermik suliani naammassineqareersuni pasineqartup allagaatinik takunnissinnaatitaanera pineqarluni, nunallu tamat akornanni inatsisitigut siunnersorneqarnermik ikiunneq pillugu suliani, nunami allami pillaatissiisoqarnissaanik suliap naammassineqareersimanissaannik tamanna isumaqarpoq.

Inatsisit unioqqutinneqarnerisa pitsaaliorneqarnerannut, paasinarsarneqarnerannut aamma eqqartuussiniarluni imaluunniit pillagassanngortitsiniarluni suliaqarnermi imaluunniit pasisaaqataasut, ilisimannittut allalluunniit immikkut ittumik qajassuunniarlugit, qinnuteqartup suliami takussutissianik ilisimasaqalernermigut imminut iluaqutissamik isumaginninnissaminut atuiniarnerata tunulluunneqartariaqarnera nalilerneqarpat, *imm. 3, nr. 3-p* allagaatinik takunnissinnaatitaanerup killilerneqarnissaa periarfissippaa. Allagaatinik takunnissinnaatitaanermit ilanngunneqanngitsut pisortat ingerlatsinerat pillugu inatsimmi § 18-imi takuneqarsinnaasut, aalajangersakkap ingerlateqqippai.

Qinnuteqartup suliami takussutissianik ilisimasaqalernermigut imminut iluaqutissaminik isumaginninnissaminut atuiniarnerata illuatungaaticullu qajassuussinissat taaneqartut akornanni piviusumik oqimaaqatigiissitsinissaq allagaatinik takunnissinnaatitaanerup killilerneqarsinnaaneranut piunasaqaataavoq. Ataani *imm. 5* malillugu allagaatinik takunnissinnaatitaanerup itigartilluinnarneqarsinnaaneranut taarsiullugu takussutissiat pineqartut assilillugit sanaqqinneqarnerisa tunniunneqarnissaannik itigartitsineq allatut qinigassaasinnaasooq, tassunga atatillugu maluginiarneqassaaq.

Soorlu oqaatsit »pingaaruteqartumik« imaluunniit »pingaarutilimmik« qajassuussinissaq atorneqartillugit, illuatungaani qajassuussinissaq ima sakkortutigisariaqanngitsooq, assersuutigalugu § 101 c, *imm. 3, nr. 2*-mut aamma 3-mut siunnersuutigineqartut malillugit, oqaatsimi »immikkut ittumik« qajassuussassamiippoq (pasisaaqataasunut, ilisimannittunut imaluunniit allanut). Taamaattoq illuatungaani qajassuussinissaq ima oqimaassuseqartigisumik piviusumik pissuteqassasooq oqaatsimi »immikkut ittumik« qajassuussassamiippoq. Nalornisoqartillugu allagaatinik takunnissinnaatitaaneq pillugu aalajangiisoqartinnagu pineqartunit oqaaseqaatinik pissarseqqaarnissaq pissusissamisoorinnaavoq.

Allagaatinik takunnissinnaatitaaneq pillugu noqqaassutit suliarineqarnissaannut piginnaasaqarnerit pillugit malittarisassanik *imm. 4* imaqarpoq.

Imm. 4-imi *oqaaseqatigiit siulliit* malillugit, pinerluttulerinermik suliani naammassineqareersuni allagaatinik takunnissinnaatitaaneq pillugu aalajangiinerit politidirektørimit aalajangerneqassasut siunnersuutigineqarpoq. Pinerluttulerinermik suliaq eqqartuussivimmut saqqummiunneqarsimanera, aamma aalajangiisussaataasumi ataatsimi arlalinniluunniit suliarineqarsimanera apeqqutaatinnagu, aamma aalajangiisussaataasumi sorlermi aalajangiisussaataasuniluunniit sorlerni allagaatinik takunnissinnaatitaaneq tunngassuteqarnersoq apeqqutaatinnagit, tamanna atuuppoq.

Politiiniunngitsoq oqartussaasut allaffeqarfiini allani pinerluttulerinermik suliat pillugit allagaatinik takunnissinnaatitaaneq pillugu noqqaassutit eqqartuussisarnermik inatsimmi malittarisassatut siunnersuutigineqartuni ilaatinneqanngillat. Pinerluttulerinermik suliani taamaattuni allagaatinik takunnissinnaatitaanermik noqqaassutit naalagaaffimmi oqartussaasoq imaluunniit namminersorlutik oqartussani oqartussaasoq pineqarnersoq apeqqutaatillugu, pinerluttulerinermik suliat politiinit allaanerusunit oqartussaasut allaffeqarfiinit allanit suliarineqartut suli pisortat ingerlatsinerat pillugu inatsimmi § 18-imi (inatsisissatut siunnersuummi § 2, nr. 1-imi oqaasertalerneqartutut) imaluunniit Pisortat ingerlatsineranni suliassat suliarineqartarnerat pillugu Inatsisartut inatsisaanni § 18-imi suli ilaatinneqarput aamma oqartussaasut allaffeqarfiannut pineqartumut saqqummiunneqassallutik. Pinerluttulerinermik suliaq oqartussaasut allaffiannit allamit suliarineqareerluni politiinit suliarineqalerpat, atortussanut, politiit oqartussaasut allaffeqarfiannit allamit tigusimasannut allagaatinik takunnissinnaatitaanermut § 102 a-mi malittarisassat siunnersuutigineqartut aamma atuupput.

§ 101 d, imm. 2-mi oqaaseqatigiit sisamaat, aamma imm. 3 taamatutaaq atuuttut, imm. 4-mi *oqaaseqatigiit aappaata* aalajangersarpaa.

Politidirektørip allagaatinik takunnissinnaatitaaneq pillugu aalajangiinera piffissap sapaatit akunnerinik 4-nik sivistigisup iluani statsadvokatimut naammagittaalliuutigineqarsinnaanera, aamma naammagittaalliuuteqarnermik suliaq Rigsadvokatimut imaluunniit inatsiseqarnermut ministerimut naammagittaalliuutigineqarsinnaannginnera, § 101 d, imm. 2-mi oqaaseqatigiit sisamaannut innersuussinerup kinguneraa. Allagaatinik takunnissinnaatitaaneq pillugu noqqaassut akuerineqassanersoq politidirektørip piaartumik aalajangiiffigissagaa, aamma noqqaassut ullut 10 qaangiutsinnagit akuerineqanngippat imaluunniit itigartitsissutigineqarpat, qinnuteqartoq tassunga pissutaasoq pillugu ilisimatinneqassasoq kiisalu qaqugukkut aalajangiinerup pinissaa naatsorsuutigineqassanersoq, § 101 d, imm. 3-mut innersuussinerup kinguneraa.

Allagaatit amerlasoorujussuit pineqarnerat, tassani illuatungaani qajassuunneqarsinnaasunut atatillugu takussutissat tamarmik immikkut nalilersorneqartariaqarnerat, imaluunniit inuup

soqutigisaata allagaatinik takunnissinnaatitaanermi sunnerneqarneranni, inummit pineqartumit oqaaseqaatip pissarsiarineqarnissaa, aalajangiinerup ullut 10 iluanni aalajangerneqarsinnaannginneranut pissutaasinnaasut assersuutitut taaneqarsinnaapput.

Allagaatinik takunnissinnaatitaanerup ilusissaa pillugu malittarisassanik *imm. 5* imaqarpoq. Politiini misissuinertut ilusilerlugu imaluunniit assilillugu sanaqqiinertut ilusilerlugu allagaatinik takunnissinnaatitaaneq pisinnaavoq.

Allagaatinik takunnissinnaatitaanerup ilusissaa politidirektørimit aalajangerneqassasoq *imm. 5-p* aalajangersarpaa. Allagaatinik takunnissinnaatitaanerup misissuisitsinertut ilusilerlugu tunniunneqarnissaa aallaavigineqassaaq.

Imm. 3, nr. 2-mi imaluunniit *3-mi* qajassuussinissat taaneqartut akerlerinngippassuk, imaluunniit assilillugu sanaqqitap inatsisit unioqquillugit atorineqarnissaa aarlerigineqassappat, allaganngorlugit takussutissiat aalajangersimasut tunniunneqarnissaat pillugit erseqqissakkamik noqqaassut kisianni akuersissutigineqartariaqarpoq.

Atortussanni annertoorujussuarni allagaatinik takunnissinnaatitaaneq noqqaassutigineqarpat, pinngitsoorani pisut amerlanerpaartaanni inuup allagaatinik takunnissinnaatitaanermik qinnuteqartup, atortussat ilaanni, *imm. 3-p* malitsigisaanik allagaatinik takunnissinnaatitaanermi tamakkiisumik ilanngunneqartussaasuni, siulliullugu misissuisinneqarnissaa naleqqunnerpaajussaaq. Tamatuma kingorna pineqartoq taamaaliussaguni, atortussat ataatsimut misissuiffigineranni takussutissiat pineqartup nassaarisimasaasa, erseqqinnerusumik taasat assilillugit sanaqqinneqarnerat pineqartup noqqaassutigisinnaavai.

Inuit normui allagaatinik takunnissinnaatitaanermi ilaatinneqannginnerat, *imm. 6-p* aalajangersarpaa. Inuit normuisa allagaatinik takunnissinnaatitaanermi ilanngunneqannginnerat, Qitiusumik Inunnik Nalunaarsuiffik pillugu inatsimmi § 54, *imm. 1-imi* oqaaseqatigiinni siullermi aalajangersakkamut atavoq, tamatumalu kingorna oqartussaasut inuit normuisa susassaqqanngitsunit pissarsiarineqarsinnaannginnissaat isumagissavaat. Aalajangersagaq eqqartuussivinnut aamma atuuppoq.

Inuit normuisa allagaatini takunnissinnaatitaanermi ilanngunneqannginnissaanni normut kinaassutsimut ilisarnaataasut (kisitsisitat kingullit sisamat) ilaatinneqarput. Kisitsisitat kingullit sisamat ilanngunneqartinnagit, kisitsisitat siulliit arfinillit inuit normuattut (ilaannakuusuunngitsutut) isigineqanngillat.

Aammattaaq inatsisissatut siunnersuummut nalinginnaasumik oqaaseqaatini *imm. 2.1.2* innersuussutigineqarpoq.

Nr. 4 (§ 112, imm. 2)-mut

Eqqartuussutit tamatigut eqqartuussinermi tamanut ammasumik nalunaarutigineqartarnissaat eqqartuussisarnermik inatsimmi § 112, imm. 2-mi aalajangersarneqarpoq.

Taamaattoq tamanna sulisaatsimi ima paasineqassaaq, eqqartuussut oqaatitsigut nalunaarutigineqarpat, tamanna eqqartuussinermi tamanut ammasumi pissasoq. Taamaattoqarpat eqqartuussutip inerniliussartaa atuffassissutigineqassaaq.

Taamaalilluni pisut ilaanni eqqartuussut eqqartuussisoqartinnagu nalunaarutigineqarsinnaavoq, imaappoq eqqartuussutip nassiunneqarneratigut imaluunniit akuusunut allakkatut ilusilerlugit tunniunneqarneritigut. Tamanna ilaatigut eqqartuussisarnermik inatsimmi §§ 221 aamma 231 malillugit inuit sakkutuujunngitsut pillugit suliani najuutinngitsoornermi eqqartuussutini aamma nassuernertut eqqartuussutini atuuppoq, aamma akuusut akuersissuteqarnerisigut inuit sakkutuujunngitsut pillugit suliaq pissutsit assiginngitsut malillugit aamma pisuni allani eqqartuussisarnermik inatsimmi § 242 malillugu allakkatut tunngavilimmik aalajangiiffigineqarsinnaavoq. Aammattaaq allakkut inuit sakkutuujunngitsut pillugit pinerluttulerinermillu suliani, eqqartuussut, pingaarnertut isumaqatigiinniarnermi ullummi tassani nalunaarutigineqanngitsaq, eqqartuussisoqartinnagu nalunaarutigineqarsinnaanera pisinnaavoq.

§ 112, imm. 2-p allanngortinneqarnissaa siunnersuutigineqarpoq, taamaalilluni eqqartuussinerit, eqqartuussummik nalunaaruteqarfiusussat, tamatigut tamanut ammasunngussallutik.

Aalajangersakkap oqaasertalerneqarnerata sulisaatsimi eqqartuussummik nalunaaruteqartarnermut naapertuuttunngornissaa, siunnersuutip kinguneraa. Qallunaat eqqartuussisarnermik inatsisaanni § 28, imm. 2-mi allannguinermit 2004-imi suliarineqartumut, assigisaanik tunngavilersorneqartumut, allannguneq naapertuuppoq.

Eqqartuussutini allagaatinik takunnissinnaatitaaneq pillugu malittarisassanut nutaanut siunnersuutigineqartunut atatillugu siunnersuut isigineqassaaq.

Aammattaaq inatsisissatut siunnersuummut nalinginnaasumik oqaaseqaatini imm. 2.1.2 innersuussutigineqarpoq.

Nr. 5-7-imut (§ 133)

Nalunaarutiginnittariaatsit assigiinngitsut pillugit eqqartuussisarnermik inatsimmi § 133 malittarisassanik imaqarpoq.

Nalunaarutiginninneq sassaqqusissummik tunniussisartumit nalunaarutiginninnertut, allakkerivitsigut nalunaarutiginninnertut, allakkatigut nalunaarutiginninnertut imaluunniit oqarasuaatikkut nalunaarutiginninnertut pisinnaasoq, aalajangersakkap imm. 1-iani takuneqarsinnaavoq. Nalunaarutiginneriaatsit taakku sisamat atorlugit nalunaarutiginninneq pisinnaasoq, aalajangersakkap imm. 2-miit 5 ilanngullugu malittarisassanik erseqqinnerusumik imaqarput, aamma inatsisitigut pisinnaatitaasunut pisussaataitaasunullu nalunaarutiginninneq pissappat, nalunaarutiginneriaatsit siullit pingasut atorneqarsinnaasut imm. 6-p aalajangersarpaa.

§ 133, imm. 1, nr. 3-p aamma 4-p atorunnaarsinneqarnissaat, aamma taakkununga taarsiullugu nr. 3-imiit 6 ilanngullugu ilanngunneqassasut siunnersuutigineqarpoq, taakkunanilu allakkatigut nalunaarutiginninneq, oqarasuaatikkut nalunaarutiginninneq, digitaliusumik nalunaarutiginninneq aamma piuminarsakkamik digitaliusumik nalunaarutiginninneq taagorneqarput.

Nutaanik nr. 5-imik aamma 6-imik ilanngussisoqarnerata malitsigisaanik aaqqissuisuneersunit allannguutit ilanngullugit, allakkatigut nalunaarutiginninneq aamma oqarasuaatikkut nalunaarutiginninneq pillugit malittarisassat attuuttut, nr. 3-tut aamma 4-tut siunnersuutigineqartut ingerlateqqippaat.

Digitaliusumik nalunaarutiginnittarneq pillugu nr. 5-itut siunnersuutigineqartoq nutaajuvoq aamma nalunaarutiginninneq nutaatut digitaliusumik nalunaarutiginninnerup pisinnaanera kingunerallugu. Digitaliusumik nalunaarutiginninnermi periaaseq eqqarsaatigalugu, ataani erseqqinnerusumik allassimasut malillugit, § 133, imm. 6-itut siunnersuutigineqartoq innersuussutigineqarpoq.

Piuminarsakkamik digitaliusumik nalunaarutiginnittarneq pillugu nr. 6-itut siunnersuutigineqartoq taamatuttaaq nutaajuvoq aamma oqartussaasut tamatumunnga tekniskiusumik periarfissaqarnerat piumasaqaatigalugu, nalunaarutiginninneq nutaatut piuminarsakkamik digitaliusumik nalunaarutiginninnertut pisinnaassaaq. Piuminarsakkamik digitaliusumik nalunaarutiginninnermi periaaseq eqqarsaatigalugu, ataani erseqqinnerusumik allassimasut malillugit, § 133, imm. 7-itut siunnersuutigineqartoq innersuussutigineqarpoq.

§ 133-imi imm. 5-ip kingorna immikkoortunik nutaanik marlunnik ilanngussisoqarnissaa siunnersuutigineqarpoq. Nalunaarutip digitaliusumik attaveqatigiinnikkut inummut, nalunaarutip nalunaarutikkut, digitaliusumik atsiornerup atorneqarneratigut digitaliusumik

nassiunneqartukkut, pineqartup nalunaarummik tiguisimanerminik uppernarsaanissaanik noqqaassummik ilallugu nassiunneqarneratigut, imaluunniit inummit atsiorneqarsimasumik nalunaarutip assilillugu sanaqqinneqarneranik nassiussinikkut, digitaliusumik attaveqatigiinnikkut inummut tikiqqarneqarsinnaasunnegortinneqarneratigut, digitaliusumik nalunaarutiginninneq pissasoq, § 133, imm. 6-imi siunnersuutigineqarpoq.

Tamatuma kiguisissap nalunaarut ullormi tassani tiguisimallugu nalunaarutigippagu, nalunaarutiginninneq pisimasutut isigineqassaaq. Ulloq tiguisiffik oqaatigineqarsimanngippat, imaluunniit digitaliusumik uppernarsaatip nassiunneqarsimasup ullortut tiguisiffiatut taaneqartoq, imaluunniit utertillugu nassiussinermi allakkap naqitsisaa ullormit tiguisiffiusutut nalunaarsorneqarsimasumit kingusinneruppat, ullortut tiguisiffigisimasutut nalunaarsorneqarsimasumi imaluunniit allakkap naqitsisaani ullormi taaneqarsimasumi, nalunaarutiginninneq pisimasutut isigineqassaaq.

Qanoq ililluni digitaliusumik nalunaarutiginninneq pissasoq, aamma qaqugukkut digitaliusumik nalunaarutiginninneq pisimasutut isigineqassasoq pillugit imm. 6-itut siunnersuutigineqartoq malittarisassanik erseqqinnerusunik imaqarpoq.

Digitaliusumik nalunaaruteqarnikkut, digitaliusumik atsiornermik kakkiussartalimmik, imaluunniit inuttut atsiukkamik nalunaarutip assilillugu sananeqarneranik nassiussinikkut, tiguisissap tiguisimallugu uppernarsarpagu, siunnersuut malillugu nalunaarutiginninneq pisimasutut isigineqassaaq. Digitaliusumik nalunaarutiginninneq eqqartuussisarnermik inatsimmi § 133, imm. 4, allannegortinneqassannegitsutut siunnersuutigineqartoq, malillugu taamaalilluni allakkatigut nalunaarutiginninnermik assingusorujussuuvoq. Inatsisissatut siunnersuummi oqaaseqatigiit aappaattut pingajuattullu siunnersuutigineqartut malillugit piffissaq nalunaarutip nalunaarutiginnissutigineqarsimaneranik isigineqartoq, allakkatigut nalunaarutiginninnermut malittarisassanit assingusunit aamma tunngaveqarpoq.

Digitaliusumik nalunaarutiginninneq takussutissiap tiguisimaneq pillugu tiguisisumit eqeersimaartumik iliuuseqarnissamik piumasaqarfiuvoq. Tiguisisumi automatiskiusumik ingerlatsineq, tiguisinerup assersuutigalugu digitaliusumik nalunaarutip ammarneqarneratigut uppernarsaaneq, taamaalilluni naammassannegilaq.

Digitaliusumik nalunaarutiginninneq pillugu tiguisisoq ilatsinnarpat, nalunaarutiginninneq allatut periuseqarluni pisariaqarpoq, tamannalu, takussutissiap tiguisisumit tiguneqarsimaneq piviusumik tunngavissaqartutut isigineqannegippat, taamaalilluni eqqartuussisarnermik inatsimmi § 138, imm. 2 malillugu nalunaarutiginninneq pisimasutut isigineqannegippat, sulisaatsimi sassaqqusissummik tunniussisartumit nalunaarutiginninnikkut imaluunniit oqarasuaatikkut nalunaarutiginninnikkut pinissaanik kinguneqassajunnarsivoq.

Nalunaarut nalunaarutiginnissutigineqartussa, nalunaarutip nassiussisumit taaneqartumit nassiunneqarsimaneramik, aamma nalunaarutip aqputaani allanngortinneqarsimannginneranik uppernarsaatitut qulakkeerinnissinnaasumik, nalinginnaasumik digitaliusumik atsiormik kakkiussiffigineqarsimanissaa naatsorsuutigineqarpoq.

Paasissutissanik isertuussaasunik illersuinissamat nalinginnaasumik malittarisassat, matumani inunnik paasissutissanik suliarinnittarneq pillugu malittarisassat pillugit paasissutissat illersorneqarnissaannut inatsisitigut malittarisassat, digitaliusumik nalunaarutiginninnermi aamma atuupput. Paasissutissanik isertugaasunik imaqartunik digitaliusumik nalunaarutitik nalunaarutiginninnermi, ilisarnarunnaarsaaneq assigisaaluunniit pissasoq, taamaalilluni susassaqqanngitsut nalunaarummik atuaasinnaassanatik, tamatuma ilaatigut kingunerissavaa.

Nalunaarutip pineqartumut digitaliusumik allakkanut nakkartitsisarfimmi, pisortat isumannaatsumik digitaliusumik attaveqatigiinnermut atortagaanni, tikinneqarsinnaasunngortinneqarnerani piuminarsakkamik digitaliusumik nalunaarutiginninnerup pinissaa § 133, imm. 7-imi siunnersuutigineqarpoq. Oqariartuut taanna, tassunga nalunaarut ilanngunneqarsimalluni, imaluunniit ilanngussa imaluunniit nalunaarut alla, oqariartuummut ilanngunneqarsimasoq, ammarneqarsimappat allatulluunniit suliarineqarsimappat, nalunaarut nalunaarutigineqarsimasutut isigineqassaaq. Ullormi tassani, ilanngussa imaluunniit oqariartuut, tassunga nalunaarut ilanngunneqarsimalluni, ammarneqarpat imaluunniit allatut suliarineqarpat, nalunaarutiginninneq pisimasutut isigineqassaaq.

Qanoq ililluni piuminarsakkamik digitaliusumik nalunaarutiginninneq pissasoq, aamma qaqugukkut piuminarsakkamik nalunaarutiginninnerup pisimanissaatut isigineqarnissaa pillugu, imm. 7-itut siunnersuutigineqartoq malittarisassanik erseqqinnerusumik imaqarpoq.

Nalunaarutip pineqartumut digitaliusumik allakkanut nakkartitsisarfimmi, isumannaatsumik pisortanik attaveqatigiinnermi atorneqartartumi, tikinneqarsinnaasunngortinneqarneratigut, siunnersuut malillugu piuminarsakkamik digitaliusumik nalunaarutiginninneq pissaaq.

Pisortanik digitaliusumik isumannaatsumik attaveqatigiinneq pillugu inatsisit malillugit, nalunaarut pineqartup digitaliusumik allakkanut nakkartitsisarfanut oqartussaasut nassiussissasut, tamatuma kinguneraa. Allaffigisat Kalaallit Nunaanni najugaqartut nunaqartulluunniit pineqartillugit, Pisortani Digitalimik Allakkerineq pillugu Inatsisartut inatsisaat, aamma allaffigisat Danmarkimi najugaqartillugit imaluunniit nunaqartillugit digitalimik allakkerineq pillugu pisortanik nassiussat pillugit inatsisit uani pineqarput.

Oqariartuut taanna, tassunga nalunaarut ilanngunneqarsimalluni, imaluunniit ilanngussaq imaluunniit nalunaarut alla, oqariartuummut ilanngunneqarsimasoq, ammarneqarsimappat allatulluunniit suliarineqarsimappat, nalunaarut siunnersuut malillugu nalunaarutigineqarsimasutut isigineqassaaq.

Piuminarsakkamik digitaliusumik nalunaarutiginninneq periaatsit arlallit atorlugit pisinnaasoq, tamatuma kinguneraa. Siullertut allaffigineqartup nalunaarutip, nalunaarutiginnissutigineqartup ammarneratigut nalunaarutiginninneq pisinnaavoq. Aappaattut pingaarnertut oqariartuutip, tassunga nalunaarut, nalunaarutiginnissutigineqartussaq ilanngunneqarsimalluni, ammarneratigut nalunaarutiginninneq pisinnaavoq. Pingajuattut ilanngussap nalunaarutilluunniit, oqariartuummut ilanngunneqartup ammarneqarneratigut nalunaarutiginninneq pisinnaavoq. Sisamaattut – nalunaarut nalunaarutiginnissutigineqartussaq, pingaarnertut nalunaarutaasoq, ilanngussaq imaluunniit nalunaarut alla ilanngussaq ammanngikkaluarlugu – nalunaarummi tassani, nalunaarutiginnissutigineqartussami imaluunniit ilanngussami imaluunniit nalunaarummi allami ilanngunneqarsimasumi, pingaarnertut oqariartuut pillugu eqeersimaartumik iliuseqarnermi, nalunaarutiginninneq pisinnaavoq. Pingaarnertut oqariartuutip, nalunaarutip, ilanngussap imaluunniit nalunaarutip ilanngussap allap ingerlateqqinneqarnerani, anillatsinneqarnerani, toqqorneqarnerani, nungutinneqarnerani imaluunniit nuunneqarnerani ingammik tamanna pineqarsinnaavoq.

Nalunaarutit arlallit imaluunniit ilanngussat akornanni ataaseq, pingaarnertut oqariartuummi tassani ilanngunneqarsimasoq, ammarneqarpat imaluunniit allatut suliarineqarpat, tamanna naammassaaq. Nalunaarummik ataatsimik imaluunniit arlalinnik, ilanngussamik, pingaarnertut oqariartuummut ilanngunneqarsimasumik, nalunaarut nalunaarutiginnissutigineqartussaq peqatigalugu, ammaasoqarpat imaluunniit allatut suliarinnittoqarpat, eqqortumik nalunaarutiginninnerup pisimanissaanut tamanna naammassasoq, tamatuma kinguneraa. Nalunaarutini arlalinni ataasiinnaq, nalunaarutiginnissutigineqartussani, ammarneqarpat imaluunniit allatut suliarineqarpat, assigisaanik tamanna naammassaaq. Taamattoqarpat nalunaarutit ilanngussat, nalunaarutiginnissutigineqartussat tamarmik, nalunaarutiginnissutigineqarsimasutut isigineqassapput.

Tekniskiusumik aaqqiineq, nalunaarutip, pingaarnertut oqariartuutaasup, iliannngussap imaluunniit nalunaarutip allap ilanngunneqarsimasup ammarneqarsimanerani imaluunniit allatut suliarineqarsimanerani uppersaammik nassiussisussap, ima ilusilersorneqarsimanissaa, ammaanermi imaluunniit pingaarnertut oqariartuutip, tassuuna nalunaarut ilanngunneqarsimalluni, allatut suliarineqarnerani, imaluunniit nalunaarutini arlalinni imaluunniit ilanngussani arlalinni, nalunaarummi tassani ilanngunneqarsimasuni,

ataatsip ammarneqarnerani, nalunaarutit ilanngunneqartut tamarmik inummut nalunaarummut imaluunniit nalunaarutinit tunngassuteqartut taamaalillunik nalunaarutiginnissutigineqarnerat pillugit erseqqissumik ilisimatinneqassasut, aamma nalunaarutiginninneq inatsisitigut aammattaaq sunniuteqartussaasoq, aamma inuk nalunaarummut imaluunniit nalunaarutinit tunngassuteqartoq, taamaammat nalunaarut taanna imaluunniit nalunaarutit taakku ilanngunneqarsimasut pillugit isummertariaqartoq, siunnersuutikkut naatsorsuutigineqarpoq.

Digitaliusumik allakkanut aaqqiissummi pineqartumi tekniskiusumik taamaattumik aaqqiissummik, taanna nassiussisumut uppersaammik nassiussisinnaalluni aamma allaffigineqartup nalunaarut, pingaarnertut oqariartuutaasoq, ilanngussa q imaluunniit nalunaarut alla ilanngunneqarsimasoq ammartinnagu imaluunniit allatut suliarineqartinnagu, allaffigineqartumut ilisimatitsissummik/mianersoqqusummik allaaserineqartumik tunniussisinnaalluni, ilusilersuisoqarpat, piuminarsakkamik digitaliusumik nalunaarutiginninneq inatsisitigut sunniutilimmik naammassineqarsinnaavoq.

Allaffigineqartup digitaliusumik allakkanik nakkartitsisarfik qanoq ililluni iserfigisinaaneraa apeqqutaatinnagu, tekniskiusumik aaqqiissut taamatut pissuseqarluni ingerlassaq. Siuliani ilisimatitsissummik/mianersoqqusummik allaaserineqartumik peqqaartinnani, nalunaarutit, pingaarnertut oqariartuutit imaluunniit ilanngussap ammarneqarsinnaanissaa imaluunniit allatut suliarineqarsinnaanissaa periarfissaassanngilaq.

Piuminarsakkamik digitaliusumik nalunaarutiginninneq allaffigineqartup eqeersimaartumik iliuuseqarnissaanik piumasaqaateqartitsissaaq. Allaffigineqartup nalunaarut, pingaarnertut oqariartuut aamma ilanngussa qarpat ilanngussat, ammanngippagit imaluunniit allatut suliarinnippagit, nalunaarutiginninneq pisimanaviannngilaq. Taamaattoqarpat oqartussaasup nalunaarutiginninnermut periaaseq alla atortariaqassavaa, suliasaatsimi tamanna periarfissaqarpat, nalinginnaasumik oqarasuaatikkut nalunaarutiginninneq, aamma taamaanngippat sassaqqusissummik tunniussisartumit nalunaarutiginninneq atortariaqassallugu.

§ 133, imm. 6-imi imm. 8-nngortussami, ”nr. 1-3” ima allannngortinneqassasoq: ”nr. 1-miit 3 ilanngullugu, 5 aamma 6”, siunnersuutigineqarpoq.

Digitaliusumik nalunaarutiginninneq aamma piuminarsakkamik digitaliusumik nalunaarutiginninneq aamma inatsisitigut pisinnaatitaasunut pissusaatitaasunullu pisinnaasoq, siunnersuutit kinguneraa.

Aammattaaq inatsisissatut siunnersuummi nalinginnaasumik oqaaseqaatini imm. 2.11.2 innersuussutigineqarpoq.

Nr. 8-imut (§ 134)

Allakkatigut nalunaarutiginninneq aamma oqarasuaatikkut nalunaarutiginninneq inummut pineqartumuinnaq pisinnaasoq, eqqartuussisarnermik inatsimmi § 134-ip aalajangersarppaa, taamaattoq § 131 takuuk.

§ 134-imi ”aamma oqarasuaatikkut nalunaarutiginninneq” ima allanngortinneqassasoq “, oqarasuaatikkut nalunaarutiginninneq aamma digitaliusumik nalunaarutiginninneq” siunnersuutigineqarpoq.

Soorlu allakkatigut nalunaarutiginneq aamma oqarasuaatikkut nalunaarutiginninneq inummut pineqartumuinnaq pisinnaasoq, taamaattoq eqqartuussisarnermik inatsimmi § 131 malillugu inuit sakkutuujunngitsut pillugit suliani, akuusup eqqartuussissuserisuanut imaluunniit eqqartuussinermi nammineq sinnerluni pisinnaatitamut imaluunniit inummut, akuusup nammineq sinnerluni nalunaarutiginninnermik tiguisussatut toqqagaanut nangaassuteqarluni digitaliusumik nalunaarutiginninneq pisinnaassasoq, siunnersuutip kinguneraa.

Piuminarsakkamik digitaliusumik nalunaarutiginnittarneq eqqartuussisarnermik inatsimmi § 134-imi ilanngunneqassanngitsoq siunnersuutigineqarpoq. Ammaaneq imaluunniit allatut suliarinninneq allaffigineqartumit namminermi suliarineqarsimanera imaluunniit inummit allamit allaffigineqartup nammineq digitaliusumik allakkanut nakkartitsisarfimmini ammaasinnaaneranik akuersissuteqarsimanera apeqqutaatinnagu, allaffigineqartup digitaliusumik allakkanut nakkartitsisarfianni nalunaarutip il.il. ammarneqarsimanerani imaluunniit allatut suliarineqarsimanerani, piuminarsakkamik nalunaarutiginninneq pisutut isigineqartussaana, tamatumunnga pissutaavoq. Piuminarsakkamik digitaliusumik nalunaarutiginninneq taamaammat inummut namminermut nalunaarutiginninnertut isigineqarsinnaanngilaq.

Aammattaaq inatsisissatut siunnersuummi nalinginnaasumik oqaaseqaatini imm. 2.11.2 innersuussutigineqarpoq.

Nr. 9 (§ 142, imm. 2)-mut

Pisortat akuersissuteqarsimatinnagit, inuit pisortani sulisut imaluunniit suliareqqusanik suliaqartut, pisortat soqutigisaanni pissutsit nipangiussisussaataaeramik pissusaaffiusut

pillugit ilisimannittut atorneqannginnissaat, eqqartuussisarnermik § 142, imm. 1-p aalajangersarpaa.

Taamaattoq itigartitsinermut pissutaasut oqartussaasumit nassuiaatigineqaqqullugit eqqartuussiviup peqqussutigisinnaavaa, aamma suliap paasinarsisineqarnissaanut qajassuussinissat, isertuussinissamut qajassuussinissaq tunulliunneqartariaqalersippagu, tamatuma kingunerisaanik pineqartoq nassuiaaqqullugu eqqartuussiviup peqqusinnaavaa.

Naalagaaffiup isumannaatsuunissaanut imaluunniit naalagaaffinnut takornartanut naalagaaffiup pissusaanik akuersissuteqarnissamut itigartitsineq tunngavilersorneqarpat, eqqartuussiviup taamaattoq pineqartoq ilisimasalittut nassuiaaqqusinnaanngikkaa, tassunga atasmusik ilanngussinnginnissaq § 142, imm. 2-mi oqaaseqatigiit pingajuata aalajangerpaa.

§ 142, Imm. 2-mi oqaaseqatigiit pingajuanni aalajangersagaq annertusineqassasoq, taamaalilluni inuup pingajuusup inuuneranut imaluunniit peqqissusaanut qajassuussassanik akuersissuteqarnissamut itigartitsineq tunngavilersorneqarpat, eqqartuussiviup pineqartoq ilisimasalittut aammattaaq nassuiaateqaqqusinnaanngikkaa, siunnersuutigineqarpoq.

Itigartitsineq piviusumik inuup pingajuusup inuuneranik peqqissusaanilluunniit qajassuussinermik tunngaveqarnersoq, eqqartuussiviup kisimiilluni nalilersinnaavaa, kisianni paasissutissanik isertuussinissaq pillugu qajassuussineq suliap paasinarsisineqarnissaanut qajassuussinermut naleqqiullugu tunulliunneqartariaqarnersoq pinnagu, siunnersuutip kinguneraa.

Inuup kinaassusaata, taassuma inuunerata peqqissusaataluunniit navianartorsiortinneqarsinnaaneratul isigineqartup, isertuunneqarsinnaanera siunnersuutip qulakkeerinneqataaffigissavaa. Taamaalilluni, tassuunakkut assersuutigalugu paasissutissiisartup kinaassutsiminik isertuussisup kinaassusaa ersersinneqassappat, tassuunakkullu paasissutissiisartup inuunera imaluunniit peqqissusaa navianartinneqassappat, politiini tjenestemandi nassuiaateqaqqullugu peqquneqarsinnaanngitsoq aalajangersakkap qulakkiissavaa.

Aammattaaq inatsisissatut siunnersuummi oqaaseqaatini nalinginnaasuni imm. 2.1.2 innersuussutigineqarpoq.

Nr. 10 (§ 147, imm. 2)-mut

Ilisimannittoq ilisimannittut aggersagaasinnaannginnermik- imaluunniit ilisimannittut nassuiaatitaasussaannnginnermik il.il. ilaatinneqartoq, nassuiaateqarpat, eqqartuussiviup

nassuiaanerup tamanut issuarneqarnissaa inerteqqutigisinnaagaa, eqqartuussisarnermik inatsimmi § 147, imm. 2-p periarfissiissutigaa.

Aalajangersakkap matuma malitsigisaanik imaqarniliornissamik inerteqquteqarnermik unioqqutitsisoq akiliisitsissummik akiliisitaasussanngortitaasariaqartoq, soorlu (eqqartuussisarnermik inatsimmi § 127, imm. 1 malillugu) eqqartuussisarnermik inatsimmi § 120-p malitsigisaanik imaqarniliornissap inerteqqutigineqarnerani aamma taamaattoqartoq, siunnersuutigineqarpoq.

Inatsisitigut pisinnaatitaasut pisussaatitaasullu aammattaaq taamaattumik imaqarniliornermik inerteqquteqarnermik unioqqutitsisut akiliisitsissummik akiliisitaasussanngortitaasariaqartut, tassunga atatillugu siunnersuutigineqarpoq.

Matumuuna isumaliutissiissut nr. 1427/2003 qupperneq 256 qallunaat eqqartuussisarnermik inatsisaanni § 173, imm. 2-mi aalajangersakkap assingusup allanngortinneqarnissaannik siunnersuummik imaqartoq, tamatumalu kingorna inatsisikkut nr. 215-ikkut, 31. marts 2004-sukkut pisoq malillugu, eqqartuussisarnermik inatsimmi § 147, imm. 2 malillugu imaqarniliornissamik inerteqquteqarnerup unioqqutinneqarnerani pinerluttulerineq pillugu inatsiseqartitsineq malillugu akisussaatitsisoqarsinnaannginneranut ullumikkut periarfissaliissuteqannginera, malittarisassiuussinermi kukkunertut isigineqartariaqarpoq.

Nr. 11 (§ 310 b, imm. 1)-imut

Nassuiaat assinik- imaluunniit nipinik immiussaappat, eqqartuussisarnermik inatsimmi § 310 b, imm. 1-imi, nassuiaanerup immiunneqarnerata imaa eqqartuussisut allattaavianni ilaatinneqarpoq.

§ 310 b, imm. 1, nr. 4-imi § 101-imut innersuussineq § 101 c-mut innersuussinermut allanngortinneqarnissaa siunnersuutigineqarpoq.

Eqqartuussisaatsimi allagaatinik takunnissinnaatitaaneq pillugu malittarisassatut nutaatut siunnersuutit kingunerisaanik siunnersuut siunnersuutaavoq, taakkulu inunnut tassunga inatsisitigut soqutigisaqartunut eqqartuussisut allattaaviinit takussutissiinerit pillugit § 101-ip taamanikkut atuuttup (inatsisissatut siunnersuummi § 1, nr. *) § 101 c-tut siunnersuutigineqartumi ingerlateqqinneqarnissaat ilaatigut kinguneraat.

Pinerluttulerinermik suliani, § 101 d, imm. 2-mi oqaaseqatigiit pingajuattut siunnersuut malillugu, allagaatinik takunnissinnaatitaaneq pillugu aalajangiinermut piginnaasaqarnerup politidirektørimut inissinneqarnissaa pillugu siunnersuut, § 101 c-tut siunnersuutigineqartoq malillugu allagaatinik takunnissinnaatitaanerup tunniunneqarsinnaanera pillugu apeqqut

saqqummerpat, nassuiaatit imaasa eqqartuussisut allattaaviannut allanneqarnerisa sularineqarnerannut tulluuttut kingunerissavai:

Nassuiaaneq, assinik- imaluunniit nipinik immiussaasoq pillugu eqqartuussisut allattaavianni allatanik allagaatinik takunnissinnaatitaaneq pillugu noqqaassummik politidirektøri tigusippat, aallaqqaataasumik inummit, nassuiaat pillugu eqqartuussisut allattaaviini allatanik allagaatinik takunnissinnaatitaasumit noqqaassut saqqummiunneqarsimanersoq politidirektørip nalilersortussaassavaa. Taamaattoqarpat, noqqaassut pillugu politidirektørip eqqartuussivik nalunaaruteqarfigisussaassavaa, taamaalilluni eqqartuussiviup nassuiaatip imaa eqqartuussisut allattaaviannut ilanngunniassammagu. Taamaattoq allagaatinik takunnissinnaatitaanerup killilerneqarsinnaanissaa pillugu malittarisassat (assersuutigalugu 101 c, imm. 3, nr. 3-tut siunnersuutigineqartoq malillugu inuit ataasiakkaat allanit sunissaqaratik pissuserisaat pillugit paasissutissat ilaatinneqannginnerat) pineqartup nassuiaat pillugu eqqartuussisut allattaavianni allatanik allagaatinik takunnissinnaatitaanerani ilaatitsinngippata, politidirektørip noqqaassut pillugu eqqartuussivimmut nalunaaruteqarnissani pinngitsoortissinnaavaa. Taamaattoq nassuiaammi, taamaattoqassappat eqqartuussisut allattaavianni ilanngunneqartussami, qanoq annertutigisumik pineqartup allagaatinik takunnissinnaatitaanissaa pillugu politidirektørip aallaqqaataasumik iternga tikillugu nalilersuissanissaa pisariaqanngilaq. Pisuni eqqartuussiviup nassuiaanerup imaanik eqqartuussisut allattaaviinut ilanngussinissaq siunertaralugu noqqaassuteqarneq pillugu politidirektørip eqqartuussivik nalunnarfigippagu, taamaalilluni nassuiaanerup imaata eqqartuussisut allattaavianni ilanngunneqarsimanerata kingorna, qanoq aamma taamaattoqassappat qanoq annertutigisumik allagaatinik takunnissinnaatitaaneq pillugu noqqaassut akuerineqassanersoq pillugu, politidirektøri aatsaat inaarutaasumik aalajangiisinnaavoq. Nassuiaat sioqqullugu eqqartuussisut allattaaviini allaaserineqartussaatinagu, politiit tamanna periarfissaatillugu allagaatinik takunnissinnaatitaaneq pillugu apeqqut paasinarsassagaat, taamaattoq piumasqaataavoq.

Nr. 12 (§ 310 c, imm. 2 aamma 3)-imut

Eqqartuussinerup nalaani assiliasat- imaluunniit nipit immiunneqarnerisa takuneqarsinnaanerat imaluunniit tusarnaarneqarsinnaanerat kiisalu taamatut nipimik immiussap allaganngortinneqarneranik pissarsisinnaaneq eqqartuussisarnermik inatsimmi § 310 c tunngassuteqarpoq.

Aalajangersakkami tassani § 102-mut innersuussinerit eqqartuussisarnermik inatsimmi § 101 e-mut innersuussinermut allannngortinneqarnissaat siunnersuutigineqarpoq.

Tusagassiutit allagaatinik takunnissinnaatitaanerit pillugu eqqartuussisarnermik inatsimmi § 102-mit § 101 e-mut (inatsisissatut siunnersuummi § 1, nr.3) nuunneqarnissaannik siunnersuuteqarnerup siunnersuut kinguneraa.

Nr. 13 (§ 310 d)-mut

Eqqartuussiviup nassuiaammik oqaluttuareqqiineranik eqqartuussisarnermik inatsimmi § 310 d tunngassuteqarpoq.

§ 310 d, 3-mi oqaaseqatigiit pingajuanni § 100-mut innersuussineq § 101 b-mut innersuussinermut allanngortinneqarnissaa kiisalu paragraf-imut innersuussinerup »nassuiaat pillugu eqqartuussuummi imaluunniit eqqartuussisut allattaavianni ilanngussinerni allagaatinik takunnissinnaatitaaneq« »eqqartuussuummi allagaatinik takunnissinnaatitaaneq«-mut tunngassuteqalernissaa siunnersuutigineqarpoq.

Allagaatinik takunnissinnaatitaaneq pillugu malittarisassatut nutaatut siunnersuutigineqartut siunnersuut kinguneraat, taakkulu ilaatigut § 101 b-imi (inatsisissatut siunnersuummi § 1, nr.3) kikkulluunniit eqqartuussutini allagaatinik takunnissinnaatitaanerit eqquppaat.

Eqqartuussiviup nassuiaammik oqaluttuareqqiinera nipilerlugu immiunneqarsimappat, kikkulluunniit eqqartuussutini takunnissinnaatitaanerit pillugu § 101 b-tut siunnersuutigineqartoq malillugu, eqqartuussuummi allagaatinik takunnissinnaatitaaneq nalunaarutigineqarpat, siunissami nassuiaanerup eqqartuussisut allattaavianni ilanngunneqartarnissaa, siunnersuutip kinguneraa.

Qallunaat eqqartuussisarnermik inatsisaanni § 714-imut, § 310 d-mi aalajangersakkap tunngavigisaani, siunnersuut naapertuuppoq, aamma eqqartuussisut allattaaviinut ilanngussineq, nammineq nassuiaatip nipilerlugu immiunneqarneranik tunngaveqartinnagu, eqqartuussiviup nassuiaammik oqaluttuareqqiineranik tunngaveqarpat, eqqartuussisut allattaaviinut ilanngussinerup ajornannginniarakasiuneranut ataqatigiilluni.

Eqqartuussiviup nassuiaammik nipilerlugu immiunneqarsimasumik oqaluttuareqqiinera pisimappat, inuit immikkut ittumik tassunga soqutigisallit § 101 c-tut siunnersuutigineqartoq malillugu eqqartuussisut allattaaviini allagaatinik takunnissinnaanerit aamma eqqartuussisut allattaaviannut ilanngussinerup akornanni pissutsit eqqarsaatigalugit, inatsisissatut siunnersuummi § 1, nr. 11-imut (§ 310 b, imm. 1) oqaaseqaatit innersuussutigineqarput.

Nr. 14 (§§ 339 a-339 c)-imut

Suliami politiit atortussaataanik illersuisoq ilisimasaqalersinnaasoq, eqqartuussisarnermik inatsimmi § 340, imm. 1-ip aalajangersarppaa. atortussat akornutissaqanngitsumik assilillugit sanaqqinneqarsinnaatillugit, assilillugit sanaqqitat illersuisumut nassiuuneqassapput. Atortussat tiguneqarsimasut politiit akuersissuteqaqqaartinnagit illersuisup pasisamut allanulluunniit tunniussinnaanngilai.

Naalagaaffinnut takornartanut, naalagaaffiup isumannaatsuunissaanut imaluunniit suliap paasinarsisinneqarnissaanut imaluunniit inummut pingajuusumut qajassuussinissap tamanna qaqutigorluinnaq pisariaqartissappagu, § 340, imm. 1-imi malittarisassat avaqqunneqarsinnaapput, imaluunniit paasissutissat politiinit tiguneqarsimasut ingerlateqqinneqannginnissaat pillugu politiit illersuisoq peqqussuteqarfigisinnaavaat. Unnerluunneqartup pingaarnertut isumaqatigiinniarnertup nalaani nassuiaareernissaata tungaanut peqqussut sivitsorneqarsinnaavoq.

Pinerluttulerinermik suliani ingerlasuni illersuisup pasineqartullu allagaatinik takunnissinnaatitaanerat pillugu aalajangersakkat taakku §§ 339 a-miit 339 c ilanngullugu aalajangersakkanit taarserneqarnissaat siunnersuutigineqarpoq.

§ 339 a-mut

Illersuisup allagaatinik takunnissinnaatitaanera aamma pasineqartup illersuisumini allagaatinik takunnissinnaatitaanera pillugit malittarisassat aalajangersarneqarnissaat aalajangersakkami siunertarineqarpoq. Eqqartuussisarnermik inatsimmi § 340, imm. 1 aamma 4, allannguutinik ilallugu, aalajangersakkap ingerlateqqippaa.

Pisuni illersuisoqartillugu, tamannalu aallaaviatigut suliami pineqartumi inummik pasisaqartoqarnissaanik piomasaaqateqarpoq, § 339 a-mi aalajangersagaq atuutissaaq.

Eqqartuussisarnermik inatsimmi kapitali 34-imi oqariartaatsit allakkut naapertorlugit aamma aalajangersakkat pisariaqanngitsumik paasiuminaatsut pinngitsoortinniarlugit, inatsisip oqaasertaani oqaaseq »pasineqartoq« atorneqarpoq, tassanilu aamma unnerluunneqartoq ilaatinneqarpoq.

§ 340, imm. 1 atuuttoq assigalugu, pinerluttulerinermik suliani assortuuttoqannginnissaanik tunngaviup naammassineqarneranik aalajangersagaq ersersitsivoq. Inuit sakkutuujunngitsut pillugit sulianut sanilliullugit, pinerluttulerinermik suliani pissutsit immikkut ittut atuuttarneri pissutigalugit, aalajangersakkami *illersuisoq* ukkatarineqarpoq. Illersuisoq tassaavoq, annikitsumik killilersugaalluni, ingerlaavartumik allagaatinik takunnissinnaatitaasoq, akerlianilli pasineqartoq inuttut illersuisuni aqutigalugu aamma suli killilersugaanerusumik ingerlaavartumik suliami atortussanik allagaatinik

takunnissinnaatitaasoq. Tassuunatigut aalajangersagaq tamakkiisumik inatsisinut atuuttunut naapertuuppoq.

Suliaq pillugu *eqqartuussisut allattaaviini* ilanngussinerit assilillugit sanaqqinneqarnerisa eqqartuussiviup nammineq suliniuteqarnermigut illersuisumut nalunaarutigisassagai, *imm. 1-imi oqaaseqatigiit siulliit* aalajangerpaat. Suliaq pillugu eqqartuussisut allattaaviinut ilanngussani illersuisup allagaatinik takunnissinnaatitaanera pillugu malittarisassanik nalinginnaasunik eqqartuussisarnermik inatsit ullumikkut imaqqanngilaq, kisianni illersuisoq taamatut allagaatinik takunnissinnaatitaammat qularineqassanngilaq.

Allagaatinik takunnissinnaatitaaneq pillugu malittarisassat nutarterneqarnerinut atatillugu, taamaammat illersuisup eqqartuussisut allattaaviini allagaatinik takunnissinnaatitaanissaa pillugu malittarisassamik erseqqissumik ilanngussisoqarnissaa siunnersuutigineqarpoq, ilaatigut ataani § 339 b malillugu pisuni illersuisoqartinnagu *pasisap* eqqartuussisut allattaavianni allagaatinik takunnissinnaatitaanera pillugu erseqqissunik malittarisassiuussinissap aamma siunnersuutigineqarnera pissutigalugu.

Illersuisoq toqqarneqarsimatillugu imaluunniit ivertinneqarsimatillugu, suliaq pillugu eqqartuussisut allattaaviini ilanngussinerit assilillugit sanaqqinneqarnerisa eqqartuussiviup nammineq suliniuteqarnermigut illersuisumut nalunaarutigisassagai, siunnersuutip kinguneraa. Illersuisoqartinnagu malittarisassaq atuutinngilaq, aamma pineqartup illersuisutut sulilinnginnerani piffissami eqqartuussisut allattaaviinut ilanngussinerit assilillugit sanaqqinneqarneri eqqartuussiviup nammineq suliniuteqarnermigut illersuisumut nalunaarutigissanngilai. Kisianni siunissami illersuisoq illersuisutut sulilinnginnermini piffissami eqqartuussisut allattaaviannut ilanngunneqarsimasut pillugit noqqaassuteqarnikkut assilillugit sanaqqiinnermik aamma pissaq. Pisup taamaattup inatsisitigut malittarisassiuunneqarnissaa siunnersuutigineqanngilaq.

Eqqartuussisut allattaaviini ilanngunneqartuni aamma aalajangiinerit ilaatinneqarput.

§§ 344-ip imaluunniit 458-ip allakkut malitsiginngippagu, illersuisup pasineqartoq eqqartuussisut allattaaviinut ilanngunneqarsimasut ilisimatitsissutigisinnaagai, *imm. 1-imi oqaaseqatigiit aappaata* aalajangerpaa. Eqqartuussisarnermik inatsimmi § 344, imm. 3 malillugu peqqussuteqartoqarsimanngippat, imaluunniit eqqartuussineq § 344, imm. 5-imi ilaatinneqanngippat (inatsisissatut siunnersuummi § 1, nr. 19-itut oqaasertaliorneqartoq) imaluunniit eqqartuussisarnermik inatsimmi § 458 malillugu (inatsisissatut siunnersuummi § 1, nr. 39-42-itut oqaasertaliorneqartoq) unnerluunneqartumut paasissutissat isertuunneqarnissaat pillugu aalajangiisoqarsinngippat, taamaalilluni pasineqartoq tamatigut eqqartuussisut allattaavini ilanngunneqartut illersuisumini naallugit atuarsinnaavai.

Pisuni §§ 344-p aamma 458-ip pineqartut avataaniittuni pasineqartup eqqartuussisut allattaaviini ilanngussanik naallugit atuaanissaminut periarfissai pillugit apeqqut ullumikkut eqqartuussisarnermik inatsimmi erseqqissumik malittarisassiuunneqanngilaq. §§ 344-ip imaluunniit 458-ip allakkut malitsiginngippagu, pasineqartup inatsisit atuuttut malillugit illersuisumini eqqartuussisut allattaaviini ilanngussanik naallugit atuaasinnaareersoq taamaattoq ilimagineqassaaq. Taamaalilluni siunnersuut piviusunik allanngortitsinertut ersiutaanngilaq.

Eqqartuussisut allattaaviini ilanngussat inatsisit unioqqutillugit atorneqarnissaat ernumagineqartariaqarpat, eqqartuussisut allattaaviini ilanngussat pasineqartumut imaluunniit allanut tunniunneqannginnissaannik illersuisumut peqqussutigineqarsinnaanera, *imm. 1-mi oqaaseqatigiit pingajuata* eqqartuussivimmut periarfissiissutigaa. Tamanna imaqarnermigut inatsisinut atuuttunut naapertuuppoq, tamatumalu kingorna, eqqartuussisarnermik inatsimmi takussutissiap § 101, *imm. 2-mi oqaaseqatigiit aappat malillugu takussutissiap inatsisit unioqqutillugit atorneqarnissaa ernumagineqartariaqarpat*, eqqartuussisut allattaaviinit takussutissiat pasineqartumut tunniunneqarnissaat eqqartuussiviup itigartitsissutigisinaavaa.

Nammineq suliniuteqarnikkut imaluunniit politiit noqqaassuteqarnerisigut aalajangersagassatut siunnersuut malillugit peqqussut tunniunneqarsinnaavoq. Taamaattumik peqqussuteqartoqarpat, illersuisup eqqartuussisut allattaaviinik pasineqartoq isiginnaartissinnaavaa, kisianni pasineqartumut eqqartuussisut allattaavii tunniussinnaanngilai.

Taamaattoqassappat siunissami pasineqartup *illersuisumit* eqqartuussisut allattaaviinit ilanngussat assilillugit sanaqqinneqarnerinik tunineqarnissaa, siunnersuutip kinguneraa. Ullumikkut eqqartuussisarnermik inatsimmi § 101 malillugu, eqqartuussisut allattaaviinit takussutissiat *eqqartuussivimmit* nalunaarutigineqarnissaat pasineqartup piumasaqaatigisinaavaa.

Illersuisup pasineqartumut takussutissiat tunniussinaanera, eqqartuussiviup eqqartuussisut allattaaviinit takussutissianik nassiussinermini isummerfigereersimassagaa, siunnersuutip kinguneraa. §§ 344-ip imaluunniit 458-ip allakkut malitsiginngippagu, eqqartuussiviup takussutissiat pasineqartumut tunniunneqannginnissaat pillugit illersuisumut erseqqissumik peqqussuteqarsimanngippat, taamaaliornissaminut illersuisoq pisinnaatitaavoq. Pasineqartup takussutissiat inatsisit unioqqutillugit atorniarai, illersuisup ilumoortumik ilisimaguniuk, taamaattoq tamanna pillugu ilaatigut illersuisup suliap paasinarsisinneqarnissaa akerlilersuinera pillugu pisuni eqqartuussisarnermik inatsimmi § 330 malillugu, illersuisoq takussutissianik pasineqartumut tunnissaminik pisinnaatitaanngilaq.

Atortussat suliamut, pasilliinermut tunngassuteqartumut, atorneqartussatut politiit pissarsiarisimasaannut *imm. 2* tunngassuteqarpoq, aamma § 340, *imm. 1*-imut atuuttumut tunngatillugu allannguutiniq kinguneqarluni.

Aalajangersagaq atuuttoq malillugu illersuisoq (aamma taamaalilluni pasineqartoq imaluunniit unnerluunneqartoq atortussanik politiit pissarsiarisimasaannik ilisimasaqarsinnaatitaavoq.

Illersuisup allagaatinik takunnissinnaatitaanera taamaallaat atortussanut, politiit suliami tassani piviusumi, *oqaaseqatigiit siulliit malillugit*, pasilliinermut imaluunniit unnerluussinermut tunngassuteqartumut, atugassatut pissarsiarisimasaannut killilerneqassasoq, siunnersuutigineqarpoq. Atortussat pingaarnertut isumaqatigiinniarnep nalaani unnerluussisussaataasut saqqummiunniarlugit siunertaqarfigisaat, atortussat suliamut piviusumut, pasilliinermut imaluunniit unnerluussinermut tunngassuteqartumut atugassatut pissarsiarineqarsimanerat apequtaatinnagu, taamaattoq suli tamatigut illersuisup allagaatinik takunnissinnaatitaanerani ilaatinneqassapput.

Aalajangersagassatut siunnersuutigineqartoq aalajangiinermi tunngavinnik marlunnik imaqarpoq, taakkulu marluullutik illersuisup atortussani allagaatinik takunnissinnaatitaaneranut naammassineqarsimassapput.

Siullertut atortussat *pissarsiarineqarsimassapput*. Kalaallit Nunaanni Politiit nammineerlutik atortussanik katersisimanerannit imaluunniit qallunaat imaluunniit nunani allani politiini oqartussaasuinit tigusisimaneranit pisimassaaq. Paasissutissat allanut atatillugit assersuutigalugu politeeqarfimmit allamit, National Enhed for Særlig Kriminalitet-imit imaluunniit Rigspolitiinit katersorneqarsimasut aamma taakkunani paarineqartut, kisianni pissarsiarineqarsimasutut isigineqarsinnaanngillat.

Aappaattut atortussaq *suliamut pasilliinermut imaluunniit unnerluussinermut atugassatut* pissarsiarineqarsimassaaq. Uani atortussap suliap piviusup taassuma pinerluttoqarsimaneranik paasiniaaffigineqarnissaa siunertaralugu pissarsiarineqarsimanissaanik piumasqaammiippoq. Paasissutissat tunuliaqutaasut nalinginnaanerusut assersuutigalugu pinerluuteqarnerit ilusaat imaluunniit inuit eqimattakkuutaat attaveqarfinnut pinerluttuliorfiusunut attaveqarnerat, suliami piviusumi atugassatut pissarsiarineqarsimasutut isigineqarsinnaanngillat. Paasissutissat allamut atatillugu politeeqarfimmit pinerluttoqarsimaneranik paasiniaasumit katersorneqarsimanerat, imaluunniit qallunaat imaluunniit nunani allani politiit oqartussaasuinit katersorneqarsimanerat aamma suliamut piviusumut atatillugu

politeeqarfimmut pinerluttoqarsimaneranik paasiniaasumut tunniunneqarsimanerat apeqqutaatinnagu, tamanna atuuppoq. Paasissutissat, politiit pinerluttoqarsimaneranik paasiniaanermi naluarsuiffiini il.il. takuneqarsinnaasut, aallaaviatigut suliami tassani piviusumi atugassatut pissarsiarineqarsimasutut aammattaaq isigineqarsinnaanngillat.

Nalunaaruteqartartup atia politiit nalunaarusiaanni politiit nalunaarutigisimanngippassuk, aamma tassunga taarsiullugu politiit nalunaarusiaanni, politiit inuup kinaassusaanik ilisimanninnertik allasimappassuk, nalunaaruteqartartup, kinaassutsimi isertuunneqarnissaanik kissaateqartup, kinaassusaa pillugu paasissutissat illersuisup allagaatinik takunnissinnaatitaanerani ilanneqannginnissat naatsorsuutigineqarpoq. Inuit paasissutissanik tunniussisimasut nalunaaruteqartartunit allaanerusut kinaassusaa § 339 a, imm. 2-p atuuffissaata avataaniipput, aamma taamaalilluni inuup paasissutissanik tunniussisimasup kinaassutsimi isertuunneqarnissaanik kissaateqarnera tunngavigalugu kinaassusaa nalunaarusiami takuneqarsinnaanngippat, illersuisup allagaatinik takunnissinnaatitaanerata avataaniipputtaaq.

Atortussat sorliit illersuisup allagaatinik takunnissinnaatitaanerani ilaatinneqarnersut pillugit politiit § 339 a malillugu aalajangiinerat, illersuisup § 341 malillugu eqqartuussivimmut saqqummiussinnaavaa. Taamaattoq illersuisup atortussat sorliit allagaatinik takunnissinnaatitaaffiginiarnerlugit erseqqissassagaa piunasaqaataavoq. Taamaalilluni illersuisup atortussanik, § 339 a-mi allagaatinik takunnissinnaatitaanermi ilaatinneqartutut oqaatigineqartunik ilisimasaqarnissaa piunasaqaataavoq. Tassuunakkut atortussanik illersuisup ilisimalissallugit soqutigisinnaasaanik nassaarniarluni, illersuisup nalunaarsuiffinnit imaluunniit atortussanit assingusunit takussutissianik pinissani piunasaqaatigisinnaanngilaa. Taamatuttaaq suliami piviusumi tassani atugassaminik suliami aalajangersimasumi allami atortussani tamani takunnissinnaaneq illersuisup piunasaqaatigisinnaanngilaa.

Oqaaseqatigiit aappaat malillugu, atortussat assilillugit sananeqarnerat, taakku ajornanngitsumik assilillugit sananeqarsinnaappata, illersuisumut tunniunneqassapput. Tamanna § 340, imm. 1-imut atuuttunut naleqqiullugu allanngortinneqanngilaq.

Oqaaseqatigiit pingajuat malillugu, politiit akuersissuteqaqqaartinnagit atortussat tigusani pasineqartumut allanulluunniit illersuisup tunniussinnaanngilai. Imm. 3-tut siunnersuutigineqartoq malillugu peqqussuteqartoqarsimanngippat (tamanna pillugu ataaniittoq malillugu), illersuisup atortussat pasineqartumut qimerloortissinnaagai taanna isumaqarpoq, akkerlianilli atortussat imaluunniit taakku assilillugit sanaqqinneqarneri politiit akuersissuteqaqqaartinnagit pasineqartumut allanulluunniit illersuisup tunniussinnaanngilai. Tamannattaaq § 340, imm. 1-imut atuuttunut naleqqiullugu allanngortinneqanngilaq.

Kisianni pasineqartunut allanulluunniit atortussat assilillugit sanaqqinneqarnerani pillugu eqqartuussisarnermik inatsimmi § 340, imm. 1-imi malittarisassamut atuuttumut tunngatillugu tapiliussat marluk siunnersuutigineqarput.

Oqaaseqatigiit sisamaat malillugu tamanna *aarlerinangitsutut* isumaqarfigineqarpat, politiit atortussat assilillugit sanaqqinneqarnerat pasineqartumut allanulluunniit tunniunneqarnissaat politiit akuersissutigissagaat, *siullertut* siunnersuutigineqarpoq. Pasineqartumut allanulluunniit atortussat assilillugit sananeqarnerisa tunniunneqartarnerat pillugit politiit aalajangiinerannut aalajangiinermi tunngavinnik malittarisassaq atuuttoq imaqangilaq. Qaagukkut atortussat assilillugu sanaqqinneqarnerat pasineqartumut allanulluunniit tunniunneqarsinnaanerit pillugu inatsisip minnerpaatut naatsumik aamma nalinginnaasumik nalunaarutiginninnissaa kisianni eqqornerpaatut isigisariaqassaaq.

Oqaaseqatigiit tallimaat malillugu takussutissiat uppersaataasut erseqqinnerusumik taaneqartut assilillugit sanaqqinneqarnerisa tunniunneqartarnissaat pillugu immikkut ittumik malittarisassaq *aappattut* siunnersuutigineqarpoq. Imm. 3-tut siunnersuutigineqartumi qajassuussinissat taaneqartut (§ 340, imm. 4-p atuuttup assigisaa) pisariaqartissappassuk, politiit takussutissiat taakku assilillugit sanaqqinneqarnerisa tunniunneqarnissaannut akuersissuteqarnissaq taamaallaat itigartissinnaagaat, siunnersuummi pineqarpoq.

Takussutissiat taakku, eqqartuussisarnermik inatsimmi § 467, imm. 1-imi aamma imm. 2, nr. 5-imi taaneqartut siunnersuummi ilaatinneqarput.

Takussutissiat, iliuuserineqartoq pillugu paasissutissanik tunniussisut § 467, imm. 1-imi ilaatigut ilaatinneqarput, aamma assersuutigalugu akileraarutit ikilisinniarlugit akileraartitsisartunut paasissutissanik kukkusunik tunniussinerit pillugit suliani nammineerluni nalunaarsuinerit, peqquserlunnerit pillugit suliani isumaqatigiissutit allaqatigiinnerillu aamma peqquserlulluni allagaasiorneq pillugu suliani takussutissiat assersuutitut taaneqarsinnaapput.

Oqartussaasut sinnerlugit suliaqarnerup malitsigisaanik nalunaajaatit aamma ilisimannittutut nassuiaatit § 467, imm. 2, nr. 5-imi ilaatinneqarput. Bilinspektørimit, Retsmedicinsk Institut-imit imaluunniit Retslægerådet-imit nalunaajaatit assersuutitut taaneqarsinnaapput. Ilaatigut ikiaroorartut arsaarinnissutaasimasut pillugit laboratorianit nalunaarusiat, nakorsap allagarsiusai, toqussutaasoq paasiniarlugu toqungasumik misissuineq pillugu nalunaarusiat aamma tarnikkut misissuinerit matuma ataaniipput. Eqqartuusseriaaseq atuuttoq malillugu, Eqqartuussiviit qullersaata aalajangiinera Ugeskrift for Retsvæsen 1997-imi, qupperneq 676-imi issuarneqartoq malillugu, aningaasaqarneq pillugu pinerluttuliornerit pillugit suliani naatsorsuuserisut nalunaarusiaat imm. 2, nr. 5-imi aamma ilaatinneqarput.

Kisianni eqqartuussisarnermik inatsimmi § 467, imm. 2, nr. 1-imi, 4-imi aamma 6-imi takussutissiat taaneqartut siunnersuummi ilaangillat, imaappoq inummit kunngikkormiuusutut imaluunniit nunat allat diplomatiattut eqqartuussivimmi ilisimannittutut nassuiaasussaangitsut, inummit suliamut tunngasumik ilisimasalimmit apeqqutit pillugit paasiniaanerit, akissuteqarnerit missiliuinerillu pillugit nalunaajaatit, kiisalu politiit nalunaarusiaanni ilanngussat ilaat. Eqqartuussisut allattaaviini ilanngussinerit assilillugit suliarineqarnerisa pasineqartumut tunniunneqartarnerat § 339 a, imm. 1-itut siunnersuutigineqartumit malittarisassiuunneqarmat, eqqartuussisut allattaaviini ilanngunneqartutut eqqartuussisarnermik inatsimmi § 467, imm. 2, nr. 1-imiit 4 ilanngullugu taaneqartut (uppernarsaatissanik ujaasinerit, arsaarinnissutiginninnerit, misissuinerit, inummit suliamut tunngasumik ilisimasalimmit apeqqutit pillugit paasiniaanerit, akissuteqarnerit missiliuinerillu pillugit nalunaajaatinik suliaqarnerit aamma siusinnerusukkut nassuiaatigineqarsimasut pillugit) aamma ilaatinneqanngillat.

Assersuutigalugu politiinut nassuaatigineqarsimasut pillugit politiit nalunaarusiaat (§ 467, imm. 2, nr. 6-imi ilaatinneqanngitsut), imaluunniit eqqartuussisarnermik inatsimmi § 467 a malillugu politiit meeqqamik killisiuinerannit video atorlugu immiussaas pillugit takussutissiat eqqartuussisarnermik inatsimmi § 467, imm. 3 ilaatinneqartut siunnersuummi aamma ilaatinneqanngillat.

Siunnersuummi ilaatinneqartunik takussutissiat assilillugit sanaqqinneqarnerannik tunniussinissamut akuersissutit, imm. 3-mi qajaassussinissat tamanna pisariaqartippassuk, taamaallaat itigartitsissutigineqarsinnaapput, imaappoq qajassuussinerit pingaarnertut isumaqatigiinniarnep nalaani unnerluunneqartup nassuiaareernissaata tungaanut, qajassuussinissat pasineqartup imaluunniit unnerluunneqartup allagaatinik takunnissinnaatitaanerit takussutissiat ilanngunneqanngivinnissaannik periarfissiisut. Takussutissiani uppernarsaataasuni pineqartuni allagaatinik takunnissinnaatitaaneq assilillugu sanaqqinertut ilusilerlugu tunniunneqassanersoq imaluunniit itigartitsissutigivinneqassanersoq, tamatuma kingunerinngilaa. Illuatungaaticut qajassuussinissanut taaneqartunut tunngatillugu pasineqartullu allagaatinik takunnissinnaatitaanissaminik soqutiginninnera pillugit oqimaaqatigiissitsineq pissaaq. Taamaattoq illersuisumi allagaatinik takunnissinnaatitaaneq misissuisitsinertut iluseqartoq tunniunneqarsinnaappat, pasineqartup soqutiginninnera annertujaartumik isumagineqassaaq, aamma illuatungaani, pasineqartumut takussutissiat assilillugit sananeqarneri tunniunneqarpata, illuatungaani qajassuussinissat ajoquserujussuarneqarsinnaapput. Naak aalajangiinnermut tunngaviit taakkoqqissaat atorneqartussaagaluartut, pasineqartumut assilillugit sanaqqitanik tunniussinertut ilusilerlugu allagaatinik takunnissinnaatitaanerup itigartitsissutigineqarnissanut tunngavissaqarnera pisinnaavoq, kisianni allagaatinik takunnissinnaatitaaneramik

itigartitsivissornermuunngitsoq. Pisut ilaanni nalequttuusinnaasooq tassaavoq periarfissat pingajuat, matumuuna malittarisassatut siunnersuutigineqartumi oqaatsit »imaluunniit allat« malillugit, pasineqartumut namminermt assilillugu sanaqqiinerup tunniunneqarnissaata itigartitsissutigineqarnera, kisianni suliamik paasisimasalimmut, illersuisumut ikiuuttumut, assilillugu sanaqqiinerup tunniunneqarnissaata akuerineqarnera.

Takussutissiat uppersaatait assilillugit sananeqarnerisa tunniunneqarnissaannut itigartitsissutaakkajunnersaasartoq tassaassaaq inummik pingajuusumik qajassuussineq. Ilaatigut inatsisinut periutsit pissutigalugit pasineqartup takussutissianik uppersaataasunik tunineqarsinnaanera eqqartuussisarnermik inatsimmi § 467-mut nalinginnaasumik innersuussinikkut ilusilersorneqarpoq. Taamaammatt inummik pingajuusumut qajassuussineq pasineqartumut assilillugit sanaqqiinernik tunniussinermt itigartitsissutinit piviusunik tunngavilersorneqartunit isumagineqassaaq. Taamaalilluni inummik pingajuusumut qajassuussinerup assersuutigalugu eqqunngitsuliorfigineqartoq pillugu nakorsap allagarsiussaata assilillugu sanaqqinneqarneranik (allagarsiussa § 467, imm. 2, nr. 5-imi ilaatinneqartussaassaaq) imaluunniit immiussinerit eqqartuussisarnermik inatsimmi § 115, imm. 2-mi ilaatinneqartut (immiussinerit, ingasattumik kinguaassiuutitigut pinerluttuliornerit erseqqinnerusumik taagorneqartut, pasilliutigineqartut imaluunniit unnerluussutigineqartut pillugit suliami pissutsinik oqaluttuareqqiisut) (immiussat § 467, imm. 1-imi ilaasinnaassapput) pasineqartumut tunniussisinnaannginneq nalinginnaasumik tunngavilersussavaat.

Takussutissiaq taamaattoq illersuisumit toqqarneqartumit suliamik paasisimasalimmit misissuiffigineqarnissaa, unnerluunneqartup illersorneqarneranut pisariaqartinneqarpat, suliamik paasisimasallip takussutissiamik illersuisumi misissuisinnaanera naammangippat, suliamik paasisimasalimmut takussutissiaq toqqaannaq tunniunneqassaaq.

Takussutissiat allat pineqartillugit (nammineq nalunaarsuutit, isumaqatigiissutit, naatsorsuisut nalunaarutaat, bilinspektørit assigisaasaluunniit nalunaajaataat, ikiaroorartut pillugit laboratoriat nalunaarusiaat, pasineqartoq nammineq pillugu Retslægeråd-ip nalunaajaataat il.il.) takussutissiap assilillugu sanaqqinneqarnerata pasineqartumut tunniunneqarnissaata itigartitsissutigineqarnissaanut qaqutigorujussuaq pissutissaqassaaq.

Atortussap assilillugu sanaqqinneqarnerata pasineqartumut tunniunneqarnissaata pillugu politiit akuersissuteqarnissartik pillugu itigartitsippata, eqqartuussisarnermik inatsimmi § 341 malillugu apeqqut eqqartuussivimmut saqqummiunneqarsinnaavoq.

Nipangiussisussaataitanermik peqqussut eqqartuussisarnermik inatsimmi § 340, imm. 4-mi aalajangersagaq atuuttoq *imm. 3-kkut* ingerlateqqinneqarpoq, tamatumalu peqatigisaanik aalajangersakkap atuuffia taamaattoq annertusineqarluni, taamaalilluni assersuutigalugu

naalagaaffinnut takornartanut imaluunniit naalagaaffiup isumannaatsuunissaanut qajassuussassat tamanna pisariaqartissappassuk – ullumikkut pisunit allaanerusumik, tassani *qaqutiguinnaq* pisariaqartinneqassalluni – illersuisoq peqqussummik nalunaarfigineqarsinnaalerluni.

Ingasattumik inatsimmik unioqutitsineramik imaluunniit pinerluttulerinermi inatsimmi kapitali 7-imik tunngassuteqartumi (naalagaaffiup namminersortuuneranut isumannaatsuuneranullu pinerluttuliornerit) imaluunniit kapitali 8-mik (naalagaaffiup inatsit tunngaviusoq malillugu aqqissuussineranut aamma naalagaaffiup oqartussaasuisa qullersaannut pinerluttuliornerit, pinerliiniarnerit il.il.) suliami allami ingerlasumi pinerluttoqarsimaneranik paasiniaanermik qajassuussinerup aamma paasissutissanik illersuisup politiinit tigusimasaanik, illersuisup ingerlatitseqqinnginnissaanut peqqussuteqarnissaq tunngavilersorsinnaagaa, aammattaaq nutaatut siunnersuutigineqarpoq. »Immikkut ittumik ingasattumik inatsimmik unioqutitsineq«-mi malittarisassaq pingaarneq malillugu inatsisinik unioqutitsinertut, inatsissatut siunnersuummi nalinginnaasumik oqaaseqaatini imm. 2.4 malillugu tassani piviusumik inissiisarfimmi sivisuumik piumasaaqaatitaqanngitsumik inissinneqarnissamik eqqartuunneqarnissaq naatsorsuutigineqassalluni, paasineqassaaq.

Assersuutigalugu Kalaallit Nunaanni Politiit suliami piviusumi atugassamik qallunaat imaluunniit nunani allani politiini oqartussaasunik paasissutissanik tigusippata, ingerlatitseqqinneq inatsisinik unioqutitsineramik ilungersunartutut pissuseqartunik taaneqartunik pinerluttoqarsimaneranik paasiniaanermik ajoqusiisinnaappat, paasissutissat taakku ingerlateqqinneqannginnissaat pillugu peqqussummik illersuisoq nalunaarfigineqarsinnaavoq.

Paasissutissat nunani allani oqartussanut tunniunneqarsimasut pineqarpata, aamma taakkuningga ingerlatitseqqinnerup nunani allani pinerluttoqarsimaneranik paasiniaaneq ajoqusersinnaappagu, iliuuseq nunami allami pinerluttoqarsimaneranik paasiniaaffigineqartumi pinerluttulerinermi inatsit malillugu immikkut ittumik ingasattumik inatsimmik unioqutitsinertut taaneqarsinnaappat, imaluunniit pinerluttulerinermi inatsimmi kapitali 7-imik 8-milluuniit assingusunik nunap pineqartup inatsisiliornerani malittarisassanik piaaraluni unioqutitsineruppat, peqqussuteqarneq nalunaarutigineqarsinnaavoq. Inatsimmik unioqutitsinerup piviusup, nunami allami pinerluttoqarsimaneranik paasiniaaffigineqartup, qallunaat naalagaaffiannut pinerluttuliuutigineqarsimannginnera pissutigalugu, tassannga ilaatinneqartussaannnginnera apeqqaatinnagu – pisuni taamaattuni qallunaat naalagaaffiannut iliuutsip assinga pinerluttulerinermi inatsimmi kapitali 7-imik 8-milluunniit piaaraluni unioqutitsinerussaaq.

Pinerliiniarnerit pillugit suliani assigiingissut taanna pilersinnaanngilaq, pinerluttulerinermimi inatsimmi pinerliiniarnerit pillugit malittarisassat sunut tamanut atuupput, kisianni pinerluttulerinermi inatsimmi kapitali 7-imi aamma 8-imi aalajangersakkat arlallit allat iliuutsinik qallunaat naalagaaffiannut imaluunniit qallunaat inatsit tunngaviusoq malillugu aaqjissuussinerannut pinerluttuliornernut il.il. taamaallaat pinerluutinngortitsipput.

Ilisimannittup isumannaatsuunissaanut qajassuussinerup, ilisimannittup najugaa imaluunniit atia, atorfia aamma najugaa pillugit paasissutissanik illersuisup ingerlatitseqqinnginnissaanut peqqussummik nalunaaruteqarnissamik tunngaviliisinaanera, erseqqissumik takuneqarsinnaassasoq aammattaq siunnersuutigineqarpoq.

Ilisimannittup najugaa imaluunniit atia amerlanertigut politiit nalunaarusiaanni takuneqarsinnaasarpog, taannalu killisiuineq tunngavigalugu sananeqartarpog aamma unnerluussaaqataasumi assersuutigalugu uppersaatinik ujaasineq pillugu aalajangiinermi aamma takuneqarsinnaasarluni. Suliap aallartinneraninngaanniilli paasissutissat taakku illersorneqarnissaat sillimaffigineqanngippat, unnerluussinissaq aamma pingaarnertut isumaqatigiinniarneg sioqqullugu tassuuna suliap ingerlanerani pasineqartoq ilisimannittup kinaassusaanik, najugaanik il.il. ilisimasaqalersinnaavoq.

Politiit pinerluttoqarsimaneramik paasiniaanerinngaanniilli ilisimannittup isumannaatsuunissaa eqqarsaatigalugu, ilisimannittup najugaa il.il. pillugit pasineqartumut paasissutissanik ingerlatitseqqinnginnissaa pillugu illersuisumut peqqussummik nalunaaruteqarnissaminnik periarfissaqartut, erseqqissaatigineqartussat siunnersuutigineqartukut erseqqissarneqassaaq. Pisuni unnerluussisussaataassut pingaarnertut isumaqatigiinniarneg nalaani eqqartuussisarnermik inatsimmi § 458, imm. 2 (inatsisissat siunnersuummi § 1, nr. *-itut oqaasertaliorneqartoq) malillugu paasissutissat taaneqartut unnerluunneqartumut nalunaarutigineqannginnissaat eqqartuussivimmit aalajangerneqaqqullugu noqqaassutigisinnaavaat.

Imm. 3 malillugu peqqussuteqarneq nalinginnaasuusinnaavoq aamma taamaalilluni suliami paasissutissanut tamanut ilaatitsisinnaalluni, matumani suliamik ingerlasoqarnera pillugu paasissutissaq ilanngullugu. Taamaattoq paasissutissat peqqussummi ilaatinneqartut pineqartillugit, peqqussut sapinngisamik killilersimaarneqassasoq, nalinginnaasumik atsikkutigiissitsinissamik tunngaviup malitsigaa. Suliaq pillugu paasissutissanik suugaluartunilluunniit ingerlatitseqqinnginnissaaq pillugu nalinginnaasumik illersuisumut peqqusineq taamaammat suliami pissutsit piviusut naliliiffigineqarnerat tunngavigalugu, qajassuussinerup taassuma isumagineqarnissaanut tamanna kisimi periaatsitut periarfissaasutut nalilerneqarpat, taamaallaat nalunaarutigineqarsinnaavoq.

§ 339 c-tut siunnersuutigineqartumi atortussanik ilanngussinnginnerminngaanniit nipangersimasussaataitanermik peqqussuteqarneq annikinnermik akuliunneruvoq, taamaammallu nalinginnaasumik atsikkutigiissitsinissamut tunngaviup malitsigisaanik, illersuisup allagaatinik takunnissinnaatitaanerani killiliineq qanoq iluseqassanersoq pillugu politiit nalilersuinnerminni, iliuuseq annikinnerpaamik akuliunnerusoq atortussaavaat.

Qajassuussineq nipangersimasussaataitanermik peqqusinnermut tunngavilersuutaasoq atorunnaarpat, peqqussut politiit atorunnaarsinneqassaaq. Taamaattoq unnerluunneqartoq pingaarnertut isumaqatigiinniarnep nalaani nassuiaateqareernerani kingusinnerpaamik atorunnaarsinneqarsinnaavoq.

Nipangersimasussaataitanermik peqqussut pillugu politiit aalajangiinerat eqqartuussisarnermik inatsimmi § 341 malillugu illersuisup eqqartuussivimmut saqqummiussinnaavaa.

Aammattaaq inatsisissatut siunnersuummut nalinginnaasumik oqaaseqaatini imm. 2.1.2 innersuussutigineqarpoq.

§ 339 b-mut

Illersuisoqartinnagu pasineqartup allagaatinik takunnissinnaatitaanera pillugu malittarisassanik aalajangersaanissaq aalajangersakkap siunertaraa. Matumuuna pinerluttulerinnermik suliat pineqartillugit, tassani pasineqartoq illersuisoqarani, assortuuttoqannginnissaanik tunngavimmut isiginniffik pingaarutilik inatsisitigut aalajangersarneqarpoq. Illersuisoq toqqarneqarpat imaluunniit ivertinneqarpat, tassunga taarsiullugu § 339 a-tut siunnersuutigineqartoq atuutissaaq.

Illersuisumik toqqaasoqarsimatinnagu imaluunniit ivertitsisoqarsimatinnagu, pasineqartup pinerluttulerinnermik suliami ingerlasumi allagaatinik takunnissinnaatitaanera pillugu aalajangersagaq tunngassuteqarpoq. Naammagittaalliortoqassappat naammagittaalliornermi aalajangersagaq aamma atuuppoq.

Allakkut eqqartuussisarnermik inatsimmi kapitali 34-imi oqariartaaseq naapertorlugu aamma pisariaqanngitsumik aalajangersakkat paasiuminaatsut ingalassimatinniarlugit inatsisip oqaasertaani oqaaseq »pasineqartoq« atorneqarpoq, tassanilu aamma unnerluunneqartoq ilaatinneqarpoq.

Eqqartuussut immi aalajangersagassatut siunnersuutigineqartumi ilaatinneqanngilaq, tassami (piumasaqaatitaqanngitsumik) eqqartuussutip takussutissiarineqarneranik

unnerluunneqartup pisinnaatitaanera eqqartuussisarnermik inatsimmi § 474, imm. 3-p (inatsisissatut siunnersuummi § 1, nr. 43-itut oqaasertaliorneqartup) malitsigaa.

Allagaatinik takunnissinnaatitaanermut atatillugu, pasineqartup illersuisoqanngitsup, pasineqartumut illersuisulimmumut sapinngisaq tamaat naligiissinneqarnissaa aalajangersakkami siunertaavoq. Taamaammat illersuisup allagaatinik takunnissinnaatitaanera pillugu § 339 a-tut siunnersuutigineqartup assigisaanik aalajangersagaq ilusilersorneqarpoq, matumani ingammik illersuisup, taama tulleriillutik, pasineqartumut paasissutissanik ingerlatitseqqinnissaanut imaluunniit takussutissiat assilillugit sanaqqinneqarnerannik tunniussinissaanut periarfissai ilanngullugit.

Pasineqartup illersuisoqanngitsup, pasineqartutut illersuisulittut allagaatinik takunnissinnaatitaanera, taamaalilluni siunnersuutip kinguneraa. Pasineqartup illersuisullip takussutissiaq illersuisumini takusinnaappagu, kisianni takussutissiamik tunineqarsinnaanani, pasineqartoq illersuisoqanngitsoq takussutissiamik politiini takunnissinnaavoq, kisianni takussutissiamik tunineqarsinnaanani. Pasineqartup illersuisullip takussutissiap assilillugu sananeqarneranik tunineqarsinnaappat, pasineqartoq illersuisoqanngitsoq taamatuttaaq takussutissiap assilillugu sananeqarneranik tunineqarsinnaassaaq.

Ilaatigut suliap paasinarsisinneqarnissaanut aamma inummut pingajuusumut qajassuussinissat taamaalillutik illersuisoqartoqarneratuffaarik isumagineqarsinnaapput. Qajassuussinerit taakku suliap aallartinneqarnerani amerlanertigut pasisap allagaatinik takunnissinnaatitaaneranani annertuumik killiliisoqarnissaa pissutissaqartissinnaammasuk, tassunga atatillugu maluginiarneqassaaq.

Suliaq pillugu *eqqartuussisut allattaaviini* ilanngussat pillugit *imm. 1* tunngassuteqarpoq. Eqqartuussisarnermik inatsimmi §§ 344 aamma 458 allatut malitseqartinnagit, *oqaaseqatigiit siulliit* malillugit pasineqartoq noqqaassuteqarnikkut suliaq pillugu eqqartuussisut allattaaviini ilanngussanik politiini ilisimatinneqassaaq. §§ 344 aamma 458 allatut malitseqartinnagit, illersuisoqartillugu pasineqartup siunnersuut malillugu illersuisumini suliaq pillugu eqqartuussisut allattaaviini ilanngussanik misissuisinnaaneranut tamanna assingulluinnarpoq.

Pinerluttuliortoqarsimaneranik paasiniaanerup nalaani eqqartuussinernut eqqartuussisarnermik inatsimmi § 344 tunngassuteqarpoq, aamma naalagaaffiup isumannaatsuunissaanut, naalagaaffinnut takornartanut imaluunniit suliap paasinarsisinneqarnissaanut qajassuussinissat tamanna qaqutigorluinnaq pisisaqartippasuk, eqqartuussisut allattaaviini eqqartuussineq pillugu ilanngunneqarsimasut pillugit pasineqartumut nalunaarutiginnissap

pinngitsoortinneqarnissaanik taanna periarfissiivoq. Inummut pingajuusumut qajassuussinerup qaqutigorluinnaq tamanna pisariaqartissappagu, nalunaarutiginninneq aammattaaq pinngitsoortinneqarsinnaasoq inatsisissatut siunnersuummi § 1, nr. *-ikkut siunnersuutigineqarpoq.

Eqqartuussinerit illersuisup pasineqartullu eqqartuussisarnermik inatsimmi § 339 c malillugu allagaatinik takunnissinnaatitaanerisa killilerneqarnerannut attuumassuteqartut, § 344, imm. 5 (inatsisissatut siunnersuummi § 1, nr. 19-19-itut oqaasertaliorneqartoq) malillugu aammattaaq nalinginnaasumik pasineqartup nalunaaruteqarfigineqartarnissaa pillugu malittarisassani ilaatinneqanngillat.

Eqqartuussisarnermik inatsimmi § 458 pingaarnertut isumaqatigiinniarnermut tunngassuteqarpoq aamma pisut ilaanni nassuiaat, unnerluunneqartup nammineq nassuiaateqarnissaata tungaanut, ilisimannittumit imaluunniit unnerluunneqaqataasumit nassuiaatigineqartoq pillugu pasineqartumut nalunaarutiginninnissap pinngitsoortinneqarnissaanik periarfissiilluni. Ilisimannittup najugaa imaluunniit atia, atorfia imaluunniit najugaa piumasaqaatit immikkut ittut piumasaqaatigalugit unnerluunneqartumut isertuunneqarnissaat inatsisissatut siunnersuummi § 1, nr. 39-42-kkut aammattaaq siunnersuutigineqarpoq.

Assilillugit sanaqqitat inatsisit unioqqutillugit atorneqarnissaat aarlerigineqanngippat, noqqaassuteqartoqarneratigut eqqartuussisut allattaaviinit takussutissiat assilillugit sanaqqinneqarnerat politiit pasineqartumut tunniussinnaagaat *imm. 1-imi oqaaseqatigiit aappaata* aalajangerpaa. § 339 a, imm. 1-mi oqaaseqatigiit aappaat, aamma tassunga oqaaseqaatit malillugit illersuisoqartillugu, eqqartuussiviup (politiinit noqqaasoqarneratigut imaluunniit nammineq iliuserisimasaminik) eqqartuussisut allattaaviinit takussutissiat pasineqartumut allanulluunniit tunniunneqannginnissaat pillugu illersuisoq peqqussinnaavaa.

Eqqartuussisut allattaaviini suliaq pillugu ilanngussat tunniunneqarnissaat politiit itigartitsissutigissatigut, eqqartuussisarnermik inatsimmi § 741 malillugu apeqqut aalajangiiffigisassanngorlugu eqqartuussivimmu saqqummiunneqarsinnaavoq.

Atortussanut politiit suliamut, pasilliinermut tunngassuteqartumut atugassatut pissarsiarisimasaannut *imm. 2* tunngassuteqarpoq. Noqqaassuteqarnikkut pasineqartup atortussanik, politiit pissarsiarisimasaanik, ilisimatinneqarnissaa, *oqaaseqatigiit siulliit* aalajangerpaat. Taamaattoq pissutsit § 339 a, imm. 3-tut siunnersuutigineqartumi taaneqartut pissutigalugit, politiit allagaatinik takunnissinnaatitaaneq pillugu noqqaassut *oqaaseqatigiit aappat* malillugu itigartitsissutigisinnaavaat. Pasineqartup atortussat politiini misissorsinnaagai, atortussanik pasineqartup ilisimasaqarsinnaatitaanerata kinguneraa.

Illersuisoqartillugu, § 339 a, imm. 3-tut siunnersuutigineqartumi taaneqartut pissutigalugit, paasissutissat illersuisup politiinit tigusimasai pillugit illersuisup ingerlatitseqqinnginnissaanik politiit peqqussuteqarsimangippata, pasineqartup illersuisumi atortussanik, suliamut tunngassuteqartunik, suliamut atugassatut politiit pissarsiarisimasaanik ilisimatinneqarsinnaaneranut taassuma assigilluinnarpaa.

Pasineqartup atortussanik ilisimatinneqarnissaanut killiliivigineqarnissaa pillugu politiit aalajangiinerat, tunngaviusumik eqqartuussisarnermik inatsimmi § 341 malillugu aalajangiiffigisassanngorlugu eqqartuussivimmu saqqummiunneqarsinnaavoq. Kisianni qajassuussinerit killiliinermut pissutaasut, pissutsit assigiinngitsut pissutigalugit, pasineqartup suli ilisimasinnaanngisaanik, politiit atortussanik pissarsisimanerat, pasineqartup ilisimatinneqartussaannnginneranik tunngavilersuutaasinnaapput. Sulisaatsimi taamaammatt pasineqartup eqqartuussisarnermik inatsimmi § 341 malillugu apeqqut pillugu eqqartuussivimmu saqqummiussinissani tamatigut ingerlaannaq periarfissarisinnaanngilaa.

Suliat nassuerfiusut pillugu § 449 a-p malitsigisaanik suliap suliarineqarnissaa siunertaralugu, pasineqartup allagaatinik takunnissinnaatitaanerani killilersuinerit kingusinnerpaamik pingaarnertut isumaqatigiinniarneq imaluunniit eqqartuussineq pisinnagu atorunnaarsinneqassasoq, kisianni imm. 2-mi *oqaaseqatigiit pingajuanni* siunnersuutigineqarpoq. Suliaq eqqartuussiviup iluani aalajangiiffigineqarpat, eqqartuussivik § 339 c-tut siunnersuutigineqartoq malillugu aalajangiisimangippat, taamaalilluni pasineqartup suliap aalajangiiffigineqannnginnerani tamatigut suliami atortussat tamaasa ilisimasaqarfigilissallugit periarfissarissavaa.

Siusinnerusukkut pasineqartup paasissutissat politiit pissarsiarisimasaat pillugit misissuinissaminik noqqaassuteqarsimappat, kisianni suli atortussat tamaasa misissuiffigisinnaasimanagit, killilersuinerup atorunnaarsinneqarsimanera pillugu namminneq iliuuseqarnermikkut politiit pasineqartoq ilisimatittariaqarpat.

Taamaattoqarpat suliap § 449 a malillugu, tassani pasineqartoq pingaarnertut isumaqatigiinniarnep imaluunniit eqqartuussinerup nalaani nammineq soqutigisami isumaginissaanut periarfissaqarnissaa pineqarluni, suliarineqarnissaa siunertaralugu, pingaarnertut isumaqatigiinniarneq imaluunniit eqqartuussineq sioqqullugu piffissaqarluarluni pasineqartup atortussat misissussavai.

Pasineqartup allagaatinik takunnissinnaatitaanera atortussat politiini *misissorneqarnerattut* ilusilik, imm. 2-mi oqaaseqatigiit siullerniit pingajuat ilanngullugu tunngassuteqarpoq. Tamanna imm. 2-mi *oqaaseqatigiit sisamaat* malillugu nangaanartoqartutut isigineqannngippat, noqqaassuteqartoqarneratigut politiit atortussat *assilillugit*

sanaqqinneqarnerat pasineqartumut *tunniutissavaat*. Tamanna § 339 a, imm. 2-mi oqaaseqatigiit sisamaattut siunnersuutigineqartoq, tassungalu oqaaseqaatit malillugit *illersuisup* atortussanik, illersuisup politiit tigusimasaanik, pasisamut allanulluunniit tunniussinissaanut politiit akuersissuteqarsinnaanerata pillugu malittarisassatut siunnersuutigineqartumut assinguvoq.

Aammattaaq imm. 2-mi *oqaaseqatigiit tallimaat* malillugu takussutissiat uppersaataasut erseqqissumik taaneqartut assilillugit sanaqqinneqarnerisa tunniunneqarnissaat pillugu immikkut ittumik malittarisassaq siunnersuutigineqarpoq. § 339 a, imm. 2-mi oqaaseqatigiit tallimaattut siunnersuutigineqartoq tassungalu oqaaseqaatit malillugit *illersuisup* pasineqartumut allanulluunniit takussutissianik uppersaataasunik taamaattunik tunniussinnaanera pillugu siunnersuummut siunnersuut manna assingusumik ilusilerneqarpoq. § 339 a, imm. 2-mi oqaaseqatigiit tallimaattut siunnersuutigineqartumut oqaaseqaatit erseqqinnerusut malillugit, takussutissiat eqqartuussisarnermik inatsimmi § 467, imm. 1-imi aamma imm. 2, nr. 5-imi taaneqartut siunnersuummi ilaatinneqarput.

Politiit assilillugit sanaqqiinnermik tunniussiumanngippata, apeqqut eqqartuussisarnermik inatsimmi § 341 malillugu eqqartuussivimmut saqqummiunneqarsinnaavoq.

Aammattaaq inatsisissatut siunnersuummi nalinginnaasunik oqaaseqaatini imm. 2.1.2 innersuussutigineqarpoq.

§ 339 c-mut

§ 339 a-tut (maannamut § 340, imm. 1-iusoq) siunnersuutigineqartoq malillugu illersuisup aamma § 339 b-tut siunnersuutigineqartoq malillugu pasineqartup allagaatinik takunnissinnaatitaanerannit atortussat ilanngunneqannginnissaat pillugit eqqartuussisarnermik inatsimmi aalajangersakkamik nutaamik ilanngussisoqarnissaa siunnersuutigineqarpoq. Aalajangersagaq ilaatigut § 340, imm. 4-imi aalajangersakkamik atuuttumik ingerlatitseqqiineruvoq, kisianni illersuisup allagaatinik takunnissinnaatitaanerata avaqunneqarsinnaanerata annertusineqarneranik kinguneqarluni.

Tassa tamanna illersuisup § 339 a malillugu allagaatinik takunnissinnaatitaaneranut qajassuussinerit tunngaviusut isumagineqarnissaannut pisariaqartinneqarpat, aamma pingaarnertut isumaqatigiinniarnep aallartinneqarnerata kingorna aamma suliap naammassineqareernerani – nutaaliornertut illersuisup allagaatinik takunnissinnaatitaanerannit atortussat piffissami aalajangigaanngitsumi ilanngunneqannginnissaat – aalajangersakkakut siunnersuutigineqarpoq.

Naalagaaffinnut takornartanut qajassuussineq *imm. 1, nr. 1* pineqartillugu, tamanna § 340, imm. 4-imi aalajangersakkami atuuttumi qajassuussinissat assingusut naapertorlugit nassuiarneqassaaq. Assersuutigalugu nunani allani oqartussaasut suliamut aalajangersimasumut atatillugu Kalaallit Nunaanni Politiinut paasissutissanik isertuussanik atugassanngortitsippata, aamma nunani allani oqartussaasut, naalagaaffiup taassuma isumannaatsuunissaa eqqarsaatigalugu paasissutissat taakku Kalaallit Nunaanni isertuullugit suliarineqarnissaat kissaatigippatigit, § 339 c-tut siunnersuutigineqartoq malillugu nalilersuinermtut atatillugu, naalagaaffinnut takornartanut qajassuussineq pineqarsinnaavoq.

Taamatuttaaq naalagaaffiup isumannaatsuunissaanut (*Imm. 1, nr. 2*) aamma suliap paasinarsisinneqarnissaanut (*imm. 1, nr. 3*) qajassuussinerit, taakku § 340, imm. 4-imi aalajangersakkami atuuttumi nassuiaaneq malillugu assigisaanik nassuiarneqassapput.

§ 339 c-tut siunnersuutigineqartoq malillugu illersuisup allagaatinik takunnissinnaatitaaneranit, inuup pingajuusup inuuneranut imaluunniit peqqissusaanut qajassuussinissat, *imm. 1, nr. 4* malillugu atortussanik ilanngussinnginnissaq tunngavilersorsinnaavaat. Matumuuna inuup pingajuusup ajoquserneqarnissaa pillugu piviusumik paasissutissamik pigisaqartoqarnissaa imaluunniit siorasaarisoqarsimanissaa piumasqaataanngilaq. Pasineqartup imaluunniit unnerluunneqartup peqatigiiffinnut imaluunniit inuit attaviinut, ingasattumik nakuusernermik atuisartunut imaluunniit inunntut, namminneq pinerluttuliornerannik ersersitsisunut ingasattumik nakuusernissamik siorasaarisartutut ilisimaneqartunut attaveqarsimaguni attaveqarnerata, taamaalilluni pissutsit assigiinngitsut malillugit illersuisup allagaatinik takunnissinnaatitaaneranut killiliinissaq tunngavilersorsinnaavaa.

Immikkut ittumik ingasattumik inatsimmik unioqqutitsineq imaluunniit pinerluttulerinermi inatsimmi kapitali 7-imi (naalagaaffiup namminersortuuneranut isumannaatsuuneranullu pinerluttuliornerit) imaluunniit 8-imi (naalagaaffiup isumannaatsuunissaanut imaluunniit naalagaaffiup inatsit tunngaviusoq malillugu aaqjissuussineranut pinerluttuliornernut, pinerliiniarnernut il.il.) piaaraluni unioqqutitsinerit pillugit suliami allami ingerlasumi tamanna pisariaqarpat, atortussat illersuisup allagaatinik takunnissinnaatitaaneranit ilanngunneqannginnissaat pisinnaasoq, *imm. 1, nr. 5-ip* malitsigaa. Qajassuussinissat assigisaat nipangiussisussaataaneq pillugu peqqussuteqarneq pillugu aalajangersakkami § 339 a, imm. 3-mi ilanngunneqarnissaa siunnersuutigineqarpoq, taamaammallu qulaani aalajangersakkamut tassunga oqaaseqaatit erseqqinnerusumik innersuussutigineqarput.

Paasissutissat taakku qaqutiguinnaq suliami ilaatillugit, politiit pinerluttoqarsimaneranik paasiniaanerminni periaasii pillugit paasissutissat isertuussaasut illersorneqarnissaannut qajassuussineq aamma illersuisup allagaatinik takunnissinnaatitaaneranut killiliinermtut tunngavilersuutaasinnaassasoq, *imm. 1, nr. 6-imi* siunnersuutigineqarpoq. Pasineqartup

unnerluunneqartulluunniit illersorneqarneranut paasissutissat ilisaqqunnartumik pingaaruteqarnaviangitsut uani pineqarput. Politiit isertortumik tusarnaarnerannut atortui aamma -periaasii il.il. pillugit tekniskiuernerusumik paasissutissaq assersuutigalugu politiit pinerluttuliorqarsimaneramik paasiniaanerminni periaasiitut pissuseqartutut oqaatigineqarsinnaapput. Politiit immikkut ittumik paasissutissap isertuunneqarnissaa soqutigisarippassuk, aamma paasissutissaq nalinginnaasumik ilisimaneqanngippat, paasissutissaq taamaattoq isertuussatut isigineqartariaqassaaq.

Politiit noqqaassuteqarnerisigut aamma suliami ataasiakkaami tassani pissutsit piviusumik nalilersuiffigineqarnerisigut, illersuisup allagaatinik takunnissinnaatitaanera pillugu malittarisassat avaqqunneqarnissaat, aalajangersagassatut siunnersuutigineqartoq malillugu eqqartuussiviup aalajangiiffigissallugu piginnaasaqarfigaa. Eqqartuussiviup aalajangiinera aalajangiinikkut tunngavilersorneqartussakkut aalajangerneqassaaq. Pissutsit piviusut, §§ 339 a-p aamma 339 b-p avaqqunneqarnerannut tunngaviliisut, suliami taaneqassapput. Eqqartuussiviup aalajangiinera malittarisassat nalinginnaasut malillugit aalajangeqqitassanngortinneqarsinnaavoq.

Qajassuussinerup qulaani taaneqartup ataatsip arlallilluunniit tamanna *pisariaqartissappagu* (aamma qaqutigunnaq pisariaqartitsinerunngippat, soorlu § 340, imm. 4-imi atuuttumi tamanna takuneqarsinnaasoq), eqqartuussiviup, § 339 a malillugu taama tulleriillutik, illersuisup pasineqartullu allagaatinik takunnissinnaatitaanerisa killilerneqarnissaat, eqqartuussiviup aalajangersagassatut siunnersuutigineqartoq malillugu aalajangiiffigisinnaavaa. Qajassuussinissat pineqartut killiliinerup pisariaqartutut isigineqarnissaanut annertoorejussuarmik pingaaruteqassapput. Illersuisup allagaatinik takunnissinnaatitaanerani ilanngussinnginnissamut pisariaqartitsilersumik qajassuussassanik peqarneranik naliliinermi, illuatungaani qajassuussinerup pineqartup illuatungaani atortussat pasineqartup imaluunniit unnerluunneqartup illersorneqarnissaanut pingaarutaat oqimaaqatigiissinneqassapput. Aatsaat pisariaqavippat (strictly necessary) illersuisup allagaatinik takunnissinnaatitaanerani paasissutissat ilanngunneqannginnissaat Den Europæiske Menneskerettighedsdomstol-ip (Europamiut Inuit pisinnaatitaaffii pillugit Eqqartuussiviata) annertuumik pingaartikkaat tassunga atatillugu erseqqissarneqassaaq.

Illersuisup § 339 a malillugu allagaatinik takunnissinnaatitaanerani imaluunniit pasineqartup § 339 b malillugu allagaatinik takunnissinnaatitaanerani avaqqutsineq, pasineqartup unnerluunneqartulluunniit illersorneqarnissaanut pingaarutilinnik nangaassutsinik pilersitsippat, atortussat ilanngunneqannginnissaat pinngisaannassasoq, *imm. 2-mi* aalajangersagassatut siunnersuutigineqartup erseqqissumik malitsigaa. Tamanna qajassuussinerit illersuisup allagaatinik takunnissinnaaneranut killiliisunut tunngaviusut annertuumik pingaaruteqassappata apeqqutaatinnagu atuuppoq. Pisuni taamaattuni politiit

taamaalillunik atortussat taakku illersuisumut tunniutissavaat – taamaattoqassappat nipangiussisussaataitanermik peqqussutitalerlugu – imaluunniit pasilliussinertik imaluunniit unnerluussinertik taamaatitiinnassavaat.

§ 339 c malillugu suliat ilaanni – ingammik assersuutigalugu naalagaaffiup isumannaatsuunissaa pillugu paasissutissat mianersuutassarujussuit pineqartillugit – illersuisup allagaatinik takunnissinnaatitaanera pillugu apeqqutip eqqartuussivimmit suliarineqarneranut atatillugu, eqqartuussivinni allakkiuutinut aamma takussutissiat suliarineqartarnerannut atatillugu immikkut ittumik isumannaallisaanissamut iliuitsit atorpeqarnissaat pisariaqarsinnaammat maluginiarneqarpoq.

Qajassuussineq ataaseq arlallillunniit taamaallaat atortussat ilaannaannut atuuppat, illersuisoq pasineqartorlu atortussap imaata sinneranik ilisimatinneqassasut, *imm. 3-mi* takuneqarsinnaavoq.

§ 339 c-mi avaqqutsineq piffissami erseqqinnerusumik aalajangersarneqartumi imaluunniit massakkuugallartoq atuutissasoq, eqqartuussiviup aalajangersinnaagaa *imm. 4-p* malitsigaa. Piffissami erseqqinnerusumik aalajangersarneqartumi avaqqutsinerup atuunnissaa pillugu aalajangiineq – assersuutigalugu pingaarnertut isumaqatigiinniarnep aallartinnissaata tungaanut – qajassuussinissat aalajangersakkami taaneqartut isumagineqarnissaannut avaqqutsinissaq suli pisariaqartinneqarpat, kingusinnerusukkut aalajangiinikkut sivitsorneqarsinnaavoq.

Illersuisup pasineqartullu allagaatinik takunnissinnaatitaanerat piffissami killiligaanngitsumi atuutissasoq eqqartuussiviup aalajangersimappagu, pingaarnertut isumaqatigiinniarnep aallartinneqarnissaa sioqqullugu, avaqqutsineq, assersuutigalugu naalagaaffiit takornartat qajassuunneqarnissaanut suli pisariaqarnersoq nalilerniarlugu, avaqqutsineq eqqartuussiviup isummerfigeqqissavaa.

Unnerluunneqartup illersorneqarneranut atortussat pineqartut illersuisup pasineqartullu allagaatinik takunnissinnaatitaaneranit ilanngunneqannginnissaat suli nangaassutinik pingaarutilinnik kinguneqannginnissaa, erseqqinnerusumik misissuinerup aammattaq qulakkiissavaa.

Suliap pingaarnertut isumaqatigiinniutigineqarnissaa qaqugukkut pissanersoq ullulernerneqartillugu, illersuisup § 339 c malillugu allagaatinik takunnissinnaatitaaneranit suli ilanngussinngitsoqannginnissaa pillugu apeqqutip eqqartuussivimmut saqqummiunneqarnissaa politiit isumagissallugu pisussaaffigaat. Atortussat illersuisup aamma pasineqartup maannamut allagaatinik takunnissinnaatitaaffiginngisaasa tunniunneqarnissaat, pingaarnertut isumaqatigiinniarnermik kinguartitsinissamik

pisariaqalersitsisinnaasut, pinngitsoortinniarlugit, isumaqatigiinniarnissaq kingusinnerpaamik sapaatit akunneri 4 sioqqullugit nutaamik misissuineq malittarisassaq pingaarneq malillugu pingaarnertut suliarineqartariaqarpoq.

Qajassuussineq, illersuisup allagaatinik takunnissinnaatitaanerata avaqqunneqarneranik tunngaviliisoq, pissutissaaruppat, politiit namminneq iliuuseqarnermikkut paasissutissat illersuisumut tunniunneqarnissaat pisussaaffigivaat.

§§ 339 a-mik aamma 339 b-mik avaqqutsinissaq pillugu eqqartuusiviup aalajangiinissaa sioqqullugu, illersuisunit sulianik taakkuninnga suliaqartussatut atorfinitsinneqartunit, *imm.* 5 malillugu inatsiseqarnermut ministerip immikkut ittumik illersuisoq ivertissavaa.

Immikkut ittumik illersuisoq oqaaseqaateqarnissaminut periarfissinneqassaaq aamma matumani qajassuussinissat, suliami piviusumi tassani § 339 c-mik avaqqutsinissamut akerliusut erseqqissassallugit. Eqqartuussinerit tamaasa, §§ 339 a-p aamma 339 b-p avaqqunneqarnissaat pillugit eqqartuussiviup aalajangiinissaa siunertaralugu eqqartuussissutigineqartut, immikkut ittumik illersuisumut ilisimatitsissutigineqassapput, aamma taakku isiginnaarnissaannut pisinnaatitaalluni kiisalu atortussanik, pasilliinermut imaluunniit unnerluussummut tunngassuteqartunik, politiit suliamut tassunga atugassatut pissarsiarisimasaannik ilisimasaqarfiginissaat pisinnaatitaaffigivai. Taamatuttaaq § 392, *imm.* 2-mi oqaaseqatigiit aappaanniit tallimaat ilanngullugu, aamma *imm.* 3 assigisaannik atuupput. Immikkut ittumik illersuisup paasissutissat pasineqartumut imaluunniit taassuma nalinginnaasumik illersuisuanut ingerlateqqissanngikkai, tamatuma ilaatigut kinguneraa. Kisianni immikkut ittumik illersuisoq – atortussat nalinginnaasumik illersuisup allagaatinik takunnissinnaatitaaneranit ilanngunneqannginnissaat pillugit aalajangiinerup aalajangiiffigineqarnerata kingorna – ingerlaavartumik suliap ineriartornera il.il. pillugit ilisimatinneqassanngilaq.

Pinerluttoqarsimaneranik paasiniaaneq pinerluttulerinermi inatsimmi kapitali 7-imik imaluunniit 8-mik unioqqutitsinermik tunngassuteqarpat, suliaq Nunatsinni Eqqartuussivimmit suliarineqassaaq. Pinerluttoqarsimaneranik paasiniaaneq pinerluttulerinermi inatsimmi kapitali 7-imik imaluunniit 8-mik unioqqutitsinermik, taama tulleriillutik, naalagaaffiup namminersortuuneranut aamma isumannaatsuuneranut pinerluttuliornernik aamma naalagaaffiup inatsit tunngaviusoq malillugu aaqjissuussineranut aamma naalagaaffimmi oqartussaasut qullersaannut, pinerliiniarnernut il.il. tunngassuteqarpat, § 339 c malillugu illersuisup pasineqartullu allagaatinik takunnissinnaatitaaneranni killiliinissaq pillugu apeqqut taamaalilluni sumiiffimmi eqqartuussivimmi suliarineqarani Nunatsinni Eqqartuussivimmi suliarineqassaaq.

Imm. 5 malillugu illersuisut ivertinneqarsinnaasut, *imm. 6* malillugu inatsiseqarnermut ministerip atorfinitsissavai. Illersuisut pineqartut pillugit malittarisassat erseqqinnerusut inatsiseqarnermut ministerip aalajangersassavai, matumani pigaartuunermut aaqqissuussinerit pillugit, atorneqarnissamut piareersimatitaanermi akissarsiat pillugit aamma isumannaallisaaneq pillugu apeqqutit pillugit ilanngullugit.

Imm. 6-itut aalajangersagassatut siunnersuutigineqartoq malillugu aamma illersuisut immikkut ittut, pinerluttulerinermi inatsimmi kapitali 7-imik imaluunniit 8-imik unioqqutitsinerit pillugit suliani, pinngitsaaliilluni isertortumik akuliunnermik tunngassuteqartumi, § 392, *imm. 4* atuuttoq malillugu ivertinneqartut malillugit inuup taassuma atorfinitsinneqarnissaa akornutissaqanngilaq.

Eqqartuussissuserisup, qallunaat eqqartuussisarnermik inatsisaanni aalajangersakkat assingusut (§ 729 c *imm. 6*, aamma § 784, *imm. 2*) malillugit atorfinitsinneqartup, aamma § 339 c, *imm. 6* malillugu atorfinitsinneqarnissaa akornutissaqanngilaq.

Aammattaaq inatsisissatut siunnersuummi oqaaseqaatini nalinginnaasuni *imm. 2.1.2* innersuussutigineqarpoq.

Nr. 15-16 (§ 340)-imut

Illersuisup politiit atortussaataannik ilisimasaqalernissamik pisinnaatitaanera pillugu eqqartuussisarnermik inatsimmi § 340, *imm. 1* malittarisassanik imaqarpoq.

Inatsisissatut siunnersuummi § 1, nr. 14 (§§ 339 a-miit 339 c ilanngullugu malittarisassatut siunnersuutit) malillugit pinerluttulerinermik suliani ingerlasuni illersuisut pasineqartullu allagaatinik takunnissinnaatitaaneri pillugit ataatsimoortumik malittarisassiuussinissaq siunnersuutigineqarpoq.

Taakku kingunerisaannik § 340, *imm. 1-p* atorunnaarsinneqarnissaa siunnersuutigineqarpoq.

Pinerluttoqarsimaneranik paasiniaanermi iliuuseqartoqarnerata nalaanni illersuisup najuunnissaa pillugu eqqartuussisarnermik inatsimmi § 340, *imm. 3* (siunissami *imm. 2*) malittarisassanik imaqarpoq, taakkulu pingaarnertut isumaqatigiinniarnep nalaani uppernarsaatit atorneqarsinnaanerit ilimagineqarpoq.

Naalagaaffinnut takornartanut, naalagaaffiup isumannaatsuunissaanut imaluunniit suliap paasinarsisinneqarnissaanut imaluunniit inummut pingajuusumut qajassuussinissat tamanna pisariaqartilerpagu, illersuisup pinerluttoqarsimaneranik paasiniaanerni iliutsini

taaneqartuni najuunnissaata avaqqunneqarsinnaaneraniq eqqartuussisarnermik inatsimmi § 340, imm. 4 (siunissami imm. 3) periarfissiivoq.

§ 340, imm. 4-p imm. 3-nngortussap allanngortinneqarnissaa siunnersuutigineqarpoq, imaalillugu pinerluttoqarsimaneranik paasiniaanermi iliuutsit taaneqartut nalaanni, tassunga taarsiullugu pinerluttulerinermik suliani ingerlasuni illersuisup pasineqartullu allagaatinik takunnissinnaatitaanerisa avaqqunneqarsinnaaneraniq pillugu § 339 c-mi aalajangersagassatut siunnersuutigineqartuq malillugu avaqqutsisoqarsinnaalissalluni.

Illersuisup pinerluttoqarsimaneranik paasiniaanermi iliuutsit taaneqartut ingerlanneqarneranni najuussinnaanerata avaqqunneqarnissaanut periarfissat, inatsisissatut siunnersuummi § 1, nr. 14-imi (§ 339 c-itut siunnersuutigineqartumi), tassungalu oqaaseqaatit malillugit illersuisup pasineqartullu allagaatinik takunnissinnaatitaanerisa avaqqunneqarsinnaaneraniq periarfissat assinginiq annertusineqarnerat, siunnersuutip kingunerana.

Politiit, tamanna pillugu illersuisumut nalunaaruteqaqqaaratik (sioqqutsisumik nalunaaruteqaratik imaluunniit tamatumalu kingorna nalunaaruteqaratik) pinerluttoqarsimaneranik paasiniaanissami iliuutsimik taamaattumik kissaateqarpata, politiit apeqqut taanna eqqartuussivimmu saqqummiutissavaat. Aammattaaq § 339 c, imm. 5 malillugu pasineqartumut immikkut ittumik illersuisumik ivertitsisoqassaaq, taassumalu pinerluttoqarsimaneranik paasiniaanermi iliuutsip suliarineqarsimane pillugu illersuisumut nalunaaruteqartoqarnissaa pillugu isumat tapersersuisut eqqartuussivimmu saqqummiussinnaavai. Immikkut ittumik illersuisoq kisianni pinerluttoqarsimaneranik paasiniaanermi iliuutsip, politiit kissaatigalugu suliarerusutaata, suliarineqarnerani najuussinnaanngilaq.

Pinerluttoqarsimaneranik paasiniaanermi iliuutsit taaneqartutut pissuseqartut, illersuisoq najuutsinnagu suliarineqarsimasut, pingaarnertut isumaqatigiinniarnep nalaani uppersaartitut kisiartaallutik imaluunniit pingaarnersaallutik atorneqarsinnaanngimmata maluginiarneqassaaq, tassami tamanna Den Europæiske Menneskerettighedskonvention-ip artikiliiani 6-imi innarliinermik kinguneqartussaassamat.

Aammattaaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 17 (§ 341, Imm. 2)-imut

Politiit pinerluttoqarsimaneranik paasiniaanermi iliuusaasa inatsisit malillugit suliarineqarsimane aamma pasineqartup illersuisullu pinnaatitaaffii pillugit

isumaqatigiittoqarpat, eqqartuussivik aalajangiissasoq, eqqartuussisarnermik inatsimmi § 341-p aalajangersarpaa.

Aalajangersakkami tassani nutaatut *imm. 2* ilanngunneqassasoq siunnersuutigineqarpoq, taassumalu kingorna politiit § 339 a, *imm. 2*-mi oqaaseqatigiit siullit imaluunniit § 339 b, *imm. 2*-mi oqaaseqatigiit siullit malillugit aalajangiinerisa inatsisinut naapertuuttumik suliarineqarsimanerat pillugu isumaqatigiinngitsoqarnerani, taamatut aalajangiisoqarneranut pissutaasut pillugit nalunaajaapput. Atortussat isumaqatigiinngissutaasut eqqartuussivimmut saqqummiuteqqullugit, eqqartuussiviup aammattaaq politiinut peqqussutigisinnaavaa.

Illersuisup § 339 a, *imm. 2*-mi oqaaseqatigiit siullit malillugit allagaatinik takunnissinnaatitaanera, imaluunniit § 339 b, *imm. 2*-mi oqaaseqatigiit siullit malillugit (inatsisissatut siunnersuummi § 1, nr. 14-itut oqaasertaliorneqartoq) pasineqartup allagaatinik takunnissinnaatitaanera pillugu atortussat ilaanersut isumaqatigiinngissutigineqartillugit, politiit aalajangiinermut aalajangiiffigineqarsimasumut tunngaviusut eqqartuussivimmut illersuisumullu nassuiaatigissagaat, siunnersuutip kinguneraa.

Atortussat isumaqatigiinngissutigineqartut saqqummiuteqqullugit, eqqartuussiviup politiit peqqusinnaagai, siunnersuutip kinguneraattaaq.

Taamaalilluni atortussat suussusii pillugit uppersarsaatnik amerlanerusunik, isumaqatigiinngissummut tunngassuteqartunik, eqqartuussivik perusussagalarpat, atortussat pineqartut saqqummiuteqqullugit eqqartuussiviup politiit peqqusinnaavai. Taamaattoqassappat atortussat eqqartuussivimmut taamaallaat saqqummiunneqassapput, aamma taamaalilluni illersuisoq atortussanik takunnissinnaassanngilaq.

Politiit atortussat isumaqatigiinngissuteqarnermut tunngassuteqartut pillugit eqqartuussivimmut saqqummiussinerisa kingorna – eqqartuussivik politiit aalajangiinerat §§ 339 a-mut aamma 339 b-mut naapertuuttut aalajangiippat, aamma taamaalilluni atortussat illersuisup allagaatinik takunnissinnaatitaanerata avataaniilerpata, eqqartuussisarnermik inatsimmi § 50, *imm. 3* (inatsisissatut siunnersuummi § 1, nr. 1-itut oqaasertaliorneqartoq) malillugu eqqartuussisoq pinerluttulerinermik suliaq pineqartoq pillugu pingaarnertut isumaqatigiinniarnep nalaani attuumavallaassaaq.

Aammattaaq inatsisissatut siunnersuummi nalinginnaasumik oqaaseqaatini *imm. 2.1.2* innersuussutigineqarpoq.

Nr. 18 (§ 344, *Imm. 2*)-imut

Eqqartuussisarnermik inatsimmi § 344 pinerluttoqarsimaneranik paasiniaanerup nalaali eqqartuussinernut tunngassuteqarpoq.

Naalagaaffinnut takornartanut, naalagaaffiup isumannaatsuunissaanut imaluunniit suliap paasinarsisinnegarnissaanut qajassuussinissap qaqutigunnaq tamanna pisariaqartilissappagu, noqqaassuteqartoqarneratigut pasineqartup eqqartuussisoqarsimamera pillugu nalunaarfigineqannginnissaa, imaluunniit pasineqartup eqqartuussisarnermik tamakkiisumik ilaannakoortumilluunniit isiginnaannginnissaa eqqartuussiviup aalajangersinnaagaa, § 344, imm. 2-mi takuneqarsinnaavoq.

Folketingstidende 2007-08 (katersat aappaat), ilanngussaq A, qupperneq 1458 malillugu aalajangersagaq aaqjissuussinermut tunngasut allannguutigalugit qallunaat eqqartuussisarnermik inatsisaanni § 748, imm. 5-imut aalajangersagaq assingusoq, § 344, imm. 2-imut piareersaataasumik suliani allanneqarpoq.

§ 344, imm. 2 qallunaat eqqartuussisarnermik inatsisaanni § 748, imm. 5-ip akerlianik, inummut pingajuusumut qajassuussineq, pinerluttoqarsimaneranik paasiniaanerup nalaani pasineqartup najuunnissaanut killilersuisinnaanermut periarfissap erseqqissumik taaneqannginnera taamaattoq allaanerussutaavoq. Allaanerussut taanna § 344, imm. 2-mut piareersaataasumik suliani oqaatigineqanngilaq.

Inatsisikkut nr. 381-ikkut, 6. juni 2002-imeersukkut, 8. juni 2002-mi atuutilersukkut inummut pingajuusumut qajassuussinissamut innersuussineq qallunaat eqqartuussisarnermik inatsisaanni § 748, imm. 5-imi ilanngunneqarpoq.

Piaartumik ilisimannittut, soorasaarneqartussatut ilimagineqartut, eqqartuussivimmi killisiorneqarnerattut ilusilimmik, siuningaani uppernarsaatiniq ilanngussisarnermik atuinnissaq pillugu innersuussineq allannguinnermut tunngaviuvoq. Eqqartuussiviup iluani ilisimannittunik killisiuineq taamaattoq, kingusinnerusukkut pingaarnertut isumaqatigiinniartoqassappat isumaqatigiinniarneq sioqqullugu qallunaat eqqartuussisarnermik inatsisaanni §§ 747-imi aamma 748-imi malittarisassat malillugit ingerlanneqartarsimavoq.

Qallunaat eqqartuussisarnermik inatsisaanni § 748, imm. 5-imi aamma 6-imi aalajangersakkat taamanikkut atuuttut oqaasertai malillugit, inummut pingajuusumut qajassuussineq - assersuutigalugu ilisimannittumut namminermut imaluunniit ilisimannittup qanigisaanut – pasineqartup eqqartuussisarnermit ilaatinneqannginnissaa imaluunniit eqqartuussisarnermik allattaaviini ilanngussanik ilisimatinneqannginnissaa – kisianni tunngavilersorsinnaanngilaa, soorlu aamma aalajangersakkap oqaasertai malillugit inummut pingajuusumut qajassuussisarnermik susoqarsimamera pillugu illersuisup

pasineqartumut nalunaaruteqannginnissaanut peqqussuteqartoqarsinnaanera tunngavilersunngikkaa.

Tamanna tunngavigalugu § 344, imm. 2-p allanngortinneqarnissaa siunnersuutigineqarpoq, taamaalilluni pasineqartup eqqartuussisoqarnera pillugu nalunaarfigineqannginnissaa, imaluunniit pisineqartup eqqartuussinermi tamakkiisumik ilaannakoortumilluunniit ilaatinneqannginnissaa, inummut pingajuusumut qajassuussinerup aamma tunngavilersorsinnaangussavaa.

Assersuutigalugu ilisimannittumut, pillaatit akiniaaffigineqarnissaminik ersissuteqartumut – pasineqartup eqqartuussinerit pillugit nalunaarfigineqarnissaani aamma pinerluttoqarsimaneranik paasiniaanerup nalaani eqqartuussinernik isiginnaarsinnaanissaanik killiliinerit inummut pingajuusumut qajassuussinerup aamma qaqtiguiinnaq tunngavilersorsinnaassagaa, erseqqilluinnartumik aalajangersarneqarmat, siunnersuutip kinguneraa.

Pasineqartoq najussimappat, pasineqartoq eqqartuussinermi isiginnaarnissaminik ilaaqquneqarsimanngippat, § 344, imm. 3 malillugu eqqartuussiviup, najuussimanngippallu politiiniit periarfissaq siulleq, pasineqartoq eqqartuussisut allattaaviini suut ilanngunneqarsimanersut pillugit ilisimatissavaa. Qajassuussinerit immikkut ittut, ilaaqqusinninnermut tunngavigineqartut, sulii atuuppata, taamaattoq pasineqartoq tamaanngaanniit eqqartuussivimmit akornuserneqarsinnaavoq, soorlu aamma eqqartuussinermi susoqarsimanera pillugu illersuisup pasineqartumut nalunaaruteqannginnissaa eqqartuussiviup peqqussutigisinnaavaa. § 344, imm. 3 malillugu peqqussuteqarneq pasineqartup pingaarnertut isumaqatigiinniarnep nalaani nassuiaateqareernerata tungaanut sivitsorneqarsinnaavoq.

Aammattaaq inatsisissatut siunnersuummi oqaaseqaatini nalinginnaasuni imm. 2.10.2 innersuussutigineqarpoq.

Nr. 19 (§ 344, Imm. 5)-imut

Pinerluttulerisoqarsimaneranik paasiniaanerup nalaani pasineqartup eqqartuussinerni peqataasinnaaneranik eqqartuussisarnermik inatsimmi § 344 tunngassuteqarpoq.

Imm. 5 nutaaq ilanngunneqassasoq siunnersuutigineqarpoq, tamatumalu kingorna eqqartuussinernut § 339 c malillugu suliarineqartunut, imaluunniit § 339 c malillugu illersuisup allagaatinik takunnissinnaatitaanerani ilanngunneqanngitsunik paasissutissanik saqqummiussisoqartillugu, aamma § 392 malillugu akuliunnermut tunngassuteqartumut illersuisumik ivertitsisoqarsimatillugu, imm. 1-imiit 4 ilanngullugu atuutissanngillat.

Atortussat illersuisup pasineqartullu § 339 c (inatsisissatut siunnersuummi § 1, nr. 14-itut oqaasertaliorneqartoq) malillugu allagaatinik takunnissinnaatitaaneranit ilanngunneqannginnissaat pillugit eqqartuussivimmit aalajangiiffigineqarnissaa siunertaralugu eqqartuussinerit ingerlanneqartut pillugit, siunnersuut malillugu pasineqartoq nalunaarutinik tiguisassanngilaq, aamma eqqartuussinerit taakku isiginnaarnissaannut pisinnaatitaassanani. Eqqartuussineq pillugu eqqartuussisut allattaaviini allanneqarsimasut pillugit tamatuma kingorna pasineqartoq aammattaaq ilisimatinneqassanngilaq.

Eqqartuussisut allattaavini eqqartuussineq pillugu allanneqarsimasut, tassani paasissutissanik § 339 c malillugu illersuisup allagaatinik takunnissinnaatitaaneranit ilanngunneqarsimanngitsunik saqqummiussisoqarluni, aamma taassani § 392 malillugu akuliunnermut tunngassuteqartumut illersuisumik ivertitsisoqarsimalluni, pasineqartoq siunnersuut malillugu aammattaaq ilisimatinneqassanngilaq. Pasineqartoq inatsit atuuttoq malillugu § 344, imm. 1-imi oqaaseqatigiit aappaat malillugu pinngitsaaliilluni akuliunnerup suliarineqarnera pillugu eqqartuussineq taamaattoq pillugu nalunaarfigineqartussaanngimmat maluginiarneqassaaq.

Aammattaaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 20 (§ 345, Imm. 3)-imut

Pinerluttoqarsimaneramik paasiniaanerup nalaani eqqartuussinerni illersuisup najussinnaara eqqartuussisarnermik inatsimmi § 345 tunngassuteqarpoq.

Imm. 3 nutaaq ilanngunneqassasoq siunnersuutigineqarpoq, tamatumalu kingorna eqqartuusinerni, § 339 c malillugu ingerlanneqartuni, imaluunniit paasissutissanik § 339 c malillugu illersuisup allagaatinik takunnissinnaatitaaneranit ilanngunneqarsimanngitsunik saqqummiussisoqartoqarnerani, aamma taassani § 392 malillugu akuliunnermut tunngassuteqartumut illersuisumik ivertitsisoqarsimanerani imm. 1 atuutissanngilaq.

§ 339 c (inatsisissatut siunnersuummi § 1, nr. 14-itut oqaasertaliorneqartoq) malillugu illersuisup pasineqartullu allagaatinik takunnissinnaatitaanerannit atortussat ilanngunneqannginnissaat pillugit eqqartuussiviup aalajangiinissaa siunertaralugu eqqartuussinerit ingerlanneqartut pillugit pasineqartup nalinginnaasumik illersuisua siunnersuut malillugit nalunaarfigineqassanngilaq, aamma eqqartuussinerit taakku isiginnaarnissaannut pisinnaatitaassanani.

Aammattaaq eqqartuussinerit, tassani paasissutissat § 339 c malillugu illersuisup allagaatinik takunnissinnaatitaaneranit ilanngunneqanngitsut saqqummiunneqassallutik,

aamma akuliunnermi pineqartumut § 392 malillugu illersuisumik ivertitsisoqarsimalluni, pasineqartup nalinginnaasumik illersuisuanut nalunaarutigineqassanngillat.

Taamaalilluni pasineqartup nalinginnaasumik illersuisuata, inuup nakkutigineqarani inummut allamut nalunaarsinnaatitaanerani akuliunnissaq pillugu, ingammik immikkut ittumik piunasaqaatitalimmik pinngitsaalilluni akuliunneq nakkutiginnertut iluseqartoq pillugu, paasissutissiinermut systemimi paasissutissanik tamanit tikinneqarsinnaanngitsunit programmit atortussallu allat atorlugit atuaasinnaaneq imaluunniit isertortumik uppersaatit ujaasineq pillugit, aamma tassani § 392-p malitsigisaanik inummut inunnulluunniit, akuliunnermut sammitinneqartunut eqqartuussissuserisumik ivertitsisoqarluni, aamma tassani § 339 c malillugu paasissutissanik illersuisup allagaatinik takunnissinnaatitaanerani ilaatinneqanngitsunik saqqummiussisoqarluni, eqqartuussiviup sioqqupsilluni aalajangiinissaa siunertaralugu eqqartuussinerup ingerlanneqartup isiginnaarnissaa pisinnaatitaaffiginngilaa.

Pisuni, tassani assersuutigalugu eqqartuussineq § 412, imm. 2 malillugu nalinginnaasumik uppersaatissanik ujaasineq pillugu eqqartuussiviup sioqqupsilluni aalajangiinissaa anguneqarnissaa siunertaralugu ingerlanneqartoq, aamma § 392 malillugu immikkut ittumik illersuisumik ivertitsisoqarani, imm. 3-tut siunnersuutigineqartumi ilaatinneqanngillat. Pisuni taamaattuni § 345, imm. 1-imi oqaaseqatigiit pingajuanni aalajangersagaq atasoq taamaattoq atorqeersinnaassappat atorqeersinnaassaaq. Eqqartuussinerup taamaattup nalaani paasissutissanik § 339 c malillugu illersuisup allagaatinik takunnissinnaatitaanerani ilanngunneqanngitsunik politiit taamaalillutik saqqummiussinissartik kissaatigippassuk, qajassuussinissat aalajangersakkami taagorneqartut ilaasa ataatsip, qaqutigootumik tamanna pisariaqartilerpagu (naalagaaffinnut takornartanut, naalagaaffiup isumannaatsuunissaanut, suliap paasinarsisinneqarnissaanut imaluunniit inummut pingajuusumut qajassuussineq) politiit noqqaassuteqarnerisigut § 345, imm. 1-imi oqaaseqatigiit pingajuat malillugu illersuisup eqqartuussineq pillugu nalunaarfigineqannginnissaa eqqartuussiviup aalajangiiffiginnaavaa.

Aammattaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 21 (§§ 384-386)-imut

Piunasaqaatit erseqqinnerusumik taaneqartut naammassineqarsimatillugit, politiit, taama tulleriillutik, allakkanik ammaasinnaanerat, oqarasuaatikkut oqaluttumik naalaarsinnaanerit aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissanik pissarsiniarnissamik suliaqarsinnaanerit, eqqartuussiviup

aalajangiinikkut, tunngavilersorneqartussakkut, aalajangersinnaagaa eqqartuussisarnermik inatsimmi §§ 384-imiit 386 ilanngullugu periarfissiisutigaat.

Pinerluttoqarsimaneranik paasiniaaneq immikkut ittumik ingasassusilimmik inatsimmik unioqquitsinerussasoq imaluunniit meeqqanik kanngunartuliornernut tunngassuteqassasoq, imaluunniit – oqarasuaatikkut oqaluttumik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissanik pissarsiniarneq pineqartillugit – eqqissisimanermik innarliinerussasoq, piumasaqaatit ilaasa ataatsip piumasaqaatigaa.

Tamanna pillugu pinerluttuliortoqarsimaneranik piumasaqaateqarnermik taaneqartumi § 384, imm. 1, nr. 3-mi, § 385, imm. 1, nr. 3-mi, aamma § 386, nr. 3-mi »pinerluttulerinermi inatsimmi kapitali 7-imik 8-milluunniit piaaraluni unioqquitsinermut« ilanngunneqassasoq siunnersuutigineqarpoq.

Pinerluttoqarsimaneranik paasiniaaneq pinerluttulerinermi inatsimmi kapitali 7-imik imaluunniit 8-imik piaaraluni unioqquitsinermut tunngassuteqarpat, aamma imikkut ittumik ingasassusilimmik inatsimmik unioqquitsineq piviusup pineqarnera apeqquataatinnagu, allakkat ammarneqarneranni, oqarasuaatikkut oqaluttumik naalaarnermi, aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissanik pissarsiniarnermi, siunissami pinerluttuliorsimanermik piumasaqaat naammassineqarsimassasoq, siunnersuutip kinguneraa.

§ 384, imm. 1, nr. 1 aamma 2, § 385, imm. 1, nr. 1 aamma 2, aamma § 386, nr. 1 aamma 2 malillugit allakkat ammarneqarnissaannut, oqarasuaatikkut oqaluttumik naalaartoqarnissaanut aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissanik pissarsiniarnissamut piumasaqaatit allakkut allanngortinneqarnissaat siunnersuutigineqanngilaq.

Akuliunnerup ajoqusiinera akornusersuineralu, § 389 malillugu suliap pingaaruteqassusaanut aamma akuliunnerup pisariaqassusaanut naapertuunnissaat, aamma allanngortinnagu piumasaqaataassaaq.

Aammattaaq inatsisissatut siunnersuummi oqaaseqaatini nalinginnaasuni imm. 2.4.2 innersuussutigineqarpoq.

Nr. 22 (§§ 387 aamma 388 aamma § 399, imm. 3)-mut

Piomasagaatit erseqqinnerusumik taaneqartut naammassineqarsimatillugit, politiit, taama tulleriillutik, oqarasuaatit sorliit sumiiffimmi erseqqinnerusumik taaneqartumi oqarasuaammut aalajangersimasumut atassuteqarsimanersut imaluunniit atassuteqartut nalilerneqartut pillugit paasissutissanik pissarsiniarsinnaaner atamma inimik anngiortumik naalaarsinnaaner at, eqqartuussisarnermik inatsimmi §§ 387-ip aamma 388-p periarfissiissutigat.

Piomasagaatit erseqqinnerusumik taaneqarsimasut naammassineqarsimatillugit, tv-kkut assiliissut avataanit aqunneqartoq imaluunniit automatiskimik ingerlasut, assiliivik sakkorluunniit assigisaa imaluunniit saku, illumi ator neqartoq (immikkut ittumik piomasagaatitalimmik pinngitsaaliilluni akuliunneq nakkutiginnertut iluseqartoq) ikiorsiullugit, politiit inunnik illumiittunik nakkutilliisinnaaner at, aammattaaq eqqartuussiviup aalajangiinikkut, tunngavilersorneqartussaasukkut, aalajangersinnaagaa § 391 malillugu eqqartuussisarnermik inatsimmi § 399, imm. 3 aamma 6 (imm. 8-nngortup) periarfissiissutigaa.

Pinerluttoqarsimaneranik paasiniaaneq imikkut ittumik ingasassusilimmik inatsimmik unioqqutitsinermik tunngassuteqassasoq, taannalu inuit inuunerannut imaluunniit atugarissaarnerannut imaluunniit inuiaqatigiit naleqartitaannik pingaarutilinnik navianartorsiortitsisimasoq imaluunniit navianartorsiortitsinermik kinguneqarsinnaasoq, piomasagaatit ilaanni ataatsimi piomasagaataavoq.

Tamanna pillugu pinerluttuliortoqarsimaneranik piomasagaateqarnermik taaneqartumi § 387, nr. 2-mi, § 388, imm. 1, nr. 3-mi, aamma § 399, imm. 3, nr. 3-mi »pinerluttulerinermi inatsimmi kapitali 7-imik 8-milluunniit piaaraluni unioqqutitsinermut« ilanngunneqassasoq siunnersuutigineqarpoq.

Pinerluttoqarsimaneranik paasiniaaneq, imikkut ittumik ingasassusilimmik inatsimmik unioqqutitsineq piviusup pineqarnera apeqqutaatinnagu, inuit inuunerannut imaluunniit atugarissaarnerannut imaluunniit inuiaqatigiit naleqartitaannik pingaarutilinnik navianartorsiortitsisimasoq imaluunniit navianartorsiortitsinermik kinguneqarsinnaasoq, pinerluttulerinermi inatsimmi kapitali 7-imik imaluunniit 8-mik piaaraluni unioqqutitsinernut tunngassuteqarpat, oqarasuaatit sorliit sumiiffimmi erseqqinnerusumik taaneqartumi oqarasuaammut aalajangersimasumut atassuteqarsimanersut imaluunniit atassuteqartut nalilerneqartut pillugit paasissutissanik pissarsiniarsinnaanermi, inimik anngiortumik naalaarsinnaanermi aamma immikkut ittumik piomasagaatitalimmik pinngitsaaliilluni akuliunneq nakkutiginnertut iluseqartoq, siunissami pinerluttoqarsimaneranik piomasagaateqarnermi naammassinneqarsimassasoq, siunnersuutip kinguneraa.

§ 387, nr. 1, § 388, imm. 1, nr. 1 aamma 2, aamma § 399, imm. 3, nr. 1 aamma 2 malillugit, oqarasuaatit sorliit sumiiffimmi erseqqinnerusumik taaneqartumi oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut pillugit paasissutissanik pissarsiniarsinnaanermi, inimik anngiortumik naalaarsinnaanermi aamma immikkut ittumik piunasaqaatitalimmik pinngitsaaliilluni akuliunneq nakkutiginnertut iluseqartoq pillugit piunasaqaatit allakkut allanngortinneqarnissaat siunnersuutigineqanngilaq.

Akuliunnerup ajoqusiinera akornusersuinalu, § 389 aamma § 399, imm. 5 (imm. 7-inngortoq) malillugit suliap pingaaruteqassusaanut aamma akuliunnerup pisariaqassusaanut naapertuunnissaat, aamma allanngortinnagu piunasaqaataassaaq.

Aammattaaq inatsisissatut siunnersuummi oqaaseqaatini nalinginnaasuni imm. 2.4.2 innersuussutigineqarpoq.

Nr. 23-24 (§ 391, imm. 3)-mut

Inuup nakkutigineqarani inummut allamut nalunaarsinnaatitaaneranut akuliunneq pillugu eqqartuussiviup aalajangiinera pillugu eqqartuussisarnermik inatsimmi § 391-p aalajangersarpaa, aamma eqqartuussiviup aalajangiinera utaqqineqassappat, akuliunnermut siunertaasoq maangaannartinneqassappat, politiit tamanna pillugu aalajangiinissaat imm. 3-p periarfissiissutigaa. Taamaattoqarpat akuliunnerup aallartinneqarnerata kingorna piaarnerpaamik aamma kingusinnerpaamik nalunaaquttap akunneri 24-t qaangiutsinnagit, politiit suliaq eqqartuussivimmut saqqummiutissavaat. Akuliunneq akuerineqarsinnaanersoq eqqartuussiviup aalajangissavaa. Eqqartuussiviup isumaa malillugu akuliunneq suliarineqarsimasussaanngikkaluarpat, eqqartuussiviup Inatsiseqarnermut ministereqarfik tamanna pillugu ilisimatitsivigissavaa.

§ 393, imm. 3-p allanngortinneqarnissaa siunnersuutigineqarpoq, taamaalilluni akuliunneq, eqqartuussiviup aalajangiinera utaqqqaarngitu politiit suliarisimasaat, suliarineqarsimasussaanngikkaluarpat, siunissami eqqartuussiviup Rigsadvokat-i ilisimatittalissavaa. Akuliunneq Politiets Efterretningstjeneste-mit suliarineqarsimasoq pineqarpat, taamaattoq nalunaarutiginninneq suli Inatsiseqarnermut ministereqarfimmut nalunaarutigineqassaaq.

Aammattaaq inatsisissatut siunnersuummi oqaaseqaatini nalinginnaasuni imm. 2.5.2 innersuussutigineqarpoq.

Nr. 25 (§ 396, imm. 4)-mut

Inuup nakkutigineqarani inummut allamut nalunaarsinnaatitaaneranut akuliunnerup naammassineqarnerata kingorna, akuliunnermi pineqartumut nalunaarutiginnittoqassasoq, eqqartuussisarnermik inatsimmi § 396-ip aalajangersarpaa. § 399, imm. 6-imi, § 400, imm. 3-mi, aamma § 415, imm. 2-mi § 396-imut innersuussinerit pissutigalugit, piunasaqaatitalimmik aamma immikkut ittumik piunasaqaatitalimmik nakkutiginninnerit naammassineqarnerisa aamma isertortumik uppersaatit ujaasinerit kingorna aamma tamanna atuutissaaq.

Pinngitsaaliilluni akuliunneq suliarineqarsimasoq pillugu nalunaarutiginninnerup pinerluttoqarsimaneranik paasiniaaneq ajoqusissappagu, imaluunniit pissutsit allakkut nalunaarutiginninnginnissaq pissutissaqartippassuk, taamaattoq politiit noqqaassuteqarnerisigut, nalunaarutiginninnerup suliarineqannginnissaa imaluunniit piffissami erseqqinnerusumik aalajangikkami kinguartinneqarnissaa, aalajangersakkap imm. 4-aa malillugu kingusinersukkut aalajangiinikkut sivitsorneqarsinnaasoq pillugu eqqartuussivik aalajangiisinaavoq.

§ 396, imm. 4-imi oqaaseqatigiit siulliit allanngortinneqarnissaat siunnersuutigineqarpoq, taamaalilluni suliami allami ingerlasumi, inatsimmik unioqutitsinermik, inatsit malillugu inuup nakkutigineqarani inummut allamut nalunaarsinnaatitaanerata akuliuffigineqarnissaanut tunngaviliisinaasumi, imaluunniit politiit pinerluttoqarsimaneranik paasiniaanermi periaasii pillugit paasissutissat isertuussaasut illersorneqarnissaannut qajassuussinissat nalunaarutiginninnissaq akerlilerpassuk, pinngitsaaliilluni akuliunneq suliarineqarsimasoq pillugu nalunaarutiginninneq aamma pinngitsoortinneqarsinnaavoq imaluunniit kinguartinneqarsinnaalluni.

Nalunaarutiginninnerup pinerluttuliorneq pillugu pinerluttoqarsimaneranik paasiniaaneq, akuliunnermut tunngaviliisoq, ajoqusissappagu, imaluunniit ilungersunartumik pinerluttuliorneq alla pillugu pinerluttoqarsimaneranik paasiniaanerup, imaluunniit allakkut pissutsit nalunaarutiginninnissaq akerlilerpassuk, pinngitsaaliilluni akuliunneq suliarineqarsimasoq pillugu nalunaarutiginninneq pinngitsoortinneqarsinnaasoq imaluunniit kinguartinneqarsinnaasoq, siullertut erseqqissarneqarnera siunnersuutip kinguneraa.

Ilaatigut pinerluttuliornerit aqqissugaasumik pinerluttuliornerit avatangiisit iluannit pinerluttuliornerusut pinerluttoqarsimaneranik paasiniaavigineqarneranni aalajangersakkap atorneqarnissaa naatsorsuutigineqarpoq, tassani pinngitsaaliilluni akuliunneq piviusoq pillugu nalunaarutiginninnerup avatangiisit taakku iluannit pinerluttuliorneq alla pillugu pinerluttoqarsimaneranik paasiniaaneq ajornakusoortilersinnaavaa.

Politiit pinerluttoqarsimaneranik paasiniaanerminni periaasiisa isertuussaassut illersorneqarnissaannut qajassuussinissaq nalunaarutiginninnissap akerlilerpagu, pinngitsaaliilluni akuliunneq suliarineqarsimasoq pillugu nalunaarutiginninnerup pinngitsoortinneqarsinnaanerata imaluunniit kinguartinneqarsinnaanerata erseqqissumik takuneqarsinnaalernera, siunnersuutip aappaattut kinguneraa.

Oqaatsit »politiit pinerluttoqarsimaneranik paasiniaanerminni periaasii pillugit paasissutissat isertuussaasut« illersuisup pasineqartullu allagaatinik takunnissinnaatitaanerannit ilanngussinnginnissaq pillugu § 339 c, imm. 1, nr. 6-imi (inatsisissatut siunnersuummi § 1, nr. 14) siunnersuutigineqartut paasinnittaaseq assigalugu paasineqassaaq.

»Politiit pinerluttoqarsimaneranik paasiniaanerminni periaasii« taamaalillutik assersuutigalugu politiit tusarnaanerminni atortui aamma- periaasii il.il. pillugit tekniskiusumik paasissutissat, aamma politiit immikkut ittumik paasissutissat isertuunneqarnissaat soqutigisarippassuk, aamma paasissutissat nalinginnaasumik ilisimaneqanngippata, »paasissutissat isertuussaasut« pineqarput.

Aammattaaq inatsisissatut siunnersuummi oqaaseqaatini nalinginnaasuni imm. 2.6.2 innersuussutigineqarpoq.

Nr. 26 (§ 399, imm. 5 aamma 6)-imut

Nakkutiginninneq pillugu malittarisassanik eqqartuussisarnermik inatsimmi § 399 imaqarpoq. Imm. 1 malillugu inunnik, sumiiffimmi tikikkuminanngitsumiittunik assiliinertut imaluunniit qinngutit sakkulluunniit allat atorlugit isiginnaarnertut nassuiarneqarpoq.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu § 399-imi nutaatut *imm. 5-imi* ilanngussisoqarnissaa siunnersuutigineqarpoq.

Inatsisit unioqutinneqarneranni politiit pinerluttoqarsimaneranik paasiniaanerminnut ilaatillugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermik atuinerat siunissami aalajangersagassatut siunnersuutigineqartumit malittarisassiuunneqarnera, siunnersuutip kinguneraa. Tamanna aamma sammivissiornermut ilutsinut, ullumikkut pinerluttulerineq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliasanngortitsinermut atatillugu politiinit, unnerluussisussaataitasunit imaluunniit

eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerannut atatillugu pinngitsaaliilluni akuliunnertut isigineqanngitsunut atuuppoq.

Akuliunneq pinerluttoqarsimaneranik paasiniaanermut annertuumik pingaaruteqartutut isigineqarsinnaassappat, aamma pinerluttoqarsimaneranik paasiniaanermi ingasattumik inatsimmik unioqquitsineq tunngassuteqarpat, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq siunnersuut malillugu suliarineqarsinnaavoq. Tamanna imm. 1 malillugu § 399, imm. 2 malillugu tv-kkut assiliissut avataaniit atorneqartoq imaluunniit automatiskimik ingerlasoq, assiliivik sakkuluunniit assigisaa atorlugu nakkutiginnissamut piumasaqaatinut atuuttunut assinguvoq.

Tamanna atsikkutigiissitsinissamut tunngavinnut nalinginnaasunut peqatigineqarsinnaappat, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermik atuineq aamma suliarineqarsinnaassaaq. Tamanna – akuliunnerup siunertaanut, suliap pingaaruteqassusianut aamma akuliunnerup inummut eqqorneqartumut innarliinermik akornusiinermillu ajoqusiinera – naleqqutinngitsuusussatut isumaqarfigineqarpat - § 399, imm. 5-imi aalajangersagaq (siunissami imm. 7-inngortussa) malillugu nakkutiginninneq suliarineqassanngilaq, taamaalilluni aamma oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermi tamanna taamatuttaaq atuutissalluni.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq *siullertut nr. 1-itut* siunnersuutigineqartoq malillugu oqarasuaatip angallattakkap sumiissusersineqarnissaa pillugu attaveqatigiinnermut attaveqarfinnik tuniniaasartunit imaluunniit nalunaarasuartaatinik sullissinermik suliaqartunit pasissutissanik pissarsiniarnermut paasineqassaaq. Tamanna ingammik oqarasuaatinut angallattakkanut napparutit sorliit, oqarasuaatip angallattakkap pineqartup nutarsaanermi attaveqarfigisai, nutarsarnermi celle sorleq atorneqarsimansoq, aamma oqarasuaatip angallattakkap attaveqatigiinnermi atorneqarnerani napparummit qanoq ungasitsigisumi oqarasuaatip angallattakkap inissisimasimanagera pillugu paasissutissat ingammik pineqassapput.

Oqarasuaat angallattagaq aalajangersimasoq pillugu paasissutissat taamaattut siumut sammisumik ingerlaavartumillu politiinut tunniunneqartarnissaat nr. 1-itut siunnersuutigineqartumi aalajangersagaq tunngassuteqarpoq. Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq siusinnerusukkut oqarasuaatit angallattakkat

napparutit attaveqarfigisimasaat pillugu paasissutissat toqqorsimasaat pillugit pasissutissanik pissarsiniarneq, aalajangersakkami ilaatinneqartussaangilaq, kisianni eqqartuussisarnermik inatsimmi § 420 aamma Eqqartuussiviit qullersaata qallunaat eqqartuussisarnermik inatsisaanni aalajangersagaq assingusoq § 804 pillugu aalajangiinera Ugeskrift for Retsvæsen 2009-imi, qupperneq 2610-imiittoq malillugit, tunniussisussaataaneq pillugu malittarisassat malillugit tamanna pisinnaassaaq.

Nr. 1 malillugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq, oqarasuaatinut angallattakkanut napparutit sorliit pasineqartup oqarasuaataata angallattakkap ingerlaavartumik attaveqarfigineraa, matumani celle atorneqartoq pillugu paasissutissat aamma pissutsit assigiinngitsut malillugit oqarasuaatip angallattakkap napparutillu akornanni ungasissuseq pillugu paasissutissat ilanngullugit, attaveqatigiinermut attaveqarfinnik tuniniaasartunit imaluunniit nalunaarasuartaatinik sullissinermik suliaqartunit pasissutissanik pissarsiniarnissamik piumasaaqatit ilaasa ataanni, politiit periarfissippaat. Taamaalilluni taamaallaat sumiiffiit pillugit paasissutissat akuliunnermi ilaatinneqarput. Taamaattoq oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup, kisianni oqaloqatigiinnerit, oqarasuaammit angallattakkamit pineqartumit ingerlanneqartut imaluunniit oqarasuaatikkut angallattakkakkut sms-it nassiuqqartut tiguqqartulluunniit imaasa politiit ilisimasaqarfigineqalernissaat periarfissingilaa.

Nr. 2-tut siunnersuutigineqartoq malillugu, gps imaluunniit sakku assingusoq ikiorsiullugu allatut inuup angalaarnerata nalunaarsorneqarnissaa, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq *aappaattut* paasineqassaaq.

Gps imaluunniit sakku assingusoq ikiorsiullugu allatut inuup angalaarnerata nalunaarsorneqarnissaa pillaasarnermik inatsimmi § 264 b-tut paasineqassasoq siunertarineqarpoq. Pinerluttulerinermi inatsit aalajangersakkamik assingusumik peqanngimmat maluginiarneqassaaq.

Taamaalilluni politiit gps imaluunniit sakku assingusoq ikiorsiullugu allatut inuup angalaarnerata nalunaarsorneqarneranik atuinerat, imaappoq inuup nunap ilaani sumiinneranik paasissutissanik nuussinerat imaluunniit toqqorsivimmiititsinerat, taamaalilluni inuit taakku angalaarnerisa ingerlaavartumik imaluunniit tamatuma kingorna malinneqarsinnaaniassammata, nr. 2-tut siunnersuutigineqartumi ilaatinneqarput. Radiop maligaasaanik, atortunit il.il. inuup tiggummisaanit aallakaatinneqartunit (matumani oqarasuaat angallattakkamit, computerimit tiggummiartakkamit il.il.), imaluunniit videomik assiliissut ikiorsiullugu, inuup angalaarneranik, naleqqersuineq atorlugu nakkutiginnineq,

aalajangersakkami aamma ilaatinneqarpoq. Inuup aalajangersimasup angalaarnerata politiit nalunaarsorneqarnera aamma taamaalilluni nammineq najuutinngikkaluarluni inuup angalaarnerata malinnaavigineqarnera, uani pingaarnerpaavoq.

Nr. 2-tut siunnersuutigineqartoq malillugu gps imaluunniit sakku assingusoq ikiorsiullugu politiit oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqartillugit, iliuutsit oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermi tekniskiusumik ajornarunnaarsitsisut aamma politiit suliarisinnaavaat. Tassani assersuutigalugu sumiiffimmut inuit namminneq illuikut iserneq, atortunik inissiineq aamma atortuni pasineqartup atugaani akuliunneq ilaatinneqarsinnaapput.

Politiit peqataatinnagit inuup sumiissusaanik inissiinerit pillugit toqqorsisoqarsimatillugu, nr. 2-tut siunnersuutigineqartumi pisut ilaatinneqanngillat. Taamaattoqassappat politiit paasissutissanik inummi pasineqanngitsumi toqqorneqarsimasunik pissarsisinnaanerata, tunniussisussaataaeramik malittarisassat pillugit eqqartuussisarnermik inatsimmi § 420 malillugu pisinnaassaaq. Paasissutissat taamaattut pasineqartumi namminermi toqqorneqarsimappata (assersuutigalugu taassuma oqarasuaataani angallattakkami), taamaattoqassappat uppersaatinik ujaasineq pillugu eqqartuussisarnermik inatsimmi § 410-mi malittarisassat politiit atorsinnaavaat.

Taaneqareersutut nr. 2-tut siunnersuutigineqartumi ilaatigut videomik assiliissut ikiorsiullugu inuup angalaarneranik nalunaarsuineq ilaatinneqarpoq. Taamaammata § 399, imm. 1-miit 3 ilanngullugu nakkutiginninnermut qaleriittoqarsinnaavoq. Politiit imm. 5, nr. 2-tut siunnersuutigineqartoq periarfissaliissutigalugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerat, aamma imm. 1 imaluunniit 2 malillugu nakkutiginninnerusoq, taamaallaat oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu taamaallaat imm. 5 malillugu politiit siumut ingerlatsisinnaapput. Kisianni illuatungaani imm. 3 malillugu nakkutiginninneq pineqarpat, imm. 3 aamma 5 malillugit politiit siumut ingerlatsissapput, aamma taamaalilluni imm. 3-mi piumasaqaatit sakkortunerusut naammassineqarsimanissaat tassani ilaatigut piumasaqaataassaaq.

Pasineqartup angalaarneranik (*litra a*) politiit nalunaarsuisinnaanerata imaluunniit pineqartoq pasineqartumut imaluunniit pasineqartup assigisaanilluunniit (*litra b*) qamutaanut, angallataanut imaluunniit illuanut attuumassuteqarpat, inuup allap angalaarneranik nalunaarsuisinnaanerata, nr. 2-tut siunnersuutigineqartup periarfissaliissutigaa.

Pasineqartup angalaarnerata nalunaarsorneqarnissaa aalajangersakkamit pingaarnertut isiginiarneqarpoq. Pisut ilaanni kisianni inuit allat, pasineqartumut attuumassuteqartut, pasineqartup qamutaanut, angallataanut imaluunniit illuanut assigisaasaluunniit attuumassuteqartut angalaarnerisa nalunaarsorneqarnissaat politiit pisariaqartittarpaat. Assersuutigalugu pasineqartumut pinerluttulerineq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliassanngortitsinerup (allap) naammassineqarsinnaanissaa siunertaralugu, akuliunneq paasineqartinnagu, aamma taamaalilluni pinerluttoqarsimaneranik paasiniaaneq ajoquserneqartinnagu, soorlu inimik naalaarnerat imaluunniit isertuussilluni uppersaatinik ujaasinerat, politiit pasisaanngitsup angalaarneranik nalunaarsuinissaat pisariaqarsinnaavoq. Aammattaaq assersuutigalugu taanna ujarneqarpat, pasineqartup sumiiffiata nassaarinissaanut tamanna pisariaqarsinnaavoq.

Pineqartoq pasineqartup qamutaanut, angallataanut imaluunniit illuutaanut assigisaanulluunniit atassuteqarpat, politiit gps sakkumilluunniit assingusumik atuillutik, taama tulleriillutik, pasineqartup pasineqanngitsullu angalaarnerinik nalunaarsuisinnaanerat, taamaammat nr. 2, litra a-kkut aamma b-kkut siunnersuutigineqarpoq.

Pasineqartup angalaarnerata nalunaarsorneqarnissaa pillugu *litra a-tut* siunnersuutigineqartoq malillugu, pasineqartup angalaarnerata malinneqarnissaa siunertaralugu, politiit gps-imik imaluunniit sakkumik assingusumik pasineqartup qamutaanut imaluunniit angallataanut ilisisinnaanissaat imaluunniit ikkussisinnaanissaat *litra a-tut* siunnersuutigineqartoq malillugu naatsorsuutigineqarpoq. Assersuutigalugu gps-imik imaluunniit sakkumik assingusumik pasineqartup qamutaanut imaluunniit angallataanut ilisineq imaluunniit ikkussineq, inuit allat pasisaanngitsut, qamutimik angallammilluunniit taassuminnga atuisussaasut nalunaarsorneqarnerannik aamma kinguneqarnera apeqqutaatinnagu, pasineqartumut akuliunnernut taamaattunut aalajangersagaq periarfissaliissutitut atorneqarsinnaavoq.

Litra b-tut siunnersuutigineqartoq malillugu inunnut pasisaanngitsunut sammititamik politiit akuliunnernik suliaqarsinnaapput. Aalajangersagaq malillugu qulaani taaneqartutut, pineqartup pasineqartumut imaluunniit qamutimut, angallammut imaluunniit illumut pasineqartutut assigisaanilluunniit atassuteqarnissaa piumasaqaataavoq.

Oqaatsit »pasineqartumut atassuteqarneq« atituumik paasineqassaaq aamma ilaatigut pasineqartup ilaqtai, aappassiarisaa, ikinngutai imaluunniit nalunngisai tassani ilaatinneqarput, taakkulu pasineqartumut ima attaveqarnissaat, assersuutigalugu pinerluttoqarsimaneranik paasiniaanerup ajoquserneqarnissaa pinngitsoortinniarlugu imaluunniit pasineqartoq nassaarinarlugu, pinerluttoqarsimaneranik paasiniaanermi pineqartut angalaarnerat paasissallugu annertuumik pingaaruteqarsinnaalluni.

Pinerluttoqarsimaneramik paasiniaanermut atatillugu allakkut attaveqartoqarpat, attaveqarnerlu taanna pineqartut angalaarnerisa nalunaarsorneqarnissaannik politiinut pingaaruteqalersitsippat, inuit pasisamut attaveqartunit allaanerusut pasisaanngitsut, oqaatsitit »qamutimut, angallammut imaluunniit illumut pasineqartutut assigisaanilluunniit« aalajangersakkami ilaatinneqarneratigut takutinneqarpoq. Pasisatut inuup ataatsip imaluunniit inuit arlallit, qamutimik angallatinilluunniit (assersuutigalugu biiliniq, qamuterallannik imaluunniit umiatsianik) imaluunniit illumut tassunga (assersuutigalugu illumik aasarsiortarfimmik, sullivimmik imaluunniit allaffimmi ininik) atuippata, kisianni nalinginnaasumik pasisamut attaveqanngippata, tamanna pisinnaavoq. Aamma (oqaatsit »assigisaanilluunniit« malillugit) qamutaanngitsunut, angallataanngitsunut imaluunniit illuunngitsunut attaveqarneq pineqarsinnaavoq.

Taamaalilluni aalajangersakkap ilaata taassuma, gps atorlugu sumiissusersiunerup il.il. inunnut, pasineqartumut attuumassuteqanngitsumut atorneqarsinnaanissaata qulakkeerneqarnissaa siunertarivaa, kisianni tassani piunasaqaatit allakkut naammassineqarsimappata, taamatut qamutimut, angallammut imaluunniit illumut assigisaanilluunniit atassuteqarnerani, gps atorlugu sumiissusersiuneq atorneqarsinnaasariaqarluni.

§ 399-imi nutaatut *imm. 6-imik* ilanngussisoqarnissaa aammattaaq siunnersuutigineqarpoq, taamaalilluni attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasut, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paassissutissanik pissarsiniarnermik suliaqarnerup naammassineqarnissaanut politiinut ikiuunnissaq pisussaaffigilissavaat, matumani *imm. 5, nr. 1-imi* paassissutissat taaneqartut ilanngullugit. Attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasut, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paassissutissanik pissarsiniarnermik suliaqarnerit pillugit akuliunnernut, oqarasuaatip angallattakkap sumiissusersineqarnera pillugu paassissutissanik pissarsiniarnermik iluseqartunut, inatsisiliornikkut ikiuunnissamik pisussaaffeqarnerat aalajangersakkap qulakkeerpaa.

Eqqartuussisarnermik inatsimmi § 393, *imm. 1-ip* malitsigisaanik inuup nakkutigineqarani inummumut allamat nalunaarsinnaatitaaneranik akuliunnerup naammassineqarnissaanut, ilaatigut attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasut pisussaaffinut, matumani oqarasuaatikkut oqaluttumik naalaarnernik aamma oqarasuaatit sorliit piffissami aalajangersimasumi oqarasuaammumut aalajangersimasumut atassuteqarsimanersut imaluunniit atassuteqartutut nalilerneqartut pillugit aamma oqarasuaatit sorliit sumiiffimmi erseqqinnerusumik taaneqartumi

oqarasuaammut aalajangersimasumut atassuteqarsimanersut imaluunniit atassuteqartutut nalilerneqartut ilanngullugit, aalajangersagaq assinguvoq.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerup, matumani oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu imm. 5, nr. 1-imi aalajangersagassatut siunnersuutigineqartumi sumiissutsit pillugit paasissutissat tunnuinneqarneri ilanngullugit, naammassineqarnissaanut attaveqatigiinnermut attaveqarfinnik imaluunniit nalunaarasuartaatitigut kiffartuussinermik tuniniaasut politiinut ikiuunnissaat, aalajangersakkap kinguneraa.

Aammattaaq inatsisissatut siunnersuummi nalinginnaasumik oqaaseqaatini imm. 2.2.2 innersuussutigineqarpoq.

Nr. 27 (§ 399, Imm. 8)-imut

Inuup nakkutigineqarani inummut allamut nalunaarsinnaatitaanera pillugu akuliunnerit pillugit taagorneqartut, § 399, imm. 2 aamma 3 malillugit nakkutiginninnerni atorneqassasut, eqqartuussisarnermik inatsimmi § 399, imm. 6, § 399-imi immikkoortunik nutaanik marlunnik ilanngussisoqarnissaanik siunnersuuteqarnerup malitsigisaanik imm. 8-nngortup (inatsisissatut siunnersuummi § 1, nr. 26) aalajangersarpaa.

§ 399, imm. 8-imi nutaanut *oqaaseqatigiit aappaat* ilanngunneqassasoq siunnersuutigineqarpoq, tamatumalu kingorna §§ 391-imi aamma 392-imi, § 396, imm. 1-imi, § 396, imm. 2, nr. 1-imi, § 396, imm. 3-imi aamma 4-imi, aamma § 398-imi malittarisassat pisuni imm. 5-imi pineqartuni atuutissapput.

Inuup nakkutigineqarani inummut allamut nalunaarsinnaatitaanera pillugu akuliunnermi aalajangersakkat erseqqinnerusumik taaneqartut ilaat, taamatuttaaq oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq pillugu § 339, imm. 5-itut aalajangersagassatut siunnersuutigineqartoq malillugu akuliunnerni atuutissasut, siunnersuutip kinguneraa.

Taamaalilluni eqqartuussisarnermik inatsimmi § 391 malillugu oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq aallaaviatigut taamaallaat eqqartuussiviup sioqqutsilluni aalajangiinerata kingorna aallartinneqarsinnaavoq. § 399, imm. 5, nr. 1 malillugu

oqarasuaatip angallattakkap ikumasup, pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarnissaq pillugu aalajangiinermi, ilaatigut oqarasuaatip angallattakkap normua imaluunniit ilisarinneqqissutit allat, assersuutigalugu IMEI- imaluunniit IMSI-normut, akuliunnermut tunngassuteqartut, kiisalu piffissap iluani sorlermi akuliunnerup suliarineqarfissaa, taaneqassapput. Pisuni § 399, imm. 5, nr. 2-mi ilaatinneqartuni, inuup angalaarnerata nalunaarsorneqarnissaanik politiit akuersissummik pissarsiaqarfigisimasaanik, inuup kinaanera allanneqassasoq, akuliunnermut tunngassuteqartumik oqarasuaatit normuisa imaluunniit sumiiffiit il.il. pillugit taasinissaq pillugu malittarisassamik assingusumik atuinerup kinguneraa. Inuup aalajangersimasup gps imaluunniit tassunga assingusoq atorlugu angalaarnerata nalunaarsorneqarnissaa pillugu aalajangiinermi, aamma gps-ip assersuutigalugu qamutimi, inuup pineqartup atugaani, aamma naak biili imaluunniit scooteri taamaattoqassappat allanit atorneqaraluartoq, tamatuma peqatigisaanik inuit taakku angalaarnerisa nalunaarsorneqarnissaat pillugu aalajangiinermik pissarsineqartussaannngitsumik, inissinneqarnera, aamma ilaatinneqassaaq.

Eqqartuussiviup aalajangiinera pissutigalugu siunertarineqartoq maangaannartinneqassappat, § 391, imm. 3 malillugu oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu politiit aalajangiisinnaapput. Taamaattoqarpat piaarnerpaamik aamma akuliunnerup aallartinneqarneranit nalunaaquttap akunnerisa 24-t iluanni, suliaq politiit eqqartuussivimmut saqqummiutissavaat.

Inuup nakkutigineqarani inuummut allamut nalunaarsinnaatitaanerani akuliunneq pillugu aalajangersakkat allat ilaasa taamatuttaaq oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnermi aammattaaq atorsinnaasunnngortinneqarput, matumani § 392 malillugu illersuisumik ivertitsineq pillugu, § 396 malillugu akuliunnerup naanerani nalunaaruteqartussaaneq pillugu, aamma § 398 akuliunnermut atatillugu atortussat politiit ilisimalersimasaasa tamatuma kingorna politiit nungutitsinerat ilanngullugit. Pisuni § 399, imm. 5, nr. 2-mi ilaatinneqartuni, inuummut politiit angalaarneranik nalunaarsuiffigisimasaanut nalunaarutiginninneq pissasoq, oqarasuaatip pineqartup piginnittuanut nalunaaruteqarnissaaq pillugu aalajangersakkap assigisaanik atorneqarnerata kinguneraa.

Aammattaaq inatsisissatut siunnersuummi oqaaseqaatini nalinginnaasuni imm. 2.2.2 innersuussutigineqarpoq.

Nr. 28 (§§ 400 a-400 c)-mut

§ 400 a-mut

Pinerluttulerinermik suliat suliarineqartarnerat pillugu eqqartuussisarnermik inatsimmi immikkoortoq V malillugu internettikkut nittartartakkap matuneqarnissaa ullumikkut periarfissaanngilaq.

Internettikkut nittartakkat matuneqartarnissaat pillugu kapitali 36-imi aalajangersakkamik nutaamik (§ 400 a-mik) ilanngussisoqarnissaa siunersuutigineqarpoq. Eqqartuussiviup aalajangiineratigut qaqugukkt internettikkut nittartakkamik politiit matusisinnaanerat aalajangersakkap malittarisassiuuppa.

Internettikkut nittartakkamiit pinerluttulerinermi inatsimmi §§ 28-imiit 35 ilanngullugu imaluunniit 37-mik, § 94, nr. 5-imik, imaluunniit §§ 95-imik, 104-imik, 105-imik, 108-imik, 111-imik imaluunniit 111 a-mik unioqquitsisoqarnera pissutissaqartumik isumaqarfigineqarpat, internettikkut nittartakkap matuneqarsinnaanera, *imm. 1-imi* siunnersuutigineqarpoq.

Internettikkut nittartakkap inatsisit unioqqustillugit atortussanik imallip DNS-iata tuniniaasuminngaanniit toqqaannartumik matuneqarnissaa siunertaralugu, Kalaallit Nunaanni internettikkut aqqutinik tuniniaasartunut sammititamik aaqqissuussinertut matusineq paasineqassaaq. Internettikkut nittartakkanik matuneqarsimasunik iserniarluni misiliinerit, internettikkut aqqutinik tuniniaasartumit automatiskiusumik itigartitsissutigineqarnissaat DNS-imik matusinerup kinguneraa. Itigartitsineq oqaasertalerneqassasoq, tassanilu eqqartuussiviup aalajangiineratigut internettikkut nittartagaq pineqartoq politiit matusimagaat, aamma maalaaruteqartoqassappat maalaarut politiinut saqqummiunneqarsinnaasoq, takuneqarsinnaassaaq.

Pinerliiniarneq, iliuseq pinerliiniarnermut tunngasoq, pinerliiniarnermik suliaqarnissamut aningaasaliineq aamma inunnik pissarsiorneq ilitsersuinerlu imaluunniit taakkununga atasunik iliuseqarneq, pinerliiniarnermi peqataaneq aamma inatsisit unioqqustillugit pinerliiniarnernut tapersersuineq pillugit pinerluttulerinermi inatsimmi §§ 28-imiit 35 ilanngullugu malittarisassanik unioqqutsinermi siullertut aalajangersagaq atorneqarsinnaavoq.

Pisortani oqartussaasut innarlerneqarnerat pillugu pinerluttulerinermi inatsimmi § 37-p unioqqutinneqarnerani aalajangersagaq aappaattut atorneqarsinnaavoq.

Eqqissisimanermik akornusiinerit, hackerinertut, imaluunniit nalunaarutininik imaluunniit assinik inummut allamut tassungaannarlu tunngasunik taamatut pisinnaatitaanani allannut ingerlatitseqqinnertut, peqquserlunnertut, paasissutissat pillugit peqquserlunnertut, tillitanik

pisinertut aamma aningaasatigut peqquuserluutinik malunnarunnaarsaanertut ilusillit pillugit pinerluttulerinermi inatsimmi § 94, nr. 5-imik, imaluunniit §§ 95-imik, 104-imik, 105-imik, 108-imik, 111-imik imaluunniit 111 a-imik unioqquitsinermi aalajangersagaq pingajuattut atorineqarsinnaavoq.

»Tungavissalimmik isumaqarfigineqarpat« pillugu piuraaqaat, pasineqanngitsumi arsaarinninneq tunniussisussaataanerlu pillugit eqqartuussisarnermik inatsimmi §§ 419-imi aamma 420-imi oqaatsit assinginut naapertuuttumik paasineqassaaq.

Internettikkut nittartakkamit pinerluttulerinermi inatsimmi malittarisassanik pineqartunik unioqquitsisoqarnerisooq pillugu »tungavissalimmik isumaqarfigineqarpat« pillugu naliliineq, suliami pissutsit ataatsimut isiginerisigut suliarineqassaaq, matumani internettimi adressip atiata nittartakkallu isikkui ilanngullugit. Internettimi adressip atia imaluunniit nittartakkap taaguutaa oqartussaasup, suleqatigiiffiup, suliffeqarfimmut pisinnaatitsissut assigisaaluunniit assingisut suliarineqarsimanersooq, aamma nittartakkamut isertartut MitID, cpr-normu aamma/imaluunniit kortit akiliissutit pillugit paasissutissanik toorseqqullugit kajumissaarneqarnerisut, tassunga atatillugu ilaatigut ilaatinneqarsinnaapput. Paasissutissat allat nittartakkamiittut taamatuttaaq naliliinermi ilaatinneqarsinnaapput, matumani cvr-normut kukkusut/eqqunngitsut aamma attaveqarfissat pillugit paasissutissat, adressinut il.il. kukkusunut/eqqunngitsunut innersuussisut ilanngullugit. Isertut assersuutigalugu e-mailit imaluunniit oqarasuaatit, kukkusut eqqunngitsulluunniit Kalaallit Nunaanni oqartussaasuni attaveqarfissatut annertuumik assingusut atorlugit attaveqarfissanut saaffiginnequllugit kajumissaarneqarnerisut, aammattaaq ilaatinneqarsinnaapput.

Nittartakkap allaaserisap oqaasertaanik, videolianik imaluunniit nipinik il.il., pinerluttulerinermi inatsimmi §§ 28-imiit 35 ilanngullugu imaluunniit 37-imik, § 94, nr. 5-imik, imaluunniit §§ 95-imik, 104-imik, 105-imik, 108-imik, 111-imik imaluunniit 111 a-imik unioqquitsisunik imaqaarnissaa, taamatut unioqquitsissutaasunik unioqquitsisimanissaaq pillugu piumasaaqatip kinguneraa.

Internettimi adressip atiata nalunaarsorneqarnera immi inatsisunik unioqquitsinerit pisimanerannik pissutissaqartitsinngilaq, tassami nittartakkap nipitut, allaaserisap oqaasertaatut, videoliatut, link-itut, tekniskiusumik aaqqissuussinertut imaluunniit assigisaattut ilusilittut, aalajangersakkat pineqartut unioqquitinneqarnissaat piumasaaqaataamat. Taamaattoq internettimi adressip atia taaneqartutut ataatsimut naliliinermi pissutaqaataasutut ilaatinneqassaaq.

Nittartakkamit pineqartunik inatsisunik unioqquitsinerit pisimanissaannik piumasaaqatip, piffissami matusiffiusumi nittartakkap inatsimmik unioqquitsinerusumik imaqaarnissaa kinguneraa. Taamaalluni nittartakkap siusinnerusukkut imarisimasaanik

unioqquitsinerusunik, massakkut peerneqarsimasunik innersuussilluni matusineq pisinnaangilaq.

Atsikkutigiissitsinissaq pillugu malittarisassamik nalinginnaasumik *imm. 2* imaqarpoq. Taamaalilluni suliap pingaaruteqassusaanut aamma akuliunnerup akornusiinerata kingunerisassaatur isumaqarfigineqartut imminnut naapertuutinnippata, akuliunneq suliarineqassanngilaq.

Massakkuugallartoq nittartagaq ilivitsuutillugu aamma taassuma ilaannaajunngitsoq, matussallugu tekniskiusumik taamaallaat periarfissaavoq. Taamaammat nittartakkap ilaannamineeranngua inatsisinik unioqquitsippat, piviusumik nalilersuineq malillugu nittartakkap ilivitsuutillugu matuneqarnissaa annertuallaartumik akuliunnerunersoq nalilerneqassaaq. Taassuma nalilersorneqarnerani pissutsit ingasassusaat pingaartittariaqassaaq, taamaalilluni ingasattorujussuarmik inatsimmik unioqquitsineq pineqartillugu, annikitsuinnarmik pissutissaqartitsisoqassalluni.

Inoqatinut attaveqaatit amerlasoorpassuarnik atuisullit pineqartillugit, atuisup ilisarititsissutaani ataatsimi ingasattumik inatsimmik unioqquitsisoqarnera apeqqutaatinnagu, inoqatinut attaveqaatip tamarmiusup matuneqarnissaa atsikkutigiissitsinerunngitsumik akulerunnerussaaq.

Nittarsaanneqartup oqaaseqaatitaani imaluunniit assigisaani nittartakkamut linkiisoqarpat, tassanngaanniillu phishing pillugu pilerisaarutit aallartinneqartarlutik imaluunniit pinerluttulerinermik inatsimmi § 95-imut akerliusumik ingerlateqqinneqartarlutik, taamatuttaaq nittartakkap ilivitsup matuneqarnera atsikkutigiissitsinerunngitsumik akuliunnerussasoq nalinginnaasumik isumaqarfigineqassaaq. Nittartagaq matussallugu eqqarsaatersuutigineqartoq, annertuumik inatsisinik unioqquitsinissaq siunertaralugu pilersinneqarsimasutut isumaqarfigineqarsimanersoq, imaluunniit inatsisitigut akuerisaasumik siunertaqartoq inuup pingajuusup annertuumik inatsisinik unioqquitsiniarluni atorniarneraa, pineqarnerasoq, naliliinermi ilaatinneqassapput.

Pisuni atortussat inatsisit unioqquutillugit nittartakkamiittut taamaallaat nittartakkap ilaani annikitsumiippata, – politiit isumaat malillugu aamma taamaattoqassappat aammattaq attartortup nammineq najoqqutassiai malillugit – nittartakkap atortussanik inatsisinik unioqquitsisinik imaqarnera politiit assersuutigalugu nittartakkamik attartortumut (nalunaarsorneqarsimasumut) attaviginnissutigisinnaavaat.

Tamatuma peqatigisaanik politiit saaffiginnissimagaluartut, nittartakkamik piginnittup nittartakkap ataani nittartakkami imaritinneqartut imaluunniit nittarsaanneqartumi oqaaseqaatit assigisaalluunniit, taakkunani assersuutigalugu nittartakkamut phishing pillugu

pilerisaarutit aallakaatinneqarfiannut linkerisoqarluni imaluunniit pinerluttulerinermik inatsimmi § 95-imut akerliusumik ingerlatitseqqittoqarluni, peersinnginnera tassunga atatillugu atsikkutigiissitsineq pillugu naliliisoqarneranut ilaatinneqarsinnaapput.

Phishing pillugu pilerisaarineq eqqugaaratarsinnaasunut ikitsuararsuarnut taamaallaat anngussinnaanera, imaluunniit pineqartut aningaasanik taamaallaat annikitsuarakasinnik salloqittarlugit tigusiffigineqarsinnaanerat pillugit tunngavissalimmik isumaqartoqarnerasoq, naliliinermi aammattaaq ilaatinneqarsinnaavoq.

Imm. 3-mi oqaaseqatigiit siulliit malillugit politiit noqqaassuteqarnerisigut eqqartuussivik matusisoqarnissaa pillugu aalajangiissaaq. *Oqaaseqatigiit aappaat* malillugu aalajangiineq aalajangiinikkut tunngavilersorneqartussakkut aalajangerneqassaaq.

Matusisoqarnissaanik politiit noqqaassutaat akuerineqarpat, aalajangiineq nittartakkap aalajangersimasup sorliup matuneqarnissaa pillugu paasissutissanik imaqaassaaq.

Imm. 3-mi oqaaseqatigiit pingajuat malillugu suliami pissutsit piviusut, akuliunnermut piunasaqaatit naammassineqarsimanerannik tapersersuisut, nittartakkap matuneqarnissaanik akuersissuteqarneq pillugu aalajangiinermi taaneqassapput. *Oqaaseqatigiit sisamaat* malillugu aalajangiineq qaqugukkulluunniit eqqartuussivimmit allanngortinneqarsinnaavoq.

Aalajangiinnermut tunngaviit atuukkunnaanerat politiit ilisimalerpassuk – assersuutigalugu inatsisit unioqutillugit nittartakkap imarisaasa peerneqarsimanerat pissutigalugu – politiit piaarnerpaamik matusinerup atorunnaarsinneqarnissaa isumagissavaat. Taamaattoq matumuuna nittartakkat matuneqarsimasut pillugit ingerlaavartumik nakkutiginninnissaq politiit pisussaaffiginngilaat.

Inummut, akuliunnermut sammitinneqartumut, imaappoq nittartakkamik eqqartuussiviup matuneqarnissaanik akuersissuteqarfigisimasaanut attartortumut (nalunaarsorneqarsimasumut), politiit nalunaaruteqarnissamik suliaqarnissaat naatsorsuutigineqarpoq. Nittartagaq attaveqarfigineqarsinnaasut pillugit paasissutissanik imaqaanngippat, aamma politiit erniinnaartumik paasissutissat taakku allakkut pissarsiarisinnaanngippatigit, nalunaarutiginninneq pinngitsoortinneqarsinnaavoq. Inunnut nunani allaniittunut nalunaarutiginninneq, inunnut nunani allaniittunut nalunaarutiginninneq pillugu inatsisitigit siunnersorneqarneq pillugu malittarisassat nalinginnaasut malillugit piumaarpoq.

Pinerluttulerinermi inatsimmi § 94, nr. 5, imaluunniit §§ 104, 105, 108, 111 imaluunniit 111 a pillugit matusinermi siunertarineqartoq, eqqartuussiviup aalajangiinissaata

utaqqineqarnissaa pissutigalugu maangaannartinneqassappat, *imm. 4* malillugu politiit matusinissaq pillugu aalajangiisnaapput.

Nittartakkamit aalajangersakkat taaneqartut unioqqutinneqarnerat tunngavissalimmik isumaqarfigineqarpat, aamma eqqartuussiviup aalajangiinissaata utaqqineqarnera pissutigalugu siunertarineqartoq maangaannartinneqassappat, politiit akuliunneq aallartissinnaassagaat tamatuma kinguneraa.

Pisunut eqqissisimanermik akornusiinertut, hackerinertut, peqquserlunnertut, paasissutissat pillugit peqquserlunnertut, tillitanik pisinertut aamma aningaasatigut peqquserluutinik malunnarunnaarsaanertut ilusilinnut aalajangersakkanut taagorneqartunut unioqqutitsinernut, politiit piginnaatitaanerata killilerneqarpoq. Pinerliiniarnerit il.il., pisortani oqartussaasut innarlerneqarneri imaluunniit eqqissisimanermik akornusiinerit, nalunaarutinik imaluunniit assinik inummut allamut tassungaannarlu tunngasunik taamatut pisinnaatitaanani allannut ingerlatitseqqiinerit, nittartakkamit suliarineqartut pillugit nittartakkanik matusineq, eqqartuussiviup sioqqutsisumik aalajangiineratigut pisuni tamani taamaallaat pisinnaavoq.

Eqqartuussiviup aalajangiinerata utaqqineqarnissaa pissutigalugu siunertarineqartoq maangaannartinneqassanersoq, piviusumik nalilersuinerimik pissuteqartinneqassaaq. Taamaattoq pisuni, phishing pillugu pilerisaarineq inuppassuarnut anngussimasoq, imaluunniit oqartussaasut nittartagaat eqqunngitsut pineqartut, taakkunanilu MitID imaluunniit kortimut akiliissutissamut paasissutissat pillugit isertut toortaaqqullugit noqqaaffigineqarlutik, politiit paasippassuk, aalajangersagaq atussallugu ingammik naleqquttuusinnaavoq.

Imm. 4-imi *oqaaseqatigiit aappaat* malillugu akuliunnerup aallartinneqarnerata kingorna piaarnerpaamik aamma kingusinnerpaamik nalunaaquttap akunnerisa 24-t iluanni politiit suliaq eqqartuussivimmut saqqummiutissavaat. *Oqaaseqatigiit pingajuat* malillugu akuliunneq akuerineqarsinnaanersoq, aamma attatiinnarneqarsinnaanersoq, eqqartuussiviup aalajangissavaa. *Oqaaseqatigiit sisamaat* malillugu aalajangiineq tunngavilersorneqassaaq. Eqqartuussiviup isumaa malillugu akuliunneq suliarineqartussaasimanngikkaluarpat, *oqaaseqatigiit tallimaat* malillugu eqqartuussiviup tamanna pillugu Rigsadvokati nalunaarfigissavaa. Akuliunnerit eqqartuussiviup isumaa malillugu Politiets Efterretningstjeneste-mit suliarineqartussaasimanngikkaluit, *oqaaseqatigiit arferngat* malillugu Inatsiseqarnermut ministereqarfimmut nalunaarutigineqassapput.

Aamma pisuni politiit matusinissamik aalajangiisimatillugit, matusinerimik aalajangernerimi tunngaviusoq atuukkunnaartoq politiit ilisimalerunikku, matusinerup peerneqarnissaa politiit piaarnerpaamik isumagissavaat, soorlu aamma politiit matusinerimni

akuliunnermut sammitinneqartumut nalunaaruteqarnissamik suliaqarnissaat naatsorsuutigineqartoq.

Attaveqatigiissutinik aamma kiffartuussissutinik elektroniskiusunik tuniniaasut aamma internettimi sullissivinni aqutsisut nittartakkat matuneqarnissaanni politiinut ikiuunnissamik pisussaaffeqarnerat, *imm. 5-imi* takuneqarsinnaavoq. Nittartakkap eqqartuussiviup aalajangiineranut tunngassuteqartup DNS-iata matuneqarnissaa tuniniaasut aallartissagaat, tamatuma ilaatigut kinguneraa.

Sulisaatsimi attaveqatigiissutinik aamma kiffartuussissutinik elektroniskiusunik tuniniaasut aamma internettimi sullissivinni aqutsisumut ataatsimut arlalinnulluunniit nittartakkat matuneqarnissaat pillugu eqqartuussiviup aalajangiinera politiit ingerlateqqissavaat, taakkulu tamatuma kingorna DNS-ip matuneqarnerata tekniskiusumik naammassineqarnissaa isumagissavaat.

Tassunga atatillugu attaveqatigiissutinik aamma kiffartuussissutinik elektroniskiusunik tuniniaasut Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat malillugu paasineqassapput.

Tassunga atatillugu internettimi sullissivinni aqutsisut [*Kalaallit Nunaani malittarisassat internettimi sullissiviit il.il. pillugit inatsimmut assingusut] malillugu paasineqassapput.

Internettimik tuniniaasut, sullitanut amerlasuunut internettimik tuniniaasut, aalajangersakkami ilaatinneqarnissaat siunertarineqarpoq. Kisianni suliffeqarfiit, inunnut ikittuinnarnut imaluunniit eqimattani matoqqasuni ilaasunut, matumani neriniartarfinni, hotelini, ilinniagaqarfinni, ineqarneq pillugu peqatigiiffinni assigisaanilu internettimik tuniniaasut ilaatinneqarnissaat siunertaanngilaq.

Internettimik tuniniaasut imaluunniit aqutsisut namminneq kajumissusertik malillugu matusinissaq pillugu eqqartuussiviup aalajangiinera malinngippassuk, ilisimannittunut pinngitsaaliissutinik atuinissaq pillugu eqqartuussisarnermik inatsimmi § 150 taamatuttaaq atuutissasoq, aalajangersakkami aammattaq takuneqarsinnaavoq. Akiliisussanngortitsisinnaaneq aamma ilisimannittumit aningaasartuutit ilisimannittup aningaasartuutigititaanik taarsiiussanngortitsineq § 150-p ilaatigut eqqartuussivimmut periarfissiissutigaa.

Pinngitsaaliissutit taamaattut assersuutigalugu internettimik tuniniaasumut imaluunniit aqutsisumut pisuni, tassani tuniniaasoq aqutsisorluunniit pineqartoq – tamatuma peqatigisaanik politiit eqqartuussiviup matusinissamik aalajangiinera takutereeraluaraat – nittartakkamik pineqartumik matusinissamik aallartitsinngitsut, atorneqarsinnaassapput.

Akuliunnermut sammitinneqartup tamanna noqqaassutigippagu, *imm.* 6 malillugu piaarnerpaamik suliaq politiit eqqartuussivimmu saqqummiutissavaat. Akuliunneq attanneqassanersoq eqqartuussiviup aalajangiiffigissavaa. Aalajangiineq tunngavilersorneqassaaq.

Sulisaatsimi nalunaarsorneqarsimasup noqqaassuteqarneq taaneqartoq saqqummiussinnaassavaa.

Aalajangiineq aalajangeqqitassanngortitsineq pillugu malittarisassat nalinginnaasut malillugit aalajangeqqitassanngortinneqarsinnaassaaq.

Nittartakkap matuneqarnera pillugu eqqartuussiviup akuersissuteqannginnermik aalajangiinera, pisumi tassani akuliunnerup attanneqarsinnaannginneranik, aamma matusinerup peerneqarnissaanik politiinit piaarnerpaamik isumaginninnissaannik kinguneqassaaq.

Aammattaaq inatsisissatut siunnersuummi nalinginnaasumik oqaaseqaatini *imm.* 2.7.2 innersuussutigineqarpoq.

§ 400 b-mut

Pinerluttulerinermik suliat pillugit eqqartuussisarnermik inatsimmi immikkoortoq V malillugu ullumikkut radiokkut aallakaatitsinernik- imaluunniit nalunaarasuartaatitigut atassuteqarnernik akornusersuineq imaluunniit atassutaarutitsineq periarfissaanngilaq.

Radiokkut aallakaatitsinernik- imaluunniit nalunaarasuartaatitigut atassuteqarnernik akornusersuineq imaluunniit atassutaarutitsineq pillugu kapitali 36-imi aalajangersakkamik nutamik ilanngussisoqarnissaa siunnersuutigineqarpoq. Qaqugukkut politiit eqqartuussiviup aalajangiinera malillugu radiokkut aallakaatitsinernik- imaluunniit nalunaarasuartaatitigut atassuteqarnernik akornusersuisinnaaner at imaluunniit atassutaarutitsisinnaaner at aalajangersakkap malittarisassiuuppa.

Tamanna pingaarutilinnik pissutissaqartoq, sumiiffimmi pineqartumi immikkut ingasassusilimmik inatsimmik unioqqutitsisoqarnissanut imaluunniit inuit inuunerannik atugarissaarnerannilluunniit imaluunniit inuiaqatigiinni pingaaruteqartunut navianartorsiortitsisinnaasunik piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqqutitsisoqarnissaa, pitsaaliuinermik siunertaqarlutik politiit sumiiffimmi radiokkut aallakaatitsinernik- imaluunniit nalunaarasuartaatitigut atassuteqaatinik akornusersuisinnaanerannut imaluunniit atassutaarutitsisinnaanerannut

piumasaqaataassasoq, *imm. 1-imi siunnersuutigineqarpoq.* Inatsisissatut siunnersuummi nalinginnaasumik oqaaseqaatini imm. 2.4.1 malillugu malittarisassaq pingaarneq malillugu inissiisarfimmi sivirusumik sivirususilimmik piumasaqaatitaqanngitsumik paarnaarussisoqarnissaa piviusumik naatsorsuutigineqartariaqartutut »immikkut ingasassusilimmik inatsimmik unioqutitsisoqarnera« paasineqassaaq.

Taamaalilluni aalajangersagassatut siunnersuutigineqartoq malillugu, assersuutigalugu pinerliiniarnerit pinngitsoortinneqarnissaat siunertaralugu radiokkut aallakaatitsinerit-imaluunniit nalunaarasuartaatitigut atassuteqarnernik akornusersuinerit imaluunniit atassutaarutitsinerit aallartinneqarnissaannut pingaarutilinnik pissutissaqarnissaa piumasaqaataavoq. Sumiiffimmi pineqartumi assersuutigalugu pinerliiniartoqarnissaa malunnartumik annertusisamik navianaateqassasoq, tamatuma kinguneraa. Tamanna assersuutigalugu sumiiffimmi aalajangersimasumi pinerliiniarluni saassussinissaq pilluinnalersoq pillugu piviusumik paasissutissat pigineqalersillugit pisinnaavoq.

Paasissutissanik piviusunik taamaattunik pigisaqartoqartinnagu, kisianni pisussaq nalinginnaasumik naliliineq malillugu, assersuutigalugu pinerliiniarnermik saassussinissamut malunnaatilimmik annertusisamik aarlerinaammik kinguneqartussaasoq pineqartillugu, aalajangersagaq immikkut illuinnartumik pisoqartillugu aammattaaq atorineqarsinnaassaaq. Nunani allani naalagaaffinni qullersaasut il.il. immikkut ittumik siorasaarneqartartut tamanut oqalugiarnernannut atatillugu tamanut sassartussaasut tikeraarneranni, aamma sumiiffimmi utaqqiisaagallartumik radiokkut aallakaatitsinerit-imaluunniit nalunaarasuartaatitigut atassuteqarnernik akornusersuinikkut imaluunniit atassutaarutitsinikkut pisariaqartinneqartumik illersuineq taamaallaat pilersinneqarsinnaasoq politiit isumaqarnerat, uani ilaatigut pineqarsinnaavoq.

Pinerliiniarnerup pitsaaliorneqarnissaa ingammik aalajangersagassatut siunnersuutigineqartup isiginiarpaa, kisianni aalajangersagaq tassungaannaq killeqanngilaq. Akuliunnissap aallartinneqarnissaannut piumasaqaatit allakkut naammassineqarpata, ilungersunartumik pinerluttuliornerup pitsaaliorneqarnissaa siunertaralugu sumiiffimmi politiit radiokkut aallakaatitsinerit-imaluunniit nalunaarasuartaatitigut atassuteqarnernik akornusersuisinnaapput imaluunniit atassutaarutitsisinnaallutik. Tamanna assersuutigalugu nalinginnaasumik inuiaqatigiinni assartuinissamut imaluunniit atassuteqaateqartitsinissamut atortunik il.il. ingerlatsinermi inatsisit unioqutillugit akornusersuinerit imaluunniit sallunavequtitut tigusinerit- aamma aallarussinerit pineqartillugit pisinnaavoq.

Inatsimmik unioqutitsineq inuit inuunerannut imaluunniit atugarissaarnerannut imaluunniit inuiaqatigiit naleqartitaannik pingaarutilinnik navianartorsiortitsisinnaanera, akuliunnermut aammattaaq piumasaqaataavoq. Akuliussinnaaneq radiokkut aallakaatitsinernik-imaluunniit nalunaarasuartaatitigut atassuteqaatinik akornusersuinertut imaluunniit

atassutaarutitsinertut iluseqartoq taamaalilluni pisunut immikkorluinnaq ittunit killilerneqarpoq.

Akuliunnerup siunertaanut, suliap pingaaruteqassusaanut aamma akuliunnerup inummut inunnulluunniit, akuliunnermik eqqugaasunut, akuliunnerup innarliineratut ajoqusiineratullu isumaqarfigineqartut, naleqqutinngitsumik akuliunnerussappata, akuliunnerit imm. 1-imi taaneqartut suliarineqassanngitsut, *imm. 2-mi* siunnersuutigineqarpoq.

Atsikkutigiissitsinissamut malittarisassatut nalinginnaasutut aalajangersagaq takutitsivoq.

Radiokkut aallakaatitsinernik- imaluunniit nalunaarasuartaatitigut atassuteqarnernik akornusersuineq imaluunniit atassutaarutitsineq pillugu aalajangiisinaanermut piginnaasaqarneq *imm. 3-mi oqaaseqatigiit siulliit* malillugit eqqartuussiviup ataaniissaaq. Eqqartuussiviup aalajangernera aalajangiinikkut tunngavilersorneqartussakkut aalajangerneqassaaq.

Radiokkut aallakaatitsinernik- imaluunniit nalunaarasuartaatitigut atassuteqarnernik akornusersuineq imaluunniit atassutaarutitsineq pillugu aalajangiinermi, *imm. 3-mi oqaaseqatigiit aappaattut* siunnersuutigineqartoq malillugu, sumiiffik akuliunnermut tunngassuteqartoq taaneqassaaq. Sumiiffiup erseqqinnerusumik killilerneqarnera pisuni ataasiakkaani piviusumik nalilersuinnermik tunngaveqartassaaq, aamma sumiiffik radiokkut aallakaatitsinernik- imaluunniit nalunaarasuartaatitigut atassuteqarnernik akornusersuiffiusoq imaluunniit atassutaarutitsiffiusoq, pissutsit, assersuutigalugu sumiiffimmi pineqartumi pinerliiniartoqarnissaanik malunnaatilimmik annertuumik aarlerinaateqarfiuneranik tunngavilersuutaasut tunngavigalugit aalajangersarneqassaaq.

Sumiiffiup pineqartup annertussusaa – atsikkutigiissitsinissamik tunngaviit nalinginnaasut naapertorlugit – sapinngisamik minnerpaaffimmiitinneqassaaq. Annertussuseq taanna tekniskiusumik pissutsit piviusut eqqarsaatigalugit, matumani frekvensi, aallakaatitsinermi sunniutit aamma antenneqarnermi pissutsit eqqarsaatigalugit isigineqassaaq. Pissutsit immikkorluinnaq ittut atuutinngippata, sumiiffimmi meterit hundredelikkaat ikitsunnguit iluat sinnerlugu radiokkut aallakaatitsinernik- imaluunniit nalunaarasuartaatitigut atassuteqarnernik akornusersuinissaq imaluunniit atassutaarutitsinissaq tunngavissaqarnaviangilaq.

Imm. 3-mi oqaaseqatigiit aappaattut siunnersuutigineqartoq malillugit suliame pissutsit piviusut suut, akuliunnermut piumasaqaatinik naammassinnissimanermik tapersersuisuusut, aalajangiinermi aammattaaq taaneqassapput.

Imm. 3-mi *oqaaseqatigiit pingajuat* malillugu aalajangiineq qaqugukkulluunniit allangortinneqarsinnaavoq. Eqqartuussiviup qaqugukkulluunniit sumiiffik aalajangiinnermut tunngassuteqartoq allangortissinnaagaa, soorlu aamma eqqartuussiviup aalajangiineq atorunnaarsissinnaagaa, tamatuma kinguneraa.

Imm. 3-mi *oqaaseqatigiit sisamaat* malillugu piffissap, akuliunnerup suliarineqarfissaa, aalajangiinnermi aammattaq taaneqassaaq. Piffissaq – atsikkutigiissitsinissamik tunngaviit nalinginnaasut naapertorlugit – sapinngisamik sivikinnerpaamiitinneqassaaq. Pissutsit immikkorluinnaq ittut atuutinngippata, nalunaaquttap akunnerinit ikittuinnarnit sivisunerusumik piffissaliinissaq tunngavissaqarnaviannngilaq. *Oqaaseqatigiit tallimaat* malillugu piffissaliussaq nutaamik aalajangiinikkut, tunngavilersorneqartussakkut, sivitsorneqarsinnaavoq.

Eqqartuussiviup aalajangiinissaata utaqqinneqarnera pissutigalugu akuliunnermi siunertarinqartoq maangaannartinneqassappat, *imm. 4* malillugu radiokkut aallakaatitsinernik- imaluunniit nalunaarasuartaatitigut atassuteqarnernik akornusersuineq imaluunniit atassutaarutitsineq pillugu politiit utaqqiisaagallartumik aalajangiisinnaapput. Sumiiffimmi maannakkorluinnaq radiokkut aallakaatitsinernik- imaluunniit nalunaarasuartaatitigut atassuteqarnernik akornusersuinissaq imaluunniit atassutaarutitsinissaq politiit pisariaqartippassuk, tamanna assersuutigalugu naleqquttuusinnaavoq. Taamaattoqarpat piaarnerpaamik aamma akuliunnerup aallartinneranit nalunaaquttap akunnerisa 24-t iluanni politiit suliaq eqqartuussivimmut saqqummiutissavaat.

Akuliunneq akunerineqarsinnaanersoq, aamma attanneqarsinnaasoq, taamaappallu piffissimi sorlermi suliarineqassanersoq, eqqartuussiviup aalajangissavaa. Eqqartuussiviup isumaa malillugu akuliunneq suliarineqartussaasimannngikkaluarpat, tamanna pillugu eqqartuussivik Rigsadvokatimut nalunaaruteqassaaq. Akuliunnerit eqqartuussiviup isumaa malillugu Politiets Efterretningstjeneste-mit suliarineqartussaasimannngikkaluit, Inatsiseqarnermut ministereqarfimmut nalunaarutigineqassapput.

Imm. 5 malillugu akuliunnerni radiokkut aallakaatitsinernik- imaluunniit nalunaarasuartaatitigut atassuteqarnernik akornusersuinertut imaluunniit atassutaarutitsinissatut ilusilinni, taamatuttaaq illersuisumik ivertitsineq pillugu § 392-imi malittarisassat atuutissapput.

§ 400 b, *imm. 3* imaluunniit 4 malillugu eqqartuussiviup aalajangiinnnginnerani, inummut akuliunnermut tunngassuteqartumut illersuisumik ivertitsisoqassasoq § 392-imut innersuussinerup kinguneraa, aamma § 392, *imm. 1* malillugu illersuisoq oqaaseqarnissaminik periarfissinneqassaaq.

Pinerluttoqarsimaneranik paasiniaaneq, taama tulleriillutik, naalagaaffiup namminersortuuneranut isumannaatsuunissaanullu aamma naalagaaffiup inatsit tunngaviusoq malillugu aaqqissuussineranut pinerluttuliornerit aamma naalagaaffimmi oqartussaasunut qullersaasunut, pinerliiniarnikkut il.il. pinerluttuliornerit pillugit pinerluttulerinermik inatsimmi kapitali 7-imik imaluunniit 8-mik unioqutitsinermik tunngassuteqarpat, suliaq Nunatsinni Eqqartuussivimmit suliarineqassaaq, aamma § 392, imm. 4 malillugu illersuisoq illersuisut immikkut ittut ilaannit ivertinneqassaaq.

Radiokkut aallakaatitsinernik- imaluunniit nalunaarasuartaatitigut atassuteqarnernik akornusersuinernit imaluunniit atassutaarutitsinernit eqqorneqaratarsinnaasut soqutigisaannik illersuisoq suliaqartussaassaaq.

Eqqartuussinerni illersuisup aggersarneqarnissaa aamma peqataanissaa aamma politiit suliaq pillugu atortussaataanik takunnissinnaatitaanissaa pillugu eqqartuussisarnermik inatsimmi § 392, imm. 2 malittarisassanik imaqarpoq. Paasissutissat tiguneqartut illersuisup allanut ingerlateqqissinnaanngilai.

Eqqartuussisarnermik inatsimmi § 392, imm. 3 malillugu, illersuisup ivertitap suliaq suliarineqarnerata nalaanit kingusinnerunngitsumik pasineqartumut kimulluunniit illersuisutut atuussinnaannginnera, eqqartuussiviup aalajangersinnaavaa.

Aammattaaq inatsisissatut siunnersuummi nalinginnaasumik oqaaseqaatini imm. 2.8.2 innersuussutigineqarpoq.

§ 400 c-mut

Nalinginnaasumik kinaassusersiunngitsuunissamat piumasaqaatit aamma inunnik paasissutissanik suliarinnittarneq pillugu malittarisassat atuuttut isiginiarlugit, ullumikkut politiit sumiiffinni kikkunnilluunniit tikinneqarsinnaasuni tv-kkut nakkutiginninnernik suliaqarsinnaapput.

Aammattaaq nakkutiginninneq pillugu eqqartuussisarnermik inatsimmi § 399-imi malittarisassat malillugit sumiiffinni tikikkuminaatsuni tv-kkut nakkutiginninneq politiit suliarisinnaavaat.

Tamatuma saniatigut eqqartuussisarnermik inatsimmi pasineqartuni pasineqanngitsunilu arsaarinnissuteqartarneq pillugit aamma pasineqanngitsunit tunniussisussaataaneq pillugit §§ 417-imiit 420 ilanngullugu malittarisassat malillugit, tv-kkut nakkutiginninnermi assilillugit immiussat toqqorneqarsimasut politiit pissarsiarisinnaavaat.

Kisianni pinerluttulerinermik suliat suliarineqartarnerat pillugu eqqartuussisarnermik inatsimmi immikkoortoq V malillugu tv-kkut nakkutiginninnerit, oqartussaasunit allanit imaluunniit inunnit ataasiakkaanit aallartinneqarsimasut ingerlasut, politiinit tiguneqarnissaat ullumikkut periarfissaqanngilaq.

Tv-kkut nakkutiginninnerit tiguneqarnissaat pillugu kapitali 36-imi (§ 400 c) aalajangersakkamik nutaamik ilanngussisoqarnissaa siunnersuutigineqarpoq. Qaqugukkut politiit eqqartuussiviup aalajangiineratigut tv-kkut nakkutiginninnermik tiguisinnaanerannut, aalajangersakkap piumasaqaatit erseqqinnersut malittarisassiuuppai.

Aalajangersagassatut siunnersuutigineqartup politiit nammineerlutik tv-kkut nakkutiginnissinnaaneratt pioreersoq attunngilaa.

PET pillugu inatsisip, peqqussutikkut nr. 1622-ikkut, 17. november 2020-imeersukkut Kalaallit Nunaannut atuutilersinneqartukkut, malitsigisaanik Politiets Efterretningstjeneste-p oqartussasunit allanit paasissutissanik pissarsiniarsinnaaneratt, aalajangersagassatut siunnersuutigineqartup attunngilaattaq.

Tamanna pingaarutilinnik pissutissaqarpat, sumiiffimmi pineqartumi immikkut ingasassusilimmik inatsimmi unioqqutitsisoqarnissanut imaluunniit inuit inuunerannik atugarissaarnerannilluunniit imaluunniit inuiaqatigiinni pingaaruteqartunut navianartorsiortitsisinnaasunik piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqqutitsisoqarnissanut, pitsaaliuinermik siunertaqarlutik politiit oqartussaasunit allanit inunnilluunniit ataasiakkaanit sumiiffimmi tv-kkut nakkutiginninnermik tiguisinnaaneratt, *imm. 1-imi* siunnersuutigineqarpoq. Inatsisissatut siunnersuummi nalinginnaasumik oqaaseqaatini *imm. 2.4.1* malillugu malittarisassaq pingaarneq malillugu inissiisarfimmi sivirusumik sivirususilimmik piumasaqaatitaqanngitsumik paarnaarussisoqarnissaa piviusumik naatsorsuutigineqartariaqartut »immikkut ingasassusilimmik inatsimmi unioqqutitsisoqarnera« paasineqassaaq.

Tv-kkut nakkutiginninneq pillugu inatsimmi § 1, *imm. 2-mi* oqaaseqatigiit siulliit malillugit, tv-kkut assiliissut avataanit aquneqartoq imaluunniit automatiskiusumik ingerlasoq, assiliivik imaluunniit sakuut assingusoq ikiorsiullugu ingerlaavartumik imaluunniit akuttoqatigiissumik uteqqiattumik inummik nakkutiginninneratt tv-kkut nakkutiginninneq paasineqassaaq.

Tv-kkut nakkutiginninneq pillugu inatsit Kalaallit Nunaannut atuutilersinneqanngimmat maluginiarneqassaaq.

Erseqqinnerusumik piuraaqaatit piuraaqaatigalugit, oqartussaasunit aamma inunnit ataasiakkaanit politiit sumiiffimmi tv-kkut nakkutiginninnernik tiguisinnaanerat siunnersuutigineqarpoq. Sumiiffinni nalinginnaasumik angallaffittut atorneqartuni, sumiiffinni allakkut nalinginnaasumik iserfigineqarsinnaasuni, aamma sumiiffinni matoqqasuni tv-kkut nakkutiginninnernut tv-kkut nakkutiginninnernik tiguisinnaaneq atuutissaaq. Politiit inuit ataasiakkaat angerlarsimaffiini tv-kkut nakkutiginninnernik tiguisinnaanavianginnerat, taamaattoq aalajangersagassatut siunnersuutigineqartumi takuneqarsinnaavoq.

Piuraaqaatit naammassineqarsimatillugit, oqartussaasut imaluunniit inuit ataasiakkaat atorsinnaasaannik politiit tv-kkut nakkutiginninnernit isiginnaarsinnaanissaat, aallakaatitsinnaanissaat aamma assinik immiussisinnaanissaat – aamma pisariaqarpat nammineerlutik pissarsisinnaanissaat – tamatuma kingunerissavaa.

Taamaaliorinnaaneq akuliunnerup aallartinneranit atuutissaaq. Akuliunnerup aallartinginnera sioqqullugu tv-kkut nakkutiginninnerit toqqorneqarsimasut takunissaannik imaluunniit assilillugit sanaqqinneqarnerinik pinissamik politiit pisariaqartitsippata, allakkut piuraaqaatit naammassineqarsimatillugit tamanna tunniussisussaataaneq aamma arsaarinnissuteqartarnej pillugit malittarisassat eqqartuussisarnermik inatsimmi kapitali 37-imiittut malillugit pisinnaassaaq.

Aalajangersagassatut siunnersuutigineqartoq periarfissaliissutigalugu politiit tv-kkut nakkutiginninneq tigugunikku, qanoq annertutigisumik atortussat tiguneqartut isiginnaarnissamut, aallakaatitsinissamut aamma assinik immiussinissamut atussanerlugit, aamma qanoq annertutigisumik politiit namminneq atortussaatic taakkununga atussanerlugit pillugit, politiit nammineerlutik sorliit atussanerlugit qinissavaat. Tamanna politiit kissaatigippasuk, aamma tekniskiusumik tamanna periarfissaappat, isiginnaarnissamut, aallakaatitsinissamut aamma assinik immiussinissamut aamma avataaniit isersinnaanikkut pisinnaassaaq. Tv-kkut nakkutiginninnermik politiit tiguserat, politiinut tamanna tekniskiusumik periarfissaaticillugu assersuutigalugu assiliissutip sammivianik imaluunniit qanillisaataanik allanngortitsisinaanermik periarfissiissaaq.

Aalajangersagassatut siunnersuutigineqartoq periarfissaliissutigalugu politiit tv-kkut nakkutiginninneq tigugunikku, politiit tv-kkut nakkutiginninnermik tiguserisa kingorna, tv-kkut nakkutiginninnermit immiussanik aamma politiit atuisinnaangussapput. Taamaammat, taamaattoqassappat immiussat taamaattut politiit namminneq atortussaataannut assilillugit sanaqqinnerisa nuunneqarnerisa kingorna, akuliunnerup naammassineqannginnerani aamma atortussamik atuisinnaanerup utertillugu tunniunneqannginnerani, atortussanit tiguneqartunit immiussat politiit nungutersinnaavaat.

Inuit pillugit paasissutissat pillugit immiussat nunguterneqanngippata, inuit pillugit paasissutissanik ingerlatitseqqinneq pineqassaaq, taamaaliernerlu inunnik paasissutissanik suliarinnittarneq pillugu inatsisiliornermut naapertuummik tamanna pissaaq.

Aalajangersagassatut siunnersuutigineqartoq periarfissaliissutigalugu politiit tv-kkut nakkutiginninneq tigugunikku, piffissami tigusiffiusumi tv-kkut nakkutiginninnermut atatillugu, inuit pillugit paasissutissat suliarineqarneranni paasissutissanut politiit aamma akisussaasuussapput. Tv-kkut nakkutiginninnermik politiit tigusinerat naappat, taamaalilluni politiit paasissutissanik akisussaanerat, tv-kkut nakkutiginninnermut atortussat tulliusumik atorneqarneranni atorunnaassaaq.

Taama tulleriillutik, naalagaaffiup namminersortuuneranut aamma isumannaatsuuneranut pinerluttuliornernik aamma naalagaaffiup inatsit tungavioq malillugu aaqqissuussineranut aamma naalagaaffimmi oqartussaasut qullersaannut, pinerliiniarnernut il.il. piaaraluni pinerluttulerinermi inatsimmi kapitali 7-imi 8-miluunniit aalajangersakkanik immikkut ingasassusilimmik inatsimmik unioqqutitsisoqarnissaa pitsaaliorniarlugu imaluunniit pinerluttoqarsimaneramik paasiniaaviginiarlugu, aalajangersagassatut siunnersuutigineqartoq malillugu tv-kkut nakkutiginninnermik tigusinermi pingaarutilinnik pissutissaqartoqarnera piunasaqaataasussavaoq. Inatsimmik unioqqutitsinerup inuit inuunerannut atugarissaarnerannulluunniit imaluunniit inuiaqatigiinni pingaaruteqartunut navianartorsiortitsisimanera imaluunniit navianartorsiortitsisinnaanera, aammattaaq piunasaqaataassaaq.

Assersuutigalugu pinerliiniartoqarnissaanut pingaarutilimmik annertusisamik aarlerinartoqarnerani, aalajangersagaq taamaalilluni atorneqarsinnaassaaq. Pingaarutilimmik annertusisamik aarlerinartoqarnerasoq piviusumik nalilersuineri apequtaassaaq. Tamanna assersuutigalugu pinerliiniarnissaq piliivissoq pillugu paasissutissanik piviusunik peqartoqartillugu pisinnaavoq. Politiit tv-kkut nakkutiginninnermik tigusinerat pinerluttuliornissap pitsaaliorneqarnissaanut pingaaruteqartussaansissaa, tamatuma aammattaaq kingunerissavaa.

Paasissutissanik piviusunik taamaattunik pigisaqartoqartinnagu, kisianni pisussaq nalinginnaasumik naliliineq malillugu, assersuutigalugu pinerliiniarnermik saassussinissamut malunnaatilimmik annertusisamik aarlerinaammik kinguneqartussaasoq pineqartillugu, aalajangersagaq immikkut illuinnartumik pisoqartillugu aammattaaq atorneqarsinnaassaaq. Nunani allani naalagaaffinni qullersaasut il.il. immikkut ittumik siorasaarneqartartut tamanut oqalugiarnernut atatillugu tamanut sassartussaasut tikeraarneranni, aamma sumiiffimmi utaqqiisaagallartumik tv-kkut nakkutiginninnerup tiguneqarneratigut pisariaqartinneqartumik illersuineq taamaallaat pilersinneqarsinnaasoq politiit isumaqarnerat, uani ilaatigut pineqarsinnaavoq.

Aalajangersagassatut siunnersuutigineqartup ilaatigut pinerliiniarnerit pitsaaliornissaat anguniarpaa, kisianni tassunga killilerneqanngilaq. Allakkut akuliunnissamut piunasaqaatit naammassineqarsimatillugit, pinerluttuliornerit ilungersunartut allat pitsaaliorneqarnissat siunertaralugu sumiiffimmi tv-kkut nakkutiginninnerit politiit tigusinnaassavaat. Assersuutigalugu tamanna nalinginnaasumik inuiaqatigiinni assartuinissamut imaluunniit atassuteqaateqartitsinissamut atortunik il.il. ingerlatsinermi inatsisit unioqqutillugit akornusersuinerit imaluunniit sallunaveqqutitut tigusinerit- aamma aallarussinerit pineqartillugit pisinnaavoq.

Pisuni, assersuutigalugu pinerliiniarneq pereersimalluni, aamma saassusseqqinnissat pitsaaliorneqarnissaat siunertaralugu sumiiffimmi tv-kkiut nakkutiginninnerup tigusinnaanik pingaarutilimmik pissutissaqarpat, aalajangersagaq aamma atorineqarsinnaassaaq. Pissutsit assigiinngitsut malillugit umiarsualivinni timmisartoqarfinnilu pinerluttuliornerit ilimagineqartup nunanut allanut qimaanissaa akornuserniarlugu tv-kkut nakkutiginninneq ilaatinneqarsinnaavoq.

Tamanna inatsimmik unioqqutitsineq pillugu politiit pinerluttoqarsimaneramik paasiniaanerannut annertuumik pingaaruteqassappat, assersuutigalugu inatsimmik unioqqutitsinermut pasisap imaluunniit ilisimannittuusinnaasut nassaarineqarnissaat aamma kinaassusersineqarnissaat siunertaralugu, politiit sumiiffimmi tv-kkut nakkutiginninnermik sukkasoorujussuarmik pissarsinnaanissaat, ilungersunartumik inatsimmik unioqqutitsinermut pereersimasumut atatillugu pinerluttulerinermik paasiniaanermi aalajangersagaq naggataagut atorineqarsinnaavoq.

Immikkut ingasassusilimmik inatsimmik unioqqutitsinerup, inuit inuunerannut imaluunniit atugarissaanerannut imaluunniit inuiaqatigiinni naleqartitanut pingaaruteqartunut navianartorsiortitsisinnaaneramik imaluunniit navianartorsiortitsisimaneramik kinguneqarsinnaanera, akuliunnermut aammattaaq piunasaqaataassaaq. Eqqartuussisarnermik inatsimmi § 387, § 388 aamma § 399, imm. 3 malillugit, aamma, taama tulleriillutik, oqarasuaatit sorliit sumiiffimmi erseqqinnerusumik taaneqartumi oqarasuaammut aalajangersimasumut atassuteqarsimanersut imaluunniit atassuteqartut nalilerneqartut pillugit, ininik naalaarnerit pillugit aamma immikkut ittumik piunasaqaatitalimmik pinngitsaalilluni akuliunneq nakkutiginninnerit iluseqartoq pillugit piunasaqaatinut oqaatsit imarisaat allakkut nassuiarneqartarnerat naapertorlugit, oqaatsit imarisaat paasineqartariaqassapput. Taamaalilluni akuliunneq tv-kkut nakkutiginninnerit ilusirik pisunut immikkorluinnaq ittunut killilerneqassaaq.

Piunasaqaatit allaaserineqartut tv-kkut nakkutiginninnermik politiit tigusinerannut tunngassuteqarput. Politiit, tv-kkut nakkutiginninnermik atuisinnaasoq isumaqatigiissuteqarfigalugu, piffissami siusinnerusumi iliuutsinik tekniskiusunik, aalajangersagassaatut siunnersuutigineqartoq malillugu kingusinnerusukkut tv-kkut

nakkutiginninnissamik tigusinissamik sunniuteqarluarnerulersitsisunik, kingusinnerusukkut tv-kkut nakkutiginninnermik tiguisoqassappat tigusinissamik piareersaanerat, aalajangersakkap malittarisassiuutissanngilaa – aamma akornusernaviannngilaa. Piareersaataasumik tekniskiusumik iliuitsit taamaattut, taamaattoqassappat inuit pillugit paasissutissat suliarineqartarnerat pillugu malittarisassat attuumassuteqartut naapertorlugit pissapput, matumani suliarinninnerup isumannaatsuunissaa pillugu.

Pinerluttulerinermi eqqartuussisarnerup iluani pinngitsaaliilluni akuliunnissamik politiit suliaqarnissamut allakkut periarfissaannut, aalajangersagassatut siunnersuutigineqartoq allannguutininik kinguneqanngilaq.

Akuliunnerup siunertaanut, suliap pingaaruteqassusianut aamma akuliunnerup inummut imaluunniit inunnut eqqorneqartunut innarliinermik akornusiinermillu ajoqusiinera naleqqutinngitsutut akuliunnerussappat, imm. 1 malillugu akuliunneq suliarineqassanngitsoq, *imm. 2-mi* siunnersuutigineqarpoq.

Atsikkutigiissitsinissaq pillugu malittarisassamik nalinginnaasumik aalajangersagaq ersersitsivoq.

Imm. 3-mi oqaaseqatigiit siulliit malillugit imm. 1 malillugu akuliunneq, eqqartuussiviup aalajangiinerata, tunngavilersorneqartussap, kingorna pissaaq. Tv-kkut nakkutiginninnermik tigusinissaq pillugu aalajangiinissamik aalajangiisinnanermut piginnaatitaaneq eqqartuussivimmiimmat, tamatuma kinguneraa.

Imm. 3-mi oqaaseqatigiit aappaat malillugu sumiiffik sorleq akuliunnermut tunngassuteqarnersoq aalajangiinermi allanneqassaaq, aamma suliami pissutsit piviusut allanneqassallutik, tassanilu akuliunnermut piumasaqaatinik naammassinninneq tapersersorneqassaaq.

Pisuni ataasiakkaani sumiiffiup erseqqinnerusumik killilerneqarnera piviusumik naliliinermik tunngaveqassaaq, aamma tv-kkut nakkutiginninnermi tassani piviusumi sumiiffik, pissutsit assersuutigalugu pinerliiniartoqarnissaanut pingaarutilimmik annertusisamik aarlerinartoqarneranik naliliinermik tunngaviliisut tunngavigalugit aalajangersarneqassaaq. Sumiiffiup taassuma pineqartup annertussusaa – atsikkutigiissitsinissamik tunngaviit nalinginnaasut naapertorlugit – minnerpaaffimmiitinneqassaaq.

Imm. 3-mi oqaaseqatigiit pingajuat malillugu, aalajangiineq eqqartuussivimmit qaqugukkulluunniit allanngortinneqarsinnaavoq. Sumiiffiup aalajangiinermut

tunngassuteqartup eqqartuussivimmit qaqugukkulluunniit allanngortinneqarsinnaanera tamatuma kinguneraa, soorlu aamma aalajangiineq eqqartuussiviup atorunnaarsissinnaagaa.

Imm. 3-mi *oqaaseqatigiit sisamaat* malillugu, piffissaq akuliunnerup qaqugukkut suliarineqarfissaa, aammattaq aalajangiinermi aalajangersarneqassaaq.

Piffissaq – nalinginnaasumik atsikkutigiissitsinissamik tunngaviit naapertorlugit – sapinngisamik sivikinnerpaatinneqassaaq. Pissutsit immikkut ittut atuutsinnagit, aallaaviatigut nalunaaquttap akunnerinik 48-nik sivisunerusumik aalajangiinissaq tunngavissaqassanngilaq.

Kisianni imm. 3-mi *oqaaseqatigiit tallimaat* malillugu, piffissaq nutaamik aalajangiinikkut sivitsorneqarsinnaassaaq.

Imm. 4-imi *oqaaseqatigiit siulliit* malillugit eqqartuussiviup aalajangiinissaata utaqqineqarnera pissutigalugu akuliunnerup siunertaa maangaannartinneqassappat, tv-kkut nakkutiginninnerup tiguneqarnissaa pillugu politiit utaqqiisaagallartumik aalajangiisinnaassapput.

Politiit sivikitsuinnarmik piffissaqarlutik pinerliiniat saassussilernerat pillugu ilimasaarinerit pillugit paasissutissanik pisimanerat pissutigalugu, imaluunniit pinerliiniarneq aallartinneqareersimappat, tamanna assersuutigalugu naleqquttuusinnaavoq.

Taamaattoqarpat, imm. 4-imi *oqaaseqatigiit aappaat* malillugu politiit akuliunnerup aallartinnerata kingorna piaarnerpaamik aamma kingusinnerpaamik nalunaaquttap akunneri 24-t qaangiutsinnagit suliaq eqqartuussivimmut saqqummiutissavaat.

Akuliunneq akuerineqarsinnaanersoq, aamma attatiinnarneqarsinnaanersoq, aamma akuerineqarsinnaappat piffissamut sorlermut akuersissutigineqassanersoq, imm. 4-mi *oqaaseqatigiit pingajuat* malillugu eqqartuussiviup aalajangissavaa. *Oqaaseqatigiit sisamaat* malillugu eqqartuussiviup aalajangiinera tunngavilersorneqassaaq.

Eqqartuussiviup isumaa malillugu akuliunneq suliarineqartussaasimanngikkaluarpat, eqqartuussiviup imm. 4-imi *oqaaseqatigiit tallimaat* malillugu Rigsadvokati tamanna pillugu ilisimatissavaa. Akuliunnerit Politiets Efterretningstjeneste-mit eqqartuussiviup isumaa malillugu suliarineqartussaasimanngikkaluartut, taamaattoq *oqaaseqatigiit arferngat* malillugu Inatsiseqarnermut ministereqarfimmut nalunaarutigineqassapput.

Imm. 5-imi *oqaaseqatigiit siulliit* malillugit, inuup tv-kkut nakkutiginninnermik atuisinnaasup, tv-kkut nakkutiginninnerup tiguneqarnerani politiinut ikiuutissaaq.

Sumiiffimmi tv-kkut nakkutiginninnerup politiit tiguneqarnissaa pillugu imm. 3 malillugu eqqartuussivik imaluunniit imm. 4 malillugu politiit aalajangiippata, taamaalilluni taakku sumiiffimmi pineqartumi tv-kkut nakkutiginninnermik atuisinnaasut, politiit noqqaaffigineqarnermikkut, tv-kkut nakkutiginninnerup tiguneqarnerani politiit ikiussavaat.

Tv-kkut nakkutiginninnermik atuisinnaanermi tassunga atatillugu inatsisitigut aamma piviusumik atuisinnaaneq ilaatinneqassapput. Taamaalillutik tv-kkut nakkutiginninnermik tigusinissaminnut tv-kkut nakkutiginninnermi paasissutissanik akisussaasumit, aamma taamaattoqarpat paasissutissanik suliarinnittumik ikiorneqarnissaq politiit qinersinnaavaat. Taamaalillutik assersuutigalugu tv-kkut nakkutiginninnermik tigusinnaanngornissamut paasissutissanik pissarsinissaq siunertaralugu, it-mik sullissinnermik tuniniaasumut imaluunniit isumannaallisaanermik suliaqarnermik ingerlatsivimmut, tv-kkut nakkutiginninnermik piviusumik atuisinnaasumut toqqaannartumik saaffiginninnissaq politiit qinersinnaavaat, matumani tv-kkut nakkutiginninnermik tigussaasumik imaluunniit elektroniskiusumik atuisinnaasut ilanngullugit.

Pissutsit erseqqinnerusut apeqquataatillugit, tamanna ilaatigut politiit ininut isersinnaanerat, tassangaanniit tv-kkut nakkutiginninnerup iserfigineqarsinnaassalluni, atortussanik, tv-kkut nakkutiginninnermi atorineqartunik, politiit atuisinnaatitaanerat, aamma politiit tv-kkut nakkutiginninnermut politiit atortuisa ikkunneqarsinnaanerisa akuerineqarnerat ilaatinneqarsinnaapput, matumani avataaniit isersinnaaneq ilanngullugu. Atortussanik atuinerup utertillugu tunniunneqannginnerani, tv-kkut nakkutiginninnermi, atortussanik tiguneqartunit politiit tv-kkut nakkutiginninnermik tigusinerisa nalaanni pisuni, immiussat nungutinneqarnissaannut politiinik ikiuineq aamma tassani ilaatinneqarsinnaassaaq.

Paasissutissanik suliarinnittoq, nakkutiginninnermut atortut tikiqqarsinnaanissaanut ikiorneqarnissaq siunertaralugu politiit saaffiginniffigisaat, inunnik paasissutissanik suliarinnittarneq pillugu inatsimmi §§ 41 aamma 42 malillugit paasissutissanik akisussaasumit ilitsersuunneqarani imaluunniit akuerineqaaqqaarani akuerisaasumik politiinut ikiuussinnaanera, tamatuma aamma kingunerissavaa.

Inunnik paasissutissanik suliarinnittarneq pillugu inatsit peqqussutikkut nr. 1238-ikkut, 14. oktober 2016-imeersukkut Kalaallit Nunaannut atuutilersinneqarmat maluginiarneqassaaq.

Inuup tv-kkut nakkutiginninnermik atuisinnaasup, sapinngisamik politiit tv-kkut nakkutiginninnermik tigusinissaanik ilisimatinneqannginnissaa pisariaqartinneqarpat, politiit imm. 5-itut siunnersuutigineqartoq malillugu ingerlatsisariaqanngillat, kisianni ataani imm. 7-itut siunnersuutigineqartoq pillugu allaaserisat malillugit nammineerlutik pissaaneq atorlugu tv-kkut nakkutiginninnermik tigusinnaassallutik.

Akuerisaasumik pissutissaqarani imm. 5-imi oqaaseqatigiit siulliit malillugit ikiuunnissamik ilaginnaasumut, imm. 5-imi *oqaaseqatigiit aappaat* malillugu, eqqartuussisarnermik inatsimmi § 150 malillugu pinngitsaaliissutit atorneqassapput.

Eqqartuussiviup imm. 3 malillugu imaluunniit politiit imm. 4 malillugu politiit tv-kkut nakkutiginninnermik tigusinissaat pillugu aalajangiinerup aallartinneqarnissaanut ikiuunnissaq tv-kkut nakkutiginninnermik atuisinnaasup ilaginnarpagu, pinngitsaaliissutit, eqqartuussisarnermik inatsimmi § 150-imi takuneqarsinnaasut, pineqartumut eqqartuussiviup atorsinnaassagai, siunnersuutip kinguneraa. Assersuutigalugu eqqartuussisarnermik inatsimmi § 150, imm. 1, nr. 1 malillugu pineqartoq akiliisitsissummik eqqartuussiviup akiligassissinnaavaa.

Imm. 6-imi oqaaseqatigiittut siullertut siunnersuutigineqartoq malillugu, nipangiussisussaataaneramik peqqussuteqarneq pillugu eqqartuussisarnermik inatsimmi § 161 politiit tv-kkut nakkutiginninnermik tigusineranni taamatutaaq atuutissaaq.

Eqqartuussiviup imaluunniit politiit, inuup, taassumap tv-kkut nakkutiginninneramik tigusiffigineqartup, naalagaaffinnut takornartanut, naalagaaffiup isumannaatsuunissaanut imaluunniit ilungersunartunik pinerluttuliornerit pillugit qajassuussassat tamanna pissutissaqartippassuk, taassuma suliaq pillugu ilisimaasai pillugit nipangiussisussaataaneramik peqquneqarsinnaanera, eqqartuussisarnermik inatsimmi § 161-imut innersuussinerup kinguneraa.

Eqqartuussisarnermik inatsimmi § 161 malillugu, kingusinnerpaamik suliap naammassinerani nipangiussisussaaneramik peqqussut atorunnaassaaq.

Eqqartuussisarnermik inatsimmi § 161, imm. 3 malillugu nipangiussisussaataaneramik peqqussummik unioqqutitsinermi pinerluttulerinermi inatsit malillugu pineqaatissiisoqarsinnaavoq.

Peqqussut inuussutissarsiornermik suliffeqarfimmut nalunaarutigineqarpat, § 400 c, imm. 6-imi *oqaaseqatigiit aappaat* malillugu allanut, suliffeqarfimmut atassuteqarnertik pissutigalugu suliamik ilisimasaqalersimasunut, eqqartuussisarnermik inatsimmi § 161 taamatutaaq atuutissaaq.

Suliffeqarfik § 161-p malitsigisaanik nipangiussisussaataaneramik aamma peqquneqarsimappat, assersuutigalugu sulisunut siulersuisunilu ilaasortanut tunngatillugu § 161 atorneqarsinnaassasoq, tamatuma kinguneraa. Kisianni inunnut, nalaatsornerusumik suliaq pillugu ilisimasaqalersimasut, matumani assersuutigalugu sullitanut, pisiortorfinnut imaluunniit pulaartunut, atorneqarsinnaanaviangilaq.

Imm. 7-itut siunnersuutigineqartoq malillugu politiit pissaaneq atorlugu tv-kkut nakkutiginninneq tigusinnaassavaat, matumani ininut, tv-kkut nakkutiginninnermik tigusiffiusinnaasumut, iserneq ilanngullugu.

Imm. 5 malillugu politiit siumut ingerlatsinerisa aamma tv-kkut tigusinissamut ikiorneqarnissamut noqqaassuteqarnerisa saniatigut, aamma nammineerlutik tv-kkut nakkutiginninnermik tigusisinnaanerit tamatuma kingunerissavaa, matumani pisariaqartinneqartumik pissaanermik atuineq ilanngullugu.

Politiit pissaanermik atuinerat taamaappat politiit pillugit inatsimmi kapitali 4-mi malittarisassat naapertorlugit pisussaassaaq, taannalu peqqussutikkut nr. 1320-ikkut, 23. september 2022-imeersukkut Kalaallit Nunaannut atuutilersinneqarpoq. Taamaalilluni politiit pissaanermik atuinerat pisariartuusimassaaq aamma illersorneqarsinnaasussalluni, aamma taamaallaat sakkussat atorlugit aamma ima annertussusilerlugit, soqutigisamut politiit pillugit inatsimmi § 16 malillugu illersorniagaannut naleqquttumik atassuteqassalluni. Pissaanermik atuinerup avataaniittunik ajoqusiisinnaanerit aarlerinaateqarnerisooq illersorneqarsinnaanerit naliliinermik ilaatinneqartussaasaaq, aamma pissaaneq, pissutsit ajornartingippassuk, ima qajassuussitigaluni atorneqassalluni, taamaalilluni ajoqusiisinnaanerit minnerpaaffissaminnut killilerneqarsinnaassallutik.

Imm. 3 malillugu eqqartuussiviup imaluunniit imm. 4 malillugu politiit, sumiiffimmi politiit tv-kkut nakkutiginninnissaanik aalajangiisimatillugit, taamaalillunik politiit pisariaqarpat sumiiffimmi pineqartumi pisariaqarpat pissaaneq atorlugu tv-kkut nakkutiginninneq tigusinnaavaat. Matumani politiit ininut, taakkunanga tv-kkut nakkutiginninneq tiguneqarsinnaalluni, isersinnaasussaassapput.

Pisuni politiit imm. 5-itut siunnersuutigineqartoq malillugu tv-kkut nakkutiginninnermik atuisinaasooq tv-kkut nakkutiginnermik tigusinissami ikiueqqullugu asuliinnaq noqqaaviginnissimaneranni, imm. 7-itut siunnersuutigineqartoq siullertut tunngassuteqarpoq. Pineqartup politiinik ikiuunnissani itigartitsissutigippagu, pineqartoq akinngippat, aamma pineqartoq akuliunnerup pingaarutaanut naleqqiullugu piffissami naleqquttumi akinngippat, aamma politiinut ikiuutigineqartoq naammattuussanngippat, tamanna atuutissaaq.

Pinerluttoqarsimaneranik paasiniaanerup imaluunniit politiit pinerluttoqarsimaneranik paasiniaanerminni periaasaat pillugit paasissutissat isertuussaasut imaluunniit pissutsit allat pissutigalugit qajassuussinissat, inuup tv-kkut nakkutiginninnermik atuisinnaasup, sapingisamik politiit tv-kkut nakkutiginninnermik tigusinissaat pillugu

ilisimasaqalinnginnissaata pissutissaqartippagu, pisuni politiit taamaatut ikiorneqarnissamik toqqaannginneranni, imm. 7-itut siunnersuutigineqartoq aappaattut tunngassuteqarpoq.

Aalajangersagassatut siunnersuutigineqartoq malillugu pissaaneq atorlugu tigusineq, sumiiffimmi tv-kkut nakkutiginninnermtu atortut sumiiffigisaanni pisinnaassaaq, aamma tassunga atatillugu politiit ininut attuumassuteqartunut pisariaqartinneqartumik annertussusilimmik isersinnaassapput. Pissutsit teknisiusumillu periarfissat erseqqinnerusut apeqqutaatillugit, pissaaneq atorlugu tigusinermi ilaatigut politiit tv-kkut nakkutiginninnermik atortussanik atuinerat, atortussanik taamaattunik akuliunnerat, matumani politiit atortussaataannut ikkussineriti, aamma tv-kkut nakkutiginninnermut atortussanut avataanit tikissutissanik pilersitsineq ilaatinneqarsinnaassapput.

Imm. 7-tut siunnersuutigineqartoq malillugu politiit pissaaneq atorlugu tv-kkut nakkutiginninnermik tigusippata, tamanna politiit pillugit inatsimmi § 16, imm. 2 malillugu pissutsit ajornartinnngippassuk, taaneqareersutut qajassuussilluni pissaaq. Taamaalilluni tigusineq annikinnerpaamik ajoqusiilluni, assersuutigalugu atortussanut aqqutinullu aamma inummi tv-kkut nakkutiginninnermik atuisinnaasumi ingerlatsinerup nalinginnaasup minnerpaamik akornuserneqarneratigut pissaaq.

Imm. 8-tut siunnersuutigineqartoq malillugu eqqratuussisarnermik inatsimmi §§ 392-imi aamma 398-imi malittarisassat tv-kkut nakkutiginninnermik tigusinermi taamatuttaaq atuutissapput.

Eqqartuussiviup § 400 c, imm. 3 imaluunniit 4 malillugu aalajangiisinnani, akuliunnermut tunngassuteqartumut illersuisumik ivertitsissasoq, aamma § 392, imm. 1 malillugu illersuisoq oqaaseqaateqarsinnaasoq, eqqartuussisarnermik inatsimmi § 392-imut innersuussinerup kinguneraa.

Naalagaaffiup namminersortuuneranut aamma isumannaatsuuneranut pinerluttuliornernik aamma naalagaaffiup inatsit tunngavisoq malillugu aaqqissuussineranut aamma naalagaaffimmi oqartussaasut qullersaannut, pinerliinianernut il.il. piaaraluni pinerluttulerinermi inatsimmi kapitali 7-imi 8-miluunniit aalajangersakkanik unioqqutitsinerit pillugit pinerluttoqarsimaneratnik paasiniaaneq tunngassuteqarpat, suliaq Nunatsinni Eqqartuussivimmit suliarineqassaaq, aamma illersuisoq § 392, imm. 4 malillugu illersuisunit immikkut ittunit ivertinneqassaaq.

Sumiiffimmi pineqartumi politiit tv-kkut nakkutiginninneq tiguppasuk, sumiiffimmi akuliunnermut tunngassuteqartussanut tv-kkut nakkutiginninnermik atuisinnaasunut, aamma politiit tv-kkut nakkutiginninnermit sammineqaratarsinnaasunut soqutigisaannik illersuisoq suliaqartussaassaaq.

Illersuisup eqqartuussinernut qaaqquneqarnissaa aamma peqataanissaa aamma politiit suliami atortussaataannik takunnissinnaatitaanissaa pillugu eqqartuussisarnermik inatsimmi § 392, imm. 2 malittarisassanik imaqarpoq. Paasissutissanik tigusaminik illersuisoq allanut ingerlatitseqqissinnaanngilaq aamma politiit akuersiteqqaarnagit akuliunnermut sammineqartunut atassuteqarsinnaanngilaq.

Eqqartuussiarnermik inatsimmi § 392, imm. 3 malillugu, illersuisup ivertitap suliap suliarineqarnerata nalaanit kingusinnerunngitsumik pasineqartumut kimulluunniit illersuisutut atuussinnaannginera, eqqartuussiviup aalajangersinnaavaa.

Akuliunnermit atortussanit politiit ilisimalersimasaasa nungutinneqarnissaat pillugit eqqartuussisarnermik inatsimmi § 398 tunngassuteqarpoq.

Kimulluunniit pasilliut saqqummiunneqanngippat, imm. 1 malillugu sumiffimmi politiit tv-kkut nakkutiginninnermik tigusiffigisaanni piffissami immiussinerit tv-kkullu nakkutiginninnermit oqaluttuareqqiinerit allat, inatsimmik inioqqutitsinermi, tv-kkut nakkutiginninnermik tigusinermi tunngavilersuutaasumi, aallaaviatigut nungutinneqassapput. Nungutitsineq pereersimappat, § 392, imm. 1 malillugu, § 400 c, imm. 8 malillugu akuliunnermut tunngassuteqartumut illersuisuusooq ivertinneqarsimasooq, politiit nalunaarfigisussaassavaat.

Atortussat pinerluttoqarsimaneranik paasiniaanermut tunngasumik suli pingaaruteqarpata, nungutitsineq pinngitsoortinneqarsinnaavoq imaluunniit piffissami erseqqinnerusumik aalajangerneqartumi kinguartinneqarsinnaalluni. Tamanna pillugu apeqqut politiit eqqartuussivimmuut saqqummiutissavaat, eqqartuussiviullu aalajangiisoqartinnagu illersuisooq ivertitaq oqaaseqaateqarnissaanik periarfississavaa. Naalagaaffiup nammimnersortuuneranut aamma isumannaatsuunissaanut aamma inatsit tunngaviusooq malillugu aqqissuussineranut aamma naalagaaffiup oqartussaasuisa qullersaannut pinerluttuliornerit, pinerliiniarnerit il.il. pillugit pinerluttulerinermi inatsimmi §§ 23-imiit 35 ilanngullugu unioqqutitsinerit pillugit pinerluttoqarsimaneranik paasiniaanermut atatillugu atortussat pissarsiarineqarsimappata, eqqartuussivimmuut saqqummiussineq aamma illorsuisumik ivertitamik tusarniaaneq taamaattoq pisussaannngillat.

Atortussat, tv-kkut nakkutiginninnermik tigusinermit pissarsiarineqartut, aamma pinerluttoqarsimaneranik paasiniaanermut pingaaruteqanngitsutut paasineqartut, politiit aammattaq nungutittariaqassavaat.

Imm. 9-mi oqaaseqatigiit siulliit malillugit, imm. 1 malillugu akuliunnerup suliarineqareersup kingorna, akuliunneq pillugu eqqartuussisarnermik inatsimmi § 396, imm. 1, 3 aamma 4 malillugit nalunaarutiginnittoqartussaassaaq.

Eqqartuussisarnermik inatsimmi § 396, imm. 1-imut innersuussineq malillugu, akuliunneq naammassisimappat, inuk tv-kkut nakkutiginninnermik, tigueqarsimasumik, atuisinnaasoq, aallaaviatigut akuliunneq pillugu nalunaarfigineqassasoq, tamatuma kinguneraa.

Kisianni, piffissami politiit tv-kkut nakkutiginninnermik tigusiffigisaanni, inunnt tv-kkiut nakkutiginninnermik sammineqarsimasunut, aalajangersagassatut siunnersuutigineqartoq malillugu nalunaaruteqartoqassanngilaq.

Inummut tv-kkut nakkutiginninnermik tigueqarsimasumik atuisinnaasumut nalunaarutiginninneq, eqqartuussisarnermik inatsimmi § 396, imm. 3-mut innersuussineq malillugu, imm. 3-tut siunnersuutigineqartoq malillugu sioqqutsisumik aalajangiineq pillugu imaluunniit politiit aalajangiinerat pillugu tulliusumik aalajangiineq pillugu imm. 4-tut siunnersuutigineqartoq malillugu eqqartuussivimmit aalajangiisimasumit, nalunaarutiginninneq tunniunneqartussaasimassaaq. Tamanna pillugu ataani allaaserineqartut malillugit, politiit piffissap, akuliunnerup suliarineqarfissaatut akuerineqartup naanerani kingusinnerpaamik ullut 14-it kingorna nalunaaruteqannginnissamik imaluunniit nalunaaruteqarnissap kinguartinneqarnissaa pillugu noqqaassuteqarsimanngippata, nalunaarutiginninneq piaarnerpaamik tunniunneqartussaasimassaaq. Nalunaarutiginninnerup assilillugu sananeqarnera illersuisumut, § 392, imm. 1 malillugu, § 400 c, imm. 8 malillugu akuliunnermut tunngassuteqartumut illersuisumut ivertinneqarsimasumut, nassiunneqartussaasimassaaq.

Taamaattoq nalunaarutiginninneq pinerluttoqarsimaneranik paasiniaanermut ajoqutaassappat imaluunniit suliami allami ingerlasumi pinerluttoqarsimaneranik paasiniaanermut, inatsit malillugu tv-kkut nakkutiginninnermik tigusinissamut tunngaviliisumut, ajoqutaassappat, imaluunniit eqqartuussisarnermik inatsimmi § 396, imm. 4-mut (inatsisissatut siunnersuummi § 1, nr. 25-itut oqaasertaliorneqartumut) innersuussineq malillugu politiit noqqaassuteqarnerisigut, nalunaarutiginninneq pinngitsoortinneqarsinnaasoq imaluunniit piffissami erseqqinnerusumik aalajangerneqartumi kinguartinneqarsinnaasoq, eqqartuussiviup aalajangersinnaassavaa. Eqqartuussivik nalunaarutiginninnermik pinngitsoortitsinissaq imaluunniit kinguartitsinissaq pillugu aalajangiitinnagu, illersuisoq, § 392, imm. 1 malillugu, § 400 c, imm. 8 malillugu inummut akuliunnermut tunngassuteqartumut, illersuisutut ivertinneqarsimasoq, oqaseqarsinnaatitaasussaassaaq.

Imm. 9-mi *oqaaseqatigiit aappaattut* siunnersuutigineqartoq malillugu, nalunaarutiginninneq inummut tv-kkut nakkutiginninnermik, tigueqarsimasumik, atuisinnaasumut tunniunneqartussaasimassaaq.

Aammattaaq inatsisissatut siunnersuummi nalinginnaasumik oqaaseqaatini imm. 2.9.2 innersuussutigineqarpoq.

Nr. 29-imut (§ 420, imm. 3-mi oqaaseqatigiit pingajuannut, § 423, imm. 1-imi oqaaseqatigiit pingajuannut, aamma § 424-imi oqaaseqatigiinnut siullernut aamma pingajuannut)

§ 420-mi tunniussisussaataitanermut piumasaaqatit taaneqarput, § 423 arsaarinnissutiginninnerup aamma tunniussisussaataitanerup naammassineranut tunngavoq, aamma § 424 inuiat ataasiakkaat arsaarinnissinnaanerannik tunngavoq.

§ 420, imm. 3-mi oqaaseqatigiit pingajuanni, § 423, imm. 1-imi oqaaseqatigiit pingajuanni, aamma § 424, 1-imi oqaaseqatigiit pingajuanni innersuussineq § 422, imm. 3-miit § 422, imm. 4-mut innersuussinermut allangortinneqassasoq siunnersuutigineqarpoq.

§ 422-imi nutaatut imm. 3-mik ilanngussisoqarnissaanik siunnersuutip siunnersuut kinguneraa, tamatumuunalu § 422, imm. 3 atuuttoq, § 422, imm. 4-nngussaaq (inatsisissatut siunnersuummi § 1, nr. 31).

Nr. 31-mut (§ 420, imm. 3-mi oqaaseqatigiit pingajuannut, aamma § 423, imm. 3-mi oqaaseqatigiit aappaannut)

§ 420-mi tunniussisussaataitanermut piumasaaqatit taaneqarput, aamma § 423 arsaarinnississuteqarnissap tunniussisussaataitanissallu naammassineqarnissaanut tunngavoq.

§ 420, imm. 3-mi oqaaseqatigiit pingajuanni, aamma § 423, imm. 3-mi oqaaseqatigiit aappaanni innersuussinerit § 422, imm. 5-imiit § 422, imm. 7-imut innersuussinermut allangortinneqarnissaat siunnersuutigineqarpoq.

§ 422-imi nutaatut imm. 3-mik aamma nutaatut imm. 6-imik ilanngussisoqarnissaanik siunnersuuteqarnerup siunnersuut kingunera, tamatumuunalu § 422, imm. 5 atuuttoq, § 422, imm. 7-inngussaaq (inatsisissatut siunnersuummi § 1, nr. *).

Nr. *-imut (§ 422, imm. 3-mut)

Eqqartuussisarnermik inatsimmi § 422, imm. 2 malillugu, tunniussisussaataitanermik peqqussuteqarnissaaq pillugu eqqartuussivik aalajangiisinnaavoq, imaappoq takussutissiat aamma tigussaasut allat pinerluttulerinermik suliap naammassineqarnissaanut pingaaruteqartut tunniunneqarnissaat imaluunniit takutinneqarnissaat pillugit eqqartuussivik

aalajangiisinnaavoq. Pisuni nukinginnartuni § 422, imm. 3 malillugu politiit tunniussisussaataaneq pillugu, tulliusumillu aalajangiinerup eqqartuussivimmi misilinneqarnissaa pillugu, aalajangiisinnaapput.

Eqqartuussisarnermik inatsimmi § 422-imi nutaamik *imm. 3-mik* ilanngussisoqarnissaa siunnersuutigineqarpoq, tamatumalu kingornatigut tunniussisussaataaneq pillugu eqqartuussiviup aalajangiinermini, inunnit suliffeqarfinnillu, aningaasatigut peqquserluutunik malunnarunnaarsaasarneq pillugu inatsimmi § 1-imi ilaatinneqartunit, kontomit nuussinerit, tassunga nuussinikkut tunniussisussaataanermik aalajangiinermi ilatinneqartumi, aningaasaatinik nuussisoqarsimalluni, imaluunniit nuussinikkut, nuussinermit tunniussisussaataaneq pillugu aalajangiinermi ilaatinneqartumit (»nuussineq pillugu aalajangiineq«-kkut) ilaatinneqartumit nuussinerit pillugit politiit paasissutissanik pissarsiniarsinnaanerannik piginnaatissinnaavaat.

Aningaasanik malunnarunnaarsaasarneq pillugu inatsit kunnigip peqqussutaatigut nr. 956-ikkut, 17. maj 2021-imeersukkut Kalaallit Nunaannut atuutilersinneqarmat, aamma suliassaqarfinnut tiguneqarsimannigitsunut atuummat, tamatumalu peqatigisaanik Aningaasanik peqquserluutunik malunnarunnaarsaasarneq pillugu Inatsisartut inatsisaat suliassaqarfinnut tiguneqarsimasunut atuummat, maluginiarneqassaaq.

Kontomi, nussinikkut, tunniussisussaataaneq pillugu aalajangiinermi ilaatinneqartumi aningaasaatinik nuussiffigineqarsimasumi, imaluunniit nuussinikkut tunniussisussaataanermik aalajangiinermi ilaatinneqartumit aallaaveqartumit nuussinermit, eqqartuussiviup tunniussisussaataanermik pillugu taamatut aalajangiinissaanut, tunniussisussaataanermut piumasaqaatit nalinginnaasut naammassineqarsimassapput. Taamaalilluni inatsimmik unioqqutitsineq, unnerluussisussaataasunit eqqunngitsuliorfigineqartoq peqataatinnagu ingerlanneqartoq pineqassaaq, aamma tunniussisussaataanermik peqqussuteqarnermi tigussaasup pineqartup uppernarsaatit atorneqarsinnaanera tunngavissaqartutut isumaqarfigineqartoq, arsaarinnissutigineqartariaqartoq imaluunniit inatsisip unioqqutinneqarnerani arlaannit arsaarinnissutaasimasooq, eqqartuussisarnermik inatsimmi § 420, imm. 1 (allanngortinneqannginnissaa siunnersuutigineqartoq) malillugu utertillugu piumasarineqarsinnaasooq, pineqassaaq. Eqqartuussisarnermik inatsimmi § 422, imm. 3-tut aalajangersagassaatus siunnersuutigineqartup, taamaalilluni suleriaaseq piumasarineqartoq taamaallaat piuminarnerulersissavaa, taamaalillutik politiit nuussinerit, nuussinermit tunniussisussaataaneq pillugu aalajangiinermi ilaatinneqartumit aallaaveqartut, pillugit taamaallaat aalajangiineq ataqaseq pissarsiarissavaat.

Aningaasatigut peqquserluutunik malunnarunnaarsaasarneq pillugu inatsimmi § 1-imi ilaatinneqartunit, kontomit nuussinerit, tassunga nuussinikkut, tunniussisussaataanermik

aalajangiinermi ilaatinneqartumi nuussisoqarsoqarsimalluni, imaluunniit nuussinikkut, tunniussisussaataaneq pillugu aalajangiinermi ilaasumit nuussinermiit aallaaveqartumit, paasissutissat tunniunneqarnissaat pillugit »nuussineq pillugu aalajangiineq« inunnit suliffeqarfinnullu politiit nalunaaruteqarsinnaanerit periarfississavaa. Taamaalillutik politiit »nuussineq pillugu aalajangiineq«-kkut kontoni arlalinni nuussinert malinnaaffigisinnaanngussavaat, matumani aningaaserivinni il.il., eqqartuussivimmit nutaamik aalajangiinermik pissarsiniaqqaaratik, kontot inunnit inatsisitigullu pisinnatitaasunit pisussaataitaasunillu assigiinngitsunit pigineqartuni ingerlatsinernik politiit malinnaasinnaalissapput.

Kontomi nuussinert, tassunga tunniussisussaataaneq pillugu aalajangiinermi ilaatinneqartumi *nuussinikkut* aningaasaatinik nuussisoqarsimalluni, imaluunniit nuussinikkut, tunniussisussaataaneq pillugu aalajangiinermi ilaatinneqartumi aallaveqartumit nuussinermiit paasissutissanik tunniussisoqarnissaata nalunaarutigineqarnissaa pillugu peqqussuteqarnissamik »nuussineq pillugu aalajangiineq«-rup politiit periarfississavai.

Pisumi kontomit (imaluunniit kontoni ataatsimit), tunniussisussaataaneq pillugu aalajangiinermi pineqartumit (konto nr. 1-i), aningaasat toqqaannartumik kontomut allamut (konto nr. 2-mut) nuunneqarnerat, periarfissami siullermi isiginiarneqarpoq. Politiit eqqartuussiviup nutaamik aalajangiinissaa pissarsiariniaaqqaarnagu konto nr. 2-mi nuussinert pillugit paasissutissanik pissarsiniarsinnaanerit, siunnersuutip kinguneraa. Tunniussisussaataanermit piumasaqaatit nalinginnaasut naammassineqarsimanissaat piumasaqaataqavoq, matumani tigussaasup pineqartup uppernarsaatitut atorneqarsinnaanera tunngavissaqartutut isumaqarfigineqartoq, arsaarinnissutigineqartariaqartoq imaluunniit inatsisip unioqputinneqarnerani arlaannit arsaarinnissutaasimasoq, utertillugu piumasarineqarsinnaasooq ilanngullugit. Ataani oqaaseqatigiit arferngattut aamma arfineq aappaattut siunnersuutigineqartut pillugit aallaaserineqartut malillugit, politiit tulliuuttumik taamatut isumaqartoqarnera pillugu tunngavigisat pillugit eqqartuussivik nalunaaruteqarfigisussaassavaat.

Nuussinikkut, nuussinermiit tunniussisussaataaneq pillugu aalajangiinermi ilaatinneqartumit aallaaveqartumit, aningaasaatinik nuussineq – tulliuuttumik aningaasaatinik aallaqqaataqani pigineqartunit kontomit (imaluunnit kontoni ataatsimit), tunniussisussaataaneq pillugu aalajangiinermi pineqartumit (konto nr. 1-i), konto nr. 2-mit kontonut allanut (nr. 3-mut, 4-mut, 5-imut il.il.) – nuunneqarneranni pisuni periarfissami allami tassani isiginiarneqarput. Eqqartuussivimmit aalajangiinermik nutaamik pissarsiniaqqaaratikk politiit kontomi nr. 3-mi, 4-imi, 5-imi il.il. nuussinert pillugit paasissutissanik pissarsiniarsinnaanerit, siunnersuutip kinguneraa. Uiguleriiaat arlallit aqputigalugit nuussinernut tamanna aamma atuuuppoq. Tunniussisussaataanermit

piumasaqaatit nalinginnaasut naammassineqarsimanissaat aamma uani piumasaqaataavoq, aamma tulliusumik kontomut tunniussisussaataitanermik peqqussuteqarnerannut pineqartumut, aningaasaatinik, aallaqqaataani kontomit pigineqartumit (imaluunnit kontoni ataatsimit) tunniussisussaataaneq pillugu aalajangiinermi pineqartumit (konto nr. 1-imit) aningaasaatinik nuussisoqarsimaneq pillugu tunngavissalimmik isumaqartoqarnera pillugu politiit tulliuullugu eqqartuussivik nalunaaruteqarfigisussaassavaat.

Aalajangersagassatut siunnersuutigineqartumi isumaq malillugu nuussinerup, tunniussisussaataaneq pillugu aalajangiinermi ilaatinneqartup, sugaluartulluunniit »aallaaveqarneranut« ingammik nuussinerit uiguleriaarneranni nuussinerit ataasiakkaat akornanni piffissaq eqqarsaatigalugu qanittumik ataqatigiittoqarnera, imaluunniit nuussinerit akornanni ineriartornernik erseqqissunik ersertoqarnera apeqqutaassaaq, assersuutigalugu nuussinerit assigeeqqissaat amerlasuut naammassineqarlutik, imaluunniit ingerlaarfiit assigiit aqqugitalugit nuussinerit suliarineqarlutik. Kisianni nuussinerit ataasiakkaat akornanni aningaasatigut naapertuuttoqarnera immini pingaaruteqarnaviangilaq.

Assersuutitut taaneqarsinnaapput 1 mio. kr.-it konto nr. 1-imit konto nr. 2-mut (inummit taqassuminnga pigineqartumut imaluunniit inummut allamut aningaaserivimmi tassani imaluunniit aningaaserivimmi allamiittumut) nuunneqarpata, tulliuullugulu kontomit 2-mit kontomut 3-mut 500.000 kr.-inik nuussineq pissutsit assigiinngitsut apeqqutaallutik, nuussinermit siullermit »aallaveqarsinnaapput«, aamma tulliuullugu konto nr. 3-mit konto nr. 4-mut assersuutigalugu 300.000 kr.-inik nuussisoqarpat, tamanna aamma atuuppoq. Assersuutitut allattut taaneqarsinnaapput konto nr. 1-imit 500.000 kr.-it konto nr. 2-mut aamma 500.000 kr.-it konto nr. 3-mut nuunneqartut, tamatumalu kingorna aningaasat taakku – taama pisoqassappat suli agguaqinneqarlutik aamma/imaluunniit akunnermuliuttut arlallit aqusaarlugit – konto nr. x-imut nuunneqartut. Pissutsit assigiinngitsut pissutigalugit assersuutigalugu tulliuullugu 1 mio. kr.-inik konto nr. x-imiit konto nr. y-mut nuussineq, nuussinernit siullernit marluusunit »aallaveqarsinnaapput«.

Pisuni ataasiakkaani tamani taamaallat kontomi nuussinernit, tunniussisussaataaneq pillugu aalajangiinermi ilaatinneqartumit nuussinikkut aningaasanik nuussiffiusoq, imaluunniit nuussinermit, eqqartuussiviup aalajangiinerani nuussinernut ilaatinneqartoq pillugu paasissutissanik noqqaasoqarnissaa politiit nakkutigissussaassavaat, aamma taaneqareersutut taamaamat oqaaseqatigiit arferngattut arfineq aappaattullu siunnersuutigineqartut malillugit tulliusumik eqqartuussivimmut nalunaarutiginninnermi nassuiartussaassallugit.

»Nuussineq pillugu aalajangiineq«-mit periarfissaliissuteqarlutik politiit aammattaq nuussinerit, kontomut pineqartumut suliarineqarsimasut pineqartillugit, taakkulu

aallaqaataani kontomit (imaluunniit kontoni ataatsimit), tunniussisussaataaneq pillugu aalajangiinermi pineqartumit, kontomut suugaluartumilluunniit nuussinerit pillugit taamaallaat paasissutissanik tunniussinissamik peqqussuteqarsinnaassapput.

§ 422, imm. 3-tut siunnersuutigineqartoq malillugu aalajangiinermi, *oqaaseqatigiit aappaattut* siunnersuutigineqartoq malillugu piffissap iluani sorlermi paasissutissanik pissarsiniarnissap pinissaa, aalajangerneqarpoq. Piffissaq atorneqartussaq sapinngisamik sivikinnerpaassaaq, aamma *oqaaseqatigiit pingajuat* malillugu sapaatit akunneri 4 qaangissanngilai. Taamaattoq eqqartuussiviup piffissaq sivitsorsinnaavaa, kisianni *oqaaseqatigiit sisamaat* malillugu annerpaamik sapaatit akunneri 4-kkaarlugit. Siviutsuineq *oqaaseqatigiit* tallimaat malillugu aalajangiinikkut, tunngavilersorneqartussakkut, pissaaq.

Oqaaseqatigiit arferngattut aamma arfineq aappaattut siunnersuutigineqartut malitsigisaannik, paasissutissanik pissarsiniarnissamut piffissaliussap naanerata kingorna, politiit piarnerpaamik nuussinerit taakku, politiit paasissutissanik pissarsiniarfigisimasaat, pillugit eqqartuussivik nalunaaruteqarfigissavaat. Nuussinerit nuussinermi, tunniussisussaataaneq pillugu aalajangiinermi ilaatinneqartumit aallaaveqarnerannut aalajangersimasumik pissutaasutut isuqarfigineqartut taaneqarnerarannik nalunaarutiginninneq imaqassaaq. Taaneqareersutut kontonut ataasiakkaanut tamanut, politiit aalajangiinermi periarfissaliissut atorlugu tunniussisussaataanermik peqqussuteqarfigisimasaannut, kontomut pineqartumut – tunniussisussaataanermik peqqussut pillugu piffissaliussaq sioqullugu – aningaasanik, kontomit (imaluunniit kontot taakku ilaannit ataatsimit) aallaqaataani pineqartumit, tunniussisussaataaneq pillugu aalajangiinermi sammineqartumit aallaveqartumit, nuussisoqarsimaneramik isumaqartoqarnera pillugu tunngaviit politiit eqqartuussivimmuut nalunaarutigissavaat. Tunniussisussaataanerit pillugit peqqussutit, »nuussineq pillugu aalajangiineq« periarfissaliissutigalugu politiit nalunalunaarutigisimasaat, ataasiakkaat pillugit tulliusumik politiit nalunaaruteqartussaanut tunngavigalugu, eqqartuussiviit nakkutiginnissaannut suli periarfissaqarnera matumuuna qulakkeerneqassaaq. Taamaattoq eqqartuussiviup nammineerluni ingerlatsinermigut tunniussisussaataanermik peqqussuteqarnerit ataasiakkaat systematiskiusumik misileqqissagaat, siunnersuutikkut anguniarneqanngilaq.

§ 420 malillugu tunniussisussaataaneq pillugu peqqussuteqarnissamik eqqartuussivikk aalajangiitinnagu, § 422, imm. 6 atuuttoq (imm. 8-nngortussaq, kisianni allanngortinneqartussatut siunnersuutigineqanngitsoq) malillugu, inummut tigussaasumik atuisinnaasumut, oqaaseqaateqarsinnaaneq tunniunneqassaaq.

Akiliinermi nuussinermi tassannga, nuussinerit aallaaveqartut,, malinneqarnissaasa periarfissaliissutigineqarnerat pæineqartillugu, taamaallaat aningaaserivik imaluunniit aningaasanik nuussineq pillugu suliffeqarfik il.il., tunniussisussaataaneq pillugu

aalajangiinermut erninnaarluni sammitinneqartoq, § 422, imm. 8 (imm. 6 atuuttoq) malillugu, oqaaseqarsinnaatitaassaaq. Taamaalilluni aningaaseriviit allat imaluunniit aningaasanik nuussineq pillugu suliffeqarfiit il.il. – taakkunani tunniussisussaataaneq pillugu aalajangiinermi ilaatinneqartumit, imaluunniit nuussinikkut, nuussinermi tunniussisussaataaneq pillugu aalajangiinermi ilaatinneqartumit, kontomut nuussinikkut nuussisoqarsimanera pissutigalugu – politiit tulliullugu paasissutissanik aallarfigisaat – »nuussineq pillugu aalajangiineq« periarfissaliissutigalugu politiit aningaaseriviup il.il. taamaattup tunniussisussaataanermik nalunaaruteqarnissaat sioqqullugu, oqaaseqarsinnaatitaassaapput. Aningaaserivik il.il. taamaattoq kisianni politiit peqqussuteqarnerat inatsisunik malinnersoq pillugu apeqqut, tamanna pillugu eqqartuussisarnermik inatsimmi § 341 nalinginnaasumik malittarisassaq malillugu, tamatigit eqqartuussivimmut saqqummiussinnaavaa.

Aammattaaq inatsisissatut siunnersuummi nalinginnaasumik oqaaseqaatini imm. 2.3.2 innersuussutigineqarpoq.

Nr. 32-mut (§ 422, imm. 6)

Inatsimmik unioqqutitsinermut pinerluttoqarsimaneranik paasinniaaffigineqartumut, unnerluussisussaataasunit eqqunngitsuliorfigineqartoq peqataatinnagu ingerlanneqartumut atatillugu, imaluunniit qanilleqqusinninneq, najugaqataasinnaannginneq aamma anisitsisarneq pillugu inatsimmi § 2, imm. 1, nr. 1-imi taaneqartutut innarliinerni, tigussaasoq suugaluartorluunniit, pineqartup atorsinnaasaa, uppersarsaatitut atorsinnaappat, arsaarinnissutigisariaqartoq, imaluunniit inatsisip unioqqutinneqarnerani arlaannit arsaarinnissutaasimasoq, utertillugu piumasarineqarsinnaasoq pillugu, inuk pasineqanngitsoq, tigussaasunik suugaluartunilluunniit takutitseqqullugu imaluunniit tunniusseqqullugu (tunniussisussaataaneq) peqquneqarsinnaasoq, eqqartuussisarnermik inatsimmi § 420, imm. 1-imi takuneqarsinnaavoq.

Arsaarinnissuteqarnissaq aamma tunniussisussaataaneq pillugu peqqussuteqarnissaq pillugu aalajangiineq, politiit noqqaassuteqarnerisigut eqqartuussivimmit aalajangerneqassasoq, eqqartuussisarnermik inatsimmi § 422, imm. 1-imi oqaaseqatigiit siulliit aamma imm. 21-mi oqaaseqatigiit siulliit malitsigaat. Imm. 2-mi oqaaseqatigiit aappaat malillugu eqqartuussiviup aalajangiinera tunngavilersorneqassaaq.

Nutaatut § 422, imm. 3-mik ilanngussisoqarnissaa inatsisissatut siunnersuummi § 1, nr. 31-kkut siunnersuutigineqarpoq, tamatumalu kingorna politiit tunniussisussaataaneq pillugu noqqaassuteqarnerisigut, politiit suliffeqarfinnit inunnillu, aningaasatigit peqquserluutinik malunnarunnaarsaaneq pillugu inatsisini § 1-imi ilaatinneqartunit, kontomi nuussinermi, tunniussisussaataaneq pillugu aalajangiinermi ilaatinneqartumi, tassunga nuussinikkut,

imaluunniit nuussinikkut, nuussinermiit tunniussisussaataaneq pillugu aalajangiinermi (nuussineq pillugu aalajangiinermi) ilaatinneqartumi, paasissutissanik pissarsiniarsinnaanerit, eqqartuussivup tunniussisussaataaneq pillugu aalajangiinermi aalajangersinnaavaa.

Tamatuma saniatigut, eqqartuussiviup aalajangiinissaata utaqqineqarnera pissutigalugu akuliunnerup siunertaa maangaannartinneqassappat, politiit arsaarinnissuteqarnissaq pillugu aamma tunniussisussaataaneq pillugu aalajangiisinnaasut, eqqartuussisarnermik inatsimmi § 422, imm. 3-mi oqaaseqatigiit siulliit (siunissami imm. 4-mi oqaaseqatigiit siulliit) malitsigaa. Akuliunnermut sammitinneqartoq tamanna pillugu noqqaassummik saqqummiussippat, piaarnerpaamik aamma kingusinnerpaamik nalunaaquttap akunneri 24-it pingasoriarlugit qaangiutsinnagit, politiit suliaq eqqartuussivimmu saqqummiutissavaat, eqqartuussiviullu § 422, imm. 3-mi oqaaseqatigiit aappaat (siunissami imm. 4-mi oqaaseqatigiit aappattut atuutilertussa) malillugu akuliunneq akuerineqarsinnaanersoq aalajangiiffigissavaa.

Eqqartuussisarnermik inatsimmi § 422-imi nutaamik *imm. 6-imi* ilanngussisoqarnissaa siunnersuutigineqarpoq.

Imm. 6-itut siunnersuutigineqartukut, suliffeqarfinnit inunnilluunniit, aningaasaanik peqquserluutunik malunnarunnaarsaaneq pinerliiniarnernillu aningaasalersuisarneq pinaveersimatinniarlugit iliuuserisassat pillugit inatsisimmi (kunngip peqqussutaatigut Kalaallit Nunaannut atuutilersinneqartumi) § 1, imm. 1, nr. 1-imiit 11 ilanngullugu imaluunniit 20-miit 24 ilanngullugu, imaluunniit Aningaasaanik peqquserluutunik malunnarunnaarsaaneq pinerliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1, imm. 1, nr. 1-imi aamma 2-mi ilaatinneqartunit, nuussinerit, kontot, toqqorsiviit imaluunniit assigisaat pillugit politiit paasissutissanik tunniussisussaataaneq pillugu peqqussuteqarsinnissamik aalajangiisinnaapput.

Suliffeqarfinnit aamma inunnit, Aningaasaanik peqquserluutunik malunnarunnaarsaasarneq pinerliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1-imi ilaatinneqartunit, pineqartut atorsinnaasaannit, kontomit nuussinerit, tassunga nuussinikkut, tunniussisussaataaneq pillugu aalajangiinermi ilaatinneqartumit, aningaasaanik nuussisoqarsimalluni, imaluunniit nuussinikkut, tunniussisussaataaneq pillugu aalajangiinermi ilaatinneqartumik aallaaveqartumit nuussisoqarsimalluni, paasissutissat pissarsiarineqarnissaat, tunniussisussaataaneq pillugu peqqussuteqarneq pillugu aalajangiinermi taamaattumi politiit aalajangersinnaagaat, siunnersuutip aammattaaq malitsigaa. Politiit aalajangiineri aallaganngorlugit suliarineqassasut, aamma tunngavilersuutunik ilaqartinneqassasut, aamma § 422, imm. 4-imi oqaaseqatigiit aappaat (massakkut imm. 3-mi oqaaseqaatigiit aappaasoq) malillugu taakku

eqqartuussivimmut saqqummiunneqarnissaat piumasaqaataasinnaasoq, naggataagut takuneqarsinnaavoq.

Aningaasanik peqquserluutininik malunnarunnaarsaasarneq pillugu inatsit peqqussutikkut nr. 956-ikkut, 17. maj 2021-imeersukkut Kalaallit Nunaannut atuutilersinneqarmat aamma suliassaqarfinnut tiguneqarsimanningsunut atuummat, tamatumalu peqatigisaanik aningaasanik peqquserluutininik malunnarunnaarsaasarneq pillugu Inatsisartut inatsisaat suliassaqarfinnut tiguneqarsimasunut atuummat, maluginiarneqassaaq.

Eqqartuussisarnermik inatsimmi nutaatut § 422, imm. 6-imik siunnersuuteqarnikkut, politiit tunniussisussaataaneq pillugu aalajangiinissamut periarfissaqalissapput, tamanna ullumikkut § 422, imm. 1 malillugu eqqartuussivimmit aalajangerneqartarpoq.

Inatsisissatut siunnersuummi nalinginnaasumik oqaaseqaatini imm. 2.3.1 malillugit, politiit aaqqissuussineq siunnersuutigineqartoq malillugu siumut isigisumik inatsisat atuutut malillugit piumasaqaatit assigisaat piumasaqaatigalugit tunniussisussaataaneq pillugu aalajangiisinnaaneq periarfissarilissavaat. Siumut isigisumik tunniussisussaataaneq pissarsiariniarlugu piumasaqaatit allangortinneqarnissaat siunnersuutikkut siunertarineqanngilaq. Soorlu inatsisat atuuttut taamaattut, aaqqissuussinikkut siunnersuutigineqartukkut politiitsiumut isigisumik piffissap ilaani tunniussisussaataanermik peqqussuteqarsinnaapput. Tamatuma kingorna, tassunga piumasaqaatit naammassineqarsimappata, politiit tunniussisussaataaneq pillugu nutaamik aalajangiisinnaapput.

Suliffeqarfinnit imaluunniit inunnit, aningaasatigut peqquserluutininik malunnarunnaarsaaneq pillugu inatsimmi § 1, imm. 1, nr. 1-imiit 11 ilanngullugu imaluunniit 20-imiit 24 ilanngullugu, imaluunniit aningaasanik peqquserluutininik malunnarunnaarsaasarneq pillugu Inatsisartut inatsisaanni § 1, imm. 1, nr. 1-mi aamma 2-mi ilaatinneqartunit, nuussinerit, kontot, toqqorsiviit, boksit imaluunniit assigisaat pillugit paasissutissanik tunniussisussaataaneq, aaqqissuussineq siunnersuutigineqartoq malillugu politiit piginnaatitaaneranni ilaatinneqarput.

Politiit paasissutissanik sorlernik pissarsisinnaanerisa annertusineqarnissaat siunnersuutip siunertarinngilaa, taamaallaalli sulisatsimik piuminarsaaneq siunertaralugu. Tunniussisussaataaneq pillugu peqqussuteqarnissap nalunaarutigineqarnissaanut, piumasaqaatit suut naammassineqarsimanissaannut allangortitsinissaq siunnersuutip aammattaaq siunertarinngilaa. § 422, imm. 3 (siunissami imm. 4-nngortussaq) malillugu ullumikkut tunniussisussaataanermik siunertaasutut, politiit aalajangiinerat taamaaqataanik eqqartuussivimmut saqqummiunneqarnissaat piumasaqaataasinnaassaaq.

Inatsisit atuuttut malillugit tunniussisussaataitanermit inuit kikkulluunniit ilaatinneqarput, matumani eqqartuussisarnermik inatsimmi § 420, imm. 1 malillugu inatsisigut pisinnaatitaasut pisussaataasullu, pasisaanngitsut.

§ 422, imm. 6-imi oqaaseqatigiit siullertigut, aaqqissuussinertut siunnersuutigineqartooq malillugu politiit piginnaatitaaneranni suliffeqarfinit imaluunniit inunnit, aningaasatigut peqquserluutinit malunnarunnaarsaaneq pillugu inatsimmi § 1, imm. 1, nr. 1-imiit 11 ilanngullugu imaluunniit 20-imiit 24 ilanngullugu, imaluunniit aningaasanik peqquserluutinit malunnarunnaarsaaneq pillugu Inatsisartut inatsisaanni § 1, imm. 1, nr. 1-mi aamma 2-mi ilaatinneqartunit, nuussinerit, kontot, toqqorsiviit, boksit imaluunniit assigisaat pillugit paasissutissanik tunniussisussaataaneq, ilaatinneqassasut siunnersuutigineqarpoq. Nuussineq pillugu aalajangiineq pillugu § 422, imm. 3-tut (inatsisissatut siunnersuummi § 1, nr. 31) siunnersuutigineqartumi killiliinerup atorineqartup tamatumaa assigaa, tassami aningaasanik peqquserluutinit malunnarunnaarsaaneq pinerliiniarnernilu aningaasalersuisarneq pinaveersimatinniarliarlugit iliuuserisassat pillugit inatsimmi (kunngip peqqussutaatigut Kalaallit Nunaannut atuutilersinneqartumi) § 1, imm. 1, nr. 14, 15 aamma 17 malillugit aamma aningaasanik peqquserluutinit malunnarunnaarsaaneq pinerliiniarnernilu aningaasalersuisarneq pinaveersimatinniarliarlugit iliuuserisassat pillugit Inatsisartut inatsisaanni § 1, imm. 1, nr. 3-miit 5 ilanngullugu malillugit, eqqartuussisuserisut, naatsorsuuserisut, illunik tuniniaasartut, siunnersuisartut allat aamma suliffeqarfinit sullissisut, tulliuuttuni erseqqinnerusumik allaaserinneq malillugu taammaattoq aallaaviatigut ilaatinneqassanngimmata. Aningaaseriviit, tigussaasumik sallunaveeqquteqarluni taarsigassarsisitsisarfiit, suliffeqarfiit aningaaserivunngitsut inuuniutigalugu imaluunniit ingerlatsinerminni pingaartut ilaatillugu aningaasanik pigisanilluunniit allanik uteritassanik tiguisartut aamma aningaasanik elektroniskiusunik atortuulersitsisartut, aamma aningaasanik peqquserluutinit malunnarunnaarsaaneq pinerliiniarnernilu aningaasalersuisarneq pinaveersimatinniarliarlugit iliuuserisassat pillugit inatsimmi (kunngip peqqussutaatigut Kalaallit Nunaannut atuutilersinneqartumi) § 1, imm. 1, nr. 1, 2, 5 aamma 6 malillugit, akiliinerit pillugit inatsimmi ilanngussa 1-imi, nr. 1-imiit 7 ilanngullugu akiliinissamat sullissivinnik tuniniaasut ilaatinneqartut assersuutigalugu ilaatinneqassapput.

Taamaalilluni aaqqissuussinertut siunnersuutigineqartumi inuit kikkulluunniit tunniussisussaataitanerat ilaatinneqanngilaq, kisianni taamaallaat aningaasatigut peqquserluutinit malunnarunnaarsaaneq pillugu inatsisini pineqartuni inuit ilaatinneqartut ilaatinneqarput.

Eqqartuussisarnermik inatsimmi § 420, imm. 1 malillugu, inatsisit atuuttut malillugit, tunniussisussaataitanermit »tigussaasut suugaluartulluunniit« ilaatinneqarput.

§ 422, imm. 6-imi oqaaseqatigiittut siullertut siunnersuutigineqartuni »nuussinerit, kontot, toqqorsiviit, boksit imaluunniit assigisaat«-nnik oqaasertaliormi, paasissutissaat suussusaasa ilaannut politiit piginnaatitaanerit killilerneqassasoq siunnersuutigineqarpoq. Aalajangersagassatut siunnersuutigineqartoq aningaaserivimmi nalinginnaasumi konto nalinginnaassoq pillugu paasissutissanut killilerneqanngimmat, tamatuma peqatigisaanik erseqqissarneqarpoq. Assersuutigalugu toqqorsivik pappiaqqanik aningaasanik nalilinnik imaqartoq, imaluunniit aningaaserivimmi boksip imai pillugit paasissutissat aalajangersagassatut siunnersuutigineqartumi aamma ilaatinneqassapput. Assersuutigalugu sullitat pillugit imaluunniit sullitat pillugit iliuutsit aalaajngersimasut pillugit paasissutissat, kontomut, toqqorsivimmu, boksimut assigisaannulluunniit pineqartumut tunngassuteqartut, matumani assersuutigalugu piginnaatitsineq pillugu pissutsit, sallinngortitaanerit pillugit pissutsit, piginnaatitaanerit pillugit pissutsit, allaffigeqatigiinnerit, inissitsiterinerit pillugit nalunaarsuutit, kontop allattorsimaffii, pilersitsineq pillugu takussutissiat aamma nuussinerit pillugu ilanngussat ataanni takussutissiat kiisalu netbank-imi il.il. sullitat sullitat pillugit iliuutsit aalaajngersimasut, matumani MitID-ip atorneqarnera aamma IP-adresse atorneqartoq pillugit paasissutissat aalajangersagassatut siunnersuutigineqartumi ilaatinneqarput. Taaguineq tamakkiisuunngilaq. Nuussinerit pillugit paasissutissat aamma aalajangersagassatut siunnersuutigineqartumi ilaatinneqarput, aamma taamaalilluni paasissutissat aaqqissuussinertut siunnersuutigineqartumi ilaatinneqarnissaat, taakku inunnut imaluunniit suliffeqarfinnut, suliffeqarfimmi tunniussisussaataitaanermik peqqussuteqarfigineqartumi kontomik assigisaannilluunniit pilersitsisimasunut tunngassuteqarnissaat, piomasqaataannngilaq. Aalajangersakkap teknologiskiusumik arlaannaannulluunnit attaveqannginnissaa naatsorsuutigineqarpoq, taamaalilluni nuussinerit, kontot, toqqorsiviit imaluunniit boksit suussusaannut massakkut ilisimaneqartunut killilerneqassanani. Piviusumik nalilersuineq malillugu assersuutigalugu kontot- aamma toqqorsiviit ilusaat, siunissami ineriartortinneqartut, nalitsinni kontot ilusaannut naligiissinneqarsinnaasut, aalajangersakkami aamma ilaatinneqarsinnaapput.

Suliffeqarfinnit allanit imaluunniit inunnit aningaasanik peqquserluutinik malunnarunnaarsaasarneq pinerliiniarnernilu aningaasalersuisarneq pinaveersimatinniarliarlugit iliuuserisassat pillugit inatsimmi (kunngip peqqussutaatigut Kalaallit Nunaannut atuutilersinneqartumi) § 1, imm. 1, nr. 1-imiit 11 ilanngullugu imaluunniit 20-imiit 24 ilanngullugu, imaluunniit aningaasanik peqquserluutinik malunnarunnaarsaasarneq pillugu Inatsisartut inatsisaanni § 1, imm. 1, nr. 1-mi aamma 2-mi ilaatinneqartunit, nuussinerit, kontot, toqqorsiviit, boksit imaluunniit assigisaat pillugit paasissutissanik tunniussisussaataaneq pillugu paasissutissanik tunniussinissamut peqqussuteqarneq, § 422, imm. 3 (siunissami im. 4-nngortusaaq) malillugu siunertaq maangaannartinneqassanngippat, ullumikkutut eqqartuussiviup sioqqutsisumik aalangiineranik piomasqaateqarfiussaaq. Suliffeqarfinnut imaluunniit inunnut inatsit

malillugu aamma aningaasanik peqquserluutunik malunnarunnaarsaasarneq pillugu Inatsisartut inatsisaani aalajangersakkani taaneqartuni ilaatinneqarnerseq apeqqutaatinnagu, nuussinerit, kontot, toqqorsiviit, boksit imaluunniit assigisaat pillugit imaluunniit tigussaasut suugaluartulluunniit pillugit paasissutissanik allaanerusunik tunniussinissamik peqqussuteqarneq, taamatuttaaq eqqartuussiviup sioqqutsisumik aalajangiineranik suli piumasaqarfiusaaq.

Siunertarineqartup taamaattoqanngippat maanngaarnartinneqarnissaa pissutigalugu, politiit § 422, imm. 3 (siunissami imm. 4-nngortussaq) malillugu, tunniussisussaataaernerik nalunaaruteqarnissamut aalajangiisimanngippata, inatsisit atuuttut malilugit, piumasaqaatit naammassineqarsimanersut eqqartuussiviup nalilissavaa.

Aaqqissuussineq siunnersuutigineqartoq atorlugu, politiit taakkuussapput tunniussisussaataaneq pillugu peqqussuteqarnermi piumasaqaatit naammassineqarsimanerannik naliliisussat, aamma pisuni § 422, imm. 3-mi (siunissami imm. 4-nngortussami) piumasaqaatit naammassineqarsimanngikkaluartut.

Taamaalillutik politiit § 422, imm. 6-itut siunnersuutigineqartumi piumasaqaatit naammassineqarsimanerat aalajangiiffigissavaat. Paasissutissat, §§ 142-imiit 145 ilanngullugu malillugit tunniussisussaataaneq pillugu aalajangiinermi pineqartunut inummut sammitinneqartut, § 420, imm. 4 malillugu inuk ilisimannittutut nassuiaateqarnissamit ilaaqquneqannginnerseq imaluunniit pisussaajunnaarsinneqarnerseq, tassunga atatillugu politiit nalilertussaassavaat. Inuk akuliunnermi pineqartoq, pineqartup paasissutissat ilisimannittut aggersagaasinnaannginnini- imaluunniit pisussaajunnaartitaanermut pissutaasut innersuussutigalugit, politiit tunniussisussaataaernerik peqqussuteqarneq pillugu aalajangiinerisa malinneqannginnissat naaggaarsinnaanngilaa.

Kisianni inuup, ilisimannittut - imaluuninit pisussaajunnaartitaanermut pissutaatinneqartunut ilaatinneqartup, taamaattoq pisuni §§ 142-imiit 146 ilanngullugu tamanna periarfissaappat, tunniussisussaataaernerik peqqunneqarsinnaanersog, aaqqissuussineq siunnersuutigineqartoq malillugu politiit piginnaatinneqarneranni ilaatinneqanngilaq. Aaqqissuussineq siunnersuutigineqartoq malillugu piginnaatitaaneq taanna suli eqqartuussivimmiisaaq.

Paasissutissat ilisimannittut aggersagaasinnaannginnermik- imaluunniit pisussaajunnaarsitaanermut pissutaasunut ilaatinneqartut pillugit tunniussisussaataaernerup piumaneqarnissaa taamaalilluni oqaluuserineqalerpat, § 142, imm. 2, § 143, imm. 2, § 144, imm. 3, aamma § 146 malillugit, § 420, imm. 4 malillugu taakkununga piumasaqaatit naammassineqarsimanersut, eqqartuussiviup suli aalajangertassavaa. Pisuni taamaattuni taamaamat ullumikkutut eqqartuussiviup sioqqutsisumik aalajangiinera politiit

pissarsiareqqaartussaassavaat, aamma aqqissuussinermi siunnersuutigineqartumi inuit aamma suliffeqarfiit ilaatinneqartut pillugit paasissutissat eqqarsaatigalugit.

Inatsisit atuuttut malillugit, siunertarineqartoq taamaangippat maangannassangippat, tunniussisussaataitanermik peqqussuteqarneq tamatigut eqqartuussiviup aalajangertussaavaa. Aqqissuussineq siunnersuutigineqartoq malillugu politiit piginnaatitaaneq pissarsiaata saniatigut, siunnersuut malillugu eqqartuussiviup nalinginnaasumik piginnaatitaanera attatiinnarneqassaaq. Akuliunneq inatsisinut naapertuunnersoq pillugu eqqartuussiviup sioqqutsillunin aalajangiinissaa pisariaqartinneqartoq politiit naliliippata, taamaaliornissamut politiit suli periarfissaqarput. Tunniussisussaataitanermut allaffigisap taakku ilisimannittut aggersagaasinnaannginnermik- imaluunniit pisussaajunnaarsitaanermut pissutaasunut ilaatinneqarneri pissutigalugit, aningaasatigut peqquserluutinik malunnarunnaarsaaneq pillugu inatsisini § 1, imm. 1-imi aalajangersakkani taagorneqartuni ilaanersoq erseqqinngippat, tamanna assersuutigalugu naleqquttuusinnaavoq. Ilisimannittut aggersagaasinnaannginnermik- imaluunniit pisussaajunnaarsitaanermut pissutaasunut ilaatinneqartunik paasissutissanik tunniussisussaataitaaneq pissappat, qulaani allaaserineqartut, taamaaliornissamut piumasagaatit naammassineqarsimaneri pillugit eqqartuussiviup aalajangiinissaa suli piumasagaataassaaq.

Taamatuttaaq § 422, imm. 3-mi oqaaseqatigiit siulliit (siunissami imm. 4-imi oqaaseqatigiit siullinngortussaq) malillugu politiit siunnertamut tunniussisussaataitaaneq pillugu aalajangiinissamut suli periarfissaqassapput, aamma inuit, suliffeqarfiit aamma paasissutissat, aqqissuussinermi siunnersuutigineqartumi ilaatinneqartut pineqartillugit. Taassuma taamaattoq killilimmik kinguneqarnissaa naatsorsuutigineqarpoq, kisianni, taamatut aqqissuussinermi siunnersuutigineqartumi siunnersuutigineqarneratut, pisuni allakkatigut aalajangiinerup suliarineqanissaata angumerineqarnissaa periarfissaatinnagu naleqquttuusinnaavoq.

§ 422, imm. 3-tut (inatsisissatut siunnersuummi § 1, nr. 31) siunnersuutigineqartoq malillugu nuussinerit malinnaavineqarsinnaanerisa assigisaannik, § 422, imm. 6-imi oqaaseqatigiit *aappaatigut* politiit nuussinermik malinnaasinnaaneq pillugu aalajangiinissaannut periarfissamik tunineqarnissaat siunnersuutigineqarpoq. Taamaalillunik, § 422, imm. 3-tut siunnersuutigineqartup assinganik, eqqartuussiviup sioqqutsisumik aalajangiinera pissarsiareqqaarnagu, politiit kontomi nuussinerit, tassunga nuussinikkut aningaasanik, § 422, imm. 6-imi oqaaseqatigiit siullertut siunnersuutigineqartut malillugit politiit tunniussisussaataitanermik aalajangiineranni ilaatinneqartumit nuussisoqarsimalluni, imaluunniit, aalajangiineri tassani ilaatinneqartumit aallaveqartumit nuussinerit pillugit, politiit paasissutissanik pissarsiniarsinnaatitaassapput. § 422, imm. 6-imi oqaaseqatigiit

aappaat malillugu aaqquissuussinertut siunnersuutigineqartup, § 422, imm. 3 malillugu aaqquissussineq siunnersuutigineqartoq assigaa, aamma suliffeqarfik inulluunniit Aningaasanik peqquserluutunik malunnarunnaarsaasarneq piniliiniarnernillu aningaasalersuisarneq pinaveersimatinniarlugit iliuuserisassat pillugit inatsimmi (kunngip peqqussutaatigut Kalaallit Nunaannut atuutilersinneqartumi) § 1, imm. 1-imi, nr. 14-imi, 15-imi aamma 17-imi, imaluunniit Aningaasanik peqquserluutunik malunnarunnaarsaasarneq piniliiniarnernillu aningaasalersuisarneq pinaveersimatinniarlugit iliuuserisassat pillugit Inatsisartut inatsisaanni § 1, imm. 1, nr. 3-miit 5 ilanngullugu taamaallini ilaatinneqarput, aamma taamaalillutik § 422, imm. 6-imi oqaaseqatigiittut siullertut aaqquissuussinertut siunnersuutigineqartup avataaniillutik.

§ 422, imm. 6-imi oqaaseqatigiit pingajuat atorlugu, § 422, imm. 4-imi oqaaseqatigiit aappaannut (atuuttumi imm. 3-mi oqaaseqatigiit aappaannut) innersuussinikkut, politiit tunniussisussaataitanermik peqqussuteqarneq pillugu aalajangiineranni sammineqartup, politiit apeqqutip eqqartuussivimmut saqqummiussinissaa piumasaaqatigisinnaagaa erseqqissumik periarfissisutigineqarpoq. Politiit pinerluttoqarsimaneraneramik paasiniaanerminni iliuusaasa inatsisinut naapertuunnerat pillugu isumaqatigiinngissutigineqarnerat pillugu apeqqutip eqqartuussivimmut saqqummiunneqarsinnaanera pillugu § 314 periarfissamik nalinginnaasumik imaqarpoq. Siunnersuut aqqutigalugu, akuliunnermut sammitinneqartup, eqqartuussiviup misiliinissaa, taamaallaat apeqqutip eqqartuussivimmut saqqummiunneqarnissaaq pillugu politiinut noqqaassuteqarneratigut, ajornannginnerusumik suliarineqarsinnaanera periarfissiisutigineqarpoq. Tamatuma kingorna piaarnerpaamik aamma kingusinnerpaamik nalunaaquttap akunneri 24-it pingasoriarlugit pitinnagit, akuliunnerup inatsisinut naapertuunnera pillugu apeqqut, politiit eqqartuussivimmut saqqummiutissavaat. Tamassuma akuliunnernut, § 422, imm. 3-mi oqaaseqatigiit aappaat (siunissami imm. 4-imi oqaaseqatigiit aappaat) malillugu, siunertarineqartoq maangaannassanngippat, politiit eqqartuussiviup sioqqutsisumik aalajangiinera pissarsiarinagu suliarisaat pillugit ullumikkut inatsisitigut inissisimaneq assigaa. § 341-imi malittarisassaaq nalinginnaasoq malillugu pasineqartup taassumalu illersuisuataq, akuliunnerup inatsisinik naapertuunnera eqqartuussimmit misilinneqarnissaa pissarsiarisinnaassavaat. Politiit aalajangiinerisa eqqartuussivimmut saqqummiunneqarnera, kinguartitsinermik kinguneqanngilaq. Inuk politiit tunniussisussaataitaneq pillugu peqqussuteqarneranik sammineqartoq, tamanna eqqartuussivimmit atornunnaarsinneqassappat atorunnaarsinneqarnissaataa tungaanut, taamaalilluni peqqussutip naammassineqarnissaanut pisussaataaassaq.

Inatsisit atuutut malillugit, inuk politiit tunniussisussaataitaneq pillugu peqqussuteqarneranik sammineqartoq, § 422, imm. 5 aamma 6 (siunissami imm. 7 aamma 8) atuuttut malillugit, eqqartuussiviup aalajangiinnginnerani oqaaseqarsinnaatitaavoq.

Apeqquut eqqartuussivimmut saaqummiunneqassappat, inuk, politiit tunniussisussaannermik peqqussuteqarnermut samminneqartoq, akuliunnerup inatsisunik naapertuunnera pillugu eqqartuussivik aalajangiitinnagu oqaaseqaateqarsinnaatitaassasoq, § 422, imm. 6-imi oqaaseqatigiit pingajuattut siunnersuutigineqartumi § 422, imm. 4-imi oqaaseqatigiit aappaannut innersuussinerup, § 422, imm. 5-imi oqaaseqatigiinnut siullernernut attuuttunut, imm. 7-imi oqaaseqatigiit sisullinngortumut innersuussineq peqatigalugu, kinguneraa. Taamaattoq politiit aalajangiisimatinnagit, inuk politiit tunniussisussaataaannermik peqqussuteqarneranni sammineqartoq, aaqqissuussineq siunnersuutigineqartoq malillugu oqaaseqaateqarnissamik piumasaqaateqarsinnaatitaanngilaq.

Eqqartuussisarnermik inatsimmi § 422, imm. 2-mi oqaaseqatigiit aappaat malillugu, inatsisit atuuttut malillugit tunniussisussaataaannermik peqqussuteqarneq pillugu aalajangiineq eqqartuussivimmit aalajangerneqartoq, tunngavilersuutunik ilaqartinneqartussaassaaq.

Politiit aaqqissuussineq siunnersuutigineqartoq malillugu aalajangeri, allakkatigit aalajangiinerussasut aamma tunngavilersuutunik imaqartinneqassasut, § 422, imm. 6-imi oqaaseqatigiit sisamaatigit siunnersuutigineqarpoq.

Tunngavilersuummut piumasaqaatit suut piumasaqaataassanersut, suliap ataasiakkaap pivusumik nalilersorneqarneranik tunngaveqassaaq. Pisuni amerlasuuni, piumasaqaat tamakkiisumik ilaannakoortumilluunniit immersugassamit tamanut atugassiamit, allaserisap oqaasertaanit tamanit atugassiaasunit assigisaannilluunniit naammassineqarsinnaassaaq, tassanilu naatsumik inatsisit tunngavigineqartut innersuussutigineqassapput aamma suliffeqarfiup aningaasalersuineramik ingerlataqartup kontot pillugit eqqartuussisarnermik inatsimmi § 420, imm. 1 malillugu tigussaasoq suugaluartorluunniit, pineqartup atorsinnaasaa, inatsimmik unioqqutitsinermi pinerluttoqarsimaneranik paasiniaaffigineqartumi uppernarsaatitut atorneqarsinnaaneranik isumaqartoqarnera pissutigalugu, paasissutissanik assigisaannillu tunniussinissaa pillugu paasitinneqassallutik. Taamatuttaaq aalaajangiinermi apeqquutip eqqartuussivimmut saqqummiunneqarsinnaaneranik periarfissaq ilitersuussutigineqartariaqarpoq.

Pisuni politiit allakkatigit aalajangiinermik suliaqarnissamik angumersinissaat periarfissaatinnagu, pissutsit assigiinngitsut pissutigalugit, eqqartuussisarnermik inatsimmi § 422, imm. 3-mi oqaaseqatigiit siulliit (siunissami imm. 4-imi oqaaseqaseqatigiit siullinngortussat) malillugit aaqqissuussinerup siunnersuutigineqartup saniatigit attatiinnarneqartussap, pisuni nukinginnartuni tunniussisussaataaneq pillugu eqqartuussiviup aalajangiinissaa utaqqeqaarnagu, politiit periarfissaq atuuttoq atorsinnaassavaat.

Aammattaaq inatsisissatut siunnersuummi oqaaseqatigiinni nalinginnaasumi imm. 2.3.2 innersuussutigineqarpoq.

Nr. 33-imut (§ 424-imi oqaaseqatigiit pingajuat)

Inuit ataasiakkaat arsaarinnissinnaatitaanerannik § 424 tunngassuteqarpoq.

Oqaaseqatigiit pingajuanni § 422, imm. 7-imut innersuussinerup § 422, imm. 9-mut innersuussinermut allannngortinneqarnissaa siunnersuutigineqarpoq.

§ 422-imi nutaamik imm. 3-mik aamma nutaamik imm. 6-imi ilanngussisoqarnissaanik siunnersuuteqarnerup siunnersuut kinguneraa, tamatumalu kingorna § 422, imm. 7 atuuttoq, § 422, imm. 9-nngussaaq (inatsisissatut siunnersuummi § 1, nr. 31 aamma 32).

Nr. 34-imut (§ 444, imm. 2)

Allakkap unnerluussutip, uppersaait pillugit nalunaarsuutip aamma suliami takussutissiat illersuisumut nassinneqarnissaat pillugit eqqartuussisarnermik inatsimmi § 444 tunngassuteqarpoq.

Imm. 2-mik nutaamik ilanngussisoqarnissaa siunnersuutigineqarpoq, tamatumalu kingorna unnerluussisussaataasut paasissutissat taakku § 458, imm. 2 (inatsisissatut siunnersuummi 1, nr. 39-kkut oqaasertaliorneqartoq) malillugu unnerluunneqartumut nalunaarutigineqannginnissaat pillugit eqqartuussivik aalajangeeqqullugu noqqaassutigilersaarpasuk, ilisimannittup najuga, atia, atorfia najugaalu pillugit pasineqartumut ingerlateqqinneqannginnissaat unnerluussisussaataasut illersuisumut peqqussutigisinnaavaat. Illersuisup peqqussut eqqartuussivimmut saqqummiussinnaavaa.

§ 458, imm. 2-tut siunnersuutigineqartoq malillugu ilisimannittup najuga, atia, atorfia najugaalu pillugit pasineqartumut ingerlateqqinneqannginnissaat pillugit eqqartuussivik aalajangeeqqullugu unnerluussisussaataasut noqqaassuteqalersaarpataq, illersuisup paasissutissanik taakkuninnga unnerluunneqartumut ingerlatitseqqinnginnissaa unnerluussisussaataasut peqqussutigisinnaavaat.

Ilisimannittup najugaa pillugu unnerluunneqartumut ilisimatitsissutigineqannginnissaa unnerluussisussaataasut noqqaassutigilersaarpasuk, ilisimannittup najugaa pillugu paasissutissat unnerluunneqartumut ingerlateqqinneqannginnissaat pillugu unnerluussisussaataasut aamma illersuisumut peqqussutigisinnaavaat. Ati, atorfik aamma najugaq pillugit unnerluunneqartumut ilisimatitsissutigineqannginnissaat unnerluussisussaataasut noqqaassutigilersaarpatigit, taamatuttaaq ati, atorfik aamma

najugaq pillugit paasissutissat unnerluunneqartumut ingerlateqqinneqannginnissaat unnerluussisussaataitaasut illersuisumut peqqussutigisinnaavaat.

Unnerluussisussaataitaasut uppersaaitit pillugit nalunaarsuummik eqqartuussivimmut tunniussinerannut attuumassuteqarpoq.

Pisuni, tassani sioqqutsisumik illersuisumik ivertitsineq pisimalluni, taannalu politiinit atortussanik tigusilluni, pineqartullu kinaassusaa najugaalu taakkunani takuneqarsinnaallutik, – ilisimannittut kinaassusaa isertuullugit eqqartuussivimmi nassuiaatinneqarnissaannut noqqaassuteqarnissamik unnerluussisussaataitaasut piviusumik periarfissaqarnissaat qulakkeerniarlugu, atortussat pineqartut illersuisumut tunniunneqarnissaat sioqqullugu, pineqartup najugaa imaluunniit atia, atorfia aamma najugaa pillugit isertuussisoqarnissaa peqqussutigisussaassavaat – aamma tassunga atatillugu § 444, imm. 2-tut siunnersuutigineqartoq malillugu illersuisoq pineqartup najugaata imaluunniit atiata, atorfiata aamma najugaata isertuunneqarnissaat pillugu peqqussuteqarfigissavaat. Tassunga periarfissaliissut eqqartuussisarnermik inatsimmi § 339 a, imm. 3-mi (inatsisissatut siunnersuummi § 1, nr. 14-imi oqaasertaliorneqartumi) nassaassaavoq.

Pinerluttoqarsimanerup nalaani paasissutissaq saqqummerpat, eqqartuussisarnermik inatsimmi imm. 2 malillugu (inatsisissatut siunnersuummi § 1, nr. 18-itut oqaasertaliorneqratoq) § 344, imm. 3, malillugu isertuussisoqarnissaa pillugu politiit illersuisoq peqqussuteqarfigisinnaassavaat.

Pinerluttoqarsimaneranik paasiniaanerup nalaanili, ilisimannittut kinaassusaa isertuullugit eqqartuussivimmi nassuiaatinneqarnissaasa noqqaassutigineqarnissaa naleqquttuussanersoq, taammaalilluni pineqartup kinaassutaa taamaattoqassappat pinerluttoqarsimaneranik paasiniaanermi piffissami killilimmi pasineqartumut isertuunneqarsinnaaniassamat, politiit eqqumaffigissagaat, taaneqartut malitsigaat.

§ 339 a, imm. 3 aamma imm. 2 malillugu § 344, imm. 3-p malitsigisaannik illersuisumut peqqussuteqarneq, taamaallaat pingaarnertut isumaqatigiinniarnep nalaani unnerluunneqartup nassuiaateqarnissaa tikillugu siviutigisinnaavoq.

Pisuni, unnerluussisussaataitaasut ilisimannittut kinaassusaa isertuullugit eqqartuussivimmi nassuiaatinneqarnissaat pillugit noqqaassuteqarnissaa pillugu aalajangiineranni, unnerluussisussaataitaasut § 44, imm. 2-tut siunnersuutigineqartoq malillugu paasissutissanut pineqartunut tunngatillugu nutaamik illersuisumut peqqussummik tunniussinissaat, taamaammat pisariaqartinneqarpoq, taammalilluni unnerluussisussaataitaasut ilisimannittut kinaassusaa isertuullugit eqqartuussivimmi nassuiaatinneqarnissaat pillugit

noqqaassuteqarnerat akuerineqarsinnaanersoq pillugu eqqartuussiviup aalajangiinissaata tungaanut, ilisimannittup kinaassusaata isertuunneqarnissaa qulakkeerneqassammat.

Eqqartuussisarnermik inatsimmi § 448, imm. 1 (inatsisissatut siunnersuummi § 1, nr. *-itut oqaasertaliorneqartoq) malillugu tamanna pingaarnertut isumaqatigiinniarneq sioqqullugu, imaluunniit pingaarnertut isumaqatigiinniarnep nalaani pisinnaassaaq.

Aammattaaq inatsisissatut siunnersuummut oqaaseqaatini nalinginnaasuni imm. 2.10.2 innersuussutigineqarpoq.

Nr. 35-mut (§ 445 a)

Uppernarsaanermi killiliisoqarnissaa pillugu eqqartuussisarnermik inatsimmi nutaamik aalajangersakkamik ilanngussisoqarnissaa siunnersuutigineqarpoq.

§ 339 a, imm. 2-mi oqaaseqatigiit siulliit, imaluunniit § 339 b, imm. 2-mi oqaaseqatigiit siulliit malillugit, inuup taassuma kinaassusaa suliame ilaanngippat, imaluunniit § 339 c (inatsisissatut siunnersuummi § 1, nr. 14-imi oqaasertaliorneqartoq) malillugu illersuisup pasineqartullu allagaatinik takunnissinnaatitaanerani ilaatinneqanngippat, inuk ilisimannittut qaaqquneqarsinnaanngitsoq, siunnersuutigineqarpoq.

Siullertut isoq, tassani inuup kinaassusaa suliame ilaanngilluinnartillugu – aamma taamaalilluni atortussani, illersuisup pasineqartullu §§ 339 a aamma 339 b malillugit aallaaviatigut allagaatinik takunnissinnaatitaaffiini takuneqarsinnaatinnagu, aalajangersagassatut siunnersuutigineqartumi ilaatinneqarpoq. Unnerluutiginnittoq imaluunniit nalunaaruteqartartoq pineqartup politiinut paasissutissanik tunniussineranut atatillugu, kinaassutsimi isertuunneqarnissaa politiinut noqqaassutigisimappagu, tamanna pissaaq. Taamaammatt politiit nalunaarusiaminni, politiit inuup kinaassusaannik ilisimanninnertik taamaallaat taassavaat. Aalajangersagassatut siunnersuutigineqartoq malillugu inuk taanna pingaarnertut isumaqatigiinniarnep nalaani ilisimannittut aggersarneqarsinnaassanngilaq. Pingaarnertut isumaqatigiinniarnep nalaani unnerluussisussaataasut inummit paasissutissiissutigineqartut uppernarsaatit atorpatingit, taamaattoq inuk pineqartoq taanna ilisimanittut aggersarneqarsinnaavoq.

Assersuutigalugu pisumi nalunaarutiginnittartup kinaassusaa pillugu paasissutissat, illersuisup allagaatinik takunnissinnaatitaanerani ilaatinneqannginnissaannik, eqqartuussiviup § 339 c malillugu naliisimane aappattut ilaatinneqarpoq. Pisumi tassani nalunaarutiginnittartuq pineqartoq pingaarnertut isumaqatigiinniarnep nalaani illersuisumit ilisimannittut aggersarneqarsinnaassanngilaq. Paasissutissat unnerlulussisussaataasunit paasissutissat atorneqassappata, inuup pineqartup

kinaassusaa, illersuisup § 339 c malillugu allagaatinik takunnissinnaatitaaneranit peerneqarsinnaanngilaq.

Aammattaaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 36-38-imut (§ 448, imm. 1)

Pingaartut isumaqatigiinniarneq sioqqullugu, unnerluussisussaataasut, illersuisup imaluunniit ilisimannittut noqqaassuteqarnerisigut, pingaarnertut isumaqatigiinniarnepur ingerlanneqarnissaa pillugu apeqqutit ilaat pillugit eqqartuussivik aalajangiisinnaasoq, matumani matut matuneqarnissaat aamma § 458, imm. 1 malillugu ilisimannittup killisiorneqarnerata nalaani unnerluussaasup ini eqqartuussiffiusoq qimassagaa ilanngullugit, eqqartuussisarnermik inatsimmi § 488-p aalajangersarpaa.

§ 458, imm. 2 (inatsisissatut siunnersuummi § 1, nr. 38-tut oqaasertaliorneqartoq) (*nr. 7 nutaaq*) malillugu ilisimannittup najugaata imaluunniit atiata, atorfiata aamma najugaata unnerluunneqartumut nalunaarutigineqannginnissaat pillugu aalajangiineq aamma ilaasussanngorlugu § 448, imm. 1-p annertusineqarnissaa, aamma § 458, imm. 4 (inatsisissatut siunnersuummi § 1, nr. 37-kkut oqaasertaliorneqartoq) (*nr. 6-ip allannngortinneqarnera*) malillugu ilisimannittup kinaassusaata isertuunneqartup taamaattup killisiorneqarnerani, unnerluunneqartup ini eqqartuussiffiusoq qimassagaa, siunnersuutigineqarpoq.

Aalajangiinerit taakku aamma pingaarnertut isumaqatigiinniarneq sioqqullugu aalajangerneqarsinnaassanerat, tamatuma kinguneraa

Aammattaaq inatsisissatut siunnersuummi nalinginnaasumik oqaaseqaatini imm. 2.10.2 innersuussutigineqarpoq.

Nr. 39-imut (§ 458, imm. 2-miit 5 ilanngullugu)

Ilisimannittup najugaa imaluunniit ilisimannittup atia, atorfia aamma najugaa qaqutigunnaq unnerluunneqartumut isertuunneqartarnissaa pillugu aalajangesakkanik ilanngussisoqarnissaa siunnersuutigineqarpoq.

Unnerluunneqartup illersorneqarneranut tamanna pingaaruteqanngitsusut isumaqarfigineqassaappat, noqqaasoqarneratigut, ilisimannittup isumannaatsuunissaanut pingarutilimmik qajassuussassat tamanna pissutissaqartippassuk, ilisimannittup najugaa

unnerluunneqartumut ilisimatitsissugineqassanngitsoq, imaluunniit ilisimannittup atia, atorfia aamma najugaa, ilisimannittup isumannaatsuunissaanut pingaasutilimmik qajassuussassat tamanna pisariaqartippassuk, unnerluunneqartumut ilisimatsissutigineqassanngitsut *imm. 2-mi* siunnersuutigineqarpoq.

Taamaalilluni isertuussinermut killiffiit marluk pineqartut, tassani ilisimannittup najugaa imaluunniit ilisimannittup atia, atorfia aamma najugaa isertuunneqarsinnaallutik, aamma ilisimannittup kinaassusaata nangillugu isertuunneqarnissaanut piumasaqaatit sakkortunerullutik.

Naliliineq piviusoq aallaavigalugu, ilisimannittup isumannaatsuunissaanut qajassuussassat tamanna pissutissaqartippassuk. Taamaalilluni ilisimannittup najugaata isertuunneqarnissaa eqqartuussiviup aalajangersinnaavaa.

Aammattaaq naliliineq piviusoq aallaavigalugu, ilisimannittup isumannaatsuunissaanut tamanna pisariaqartinneqarpat, ilisimannittup atiata aamma atorfiata isertuunneqarnissaat eqqartuussiviup aalajangersinnaavaa.

Pisuni taakkunani tamani, isertuussinerep unnerluunneqartup illersorneqarneranut pingaaruteqannginnissaa piumasaqaataavoq. Piumasaqaat taanna sulisaatsimi ilimannittup kinaassusaata nangittumik isertuunneqarnerani pingaaruteqarnerpaassaaq. Ilisimannittutut nassuiaateqarneq isiginnaarnernit, ilisimannittup nammineq najukkamini imaluunniit najukkaminit isiginnaarsimasaanut tunngassuteqarpat, ilisimannittup najugaa taamaallaat pillugu isertuussineq nalinginnaasumik unnerluunneqartup illersorneqarneranut pingaaruteqarsinnaassaaq.

Sulisaatsimi ilisimannittup kinaassusaata isertuunneqarnissaanut periarfissaq assersuutigalugu, nalaatsornikkut ilisimannittutut taaneqartartut pineqartillugit – imappaaoq inuit, unnerluunneqartup siuningaanili isimasarinngisai, aamma nalaatsornerinnakkut pinerluttuliornermik isiginnaartut imaluunniit nammineq eqqugaasut, atorneqarsinnaassaaq. Pisuni taamaattuni qagutiguinnaq pineqartup inuup kinaassusaata unnerluunneqartup illersorneqarnerani pingaaruteqarsinnaavoq.

Aammattaaq ilisimannittup kinaassusaata isertuunneqarnissaanut periarfissaq assersuutigalugu Politiets Efterretningstjeneste-anni sulisut Politiets Efterretningstjeneste-anni atorfeqarnertik pissutigalugu ilisimannittutut aggersarneqarneranni atorneqarsinnaassaaq. Assersuutigalugu Center for Terroranalyse-mi sulisut, pinerliiniarneq pillugu pinerluttulernermik suliani ilisimannittutut aggersarneqartut pineqarsinnaapput, tassani pinerliiniartartut suleqatigiiffianni suugaluartumiluunniit nalunaajaateqarnissaq pillugu killisiorneqartussaallutik. Aamma naalagaaffimmut akerliusumik nunap iliuaniit

imaluunniit nunanit allanit kilitsissiatut sulisut akornuserneqarnissaat siunertaralugu paasiniaanissamik siunertaqarluni suliffeqarfimmi- imaluunniit pinerliiniarnerit akiorneqarnissaannut immikkoortortaqarfimmi sulisut, pinerluttoqarsimaneranik paasiniaanermi ikorfartuisimasut, pinerluttoqarsimaneranik paasiniaanermi suugaluartumiluunniit ilisimannittut aggersarneqartut pineqarsinnaapput.

Ilisimannittup aamma unnerluunneqartup ilisimagunaat – imaluunniit imminnut ilisimasaat – pisut aamma eqqarsaatigineqarsinnaapput, kisianni akuusut taakku marluk akornanni atassuteqarneq qaasiornikkuinnartut aamma pingaaruteqanngitsutut pissuseqartoq, taamaalilluni ilisimannittup kinaassusaata isertuunneqarnera, unnerluunneqartup illersorneqarneranut ajortumik kinguneqarnissaanik tunngavissaqannginnera isumaqarfineqarluni.

Tamatuma saniatigut, tassani ilisimannittoq aamma unnerluunneqartoq erseqqinnerusumik imminnut ilisarisaneranni, kisianni ilisimannittoq tulliusumik atiminik allanngortitsisimallu, pisut eqqarsaatigineqarsinnaapput. Pisuni taamaattuni, unnerluunneqartup ilisimannittup taamanikkut kinaassunaa pillugu ilisimatinneqarnera unnerluunneqartup illersorneqarneranut pingaaruteqarsinnaavoq, tamatumalu peqatigisaanik unnerluunneqartup illersorneqarneranut ilisimannittup massakut atiata ilisimaneqarnissaa nalinginnaasumik pingaaruteqarnaviangilaq. Allakkut piumasaqaatit naammassineqarsimatillugit, taamaalilluni aalajangersagassatut siunnersuutigineqartoq aamma ima atorineqarsinnaavoq, taamaallaat ilisimannittup massakut atia, atorfia aamma najugaa, unnerluunneqartumut isertuunneqarlutik. Qallunaat eqqartuussisarnermik inatsisaanni aalajangersakkap assinganut tunngatillugu, qallunaat eqqartuusseriaassianni atuuttumi aamma assersuutissaqarpoq, tassani ilisimannittup kinguliaqutaa, atorfia aamma najugaa, unnerluunneqartumut isertuunneqarlutik, tassami ilisimannittup siuliaqutaa, unnerluunneqartup ilisimannittup atiatut ilisimasaa, pillugu unnerluunneqartup ilisimatinneqarnera unnerluunneqartup illersorneqarneranut naammammat.

Ilisimannittup isumannaatsuunissaanut pingaarutilimmik qajaassuussinissanut, unnerluunneqartup ilisimannittup kinaassusaa pillugu paasissutissanik pissarsineratigut, ilisimannittup pillaatitut akiniutinik imaluunniit nuanniitsunillu allanik pineqarsinnaaneranik suliameqarsissutit sakkortusisamik pissutissaqartissagaat, ilisimannittup atiatut, atorfiata aamma najugaata isertuunneqarnissaanut pissutissaqartitsineq pillugu piumasaqaatip kinguneraa. Pisuni, tassani ilisimannittoq eqqartuussisarnermik inatsimmi § 144, imm. 2 malillugu ilisimannittutut nassuiaateqarnissamit ilaaqquneqannginnermut pissutissani ilaatinneqarnerani piumasaqaat amerlanertigut naammassineqarsinnaasarpoq, kisianni aamma pisuni ilisimannittutut nassuiaateqarnissamit ilaaqquneqannginnermit patsisissaqanngitsumit naammassineqarnera pisinnaassalluni.

Aammattaq Politiets Efterretningstjeneste-ianni sulisunut, taassuma Politiets Efterretningstjeneste-mi atorfeqarnera pillugu paasissutissap inunnut naalagaaffiup isertortumik paasiniaasartuisa avataaniittunut susassaqqangitsunut, matumani pinerluttulerinermik suliami unnerluunneqartumut, tassani sulisoq qulaani allaaserineqartut ilisimannittut nassuiaateqqarluni, ingerlateqqinneqarnera ataasiakkaanut isumannaatsuunissamut aarlerinaammik annertuumik kinguneqarsinnaavoq.

Tamanna tunngavigalugu ilisimannittup kinaassusaata isertuunneqarnera ingammik ingasattumik aamma aaqqiissuussaanagerusumik pinerluttuliorneq pillugu suliani naleqquttuusinnaavoq, kisianni aalajangersagaq taakkununga killilerneqangilaq.

Ilisimannittup (tamakkiisumik ilaannakoortumilluunniit) isertuunneqarnissaa pillugu aalajangiisoqarpat, paasissutissat pineqartut unnerluunneqartumut isertuunneqassasut, taaneqartut taamaaliornerup kinguneraa. Kisianni ilisimannittut, unnerluunneqartoq pillugu eqqartuussivimmi suliami nassuiaateqartut, kinaassusaat pillugit paasissutissanik illersuisoq pissaaq.

Eqqartuussiviup imm. 2 malillugu aalajangiinera, suliami pissutsit ataatsimut naliliiffiqineqarneri tunngavigalugit aalajangerneqassasoq, *imm. 3-mi* siunnersuutigineqarpoq, matumani taamaattoqassappat ilisimannittup sioqqutsisumik unnerluunneqartumut atassuteqarnera aamma suliap ssuussusaa pillugu paasissutissat ilanngullugit.

Imm. 2-mi piunasaqaatit naammassineqarsimaneri pillugit nalilliinermi, sulisami ataasiakkaami pissutsit piviusut apeqqutaasut, siunnersuutikkut erseqqissarneqarpoq. Naliliinermi tassani, ilisimannittup unnerluunneqartumut atassuteqarsimaguni atassuteqarnera pi8ngaartinneqarsinnaavoq, matumani ilisimannittoq unnerluunneqartumut atassuteqanginnera, ungasissukkut unnerluunneqartumut atassuteqarneraq imaluunniit inuttut qanittumik unnerluunneqartumut atassuteqarnera ilanngullugit. Naliliinermi tassani iilaatigut aamma suliap suussusaa pillugu paasissutissat pingaartinneqarsinnaapput, matumani ilaatigut avatangiisit pinerluttuliorfiusut ilaatillugit suliat pineqarnersut ilanngullugit, tassani nakuuserneq aamma qunusaarineq misilittakkat tunngavigalugit qaqutigoortuunngitsumik pisarlutik.

Eqqartuussivik imm. 2, nr. 2 malillugu aalajangiisimappat, ilisimannittup killisiorneqarnerani unnerluunneqartup inimit eqqartuussiffiusumit qimagunnissaa eqqartuussiviup aammattaq aalajangersinnaagaa, *imm. 4-imi* siunnersuutigineqarpoq.

Ilisimannittup kinaassusaata (atiata, atorfiata aamma najugaata) unnerluunneqartumut isertuunneqarnissa imm. 2, nr. 2-tut siunnersuutigineqartoq malillugu eqqartuussiviup

aalajangerpagu, ilisimannittup killisiorneqarnerani unnerluunneqartup inimit eqqartuussiffiusumit qimagunnissaa eqqartuussiviup aammattaaq aalajangersinnaagaa, tamatuma kinguneraa.

Unnerluussaasup ilisimanittoq inimi eqqartuussiviusumi takuppagu, isilimannittup kinaassusaata isertuunneqarnerata navianartorsiortinneqarsinnaanera, tamanna pillugu eqqartuussiviup aalajangiinerata tunngavigissagaa naatsorsuutigineqarpoq. Taamaattoqanngippat, imm. 4 atorneqarsinnaanngilaq.

Kisianni ilisimannittut kinaassusaasa isertuunneqarnissaat pillugit malittarisassatut siunnersuutigineqartut saniatigut, unnerluunneqartup nassuiaammik isiginnaarnissamut ilaatinneqannginnissaa pillugu § 458, imm. 1-imi (allanngortinneqartussatut siunnersuutigineqanngitsumi) nalinginnaasumik malittarisassaq atuuppoq, aamma pissutsit assigiinngitsut malillugit ilisimannittumut kinaassutsimik isertuussaassumut tunngatillugu aamma atorsinnaasussaalluni.

Kialluunniit isumannaatsuunissaata qajassuunneqarnissaa pillugu matut matuneqarnissaat pillugu eqqartuussisarnermik inatsimmi § 114, imm. 2, nr. 2 malillugu, tamanut ammasumik eqqartuussinermi ilisimannittup kinaassusaata isertuunneqarnera navianartorsiortinneqassappat, ilisimannittup kinaassusaata isertuussaasup nassuiaanerata nalaani, unnerluunneqartup ini eqqartuussiffiusoq qimanneraa qimannginneraalunniit apeqqutaatinnagu, eqqartuussiviup matut matuneqarnissaat aalajangersinnaavaa.

Ilisimannittup nassuiaanerani unnerluunneqartup eqqartuussivik qimassagaa eqqartuussiviup aalajangerpagu, § 458, imm. 6 (siusinnerusukkut imm. 2) (inatsisissatut siunnersuummi § 1, nr. 40 aamma 41-kkut oqaasertaliorneqartoq) malillugu unnerluunneqartoq inimut eqqartuussiffiusumut uteqqippat, unnerluunneqartoq nassuiaatip saqqummiunneqarsimasup imaa pillugu ilisimatinneqassaaq.

Imm. 2 malillugu noqqaassutit saqqummiunneqartut pillugit sioqqutsisumik isumaqatigiinniarnep nalaani, unnerluunneqartup ini eqqartuussiffiusoq qimassaneraa, eqqartuussisut siulittaasuata aalajangissagaa, *imm. 5-imi* siunnersuutigineqarpoq.

Eqqartuussisarnermik inatsimmi § 448 (inatsisissatut siunnersuummi § 1, nr. 36-38-kkut oqaasertaliorneqartoq) malillugu ilisimannittup najugaataq imaluunniit ilisimannittup atiata, atorfiataq aamma najugaata isertuunneqarnissaa pillugu aalajangiineq aamma pingaarnertut isumaqatigiinniarnep sioqqullugu aalajangiiffigineqarsinnaasooq, maluginiarneqassaaq.

Aammattaaq inatsisissatut siunnersuummi nalinginnaasumik oqaaseqaatini imm. 2.10.2 innersuussutigineqarpoq.

Nr. 40 aamma 41-mut (§ 458, imm. 6)

§ 458, imm. 1-ip malitsigisaanik, imaluunniit § 141, imm. 5 malillugu unnerluunneqartup ilisimannittup imaluunniit unnerluussaaqataasup killisiorneqarnera isiginnaarsimangippagu, unnerluunneqartoq, taanna inimit eqqartuussiviusumut iseqqippat, unnerluunneqartup peqannginnerani kikkut nassuiaateqarsimanersut pillugit ilisimatinneqassasoq, eqqartuussisarnermik inatsimmi § 458, imm. 2-p (siunissami imm. 6-nngortussap) aalajangersarpaa. Aammattaaq unnerluunneqartoq, nassuaatigineqartumi unnerluunneqartoq pineqartillugu, nassuaatigineqartup imaanik ilisimatinneqassaaq. Nassuaatigineqartup issuarneqarnera, unnerluunneqartup nammineq nassuiaanera sioqqullugu imaluunniit kinguneratigut pinissaa, eqqartuussiviup aalajangissavaa.

§ 458, imm. 1-imi, aamma § 141, imm. 5-imi innersuussineq, § 458, imm. 1-imut aamma 4-imut, aamma § 104-imut innersuussinermut allanngortinneqassasoq, *oqaaseqatigiinni siullerni* siunnersuutigineqarpoq.

Innersuussinermi § 458, imm. 4-p ilanngunneqarnera, ilisimannittut kinaassusaat isertuullugit eqqartuussivimmi nassuiaatinneqarsinnaanerannut periarfissap ilanngunneqarnissaanut, aamma tassunga atatillugu inatsisissatut siunnersuummi § 1, nr. 39 malillugu ilisimannittup kinaassusaata isertuunneqartup nassuiaanerata nalaani, unnerluunneqartup ini eqqartuussiffiusoq qimassagaa pillugu aalajangiisinnaaneq, siunnersuutigineqartup kinguneraa.

§ 458, imm. 4 malillugu ini eqqartuussiffiusoq qimassimareerlugu, unnerluunneqartup inimit eqqartuussiffiusumut iseqqinneqarani, nassuiaammi unnerluunneqartoq pineqartillugu, nassuaatigineqartup imaanik ilisimatinneqarnissaa, siunnersuutigineqartup ilaata taassuma kinguneraa. Ilisimannittup najugaa taamaallaat unnerluunneqartumut ilisimatitsissutigineqartussaangippat, unnerluunneqartup peqannginnerani kina nassuiaateqarsimanersoq unnerluunneqartumut aamma ilisimatitsissutigineqassaaq. Oqaaseqatigiit sisamaattut siunnersuutigineqartoq pillugu ataani allaaserineqartut matumuuna innersuussutigalugit, kisianni ilisimannittup atia, atorfia aamma najugaa unnerluunneqartumut ilisimatitsissutigineqartussaangippataq, tamanna pillugu unnerluunneqartoq ilisimatinneqassangilaq.

§ 141, imm. 5-imut innersuussinerep allanngortinneqarnera – killisiuinernut pingaanginnerusunut tunngassuteqartoq, imaappoq ilisimannittut nassuiaataqat eqqartuussivimmi eqqartuussisussaangitsumi eqqartuussivimmi aallami nassuaatigineqartut, – § 104-imut innersuussinermut – eqqartuussivimmi torersuunissamut

tunnngassuteqartumut, matumani peersitsineq ilanngullugu allanngortinneqarnera, § 141, imm. 5-imut innersuussinerup atuuttup kukkusumik tunnngaveqarneranik pissuteqarpoq.

Tamanna § 104-p malitsigisaanik unnerluunneqartoq inimit eqqartuussiviusumit peersinneqartimatillugu aamma najuuteqqilersissillugu, unnerluunneqartup taassuma peqannginnerani kina nassuiaateqarsimanersoq pillgu ilisimatinneqartussaavoq, aamma nassuiaatigineqartumi unnerluunneqartoq pineqartillugu, imaanik ilisimatinneqartussaalluni. Eqqartuussisarnermik inatsimmi 1951-imeersumi kapitali 5-imi, § 39, imm. 2-mi aamma tamanna pivoq, aamma eqqartuussisarnermik inatsimmi 2008-meersumi piareersaataasumik suliani, taassuma allanngortinneqarnissaa siunertarineqartoq takuneqarsinnaanngilaq.

Eqqartuussivimmut eqqartuussisussaasumut killisiuinerit pingaanninnerusut, eqqartuussisut allattaaviannit takussutissiatigut imaluunniit nassuiaanerup nipinngorlugu immiunneqarneratigut, suliami ilaatinneqarput, aamma pasisap killisiuinermik pingaanninnerusumik isiginnaarnissaa aamma tamanna pillugu eqqartuussisut allattaaviannut allanneqarsimasut pillugit ilisimatinneqarnissaa, eqqartuussisarnermik inatsimmi § 344, imm. 1-imiit 3 ilanngullugu (inatsisissatut siunnersuummi § 1, nr. 17 aamma 18-itut oqaasertaliorneqartumi) malittarisassiuunneqarput.

Aammattaq *imm. 4-mik* nutaamik ilanngussisoqarnissaa siunnersuutigineqarpoq, tamatumalu kingorna, § 458, imm. 2, nr. 1-itut imaluunniit 2-tut siunnersuutigineqartup malillugit isertuussisoqarnissaa pillugu eqqartuussivik aalajangiisimappat, ilisimannittup najugaa imaluunniit atia, atorfia aamma najugaa taamaattoq unnerluunneqartumut nalunaarutigineqassanngillat.

Aammattaq inatsisissatut siunnersuummi nalinginnaasumik oqaaseqaatini imm. 2.10.2 innersuussutigineqarpoq.

Nr. 42-imut (§ 458, imm. 7)

Ilisimannittup atiata, atorfiata aamma najugaata qaqutiguinnaq unnerluunneqartumut isertuunneqarnissaat, aamma ilisimannittup taamaattup inatsisissatut siunnersuummi § 1, nr. 39 (§ 458, imm. 2, nr. 2, aamma imm. 4) malillugu nassuiaanerani unnerluunneqartup inimit eqqartuussiviusumit qimatsinissaanik peqquneqarsinnaanera pillugit malittarisassanik ilanngussisoqarnissaa siunnersuutigineqarpoq.

Tassunga atatillugu nutaamik § 458, *imm. 7-imik* ilanngussisoqarnissaa siunnersuutigineqarpoq, tamatumalu kingorna ilisimannittup atiata, atorfiata aamma najugaata isertuunneqarnissaat pillugit, aamma ilisimannittup nassuiaateqarnerata nalaani

unnerluunneqartup ini eqqartuussiffiusoq qimassagaa pillugu aalajangiineq, aalajangiinikkut tunngavilersorneqartussakkut aalajangerneqassaaq. Aalajangiinermi suliami pissutsit piviusut taaneqassapput, taakkulu isertuussinissamut piumasaqaatit naammassineqarnerat tapersissavaat. Aalajangiineq qaqugukkulluunniit allanngortinneqarsinnaavoq. Eqqartuussiviup aalajangiinera aalajangeqqitassanngortinneqarsinnaavoq.

Ilisimannittup atianik, atorfianik aamma najugaanik isertuussinertut ilusimik ilisimannittut kinaassusaat isertuullugit eqqartuussivimmi nassuiaatinneqarnerat, aamma ilisimannittup nassuiaanerata nalaani unnerluunneqartup inimik eqqartuussiffiusumik qimatsinissaa pillugit eqqartuussiviup aalajangiinera, taamaalilluni eqqartuussisarnermik inatsimmi § 566, imm. 3, nr. 1 malillugu pingaarnertut isumaqatigiinniarnermi imaluunniit taassuma piareersarneqarnerani aalajangiisqaarnera apeqqutaqatinnagu aalajangiineq aalajangeqqitassanngortinneqarsinnaavoq.

Aalajangiineq Nunatta Eqqartuussisuuneqarfianit aalajangerneqarsimappat, taanna taamaallaat eqqartuussisarnermik inatsimmi § 577 malillugu Suliareqqitassanngortitsisarnermik aalajangiisartut akuersissuteqarnerisigut aalajangeqqitassanngortinneqarsinnaavoq.

Tassani ilisimannittup kinaassusaata isertuunneqarnissaa, imaluunniit ilisimannittup kinaassusaata unnerluunneqartumut isertuunneqanninnissaata pineqarnera apeqqutaatinnagu, eqqartuussiviup aalajangiinera aalajangeqqitassanngortinneqarsinnaavoq.

Tamanna eqqartuussisarnermik inatsimmi §§ 571 aamma 578 malillugit eqqartuussivimmit aalajangiisumit aalajangerneqarpat, aalajangiinerup aalajangeqqitassanngortinneqarnera taamaallaat kinguartitsissutaasinnaavoq.

Ilisimannittup kinaassusaa isertuullugu eqqartuussivimmi nassuiaatinneqarnera pillugu aalajangiinerup aalajangeqqitassanngortinneqarnera kinguartitsinermik kinguneqartinneqassanngippat, ilisimannittup kinaassusaa isertuullugu eqqartuussivimmi nassuiaatinneqarnera taamaalilluni naammassineqarsinnaanngilaq. Eqqartuussisunut qaffasinnerusunut ingerlatitseqqitassanngortitsinermi aalajangiisartut aalajangiineq kingusinnerusukkut allanngortippassuk, kisianni unnerluunneqartoq ilisimannittup kinaassusaa pillugu ilisimatinneqassaaq, matumani aamma pisut akornanni suliami eqqartuussisoqarsimanera ilanngullugu.

Ilisimannittut eqqartuussivimi kinaassusaat isertuullugit nassuiaatinneqarnissaat siunertaralugu, ilisimannittut kinaassusaat isertuullugit eqqartuussivimmi nassuiaatinneqarnernissaasa akuersissutigineqanninnissaa pillugu aalajangiinerup

aalajangeqqitassanngortinneqarnera, kinguartitsissutaasinnaangilaq, taamaallaat ilisimannittup kinaassusaata siusinnerusukkut aalajangiinernut naapertuuttumik, eqqartuussisunut qaffasinnerusunut ingerlatitseqqitassanngortitsinermi aalajangiisartut aalajangiitinnagit, unnerluunneqartumut ilisimatitsissutigineqannginnissaa siunertaralugu aalajangeqqitassanngortitsisoqarsinnaavoq.

Eqqartuussisarnermik inatsimmi §§ 470 aamma 471 malillugit, unnerluussisussaataitaqasut noqqaassuteqarnerisigut eqqartuussivik immikkut ittumik aalajangiinermigut, ilisimannittup nassuiaateqarnissaa ullumut kingusinnerusumut kinguartissinnaassavaa. Eqqartuussisarnermik inatsimmi § 566, imm. 3, nr. 2 malillugu kinguartitsinissamik aalajangiineq aalajangeqqitassanngortinneqarsinnaassaaq.

Aammattaaq inatsisissatut siunnersuummi nalinginnaasumik oqaaseqaatini imm. 2.10.2 innersuussutigineqarpoq.

Nr. 43-mut (§ 474, imm. 3)

Pinerluttulerinermik suliami eqqartuussutip, eqqartuussinermi inerniliussap eqqartuussinermi atuarneqarneratigut nalunaarutigineqassasoq, § 474, imm. 3-mi oqaaseqatigiinni siullerni takuneqarsinnaavoq. Nalunaarutiginninnermi unnerluunneqartoq najuutinnagippat, oqaaseqatigiit aappaat malillugu eqqartuussutip takussutissiarineqarnera politiit unnerluunneqartumut nassiutissavaat.

§ 474, imm. 3-mi oqaaseqatigiit aappaata allanngortinneqarnissaa siunnersuutigineqarpoq, taamaalilluni politiit pisuni tamani eqqartuussutip takussutissiarineqarnera politiit unnerluunneqartumut nassiuttalissavaat.

Taanna eqqartuussutip nalunaarutigineqarnerani najuukkaluartoq, politiit aamma eqqartuussutip takussutissiarineqarnera unnerluunneqartumut nassiutissagaat, siunnersuutip kinguneraa.

Takussutissianik »nassiussinissamut« pisussaaffik, aamma takussutissiamik unnerluunneqartumut tunniussinikkut naammassineqarsinnaavoq, matumani eqqartuussiviup piffissami tassani takussutissiap tunniunneqarnissaa piareeqqappagu, eqqartuussutip nalunaarutigineqarnerata kinguninnguanut uiggiullugu.

Eqqartuussummut takussutissiap § 474, imm. 3-mi oqaaseqatigiit pingajuat aamma sisamaat malillugit unnerluunneqartumut qaqugukkut nalunaarutigineqarnissaanut siunnersuut allannguutinik kinguneqanngilaq.

Aammattaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 44-mut (§ 485 a)

Pinerluttulerinermik suliani eqqartuussutit aalajangiinerillu, kinaassutsinik ilisarnarunnaarsaqqaarlugit taamaallaat tamanut issuarneqarsinnaasut, taamaalilluni pasineqartup, unnerluunneqartup, eqqunngitsuliorfigineqartup imaluunniit ilisimannittut kinaassusaat takuneqarsinnaassanatik, siunnersuutigineqarpoq.

Inatsisissatut siunnersuummi § 1, nr. 3 (§ 101 b-tut siunnersuummut) malillugu pinerluttulerinermik suliat ullumikkumut naleqqiullugu annertunerusumik tikkineqarsinnaalernissaannut, inerteqquteqarneq pisussamut nutaamut atuuppoq. Taamaammat eqqartuussummi imaluunniit aalajangiinerimi allaserisap oqaasertaanut (imaluunniit taakku ilaannut) takkununga taamaallaat inerteqquteqarneq atuuppoq.

Unnerluussutit imaluunniit aalajangiinerit, kinaassutsit pillugit isertuussiffiusut tamanut saqqummiunneqarnerannut atatillugu, aqqissuisuneersumit allaaserisap oqaasertaani imaluunniit assigisaanni inuit ilaatinneqartut kinaassusersineqarsinnaaneri inatsisinut naapertuunnersut (imaluunniit paasissutissanik taamaattunik tunniussinerimi taakku inuit amerlasuut akornanni ilisarineqarsinnaanerat), suli ilaatigut pinerluttulerinermi inatsimmi malittarisassat nalinginnaasut malillugit tunngavilersorneqassapput, soorlu aamma eqqartuussisarnermik inatsimmi tamanna pillugu malittarisassat malillugit pasineqartup unnerluunneqartulluunniit atiisa tamanut taaneqarnissaat pillugit inerteqquteqartoqarsinnaasoq.

Inatsisit pillugit paasissutissiinermik systemit, Inunnik paasissutissanik suliarinnittarneq pillugu inatsimmi § 9-mi ilaatinneqartut, aamma tamanut oqaluttuareqqiinerit, inatsisit pillugit paasissutissiinermik systememit tunngaveqartut, inerteqquteqarnissatut siunnersuutigineqartumi ilaatinneqanngillat.

Inunnik paasissutissanik suliarinnittarneq pillugu inatsit peqqussutikkut nr. 1238-ikkut, 14. oktober 2016-imeersukkut Kalaallit Nunaannut atuutilersinneqarmat maluginiarneqassaaq.

Eqqartuussutit aalajangiinerillu, kinaassutsinik ilisarnarunnaarsitsiviunngitsut, tamanut issuarneqarnissaannut inerteqquteqarneq *imm. 1* malillugu ilaatinneqarput. Taaneqareersutut takussutissiat, inatsisissatut siunnersuummi § 1, nr. 3 (§ 101 b-mut siunnersuut) malillugu nalinginnaasumik allagaatinik takunnissinnaaffiisussatut siunnertuutigineqarnerat tassunga pissutaavoq. Pinerluttulerinermik suliani takussutissiat allat taqamaalillutik inerteqquteqarnermi ilaatinneqanngillat.

Pasineqartut, unnerluunneqartut, eqqunngitsuliorfigineqartut aamma ilisimannittut eqqarsaatigalugit, kinaassutsinik isertuussinani tamanut oqaluttuareqqiinnissamut inerteqquteqarneq, *oqaaseqatigiinni siullerni* ilaatinneqarpoq. Taamaalilluni unnerluussisoq, illersuisoq imaluunniit eqqartuussisut inatsisilerituujusut pillugit kinaassutsit isertuunneqarnissaat piumasaqaataanngilaq. § 485 a-tut siunnersuutigineqartumi aammattaaq eqqartuussisooqataasut ilaatinneqanngillat, kisianni uani eqqartuussisarnermik inatsimmi § 485 atuuppoq, taannalu pinerluttulerinermik suliamut atatillugu eqqartuussisooqataasut eqqartuussinermi peqataasut kinaassusaasa tamanut saqqummiunneqarnissaannut inerteqquteqarnermik imaqarpoq.

Kinguaassiuutitigut pinerluttuliornerit pillugit suliani eqqunngitsuliorfigineqartut pineqartillugit, § 485 a-tut siunnersuutigineqartup aamma eqqartuussisarnermik inatsimmi § 484-imi malittarisassap atuuttup akornanni ilaatigut qaleriittoqarpoq. Taamattoq § 484 atituneruvoq, tassami suliani taamaattuni eqqunngitsuliorfigineqartup kinaassusaata tamanut saqqummiunneqarneri suugaluartulluunniit tassani ilaatinneqarmata aamma eqqartuussummi aamma aalajangiinermi allaaserineqartut oqaasertaannit kinaassutsit pillugit isertuussiffiunngitsunit tamanut oqaluttuareqqiineq kisimi pineqanngilaq. Illuatungaani § 485 a-tut siunnersuutigineqartoq politiit eqqunngitsuliorfigineqartup kinaassusaanik tamanut saqqummiussineri eqqarsaatigalugit (§ 484, imm. 2 malillugu), ilanngussinnginnissaqmik imaqaanngilaq, aamma § 485 a taamaalilluni killeqaanngitsumik politiinut aammattaaq atuuppoq. §§ 484 aamma 485 a ataatsikkut unioqqutinneqarpata, aalajangersakkanik taakkununga marluusunut unioqqutitsinertut eqqartuussisoqarsinnaavoq.

Aammattaaq § 485 a-tut siunnersuutigineqartup aamma inunnik paasissutissanik suliarinnittarneq pillugu inatsisip akornanni ilaatigut qaleriittoqarpoq, tassami pinerluttulerinermik suliani eqqartuussutit aalajangiinerillugu pillugit tamanut oqaluttuareqqiineq, inatsimmi ilaatinneqartutut suliaasinnaammat. Taamattoqarpat, inuk tamanut saqqummiunneqartumik oqaluttuareqqiisoq, inunnik paasissutissanik suliarinnittarneq pillugu inatsimmi aamma eqqartuussisarnermik inatsimmi § 485 a-tut siunnersuutigineqartumi malittarisassat eqqortissavai. Pinerluttulerinermik suliani eqqartuussutit aalajangiinerillu tamanut issuarneqarneranni, assersuutigalugu internettikkut, inunnik paasissutissanik suliarinneqarneq pillugu inatsit unioqqutinniarnagu, pissutsit assigiinngitsut pissutigalugit § 485 a-tut siunnersuutigineqartoq malillugu piumasaqaatinik tamakkiisunit annertunerusumik kinaassutsinik isertuussinissaq pisariaqarsinnaavoq.

§ 485 a-tut siunnersuutigineqartoq malillugu kinaassutsit isertuunneqarnissaannut pisussaaffik inunnut aamma inatsisitigut pisinnaaatitaasunut pisussaatitaqasunullu, suliami pasisaasunut imaluunniit pasineqarsimasunut, unnerluunneqartunut imaluunniit

eqqunngutsuliorfigineqartunut atuuppoq. Iisimannittut soorunami taamaallaat tassaasinnaapput inuit.

Kinaassutsinik isertuussineq ima sunniuteqarluartigissaaq, pineqartut inuit amerlasuut akornanni ilisarineqarsinnaassanatik. Taamaalilluni eqqartuussut aalajangiinerluunniit paasissutissanik allanik, pineqartut kinaassusersineqarnissaannut ajornarunnaarsitsisunik imaqarpat, atit aamma najugaqarfiit erseqqissumik taaneqarnerannik isertuussineq naammassanngilaq. Assersuutigalugu paasissutissaq taanna illoqarfiup nunaqarfiulluunniit atianut, pineqartup najugaqarfigissanut, ataqatigiissinneqarpat, aamma taamaattoqassappat pineqartup ukiui suaassusaalu ilanngunneqarpata, piviusumik inunnut amerlasuunut pineqartup kinaassusersinissaanik periarfissiippat, inuup inuussutissarsiutaa imaluunniit sulinera pillugit paasissutissat ilanngunneqannginnissat pisariaqarsinnaavoq. Ullup inuuffigisap (ukiup inuuffiup akerlianik) taaneqannginnissaa amerlanertigut aamma pisariaqassaaq, aamma ullut inuuffiit toqqaannanngikkaluamik eqqartuussutip allallugu oqaasertaani takuneqarsinnaasarmata, tassunga atatillugu eqqumaffigineqassaaq.

Kisianni kinaassutsinik isertuussineq ima sunniuteqarluartigissanngilaq, kialluunniit pineqartoq ilisarisinnaanngivissallugu. Kinaassutsinik isertuussinissamut pisussaaffik, naak pineqartup qanigisaasa pineqartoq ilisarisinnaagaluaaraat, naammassinneqarpoq.

Suliaq siulianili tamanit ilisimaneqarpat, eqqartuussut ima aaqqissugaappat, nalinginnaasumik inuit amerlasuut akornanni, eqqartuussummi paasissutissat tunngavigalugit, pineqartup najugaanut, ukiuinut, suaassusaanut, ilinniarsimaneranut, suliffeqarneranut aamma ilaqtarissutsikkut pissutsinut atugaanut il.il. tunngatillugu, pineqartup ilisarineqarnissaa periarfissaassanani, kinaassutsip isertuunneqarnissaanut pisussaaffik naammassineqarsimassaaq.

Immikkut ittumik pisumi tassani, eqqartuussutip ima iluseqarluni tamanut saqqummiunneqarnera, allaat inuit amerlasuut (taamaassappat innuttaasut amerlanersaasa) inuk peqataasoq ataaseq imaluunniit inuit peqataasut arlallit ilisarisinnaanngorlugit, § 485 a-tut siunnersuutigineqartumit akornuserneqanngilaq. Pisumi tassani kinaassutsit isertuunneqarnissaannut piunasaqaatip taamaakkaluartoq aalajangiusimaneqartariaqarnera, piffissamut tunngassutilimmik isiginniffimmik ingammik pissuteqarpoq.

Pisut ilaani, tassani suliaq annertoorujussuarmik tusagassiuutini eqqartorneqarsimalluni imaluunniit allakkut inuit amerlasuut akornanni nalinginnaasumik ilisimaneqarluni, taamaalilluni eqqartuussutip tamanut saqqummiunneqarnerata kingunitsianngua, aamma eqqartuussut kinaassutsinik ilisarnarunnaarsitsiffiugaluartoq, Kalaallit Nunaanni innuttaasut agguarneqarneranni amerlasoorujussuit unnerluunneqartoq imaluunniit unnerluussaasut ilisarisinnaassavaat. Innuttaasut agguarneqarneranni ilaasut taakku, eqqartuussutip

oqaasertaani kinaassutsimik isertuussiffiusumi pineqartumik ingerlaannartumik ilisarinnittut, kisianni ukiut ingerlaneranni ikiliartuaassapput. Tamanna tunngaqvigalugu aamma malittarisassap erseqqissup ajornaatsullu anguneqarnissaa siunertaralugu, nalinginnaasumik kinaassutsinik isertuussisoqarnissaata piumasaqaataanissaa naleqqunnerpaatut isigineqartariaqarpoq, aamma naak tamanna pisut ilaanni, tassani massakkorpiaq kinaassutsip isertuunneqarnera annikitsuarakasimmik kinguneqaraluarteq.

§ 101 d, imm. 4 (inatsisissatut siunnersuummi § 1, nr. 3) malillugu allagaatinik takunnissinnaatitaaneq pillugu nalunaaruteqarnermut atatillugu aalajangiinerup siulianili kinaassutsinik isertuussiffiusimanera apeqqutaatinnagu, § 485 a-tut siunnersuutigineqartoq malillugu kinaassutsinik isertuussinissamut pisussaaffik atuuppoq. § 101 d, imm. 4-imi oqaaseqatiginni siullerni missiliuussisumik aalajangersagaq malillugu taamaaliortoqassappat kinaassutsinik isertuussineq, taamaalilluni § 485 a-tut siunnersuutigineqartoq malillugu kinaassutsimik isertuussinissamut pinngitsoornani naammassissutaassanngilaq, soorlu aamma § 101 d, imm. 4-imi oqaaseqatigiit pingajuat malillugu pinngitsuugassaannngitsumik kinaassutsit isertuunneqanissaat, taamaallaat kinguaassiuutitigut pinerluttuliornerit pillugit suliani eqqunngitsuliorfigineqartunut tunngassuteqartoq. Allagaatinik takunnissinnaatitaaneq pillugu nalunaaruteqarnermut atatillugu aalajangiineq kinaassutsinik isertuussiffiugaluarteq, taamaalilluni aalajangiinerup tamanut issuarneqannginnerani suli annertunerusumik kinaassutsip isertuunneqarnissaa pisariaqarsinnaavoq.

Qulaani allaaserineqartuni kinaassutsit isertuunneqarsimatinnagit, pinerluttulerinermik suliani eqqartuussutit aalajangiinerillu *tamanut issuarneqarnissaat* § 485 a-tut siunnersuutigineqartup inerteqqutigaa. Eqqartuussutip imaluunniit aalajangiinerup inunnit amerlasuunit tikinneqarsinnaanera, tamanut oqaluuttuareqqiinerup isumaraa. Naqitat atorlugit tamanut saqqummiussinerup saniatigut, matumani agguassineq imaluunniit naqitanik sumiiffinni qanittumiittuni allagarsiineq ilanngullugit, aamma inunnut amerlanerusunut siaruarterinertut allatut ilaatinneqarpoq.

Taamaalilluni eqqartuussutip imaluunniit aalajangiinerup inunnut amerlasuunut paasissutissiinermut systemip tikinneqarsinnaanera aamma tamanut oqaluttuareqqiinermit ilaavoq. Paasissutissiinermut systemimut tamat isersinnaatitaanerit, assersuutigalugu internettikkut, imaluunniit inuit amerlasuut isersinnaanerit, paasissutissiinermut systemimut kode atorlugu imaluunniit tikinneqarsinnaanerit killilersuummik allamik illersugaanera apeqqutaatinnagu, tamanna atuuppoq. Paasissutissiinermut systemimut isersinnaanerit akiliinissap piumasaqaataanera, tassunga atatillugu pingaaruteqanngilaq. Inatsisit pillugit paasissutissiinermit systemit, inunnik paasissutissanik suliarinnittarneq pillugu inatsimmi § 9-mi ilaatinneqartut, kisianni imm. 2 ataani taaneqartoq malillugu inerteqquteqarnermit ilaatinneqanngillat.

Paasissutissiineq pillugu systemimi inunnt amerlasuunut tikkinneqarsinnaatilluni, eqqartuussut imaluunniit aalajangiineq aalajangersakkap paasineqarnissaa malillugu tamanut issuarneqassaaq. Qanoq annertutigisumik kikkut aalajangiinermik piviusumik ilisimasaqalersimanerat taamaalilluni pingaaruteqanngilaq. Paasissutissiinermik systemip piviusumik atorneqarnera, paasissutissiinermik systemi inunnt amerlasuunit imaluunniit inunnt ikinnerusunit tikinneqarsinnaanersoq pillugu nalornisoqarpat, annerpaamik (uppernarsaatinut tunngatillugu) pingaaruteqarsinnaavoq. Inunnt amerlasuunut paasissutissiinermik systemip tikinneqarsinnaanera nalornissutigineqanngippat, naak kialluunniit piviusumik aalajangersagaq ilisimalersimannikkaluaraa, tamanut oqaluttuareqqiineq pivoq. Paasissutissiinermik systemip piviusumik atorneqarnera (taamaalillunilu ajoqusiinera) akiliisitsissutissap annertussusissaata aalangerniarneqarnerani isiginiarneqarsinnaammat, maluginiarneqassaaq.

Inuit pineqartut (pasineqartut, unnerluunneqartut, eqqunngitsuliorfigineqartut aamma ilisimannittut) illersorneqarnissat § 485 a-tut siunnersuutigineqartumi siunertarineqarpoq. Inuk inatsisitigut akuerisaasumik eqqartuussutip kinaassutsimik isertuussinani tamanut saqqummiunneqarnissaa pillugu imminut pilluni taamaaliorneqarnissaanut akuersissuteqarsimappat, inerteqquteqarneq taamaalilluni atuutissanngilaq, kisianni inuk imminut taammaallaat pilluni akuersissuteqarsinnaavoq. Taamaattoqassappat inuit allat eqqarsaatigalugit eqqartuussummi kinaatsutsinik isertuussineq suliarineqassaaq, aamma ilaqutariissutsit imaluunniit atassuteqaatit allat pineqartut akornanni pissutsit pissutigalugit, tassunga atatillugu taamaakkaluartoq, inuup, kinaassuseq isertuunnagu tamanut saqqummiussinissamik akuersissuteqarsimasup, kinaassusaata ilaatinneqannginnissaa pisariaqarsinnaammat eqqumaffigineqartariaqarpoq.

Akuersissuteqarnissamut ilusiliinissamut piumasaqaatinik piumasaqaateqanngilaq, kisianni illersorneqarneq sakkukilliskkumanagu akuersissuteqarneq malittarisasassaq pingarneq malillugu erseqqilluinnartariaqarpoq. Eqqartuussutip immini oqaasertaasa tamanut issuarneqarnissaanut inerteqquteqarneq tunngassuteqarpoq, aamma inuup tusagassiuutini saqqumnerata allakkut eqqartuussutip kinaassutsinik isertuussinani tamanut saqqummiunneqarnissaanut, taassuma akuersissuteqarsimaneranik paasineqarnissaa pinngitsoorani taamaattariaqanngilaq. Ingerlaavartumik tamanut issuaasoqarnera pineqarpat, assersuutigalugu paasissutissiinermik systemimi, matumani tusagassiuutit tamanut ammasumik paasissutissiinermut katersiiviini, akuersissuteqarneq qaqugukkulluunniit utertinneqarsinnaavoq, taamaalilluni tamanut issuaanerni suli ingerlasuni kinaassutsit isertuunneqarnerat pissalluni.

Inuup toqunerani kinaassutsimik isertuussinissaq pillugu pisussaaffik automatiskiusumik atorunnaarneq ajoqpoq, tassami qanigisaasunut aamma toqusup eqqaamaneqarneranut qajassuussinissat isumagineqartussaammata.

Pinerluttulerinerimi inatsimmi § 13 malillugu, pinerluttulerineq pillugu inatsisineqartitsineq malillugu akisussaaffik, tamanut issuaanermik suliaqartumiippoq, imaluunnit tassunga suleqataasumiippoq. Tusagassiuutit pineqartillugit immikkut ittumik akisussaassuseqarnermut aaqqissuussineq, tusagassiuisarnermi akisussaassuseqarneq pillugu Inatsisartut inatsisaanni aalajangersarneqartoq atuuppoq.

Oqaaseqatigiit aappaat malillugu inerteqquteqarnermik unioqqutitsinerimi akiliisitsissummik akiligassisoqarsinnaavoq, aamma *oqaaseqatigiit pingajuat* malillugu pinerluttulerineq pillugu inatsiseqartitsineq malillugu akisussaaneq inatsisitigit pisinnaatitaasunut pisussaataasunullu peqqussutigineqarsinnaavoq.

Imm. 2 malillugu inatsisit pillugit paasissutissiineramik systemit, inunnik paasissutissanik suliarinnittarneq pillugu inatsimmi § 9-mi ilaatinneqartut, aamma tamanut issuaanerit, inatsisit pillugit paasissutissiineramik systemimit taamaattumit tunngaveqartut, imm. 1-imi inerteqquteqarnermik siunnersuutigineqartumi ilaatinneqassanngillat.

Inunnut paasissutissanik suliarinneqarneq inatsisit pillugit paasissutissiineramik systemini taamaattuni, piumasaqaatinik Datatilsynimit aalajangersarneqartunit, matumani kinaassutsit isertuunneqarnissaat pillugit, eqqortitsisussaaneq, ilaatitsinnginnermut tassunga pissutaavoq. inatsisit pillugit paasissutissiineramik systemi paasissutissanik suliarinnittartumik namminersortumit ingerlanneqarpat, aammattaaq, inunnik paasissutissanik suliarinninneq aallartinneqartinnagu Datatilsynet-mit akuersissummik pissiarniartoqaaqqaassaaq.

Tamanna tunngavigalugu eqqartuussisarnermik inatsimmi nalinginnaasumik pinerluttulerinerimik suliani eqqartuussutit aalajangiinerillu, kinaassutsit pillugit isertuussiffiunngitsut, inatsisit pillugit paasissutissiineramik systemini taaneqartuni, taakkunangalu tamanut issuaanerit tunngaveqartut, ilaatinneqarnissaat pisariaqartinneqanngilaq.

Tamanut issuaanikkut, inatsisit pillugit paasissutissiineramik systeminit tunngaveqartut, siullertut pisut, tassani inuk, inatsisit pillugit paasissutissiineramik systemimit ingerlatsinerimut pissutaasoq, aamma paasissutissanik naqitanngorlugit saqqummersitsisoq, anguniarneqarpoq. Aammattaaq pisut, taakkunani inatsisit pillugit paasissutissiineramik systeminut ingerlatsinerimut pissutaasumit allannaanerusut, inatsisit pillugit paasissutissiineramik systemimit paasissutissanik tamanut issuaaneq aammattaaq anguniarneqarput.

Pisuni taakkunani marlunni pinerluttulerinermik suliani eqqartuussutit aalajangiinerillu, eqqartuussisarnermik inatsimmi inerteqquteqarnissatut siunnersuutigineqartoq atunngikkaluarlugu, inatsisit pillugit paasissutissiinermik systemimi iluseq atugartik atorlugu tamanut issuarneqarsinnaapput.

Aammattaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

Nr. 45-imut (§ 493 h, imm. 6)

Politiini sulisut pillugit pinerluttulerinermik suliani eqqunngitsuliorfigineqartumut illersuisumik ivertitsisoqarnissaaq pillugu eqqartuussisarnermik inatsimmi § 493 h aalajangersaavoq.

Illersuisoq atortussanik Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup suliami pissarsiarisimasaanik atuisinnaasoq, imm. 3-mi takuneqarsinnaavoq.

Politiit pillugit Naammagittaalliuuteqartarfimmi Arlaannaannulluunniit Attuumassuteqanngitsumi aamma eqqartuussivimmi eqqunngitsuliorfigineqartup killisiorneqarnerisa isiginnaarnissaat illersuisup pisinnaatitaaffigaa, aamma killisiuinernut eqqartuussinernullu piffissaliussat aamma eqqartuussinerit allat pillugit illersuisoq nalunaarfigineqassasoq, imm. 4-mi takuneqarsinnaavoq.

Naalagaaffinnut takornartanut, naalagaaffiup isumannaatsuunissaanut imaluunniit suliap paasinarsisinneqarnissaanut imaluunniit inummut pingajuusumut qajassuussinissap qaqutiguinnaq tamanna pisariaqartippagu, imm. 3-mi aamma 4-mi malitarrisassat avaqqunneqarsinnaasut, imaluunniit Politiit pillugit Naammagittaalliuuteqartarfik Arlaannaannulluunniit Attuumassuteqanngitsup, paasissutissat Politiit pillugit Naammagittaalliuuteqartarfimmit Arlaannaannulluunniit Attuumassuteqanngitsumit tiguneqarsimasut pillugit, allanut ingerlateqqinneqassannginnerat pillugu illersuisoq Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup peqqussuteqarfigisinnaavaa. Unnerluunneqartup pingaarnertut isumaqatigiinniarnep nalaani nassuiaateqarnissaata tungaanut peqqussuteqarneq sivitsorneqarsinnaavoq.

§ 493 h, imm. 6-ip allannngortinneqarnissaa siunnersuutigineqarpoq, imaalillugu § 339 a, imm. 3-mi malitarrisassat taamatuttaaq atuutissallutik, aamma imaalillugu § 339 c-mi malitarrisassaq malillugu § 493 h, imm. 3-mi aamma 4-imi malitarrisassat avaqqunneqarsinnaalerlutik.

Politiit pillugit Naammagittaalliuuteqartarfimmit Arlaannaannulluunniit Attuumassuteqanngitsumit paasissutissat tiguneqarsimasut pillugit ingerlatitseqqinnginnissamik illersuisup peqquneqarnissaanut periarfissap atasup, inatsisissatut siunnersuummi § 1, nr. 14 (§ 339 a, imm. 3-tut siunnersuut) malillugu pasineqartup illersuisua eqqarsaatigalugu siunnersuutigineqartutut annertusineqarnissa, siullertut tamatuma kinguneraa. Peqqussummik taamaattumik illersuisup nalunaarfigineqarnisaanik piginnaasaqarneq allangornani Politiit pillugit Naammagittaalliuuteqartarfimmi Arlaannaannulluunniit Attuumassuteqanngitsumiissaaq. Paasissutissat, eqqunngitsuliorfigineqartumut tunngassuteqartut pineqartillugit, § 339 a, imm. 3 malillugu, § 493 h malillugu peqqussuteqarneq illersuisumut naleqquttuusinnaavoq. § 493 h, imm. 5-imi pineqartup aappaa (allangortinneqartussatut siunnersuutigineqanngitsoq) malillugu Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq akuersiteqqaarnagu illersuisup taakku ingerlateqqissinnaanngikkai, suliami paasissutissanut allanut inatsit malillugu toqqaannartumik atuuppoq.

Suliami atortussanik illersuisup atuisinnaatitaanerani, eqqunngitsuliorfigineqartup killisiorneqarneranni isiginnaartuunissamut aamma eqqartuussinissat pillugit nalunaarfigineqarnissamik, avaqqutsisinnaanermut periarfissaq attuuttoq, inatsisissatut siunnersuummi § 1, nr. 14 (§ 339 c-tut aamma § 340, imm. 3-tut siunnersuutit) malillugit allagaatinik takunnissinnaatitaaneq aamma pinerluttoqarsimanerani paasiniaanermi iliuitsinik immikkut ittunik isiginnaarsinnaatitaaneq pineqartillugit, pasineqartup illersuisua eqqarsaatigalugu sinnersuutigineqartut assigisaannik annertusineqassasut, aappaattut tamatuma kinguneraa.

Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup illersuisumut atortussanik tunniussinnginnissaq kissaatigippagu, eqqunngitsuliorfigineqartup killisiorneqarnerani illersuisup isiginnaartuunissaa akornuserpagu imaluunniit eqqartuussinissat pillugu illersuisup nalunaarfigineqarnissaa pinngitsoortippagu, apeqquut taanna Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup eqqartuussivimmut saqqummiutissagaa, tamatuma kinguneraa. Immikkut ittunik illersuisunit inummik, § 339 c, imm. 6-imi taaneqartumik, aammattaaq piginnaaniliisoqassaaq, taannalu illersuisup atortussanik atuisinnaanissaa, eqqunngitsuliorfigineqartup killisiorneqarnerani isiginnaartuunissaa imaluunniit eqqartuussinerit pillugit nalunaarfigineqarnissaa pillugit isummanik tunngavilersuutaasunik saqqummiussissaaq. Inuk immikkut ittunik piginnaanilerneqartoq taanna kisianni eqqunngitsuliorfigineqartup killisiorneqarnerani najuutissanngilaq.

Aammattaaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

§ 2-mut

Nr. 1-imut

Pisortat ingerlatsinerat pillugu inatsit peqqussutikkut nr. 1188-ikkut, 27. december 1994-imeersukkut Kalaallit Nunaannut atuutilersinneqarpoq.

Pisortat ingerlatsinerat pillugu inatsimmi § 9, imm. 3 malillugu akuusut allagaatinik takunnissinnaatitaanerat pillugu pisortat ingerlatsinerat pillugu inatsimmi malittarisassat nalinginnaasut malillugit pinerluutulerinermik suliani atuutinngillat. Tassunga taarsiullugu ingerlatsinerat pillugu inatsimmi § 18 atuuppoq, tassanilu pinerluttulerinermik suliani naammassineqareersuni akuusut allagaatinik takunnissinnaatitaanerat pillugu malittarisassat aalajangersarneqarput.

Pisortat ingerlatsinerat pillugu inatsimmi § 18-imi eqqartuussisut allattaavii aamma takussutissiat eqqartuussivimmi saqqummiunneqarsimasut ilaatinneqanngillat, tassami taakkunani allagaatinik takunnissinnaatitaaneq eqqartuussisarnermik inatsisip malittarisassaanit malittarisassiuunneqarpoq. Suut pisortat ingerlatsinerat pillugu inatsimmit malittarisassiuunneqarnerisa, aamma suut eqqartuussisarnermik inatsimmit malittarisassiuunneqarnerisa akornanni killiliineq, naleqquppallaanngilaq, ingammik qaqugukkut takussutissiap »saqqummiunneqarsimanissaa« pillugu taamaattoqarnerata nalornissuteqarnermik pissutaasinnaanera pissutigalugu.

Taamaammat §§ 101 c-tut aamma 102 a-tut (inatsisissatut siunnersuummi § 1, nr. 3) siunnersuutigineqartut malillugit pinerluttulerinermik suliat pillugit allagaatinik takunnissinnaatitaaneq pillugu malittarisassat tamaasa eqqartuussisarnermik inatsimmi politiini, unnerluussisussaataasuni aamma eqqartuussivimmi katersorneqarnissaat siunnersuutigineqarpoq. Tamatuma kingunerisaanik pisortat ingerlatsinerat pillugu inatsimmi § 18-p allannortinneqarnissaa siunnersuutigineqarpoq, taamaalilluni politiini imaluunniit unnerluussisussaataasuni takussutissiat aalajangerakkami ilaatinneqarunnaassallutik. Tamatuma kingorna taamaattoqassappat takussutissianut naalagaaffimmi oqartussaasuni allani inatsisinik unioqqutitsinerit pillugit pinerluttulerineq pillugu inatsiseqartitsineq malillugu eqqartuussiniarluni imaluunniit pillagassanngortitsiniarluni suliaqarnermi, pisortat ingerlatsinerat pillugu inatsimmi § 18 taamaallaat atuutissaaq.

Aammattaq inatsisissatut siunnersuummi nalinginnaasumik oqaaseqaatini imm. 2.1.2 innersuussutigineqarpoq.

§ 3-mut

Aalajangersagaq inatsisip atuulilernissaanut tunngassuteqarpoq.

Inatsisip ulloq 1. januar 2025 atuutilernissaa siunnersuutigineqarpoq.

Ataani imm. 2-miit 4 ilanngullugu pineqartut malillugit, allagaatinik takunnissinnaatitaaneq pillugu malittarisassat pillugit allanngortitsinissamik siunnersuutigineqartut ilaat pillugit ikaarsaariarnermi malittarisassat siunnersuutigineqarput.

Inatsisissatut siunnersuutip ilaanut allanut, immikkut ittumik ikaarsaariarnermi malittarisassaqaannginnissaa siunnersuutigineqarpoq.

Pinerluttulerineq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliaassanngortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat pillugit allannguutissatut siunnersuutigineqartut aamma inatsisip atuutilernerata kingorna akuliunneq suliarineqarpat imaluunniit sivitsorneqarpat, pinerluttoqarsimaneranik paasiniaanerni ingerlasuni atuutissasut, tamatuma ilaatigut kinguneraa.

Inatsisip atuutilernerata kingorna politiit pinerluttuliortoqarsimaneranik paasiniaanermut atatillugu oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarnerat, malittarisassatut siunnersuutigineqartunut naapertuuttumik suliarineqassasut, oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq pillugu malittarisassatut siunnersuutigineqartut kinguneraat. Malittarisassat maannamut atuuttut malillugit oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq ingerlasoq, pinerluttulerineq pillugu inatsiseqartitsinermut atatillugu eqqartuunneqarnissamut imaluunniit pillagassanngortitsinissamut suliaassanngortitsinermut atatillugu politiinit, unnerluussisussaataitasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerattut isigineqanngippat, inatsisip atuutilerneranit oqarasuaatip angallattakkap ikumasup, pasineqartumit atorineqartutut isumaqarfigineqartup, sumiissusia pillugu paasissutissanik pissarsiniarnermik suliaqarneq taamaalilluni inatsimmi piumasaqaataasut naammassineqartillugit taamaallaat ingerlaqqissinnaavoq, aamma inatsisip atuutilernerani tamanna pillugu eqqartuussiviup aalajangiisimanera pissarsiarineqassaaq.

Tamanna ajornaatsumik pisinnaappat, imaappoq inatsisip atuutilinnginnerani maannamut malittarisassat atuutut malillugit paasissutissanik pineqartunik illersuisup pasineqartullu paasissutissanut pineqartutunut atuisinnaatitaangippata, illersuisup pasineqartullu allagaatinik takunnissinaatitaanneranni killilersuineq pillugu malittarisassatut siunnersuutigineqartut suliani ingerlasuni aamma atorneqarsinnaassapput.

Tamanna ajornaatsumik pisinnaappat, imaappoq inatsisip atuutilinnginnerani, maannamut malittarisassat atuutut malillugit ilisimannittup kinaassusaa pasineqartumut ilisimatitsissutigineqarsimangippat, aamma ilisimannittut kinaassusaat isertuullugit eqqartuussivimmi nassuiaatinneqarnerat pillugit malittarisassatut siunnersuutigineqartut taamatuttaaq atorneqarsinnaapput.

Eqqartuussisarnermik inatsimmi (inatsisissatut siunnersuummi § 1, nr. 3) § 101 b-tut siunnersuutigineqartoq malillugu kikkulluunniit eqqartuussutini aalajangiinernilu allagaatinik takunnissinnaatitaanerit pillugu, aamma eqqartuussisarnermik inatsimmi (inatsisissatut siunnersuummi § 1, nr. 44) § 485 a-tut siunnersuutigineqartoq malillugu eqqartuussutit aalajangiinerillu kinaassutsinik isertuussiffiginagit tamanut saqqummiunneqartarnissaannik *imm.* 2 tunngassuteqarpoq. Aalajangersakkat taakku, eqqartuussutitut aalajangiinernullu, inatsisip atuutilersinneqarnera sioqqullugu nalunaarutigineqarsimasunut, atuutissanngitsut siunnersuutigineqarpoq.

§ 101 b-tut siunnersuutigineqartoq malillugu allagaatinik takunnissinnaatitaanermit pisinnaatitaaffik, inatsisip atuutilersinneqarnera sioqqullugu eqqartuussutitut aalajangiinernernullu nalunaarutigineqarsimasunut atuutissanngitsuq, ikaarsaariarnermi malittarisassap siullertut kinguneraa.

Inatsisip atuulersinneqarnera sioqqullugu eqqartuussutini aalajangiinernilu kikkulluunniit allagaatinik takunnissinnaatitaanermit pisinnaatitaaffeqannginnerat, taamaammat atuutissaq.

Inatsisip atuutilernerata kingorna eqqartuussutini aalajangiinernilu taamaattuni allagaatinik takunnissinnaatitaanermik noqqaassuteqarnerit, eqqartuussisarnermik inatsimmi § 101 c-tut (inuit suliami immikkut soqutigisaqartut), § 101 e-tut (tusagassiuutit) aamma § 101 f (oqartussaasut, naak taamaaliortussaannikkaluarlutik, nipangiussisusaatitaaneq akornutaatinnagu, paasissutissanik tunniussisinnaaneranerit) inatsisissatut siunnersuummi § 1, nr. 3 malillugit allakkut allagaatinik takunnissinnaatitaaneq pillugu malittarisassatut siunnersuutigineqartut malillugit suliarineqartussaassapput.

Pinerluttulerinermik suliani eqqartuussutit aalajangiinerillu kinaassutsinik isertuussiffiunngitsut tamanut issuarneqarnissaannut inerteqquteqarneq, eqqartuussutitut

aalajangiinernullu inatsisip atuutilersinneqarnera sioqqullugu nalunaarutigineqarsimasunut, atuutissanngitsoq, ikaarsaariarnermi malittarisassap aappattut kinguneraa.

Pinerluttulerinermik suliani eqqartuussutit aalajangiinerillu, inatsisip atuutilersinneqarnera sioqqullugu nalunaarutigineqarsimasut, tamamut issuarneqarnerisa inatsisitigut akuerisaanerat, taammaammat aamma inatsisip atuutilersinneqarnerata kingorna inatsisiliornermi malittarisassanit allanit aalajangiiffigineqartussaassaapput, matumani eqqartuussisarnermik inatsimi §§ 484 aamma 485 (kinguaassiuutitigut pinerluttuliornerit pillugit pinerluttulerinermik suliani eqqunngitsuliorfigineqartup kinaassusaata imaluunniit pinerluttulerinermik suliani eqqartuussisooqataasut kinaassusaasa tamanut saqqummiunneqarnissaanik inerteqquteqarnek), pinerluttulerinermi inatsimmi eqqissisimanermik akornusiinerit pillugu malittarisassat aamma inunnik paasissutissanik suliarinnittarneq pillugu inatsit, peqqussutikkut nr. 1238-ikkut, 14. oktober 2016-imeersukkut Kalaallit Nunaannut atuutilersinneqarsimasoq ilanngullugit.

Imm. 3 takussutissiat ilaanni tusagassiuutit allagaatinik takunnissinnaatitaanerit pillugu immikkut ittumik malittarisassanut tunngassuteqarpoq, tassani allagaatinik takunnissinaatitaaneq takussutissianik tamanut saqqummiusinissamut il.il. inerteqquteqarnermik, pinerluttulerineq pillugu inatsiseqartitsineq malillugu iliuusereriikkanut kinguneqartitsinertaqartoq ilassutigineqarluni. Eqqartuussisarnermik inatsimmi § 101 e-tut siunnersuutigineqartumi tamanut saqqummiussinissamik il.il. inerteqquteqarnek aamma takussutissianut, inatsisip atuutilersinneqarnera sioqqullugu eqqartuussisarnermik inatsimmi § 102-mi aalajangersagaq maannamut atuuttoq malillugu tunniunneqarsimasunut, aamma tuutissasoq imm. 3-p kinguneraa.

Tusagassiuutit inatsisip atuutilersinneqarnera sioqqullugu eqqartuussisarnermik inatsimmi § 102-mi aalajangersagaq maannamut atuuttoq malillugu takussutissiamik tunineqarsimappata, tamanna inatsisip atuutilernerata kingorna (tassani eqqartuussisarnermik inatsimmi § 102, eqqartuussisarnermik inatsimmi § 101 e-mi allaanerulaartumik oqaasertaliorneqartumik taarserneqarluni), takussutissiaq tusagassiuutit tusagassiortuunit aamma aqqisuisoqarfimmi sulisunit allaanerusunit takuneqarsinnaappat, imaluunniit tusagassiornermik aamma aqqissuinermik suliaqarnermut tapersiinerit allaanerusumik atorneqarpat, imaluunniit malittarisassat, inatsiseqarnermut ministerip aalajangigai naapertorlugit toqqorneqanngippata, suli pinerluttulerineq pillugu inatsiseqartitsineq malillugu iliuusereriikkanut kinguneqartitsinermik kinguneqassaaq.

Aqutsinikkut malittarisassat, eqqartuussisarnermik inatsimmi § 102, imm. 1-imi aamma 7-imi maannamut malittarisassat malillugit atulersinneqartut, eqqartuussisarnermik inatsimmi § 101 e, imm. 2-tut aamma 6-itut (inatsisissatut siunnersuummi § 1, nr. 3)

siunnersuutigineqartut malillugit malittarisassanik atulersinneqartunik taarserneqartigatik atuutissasut, *imm. 4-p* aalajangersarpaa.

Kalaallit Nunaanni unnerluussissutit il.il. nuutinnerinik tusagassiorfiit paasitinneqarsinnaatitaanerit toqqortaqaarsinnaatitaanerallu pillugit nalunaarummi 1354-imi, 15. december 2009-imeersumi, eqqartuussisarnermik inatsimmi § 101 e, *imm. 2-tut* aamma 6-itut siunnersuutigineqartut malillugit malittarisassanik atulersinneqartunik taarserneqartigatik atuutissasut, tamatum kinguneraa.